

**НОРМУРОД НОРҚОБИЛОВ**

# **БЕКАТДАГИ ОҚ УЙЧА**

*Хикоялар ва қиссалар*

«ШАРҚ» НАШРИЁТ-МАТБАА КОНЦЕРНИ  
БОШ ТАҲРИРИЯТИ  
ТОШКЕНТ — 2000

Цунёдаги жамики тирик жон меҳрга ташна яшайди. Меҳр ан — баҳтили. Бунинг акси бўлса-чи? Аслида баҳт нима? Иклиқ-чи? Тирикликнинг тиргаги нима? Баҳт дегани нисбий ўнча деймиз. Ўнда баҳтсизликнинг шакл-шамойили Қанака-ди? Ранги-чи? Умуман олганда, баҳтсизликнинг ранги ёборми-ди. Инсон боласи ушбу икки кутб ўртасида сарсон яшаб, бири-иккинчисига интиларкан, хамиша нимадир кидиради. Ўша ўргани меҳр эмасмикан? Бу туйғу сўзда нозик оҳанг касб этса замирода атом кучи мавжудлигини хамма ҳам билармикан? Сиз таби катор саволларга ёзувчи Нормурод Норқобиловнинг ушбу ёбидан жавоб топасиз. Адид ўзининг бу тўпламида тирикликни ратувчи катор туйғуларни ўзига хос маҳорат билан очиб бетга харакат килган.

## **НОРМУРОД НОРҚОБИЛОВ**

### **БЕКАТДАГИ ОҚ УЙЧА**

*Хикоялар ва қиссалар*

«Шарқ» нашриёт-матбаа концерни  
Бош таҳририяти  
Тошкент — 2000

Мухаррир Г. Зокирова  
Рассом А. Мамажонов  
Техник мухаррир Д. Габдрахманова  
Мусахих Ж. Тоирова

Босмахонага 03.03.2000 да берилди. Босишига 05.05.2000 да руҳсат тилди. Бічими 84x108  $\frac{1}{32}$ . Антика гарнитураси. Юкори босма. Шартли осма тобоги 20.16. Нашр босма тобоги 19.7. Адади 5000 нусха. Буюртма № 386. Баҳоси шартнома асосида.

**«Шарқ» нашриёт-матбаа концерни босмахонаси,  
700083, Тошкент шаҳри, «Буюк Турон» кўчаси, 41.**

© «Шарқ» нашриёт-матбаа концерни  
Бош таҳририяти, 2000

# ҲИКОЯЛАР

## ҚУШИК

Чоюдамларнинг таъбири билан айтганда, хафтада уч-тўрт бор айнииди. Айниб-ку, бирор ёкка улоқиб кетмайди, шунингдек, бирор билан ёка ҳам бўғишмайди. Бор-йўғи «увлади». Яъни четлари нураган бала ўсупада чордана қуриб ўтириб олади-да, секин-аста тебранганча сўзсиз бир қўшикни бўғик овозда узок куйлади. Мижжалари юмук — бунака пайтда хеч нарсанни кўрмайди, эшитмайди. Кўз ёшлари ажин босган юзларини юваб, мошгуруч соколидә мэрварид доналаридай котаркан, ботаётган куёшнинг кизғиши нурида бамисоли ёкутдай товланади. Куйлаётганида, чол бу оламнинг одами бўлмай колади. Овози ўтмишнинг теран чохларидан силқиб чикаётгандек, кишида галати хис туғдиради — этни жунжикитиради, ҳам ҳаёлга толдиради. Дунё кўхна, у эса дунёдан ҳам кадим туюлади. Қўшигида гоҳ йилки уюрига тўла кенг дашт шовури, чапдаст ва ботир йигитларнинг ҳайкириги сочпопукли сулув кизларнинг шўх кулгиси акс этиб димокка тутун исига қоришик шопирилаётган қайниси сут хиди урилгандай бўлади. Кизларнинг тилла жарангидай нафис ва майин кулгиси еллардан қанот ясаб, охиста дунёни кучади. Гоҳо бу ажиб манзара бирдэ, кунпаякун бўлиб, ковжираган яйдок дашт юзага ҳақиб чикади. Кайнок гармсел юзни куидиради. Кўк-Ха, дан умр, саратондан завол топган куриган ҳас осмон бўйи уюрмала чирпирак бўлиб айланади. Уючиндер юзини супурмокка қасд этгандай, тиккайгандай дейди чол бўр комига тортмоқка уринади. Аммо Кетди, көраси буга унга бўй бермайди. Кутургағиб, пастга тушади. Уирлатади, новдаларини тортқишириш лозимлигини юлкиб, чор тарафга сочади. Қўра хафсаласи йўклиги-турмокка интилади, сабр в?

Бирдан... калламга келмади-да.  
Калланга сени... — Нортожи полвон хунук сўкин-  
катъий деди: — Унда нега ўтирибмиз?! Кетдик!  
! инг тизгинсиз разаби-ю, важоҳатини кўрган Ко-  
ўрқиб кетди.  
Балки эртага ўсармиз? — деди бир зумга тай-  
б.  
Йўк, бугун ўсамиз! — Нортожи полвон оёкка  
иди. — Усмасам, ўламан!  
Мен хам ўламан! — дея уни қувватлади Шариф  
з хеч нарсани тушунмаган эса-да, катордан қолги-  
лмай.  
— Қаёкка... ўсамиз? — деди Самандар, кўли ла-  
а, гоҳ унисига, гоҳ бунисига аланглаб.  
гар шу тобда Гелдиёр бодининг нописанд қараши-  
лғамаганда, Кодир тайсаллашда давом этиши мум-  
эди. У тинчлик тарафдори, ҳар ишни муомала би-  
битиришни яхши кўрарди. Аммо ана шу биргина  
оғли боқиши ундағи сўнгги андишани хам мавҳ этди.  
— Бас! — деди разаби қайнаб. — Ўсмаганим ўлга-  
!!  
— Ха, ўлганим! — Нортожи полвон сузадиган  
издай пишкириб, беихтиёр олға юрди.  
Изидан Кодир юрди. Шариф ўрнидан тураётуб  
мандарнинг тиззасига йиқилиб тушди. Йиқилганига  
йбдордай, Самандарни сўка-сўка, бир амаллаб оёкка  
сди-да, үларга эргашди.  
Шундай килиб, баҳорнинг ажойиб оқшомларидан  
рида, димокни қитиковчи кўклам хиди борлиқни  
тган бир паллада қишлоқ тарихида хеч учрамаган  
кеа юз берди. Ориятга тамомила бўйсунган Нортожи  
и полвон юқори супадагиларнинг барини пастга хай-  
ди. Албатта, бу иш силлиққина кечмади: бошда улар  
анг-манг бўлишди, сўнг жиддий каршиликка ўтишди.  
mmo «босқинчи»лар бақувват эди, окибатда, уч ул-  
матнинг бири пастга коптоқдай юмалади, бири сирпа-  
иб, бири эса, ўз оёғи билан йўрғалиб тушди.  
Бу борада Кодир ҳам бекор турмади. Нортожи пол-  
юннинг силтovидан сўнг қалин ва юмшоқ майсалар узра  
куйига сирпаниб тушаётган Гелдиёр бодининг кетига

боплаб бир тепишга улгурди. Иккинчисини эплаёлмади. Майсалар сирпанчик эди, Гелдиёр боди зингилла-ганча куйига эниб кетди. Тепки тушган куймичини тут-ганча лолу ҳайрон кетди. Ўша бир тепкиданоқ ичиданече йилдирки димланиб ётган алами бўшаганини се-зив, Қодир бегона овозда хайкириб юборди. Хайкириши баробар рухи жуда енгил тортиб, ўзини ўсган, жуда ўсган ҳис этди. Супа сахнида бир чарх уриб, сал нарида мамнун ва масрур бир киёфада турган Нортожи полвоннинг қошига борди. Бу ишни ювамиз, деди. Нортожи полвон бош иргаб, ана энди ичамиз, деди.

Фақат Шарифнинг ахволигина анча танг эди. Тик тепаликка шитоб билан кўтарилгани боис, нафаси тикилиб, супа лабида ҳануз ўзига келолмай турад, гар Қодир вактида тутиб колмаганида, чайқала-чайқала пастга думалаб кетиши тайин эди.

Кўз ўнгига юз берган воқеани идрок этолмай, ҳануз жойида анкайиб ўтирган Самандар Ниҳоят нимадир бўлганини пайқади. Шундоқкина қаватига сирпаниб тушган Гелдиёр бодидан ҳам кўра унинг оёғи тегиб учиб кетган лаганга, ерга тўқилган бир сиқим ошга ичи ачий-ачий, гандира克拉ганча ўрнидан турди. Тийгона-тийгона ўртоқлари томон юрди.

У шими тиззаларини кўк қилиб, бир амаллаб супага чикиб келганида, Нортожи полвон супанинг тўрида чордана куриб ўтирас, шу атрофда ўйнаб юрган болалардан бирини арокка юоришига улгурган Қодир ўртада чўзилиб ётар, Шариф эса, кўкка тикилганча ёш боладай харҳаша қилмоқка тушганди.

— Учим, анову булутнинг боврига учгим келаяпти!

У термулган булут эса, заминдаги бу ишлардан ажабсингандай, яккам-дуккам ёмғир томчилатиб, се-кин-аста кунботиш томонга силжимоқда эди.

## ШИМ ЁХУД ХОТИНЛАР ЖАНЖАЛИ

Қоқ қиём пайти. Саратон офтоби кўқдан нак олов пуркайди. Қимирлаган жон борки, бари ўзини сояга тортган. Тўлин ой кечаси қишлоқ нечоғли сокин тортган.

са, хозирда шу хил сукутга чўмган. Фарки — тунда итлар яккам-дуккам акиллаб, тириклидан нишона берса, айни кезда шу ҳам йўқ, гўё тириклик қишлоқни тарк этган.

Узғи билан бирор уч соатлардан сўнг бу ерда ҳаёт кайта жонланишига кишининг ишонгиси келмайди. Бироқ иссиқ тафти хиёл пасайиши билан кўчаларда одам ўрмалаб қолади. Бригадирнинг дўқ-пўписасига қарамай, орта пешинданоқ уйларига қамалиб олишган кетмончи қизлар узун-қиска бўлиб далага йўналишади. Болалар оқшом оталаридан калтак емаслик дардидагина ноилож ўтга ошиқишади. Бағрини захдан узмай ётган итлар дадилланиб, кўча тентийди, кўзига бегона кўринган кимсага эринмай акиллашади. Холбуки, тушда уларни тепкилаб ҳам ўрнидан силжитиб бўлмасди. Захдан бағри узилса ўлиб қоладигандек, ингиллаб соядан бери чиқишимасди. Энди эса... Бироқ бунгача ҳали эрта. Ҳозирча жамики жонзот ўзини панага тортган. Қишлоқ кун чиқишдаги асрий кумликларга бақамти жойлашгани сабаб бу ернинг офтобига бардош бермоқ душвор. Боз устига, қишлоқ ахли ўзини жуда доно санайди. Доно санагани боис, қиёмда уйларини корон-филатиб, уйқунинг пайида бўлмокни маъқул кўрадилар. Шунинг учунми, учқўтонликникига ўғри кирмас, ўғри кирса-да, бир мўйи қилт этмас, деган қочирим йўсингдаги гап ҳанузгача яшаб келади. Ҳақиқатда, бу маҳалда уларни тўп отиб ҳам ўринларидан кўзғаб бўлмайди. Аммо дунёда шундай бир зарурат борки, манаман деган танбалниям оёқлатмай кўймайди. Бу лаҳзада ҳар қандай учқўтонлик ўз ҳаловатини томорқаси адогидаги эски-туски тахтаю тунукалардан кўнқайтириб курилган жойдангина топади. О-о, бу пайтда уларни йўргалашини кўрсангиз, ҳали-ку офтоб экан, тош ёғмайдими осмондан. Заруратга ҳеч бир куч монелик қила олмайди.

Қишлоқка ярим йил бурун келин бўлиб тушган Зебохон айни шу зарурат туфайли уйғониб кетди. Қашина-қашина қаддини ростларкан, барча қулайликлари ичida бўлган шаҳар уйларини нечоғли созлигини ўйлади. Шаҳарда кечган беташвиш талабалик йилларини эслади. Оғзини аёлларга хос бўлмаган бир тарзда

кatta очиб эснаркан, деразага тутилган қалин парда тиркишидан кирмизи гилам юзига бамисоли пичоқ тифи янглиғ түшиб турган нурга ўшшайиб қараб қўйди. Назарида, нур түшиб турган ер ҳализамон тутайдигандек эди. У ўтирган жойида нурга ўнг оёғини узатаркан, худди куйдириб олишдан қўркқандай тезда тортиб олди. Кейин белига йиғилиб қолган этагини тўғрилай-тўғрилай, ўрнидан кўзголди. Айвонга ўтаркан, бурчакдаги кўзгуга кўз ташлаб олишни унутмади. Кўзгудаги аксидан кувонмади. Қовоклари шишган, соchlари тўзғиган паришон бир киёфа тумтайиб турганини кўриб, соchlарини тўғрилади, бўйнига тушган қийикчасини бошига тортди. Аммо шишинки қовокларини асл ҳолига келтиролмади. Кўзларини очиб-юмиб кўрди, муштчалари билан ишқалаб кўрди, қайдам, қовоклари олмадай бўртиб тураверди. Гўзалнинг руҳсорини уйкудан кейин кўр дегандек, у ўз кўринишидан ўзи ранжиб, ташкарига юрди. Эшик ёндорига кафтини тираб, кўзи тандирдек қизиб ётган ховли юзида, оёғига кавушни илди. Кавуши иссикдан қовжираб, торайгандек туюлди. Тепкилаб-тепкилиб кийди. Сўнг ховлини кесиб томорқа адогига ўтиш малол келгандай оstonада бир зум туриб қолди. Шунда ўнг оёғидаги кавуш сикаётганини сезди. Оёғига қараб, ранги униққан эски кавушни кўрди. Тушдан олдин бирров кириб чиқкан овсинидан жаҳли чиқди. Кайфияти ланж ва носоз эмасми, кавуш баҳона бир тергаб қўйгиси келди. «Нима бало, гарангмисиз, кирдингиз ниманидир алиштириб кетасиз дея, гап билан узиб-узиб олгиси келди. Ўтган сафар ўғлингиз чойнагимни синдириб кетувди, энди сиз кавушимни алиштириб кетибсиз, билса — ўзиники, билмаса — ўзимники, демоқчимисиз» деб, янибяниб қўйгиси келди.

У шу ўйда кўшни ҳозлига зардали бокди. Бокдигу, шишинки қовоклари орасида норози йилтиллаётган кўзлари ғазабдан мисли чўғдек ёниб кетди. Орада, кўзимга кўринмаяптимикан, деган хаёлда қовокларини чирт юмиб, бошчасини силкиб-силкиб олди. Йўқ, ўртадаги бел баравар деворда, аниқроғи, яшил рангдаги бежирим тахта панжарада ҳар бир почасига бундайроқ одам сифарли кенг ва улкан шим, олди бу

томонга қаратилган кўйи, хунук ҳолда, осиғлиқ турарди.

Зебохон шимга чимирилиб-чимирилиб тикиларкан, шимни эмас, ўзига нисбатан катта, жуда катта хурматсизликни кўргандек бўлди. Бундан муштдеккина юраги ғазабга тўлиб-тошиб борди. Кўлчалари ўз-ўзидан белига тиралиб, жангари ва жанговор ҳолатга кирди. Шу ҳолатда девор томон юрди. Бир ўйи, шимни девордан юлқиб олиб, нариги тарафга тўлғаб отмоқ истади. Тағин шайтонга хай берди. Эсиға шаҳар кўрган оқила, ўқимишли аёллиги тушиб, оғирроқ бўлмокқа тиришди. Бу сифатни унга қўшни аёллар ёпиштирган бўлиб, буни у доимо сақлашга харакат қилиб келарди. Аммо олди бу томонга қаратиб, хунук тарзда осилган шим оғир ва оқила бўлмокқа қўймас, юрагининг бир четида биқиниб ётган иззатталаблигини қўзғаб, қонини киздирмокда эди.

У қўшни ҳовлига ёмон-ёмон тикилди, уришмоққа овоз созлаб, кетма-кет томоқ қирди. Оёғидан иссиқ ўтиб, наридаги тол кўланкаси сари юрди. Жанжални кўланкадан туриб олиб бормоқни маъқул кўрди.

Бу пайтда ғаним томён — овсини Ойниса коронғи ҳужралардан бирида иккинчи уйқусини олмокда эди.

Зебохон кўланкадан туриб, овсинлаб, баланд овозда чакириди. Дастрраб ҳезланиб, қаҳрланиб чакириди. Кейин-кейин қаҳрига чексиз адоват қоришиди. Эшитсада, эшитмасликка солиб ётибди, деб ўйлади. Натижада, кейинги чакириғи чинқирик бўлиб чиқди. Чинқириқдан иссиқ хаво тебраниб, четини ўт босган ариқ ичида уялаб ётган товуқларни чўчитиб юборсаямки, қўшни ҳовлида кора кўринмади.

У, сабри чидамай, офтобга чиқди. Деворга якин борди. Тушдан бурун эмин-эркин кириб чиккан ҳовлига йўлашни бу гал хаёлига ҳам келтирмади. Бу менга душман, ичида фарази бор, деб ўйлади, кеча чойнагни синдириди, бугун эса шимини пешонамга осди билан сенам одаммисан демокчи, қўйнида тоубунинг!

Ҳовлида қовоклари шишган Ойниса пайдо бўлгда, Зебохоннинг ғазаби авж пардасига етганди. Аммо овсинининг ҳокисорона анқайиши, орада бир қалқиб

олиши авж парданинг чертилишига изн бермади. Ойниса, күёшдан кўзлари шафақландими, келаётib яна қокилди. Бу сафар анча беўхшов қокилди. Копдек кўйлагига ўралашиб, йикилиб тушай деди. Зебохоннинг кўнглида андак шафқат хисси уйғонди. Аммо овсини қаддини тиклаши билан бу хис яна изсиз йўқолди. У, чап кўли белида қолиб, ўнг кўлинин шимга бигиз қилди:

— Нима бу?

Ойниса узун енги билан елпина-елпина, гоҳ унга, гоҳ шимга алангларкан, овсинининг ғазабкор ахволидан ғоят таажжубланди.

— Шим, — деди ниҳоят тилга кириб ва сўнг секин кўшиб қўйди: — Эримники...

— Ҳалиям ўйнашингизники деётганим йўқ! — Зебохоннинг ўнг кўли белига қайтиб, қомати «Ф» шаклига кирди. — Пешонамга шим осиб, сенам одамми демокчимисиз? Ҳали биз сизга одам бўлмай қолдикми? Сизга нима ёмонлик қилдимки, одамни бу қадар беҳурмат қиласиз, а?

Ойниса баттар анкайди. Пастки лаби осилиб, аввал овсинига, сўнг шимга бокди. Буни қарангки, айни шутобда аксиргиси келиб қолса бўладими. Башараси бужмайиб, ўзича хузур қилиб бир тушкурди.

Бундан Зебонинг баттар жахли чиқди. Атай қилаяпти, башарангга чучкурдим деяпти, деб ўйлади. Аксирмай бурнинг чирисин, деб қарғанди.

Бу орада иккинчи, сўнг учинчи аксиришни қойиллатган Ойниса енги билан оғзи-бурнини сурта-сурта, хануз лаби-лабига тегмай бидирлаётган Зебога меровсираб қаради. Кулогига аллақандай ёқимсиз сўзлар чалингандай бўлди. Бу сўзлар ўша ўзи билган овсинининг дудоқларидан чиқаётганига ишонгиси келмай, кафтини пешонасига қўйди-да, унинг афтига хайрат аралаш тикилди. Йўқ, адашмабди. Овсини йўқ ердаги гапларни пайдар-пай туфламокда эди.

— Эбий! — деди овсинининг уни ўчгач, ранги гезариб. — Олашакшакдай намунча шакиллаб қолдингиз? Нима гап ўзи, тинчликми?

Бу гапдан Зебохон донг қотди. Нега деганда, у ичидаги борини тўкиб солган, энди эса, Ойнисанинг

уэр сўраб, шимини девордан олишини зўр чидам билан кутмокда эди. Ўшанда иззат-нафси қаноатланиб, томорка адоғига зипилламокчи эди. Бу ёқда оёғи тагидан иссиқ ўтиб, кўп беҳаловат бўлмокда эди. Аммо буни қарангки, овсини шунча гапдан сўнг ҳам ҳеч балони тушунмабди.

— Нима бало гарангмисиз?! — деди миясига қайта қон тепиб.

Ойниса шаҳар кўрмаган, гапни қишлоқчасига олди.

— Ўзинг гаранг.

— Нега сенлайсиз?

— Нега гаранг дейсан?

— Нега шимингни пешонамга осасан? — Зебохон ҳам «сен»ламокқа ўтди.

— Қаерга осай эмасам?

— Нима, дор кўтармайдими?

— Сифмаса нима қиласай?

— Сифмаса ҳовлингга ос, нега пешонамга осасан!

— Қани пешонангга осганим?

— Нима бу пешона бўлмай, — Зебо шимга ишора килди. — Яхшиси, уйимнинг тўрига осақол!

Ойниса гоҳ шимга, гоҳ унинг тор, бежирим пешона-сига тикиларкан, ўз килиғидан хафа бўлишга арзигулик сабаб топмади. Буни изоҳламоқ ўйида лаб жуфтларкан, бирдан юрагининг қат-қатида сингиб ётган эски бир алами юзага қалқиб чиқди. Зебохоннинг синглисини тўйида тогораси устига жўн кўйлаклик кўйилганини эслаб қолди. Хаёлидан, асли булар одам эмас, деган ўй ўтди. Бу ўй тилида қуидагича эврилди.

— Зоти паст шапшак!

— Нима?! — Зебохон таъби нозик аёллардан эди, бу ҳақорат юрагига ўқдек қадалиб, бир қалқиб тушкиди. — Ни... нима дединг?!

Овсинини боплаб каловлатганидан бир қоп семирган Ойниса курк товуқдай хурпайиб, икки-уч одим олдинга босди.

— Синглингни тўйида товоғимга паст мато кўйдириб, — деди кўкрагини дўнг килиб, — қайси юз билан, гапиряпсан менга! Уяти йўқ, шарманда!

— Ўзинг нима оборувдинг! — Зебохон жаҳлдан ҳам кўра оёғи куйганидан бир ирғишлаб олди. — Оборган

матойингни гадой эгнига илмасди! Дока обориб, зар олмокчи эдингми, кумсирка!

— Қанака дока? — энди Ойниса хам «Ф» шаклига кирди. — Нега энди дока бўларкан! Бир кийимлик тоза мато оборганман, кўр бўлгур!

Синглисининг тўйига олиб борилган матонинг тоза-нотозалигини аниклаб туришга Зебохоннинг чидами етмади. Нега деганда, унинг юрагида бошка бир алам фимиirlаб қолганди.

— Пахта гулли оштоворимни қайтар, мегажин! — деб қолди дабдурустдан.

Кўлни белга тираб жанжаллашмокка ҳамманинг бардоши етавермайди. Ойнисанинг семиз билаклари пастга шалвираб тушиб, манглайи остидан ғанимiga ҳайрон бокди.

— Қанака оштоворок?

— Эримнинг жўралари келган куни қарашган киши бўлиб, чинни товоғимга ярим қозон ошни босиб кетгансан, — деди Зебохон, оёғи куйса-да, кўланкага чекинишни ўзига ор билиб. — Эсидан чикди деб ўйлабмидинг? Товоқларингни орасида турганини кеча ўзим кўрдим. Қайтар товоғимни!

— Бекоргинани бештасини айтибсан! — Ойнисанинг овози яна бир парда кўтарилди. — Ўзимники у. Пахта плани бажарилган куни раис эримга падарка қилган.

— Эринг нимани тиндирибдики, раис падарка қилса.

— Эримга тил тегизма, таги паст! — деди Ойниса яна бир одим олға босиб. — Эрим эрингга ота ўрнидаги одам. Эрингни ўқитиб одам қилган ким? Эрим! Қайданам ўқитган экан. Ўқийман деб шаҳар кетмай, тинчгина кишлокда юрса, сен байтални топмасдиям. Юардинг қари киз бўп!

— Вой-бўй! Ерда колиб кетмасдик, — Зебохон унинг нодонлигидан ўзича кулган бўлди. — Тешик мунчоқ ерда қолмас, ерда колса, кимлар олмас. Оркамдан тилини осилтириб юрганлар сон мингта эди. Асли пешонам шўр экан-да, эмасам, келиб-келиб сенга қариндош..., э, кўшни бўлармидим.

— Қайним бечора кўз ўрнида пўстакнинг йиртиғи-

ни об юрган эканда, — деди Ойниса бўш келмай. —  
Хайронман, нимангга учган. На бетинг бор, на кетинг.  
Ўчоқ бошидаги косовдан фарқинг йўқ!

Бу борада Ойниса фирт хато кетганди. Шаҳар кўзи билан қараганда, Зебохон жуда хушбичим эди. Аммо овсини қишлоқ кўзи билан қарамокка ўрганганд, кўйлагини тўлдириб юрмаган хотин хотинми! Ўзича у овсинни боллаганди. Бирок Зебохон қоматининг гўзаллигини жуда яхши биларди. Шул боис, унинг гапларини зигирча оғир олмади. Ойнисанинг қоматини канор-қопга ва яна аллабалоларга киёслаб, асосий мақсадга ўтди.

— Падарка товоғинг тўрдаги токчангда турибди-ку, илойи ер қўчкир! — деди қўлига тегиши даргумон бўлган косасига ичи туздай ачишиб. — Идишларинг орасидаги меники. Лабидан танидим, чети учган. Ўзи обчиқар десам, эсинггаям келмайди. Обчиқ косамни! Йўғасам, токчангдагини оламан!

Зебохон девор томонга интилган бўлди. Ойниса эса теваракка аланглаб, чамаси, калтак қидирди.

— Эя, ҳали урмокчимисан, бетингни мурдашув ювгар! — Зебохон баттар шанғиллади. — Чертиб кўрчи, бошингга не кўйларни соларканман!

— Мурдашув сени ювсин! — Ойниса қопдек енги ичидан кўл юбориб, киртиллатиб қашинди. Бошқа пайт бўлганида, бургаларнинг гўрига фишт қалаб, яrim соат эзилган бўларди. Аммо хозир қаршисида бургдан баттар ғаними турганлиги боис, бадани жизиллаб ачишаётган эса-да, бу нарса эсига келмади. Ҳурпайиб, оёкка маҳкамроқ тураркан, деди: — Қани, ўтиб кўрчи, соchlaringни битталаб юлмасамми!

— Ўл-а! — Зебохон таассуф-ла бош чайкади. — Битта товоқ учун шунчами! Ўл-а, курумсок!

— Ўзинг курумсок!

— Таги паст!

— Таги пастлик сендан бери келмасин, — оёклари куйди шекилли, Ойниса турган жойида ғалати тебранди. — Сен оксувликлар таги-томирларинг билан пастсилар!

— Учқўтонликлар ҳам гўр эмас! — деди Зебохон. — Биттаси сен бўлсанг, тупурдим хаммангга! Зоти паст маҳлуклар!

— Эринг бўлмиш қайнимгаям тупуряпсанми? —  
Ойниса аччик кулди. — Оқшом келиб, тупуриш қанақа  
бўлишини кўрсатиб кўймасин тағин!

Зебохон индамади.

— Бизни-ку тагимиз паст экан, — уни мот қилдим  
деб ўйлади чамаси, Ойниса тағин бобиллашга туш-  
ди. — Нега унда келин бўп тушдинг? Қайним бечоран-  
нинг бошини айлантириб тегиб олганинг етмагандек,  
бурин жийиришинг нимаси! Яхшиямки, баҳтингга қай-  
ним бор экан, эмасам, сен қари қизни кимам оларди.  
Қиз дегани ўн саккиз ёшида жойини топиб кетади.  
Сенга ўхшаб йигирма бешни коралаб эр қилмайди.  
Тағин бу кишим ўқиган эмиш! Ҳи-и, ўқимай ҳар нарса  
бўлгир, жодугар!

— Қарғама мегажин!

— Арвоҳ ургир истиляга! — Ойниса уни оғиз  
очиргани кўймай, тағин бобиллашда давом этди. —  
Тұғмас! Кисир эчки! Эр қилганингта ярим йилдан ошиб-  
дики, халигача қоматинг бузилмаган. Нима бало ша-  
харда юрганингда бирор нима кип кўйганмисан?!

Ойниса ўзича мўлжални бехато олганди. Агар бир  
неча хафта бурун бу гап айтилганда, Зебохон деганла-  
ри бу зарбанинг залваридан икки букилиб қолган ва  
ғалаба тўлалигича Ойнисада кетган бўларди. Аммо  
Зебохон овсинини роят таажжубда қолдириб, лоақал  
қилт этмади. Хипча қоматини хиёл олдинга чиқариб,  
мамнун ва масур бир киёфада қорнини сийпалаб  
кўяркан:

— Ҳар нарсанинг ўз вақти-соати бор, хомсемиз! —  
деди ўзига ишонган викорли бир охангда. Сўнг барি-  
бир аёллигига боради-да, бирдан жазавага тушиб, ов-  
синини батамом тупрокка кориштириб ташлади. Бу  
борада луғат бойлигининг қоғозга тушуриб бўлмас  
оғзаки услубидан унумли фойдаланиб, шундай бир  
шиддатли «нутқ» ижод қилдики, Ойнисага ўхшаш ха-  
шаки хотинлар бу қадар ранг-баранг қарғишу ҳақорат-  
ни умрида эшитмаганди. Эшитмагани боис, кўли ёқаси-  
да,вой ўлай-вой ўлай дея, лолу ҳайрон бўлишдан  
нарига ўтмади. Ҳатто бир неча одим ортга чекинганини  
ҳам билмай қолди. Гап халтаси бўшаб қолдими, ё  
овсинининг оғир-оғир нафас олишини кўриб, раҳми

келдими, Зебохон шиддатли «нутқ»ини ўта жўн тарзда тугаллади: — Бокувдаги хўқиздай пишилламай ўл, сен тулуп! Эринг топганини еб ётгунча далага чик, зора озсанг!

Ойниса жавобга ошикмади. Ҳозиргина эшитганларини идрок этмоқка қийналиб, бир муддат анқайиб туаркан, ниҳоят, лаб ялаб, сўз котмокка журъат этди. Оғиз очишдан олдин аёлларга хос синчковлик билан овсинининг қоматига бир сидра кўз югуртириб чиқди.

— Ишлаб... ишлаб нимани тиндиряпсан ўзинг! — деди сўнг шубҳа тўла нигохини Зебонинг бел қисмидан узмай. — Қилпиллаб бачаларни алдаб юрибсан да. Малим бўлмай ўл, сен тол хивич!

Шахар кўрган оқилалиги дабдурустдан эсига тушиб, Зебохон хиёл сипо тортди. Овсинини ўзига тенгситмай муомала килмоқ истади. Аммо керакли сўзни тополмай, бир озгина хаяллади.

Бу орада тўла ўзига келиб олган Ойниса, ана шу сукутдан фойдаланиб, отини камчилади.

— Пастсан-да! — деди ўша эски суръатда овозини баландлатиб. — Паст бўлмасанг, ҳовлини иккига бўлди-рармидинг. Сен келдингу ўртага девор тушди. Рахматли қайнона-кайнотамнинг арвохлари тинч кўймайди сени! Тенггинангни беради хали!

— Товукларингни тийгин эди! — Зебохон оқилалигини паккос унутди. — Товукларингни дастидан ҳовли ўзига оёқ босиб бўлмай колди-ку! Хи-и, товуфинг билан кўшмозор бўлгур!

— Этини еган, тезагигаям чидайди-да, карғиш олгур!

— Қачон ебман?

— Товук осдим дегунча, бир бурдини сенга илинаман-ку, тешиб чиккур!

— Косанг қурук қайтмаган-ку, овозинг гўрдан чиккур! Коса-коса чучвараю, мантиларимни, ошу қовурдокларимни лўкқа-лўкқа ютган сен эмасми?

— Есам, кайним топганини еганман! — Ойниса бўш келмасликка тиришаркан, бирдан кайнисига хув бир замонлар беш-олти чеълак лой ташиб бергани эсига тушиб қолди: — Келдингу уйга эга чиқиб олдинг,

деди мулк эгасига хос замзамали оҳангда. — Ҳовлини иккига бўлдиридинг. Билсанг, сен ўтирган уй ҳам менга тегишли. Мана бу қўлларим билан ўзим қурганман. Тайёрига келиб, кариллаганинг нимаси энди. Ҳув-в, уйдан ўлигинг чиксин сени!

— Каргишинг ўзингга урсин! — Зебохон оёғи куйиб безовта типирчиларкан, кавуши сиқаётганини дафъатан пайқаб, хушёр тортди. Кейин ўнг оёғидаги кавушини ечиб қўлига олди. Аммо ер дегани темирдай қизиб ётарди. У оёғи куйиб, қўланкага қочди. Ўша ердан туриб овсинига юзланди: — Кавушимни бер, мегажин! — дея қичқирди. — Кеча чойнагимни синдиридинг, бугун кавушимни кийиб кетибсан! Ма, ол ислиқингни!

Зарб билан улоқтирилган кавуш ҳавода чарх уриб, Ойнисанинг манглайига бориб тегди. Буни сира кутмаган Ойниса бир чинқирди-да, ерда ётган кавушни қўлига олиб, унга қайтиб улоқтириди. Аммо мўлжални аниқ ололмади шекилли, кавуш деганлари, «менда не айб», дегандай ҳовлининг «поп» этиб тушди.

Бу ўртада иккинчи кавушиниям ечишга улгурган Зебохон, биринчи ғалабасидан рухланиб, унисиниям улоқтириди. Буни қарангки, Зебохон деганлари тузуккина мерган чиқиб қолди. Иккинчи кавуш овсинининг баланд кўксига бориб тегди.

Ойниса бу зарбадан бир қалқиб тушаркан, фазаби тошганидан тошиб, овсйинидан ибрат олди. Бироқ улоқтирган кавуши деворнинг нариги томонида қолиб кетди. У бундан баттар кутуриб, оёғидаги ҳар иккала кавушини ҳам қўлига оливолди-да, бирин-кетин улоқтиришга тушди. Шўрлик барибир тегизолмади. Тегизолмагани алам килиб, тахта девор ўртасидаги мўъжазгина эшикка келиб ёпишди. Эшикнинг овсини томонга очилишини унутиб, ўзи тарафга силтаб торта бошлади. Эшик хийла мўрт экан, ошиқ-мошиғи билан кўчиб, шўрлик аёлни босиб тушди.

Зебохон овсинининг важохатидан қўркиб қочди деб ўйларсиз? Қайдам, енг ҳимариб, «қальъа»нинг ишғол этилган жойига ошиқди. Яланг оёқлари жизиллаб куйганигаям эътибор бермади. Бироқ, шунга қарамай, у кутилмаганда мард ғаним чиқиб қолди. Афдарилган

қопдай бўлиб, эшик тагида типирчилаб ётган овсини-  
нинг ўзини тутиб олишига имкон берди.

Ана Ойниса бир амаллаб оёққа қалқиди. Кутурган  
хўқиздай олға ташланди.

Талабалик йилларида Зебоҳон жисмоний тарбия  
дарсида баъзи бир усулларни ўргангандай бўлувди.  
Гавдасини зўрға эпловчи овсинини ўша усулларнинг  
бири билан осонгина мавҳ этмок ниятида эди. Аммо  
иш бутунлай тескари кетди. Зебоҳон усул кўллагунча  
бўлмай, Ойниса аёл зоти яралгандан бери мавжуд  
бўлиб, асрлар оша хеч бир ўзгаришсиз сакланиб кели-  
наётган бирдан-бир усуlnи ишга солди, яъни ракиби-  
нинг соchlарига ёпишиди.

Натижада, ховли кий-чувга тўлди. Мудроқ саратон  
хавоси аввалига бир силкиниб олди. Сўнг кий-чувга  
коришиб, қишлоқ бўйлаб тебрана бошлади. Силки-  
нишдан уйғониб кетган қишлоқ ахли, тебранишга чи-  
даёлмади. Уйларидан югуриб чикиб, қишлоқда бафоят  
оқибатли саналган aka-укалар ховлиси томон ҳайрат  
ва ҳайронлик ила ошиқишиди.

- Нимаси бу?
- Нималар бўляяпти?
- Алишер хотинини ураётганга ўхшайди.
- Йўқ, бўлиши мумкин эмас.
- Унда не тўполон бу?
- Йўқ, Фанишерга ўхшайди.
- Фанишер тилла, Алишерга ўхшайди.
- Алишер кеча қулок бошига кетган. Уч кунсиз  
қайтмайди. Тўполонни Фанишер қилаяпти.
- Бечора Зебо малимнинг шўри қурияпти дегин.
- Овозидан шунга ўхшайди. Чинқиллаб чикишини  
қара.
- Тезроқ борайлик, тагин ўлдириб-пўлдириб қўйма-  
син.
- Фанишерни қўй оғзидан чўп олмаган йигит деб  
юрсам, тавба...
- Одам оласи ичида, биродар. Нима, абедда ухла-  
мадиларми, қадам олишлари бунча суст.

Бу пайтда овсинлар бир-бирларини ерга босиб, ба-  
мисоли коптоқдай, ховли бўйлаб думалаб юришарди.  
Урушнинг дастлабки дақиқасида, эшикдан сўнг, тахта

деворнинг тенг ярми ағдарилиб тушган бўлиб, қолган қисмida улкан шим осиғлик турарди. Туйкусдан уйғонган кучсиз эпкинданми, у ўқтин-ўқтин силкиниб қўяр—гўё овсинлар жанжалига пишанг бераётгандек эди.

## ҚУВОНЧЛИ КУН

Шоирни калтаклашдилар. Илк тўплам чиққанидан ўзида йўқ қувониб, мақтангани туғилиб ўсган қишлоғига йўл тортганда, йўлда калтаклашдилар уни. Одамларни севарди у, ҳатто китобининг номи хам шу маънода: «Мухаббатим сизга одамлар!». Хуллас, эллик олтмишга яқин китобчасини қора сумкасига жойлаб йўлга чиққанди у. Туман марказигача поездда осон етиб келди-ю, аммо бу ерда узок туриб қолди. Тоғ оралиғидаги дўппидек мўъжазгина қишлоғига олиб борадиган йўл, шу ердан бошланарди. У томонга катнайдиган биргина автобусдан ҳануз дарак йўқ, томини шамол учирив кетган бекатда одам гавжум. Ҳар ким ўз холича ўтирибди: бирор ерга чордона курган, бирор халтасини тагига қўйган, бирор ёғоч ўриндиққа илашган, илашмаганлар тик оёқда туришар, ҳатто бир чол шундокқина йўлнинг ёқасига ёнбошлаб олганди. Ёнбошлаган кўйи таниш-нотанишга гап қотиб, одамларни гурунгга тортмоққа уринарди. Кутиб толиккан кишилар сұхбатга мойиллик билдиравермагач, чолнинг чақаги тиниб, аста пинакқа кетди. Ҳар машина гуриллаб ўтганда, танбал мушукдек кўзларини эринибгина очар ва сўнг шу созда яна секин юміб оларди. Бошқаларнинг хам ахволи уникидан пеш эмасди. Кутишдан одамлар толикканди. Манглайини маржон-маржон тер босган семиз бир амаки эса бошини бекат устунига тираганча ўтирган жойида баҳузур уйқуни уради.

Факат шоиргина бу умумий кайфиятдан йироқ эди. Чексиз қувончга тўлиб, ҳапқириб турган юраги кутиш азоби орқасидан юзага келадиган дилгирликни хали ўзига яқин йўлатиб улгурмаганди. Шаҳар кўрган эмасми, бундай пайтда вактни қандай ўтказишни биларди. Йўлда харид килган газетасини кўздан кечириб бўлганидан сўнг, бекат қаршисидаги тамаддихонага кириб,

озгина отиб, иккитагина кабобни тишига босиб чикканди.

Автобусдан дарак бўлавермагач, у енгил одимлар ила яна тамаддихонага йўргалади. Бу сафар сал узокроқ колиб кетди. Бекатга қайтгач, тўпланганлар орасидан бирор таниш тополмай, юраги андак сикилди. Арокнинг таъсириданми, шу топда ким биландир дилдан сухбатлашгиси, иложи бўлса, китобчаси билан мақтангиси келарди. Тўнглаб колган одамларни кўз кирида кузатаркан, четроқда, қоқ ерга чордана қурган бақалоқ амакини маъкул топди. Бақалоқнинг каеридир тоғасига ўхшаб кетарди.

— Бу... автобус анчадан бери йўқми дейман, — деди сухбатга шерик топиш умидида.

Бақалоқ барча тоғликлар каби содда, дўлворгина экан, яғири чиқиб кетган шляпасини энсасига суриб, сухбатга бажонидил кўшилди.

— Пешиндан бери йўқ. Пастга автобуснинг ўнтаси кетдиямки, биздики кўринмайди. Ишқилиб, болон-молони тешилиб-пешилиб қолмаган бўса бўпти-да, кеп колар кечгача.

Ҳақиқатдан пастга қатнағдиган автобуслар келиб-кетиб турар, токқа кунига атиги уч бор қатнайдиган автобусдан эса ҳануз дарак йўқ эди. Шу пайт ора-сира гурунглашиб ўтирган аёллар тўpidан ҳайдовчи шаънига ёмон сўз чиқиб кетди. Худди шуни кутиб тургандай эркаклар гурухи дарров жунбишга келди. «Ҳи-и, энасини...» — деди кимдир гапнинг охирини ичига ютиб. Бошқалар дарҳол уни илиб кетишди:

— Бу Мутал сарик ҳеч қачон одам бўлмаган ва бўлмайдиям!

— Одамни маҳтал қилмай жўнайдиган куни борми-кан бу лаънатини!

— Вактида жўнагандан хозир уйда маза кип ўтирган бўлардик.

— Энағар, ишқилиб, ўлиб-нетиб қолмадимикан, а?

— Ўлмайди у. Мутал сарик деб кўйибдилар уни.

— Агар овқатга кетган бўлса, уч-тўрт соатсиз чикмайди у ердан. Укағарди нимаси кўп, ошнаси кўп, ўтиргандир хотинлардай писирлашиб.

Кейинги одам тўғри башорат қилган эди. Тоғ йўли-

га қатнайдиган Мутал сариқ сой бўйидаги сомсаҳона-да гапнинг чангини чиқариб ўтиради.

Шоир дурустгина ҳамсұхбат топган эса-да, кутиш охири жонига тегиб, бетоқатлана бошлади. Боз устига, у шоир, шоир қалби эса жўшқин ва бесабр бўлади. Тамаддихонага учинчи бор бош суқиб, бу сафар пиво билан қаноатланиб чиққанидан кейин, беихтиёр ғазаби жўш уриб кетди.

— Нимаси бу, а? — деди келаётиб йўлнинг ўртасида тўхтаркан, кошларини чимирганча, гоҳ у томонга, гоҳ бу томонга жиддий бокиб. — Қани автобус? Шунчалик ҳам маъсулиятсиз бўладими киши! Ким ўзи у? Башарасини бир кўриб, халқ номидан нордонгина рахмат айтиб қўйсак, ёмон бўлмасди.

Боя, юринг, озгинадан отиб чиқайлик деганида, ошқозоннинг мазаси йўқ-да дея, узрини айтган бакалоқ унга қизиқсиниб бокди. Бошқаларнинг ҳам дикқати унга тортилди. Мудраётган чол уйғониб кетди. Аёлларнинг пичир-пичири тинди.

Одамлар эътибори ўзига каратилганини сезган шоир, бирдан рухланиб кетди.

— Кутиш деган шунча бўлар ахир! — деди у бу гал одамларга хитоб килиб. — Наҳотки, бирор чораси топилмаса? Ўйлайлик, фикр қилайлик, кутмокдан нафода. Халқ бу... нима эди? Ҳа, халқ бу — буюк куч деганлар! Неужили, ўша буюк кучдан фойдалана олмасак!

Бекатга сув сепгандай жимлик чўқди. Одамлар уни бошдан-оёқ мароқ билан кузатмоқда эди. Елкасига сумка осган бу пўрим йигитча гурунгга янги мавзу бўлиши мумкин эди-да. Агар сал наридаги автобуслар қайриладиган майдонга кетма-кет келиб қолишган автобус ҳайдовчилари ўзаро тортишиб қолмаганида, бекатдагилар унинг узунрок соchlаридан тортиб, ялтироқ туфлисигача муҳокама қилиб чиқишган бўларди. Бекордан кўра эрмак-да.

Буни қарангки, айни шу пайтда ҳайдовчилар айтишиб қолса бўладими. Бахсга сабаб, ким илгарироқ жўнаш эди. Негаки, автобусларнинг тез-тез келиб кетиб тургани боис пастки манзилга йўловчи кам эди. Кейин келган автобус ҳайдовчиси ўзига етганча кув

экан, ниманидир баҳона килиб, отини эртарок қамчи-  
ламокчи эди. Аввалроқ жўнаши лозим бўлган ҳайдов-  
чи эса унга гап топиб беролмай гаранг эди.

— Чора топмок ўз қўлимизда-ку, — деди воқеани  
тез фаҳмлаган шоир, ўша томонга кескин қайрилар-  
кан. — Гаплашайлик манову автобусларнинг бири  
билан.

Азбаройи қизишганидан гапида жиддий грамматик  
хатога йўл қўйганини пайқамади. Сўнгги жумлаларни  
қойиллатди лекин. Тўлкин-тўлкин соchlарини ортга  
силтаб ташлаб деди:

— Кутмок, сабр этмок мутеликдир! Муте бўлманг,  
ўртоқлар! Ҳаракат қилинг!

Тўдадан иккі киши ажралиб, эран-қарон унинг  
ортидан юрдилар. Бақалоқ ҳам уларга қўшилди. Бу  
пайтда ҳайдовчиларнинг баҳси энг юкори нуктага ет-  
ганди.

— Сени биламан, — дерди олдин жилиши лозим  
бўлган автобус ҳайдовчиси, ориқ, новча киши. —  
Мени алдаб, Бештеракдагӣ жанозадан чиқадиган одам-  
ларни опкетмокчисан. Ўтган сафар ҳам шундай қил-  
гансан. Бас, ҳар ким ўз графигида жўнайди.

— Гап уқмайдиган ғалча экансан-да ўзинг ҳам, —  
дерди куви. — Шу рейисдан сўнг Оқтошга кетишим  
керак. Божам ўғлини ётқизаяпти. Бормасам... Ке, қўй,  
кетма-кет кувлашиб юрмайлик. Ярим соат сабр эт-  
санг яна одам йифилади. Шошадиган жойинг йўқ-ку  
ахир.

— Ўртоқ ҳайдовчилар!

Тўсатдан айтилган бу хитобдан иккиси ҳам чўчиб  
тушилди. Аввал шоирга, сўнг бир-бирларига, кейин  
яна унга карашди. Шоир чиройли бошини бекат то-  
монга силкиб, андак ҳадикли, андак викорли оҳангда  
деди:

— Карап, қанча одам кутмоқда! Кута-кута юракла-  
ри торикиб кетди бечораларнинг! Сизлардан илтимос,  
биронтангиз мана шу кора кўзларнинг меҳрига сазовор  
бўлсангиз! Халқ бу яхшилигингиҳни ҳеч қачон унут-  
магай!

Новча, бу ичиб олганми, деган маънода юзини  
ўғирди. Аммо кувга жон кирди.

— Укам, түғри айтаяпти, — деди кўзлари чакнаб. — Тоқка бир рейс қип келмайсанми? Вақтим бўлса, ўзим борардим-а.

— Мутал сариқ кўяр кейин, — деди новча бош чайқаб. — Йўқ, бўлмайди.

— Муталинг тўйга кетган.

Новча ишонқирамай қаради.

— Рост-рост, — деди кув кўзларини бакрайтириб. — Қўшни районга тўйга кетган, одам опкетган. Одамлар бу ерда уч соатдан бери пойлаяпти уни, у кишим эса тўй-тўйлаб юрибдилар. Лекин ундаям айб йўқ, одамларнинг хожатини чикараяпти. Сен эса бу ердагиларнинг хожатини чикар. Мутал сариқ ҳам хурсанд бўлади, планинг ҳам яхши бўлади. Ўрнимни билдирамбсан биродар деб, эрта сенга яримтаям кўяди. Бир гал менда шундай бўлган.

— Унда ўзинг бор.

— Оббо, фирт девор экансан-ку, — кув сонига шапатилаб, қўлларини пахса қилди. — Ишим бор, деб неча марта айтдим сенга. Яхшилик ёқмайдиган одам экансан-да ўзинг ҳам. Мен билан пассажир талашиб, ўзинг тайёр пассажирлардан воз кечиб ўтирибсан-а. Қанака одамсан ўзинг, э!

Шоир ҳам караб турмади. Унинг оҳангдор овози уларнинг жанжалини босиб тушди.

— Хўп денг, ака, — деди новчанинг билагидан дўстона тутиб. — Сиздан ғоят миннатдор бўлардик!

Охири новча рози бўлди. Негадир атрофга алангжаланг қараниб, машинасини бекат томонга қайира бошлади. Тортишув давомида бошқалар катори миқ этмай турган бақалок койил қолганини яширолмади.

— Гапди... лекин бопларкансан, ука.

Мактоб хуш ёкиб, шоир унга илжайиб қаради. Сўнг сал ўйланқираб турди-да, сумкасидан бир дона китоб чикарди, ижодимнинг камтаргина маҳсули, шу кундан сизга эсадалик бўлсин дея, уни бақалоқка такдим этди.

Бақалоқ китобчани вараклаб, у ёқ-бу ёғига разм солиб, шуни ўзинг ёзганмисан, деганга ўхшаш тўпори саволлардан кейин, умрида дазмол юзини кўрмаган костюмининг кўйин чўнтағига солиб кўйди.

Бу орада улар ёнига келиб тўхтаган автобус эшиклиари шараклаб очилди.

Шоир нозиктаъб, маданиятли инсон эди, четланиб бошқаларга йўл берди. Автобус худди ўзиникидек баъзи бирларининг чиқишига кўмаклашиб ҳам юборди. Оқибатда, тирбанд автобусга ўзи зўрға илашди. Нолимади, қайтамга ўзидан жуда мамнун эди.

Автобус ҳайдовчиси туман марказидан уч чакирим наридаги булок бўйида тўхтаб, патта йирта бошлади. Шоир пастга тушиб сув-пув ичди.

Энди гапнинг давомини бу ёқдан эшигинг. Мутал сариқ деганлари ўн-ўн беш сомсадан кейин беш-олти чойнак чойни бўшатиб, гап халтасини баҳузур қоқибилиб, ҳеч ошиқмай йўлга чиқди. Бекатга келиб карасаки, йўловчилардан асар йўқ. Унинг анграйиб турганини кўрган кабобпаз йигит кулиб юборди. Ҳакини биронга бермайдиган, ўзига етгунча қўрс ва қайсар бу одамга бемаврид кулги каттиқ ботди.

— Ҳи-и, нега иршасан? Нима очиб кўйибдими? — деди кабинадан қовундек узунчоқ бошини чикариб. — Кўра-пўранг билан сувга улоқтириб юбормайин тағин!

Кабобпаз яхши билади, яна жиндек ортиқча гап килса, бу мардум айтганини ҳеч киприк қоқмай адо этади. Шу боис юзига андак ялтоқ тус бериб деди:

— Одамларингизни Учкудуқнинг автобуси олиб кетди.

— Нима? — деди Мутал сариқ, ҳазиллашма, чатоғингни чиқараман, деган оҳангда. — Қачон?

— Бирор беш минутча бўлди-ёв.

Йигитнинг гапига ишониб-ишонмай, у автобусини елдек учириб кетди.

У кувиб етганда, новча эндингина етти-саккиз одамга патта йиртганди.

Мутал сариқ машинасини олдинрок ўтказиб кўйиб, ўзига ишонган бир тарзда гўддайиб пастга тушди. Қўлларини белига тираб, бериги автобуснинг қаршисига келиб босди. Бутун турки-тароватидан, кани, бир кўрай-чи, бу энаси байтол ким бўлди экан, деган ифода барқ уриб турарди.

Хозиргина хожатбарор ҳайдовчини олқишлиб ўтиришган одамлар, таниш автобус пайдо бўлиши билан

ѓув этиб ташқарига интилишди, бир-бирини уриб-суреб, узокдаги қўнғир тусли кирларни мароқланиб томоша килиб турган шоирни туртиб ўтиб, нариги автобусга отилишди. Бикинига каттиқ туртки еган шоир ёнига мункиб, булоқ сувидан хосил бўлган кўлмакка йикилиб тушаёзди. Хартугул, бир амаллаб ўзини тутиб қолди. Одамлар ортидан ҳайрон бокаркан, кўли симиллаб оғриётган бикинида, донишмандона бир киёфада таассуф ила бош чайқаб кўйди.

Энг охирида бўйнига осилтан пул йигар сумкасини саланглатиб новча тushiб келди. Бирдан тушмади, бир оёғи қуйи зинада, бир оёғи ичкарида, узун қадди алланечук шалвираган, кўзлари қаншари остидан ҳадикли жавдираған, шу созда бир оз қотиб турди-да, сўнг ботиниб-ботинмай ерга оёқ кўйди.

— Ҳа-а! — деди Мутал сариқ нописанд, ўз навбатида, таҳдидли оҳангда. — Миясига курт тушган кўйдайин бу томонларда сермаланиб юрибсан?!

— Сизди... тўйга кетган дейишувди-ку, — деди новча уни кўрмаетгандек кўзларини пирпиратиб.

— Ким айтди? — Мутал сариқнинг қўнғиритоб куюк қошлари туташиб, кўзлар ёвузона чакнади. — Ким экан у, энаси тайхар?

Шофёр зоти борки, чакимчиликни ёмон кўради. Бундай одам ҳар қандай жамоада ҳам обру тополмайди. Айникса, шофёрларнинг жини севмайди буларни, ҳар қадамда панд беришга тиришишади. Мана ўгу боис, новча оғир ахволда қолганди — айтса, бир бало, айтмаса, минг бало... У соколи қиртишланмаган иягини кирт-қирт қаширкан, оғирлигини бир оёғидан иккинчи оёғига солди, одамни кўп қийнаманг, деган маънода Мутал сариқка илтижоли тикилди. Бунга сари у баттар зуғум киласади.

— Ким айтди деяпман?! — Мутал сариқ вахимали важоҳатда олдинга бир одим ташлади. — Нима, тилингни мол босганми, гапир тезрок!

— Тўйга кетган бўлсангиз... сизни хурсанд бўлади деб ўйловдим, — деди новчанинг овози паст тushiб.

— Хурсанд бўламан? — Мутал сариқнинг қошлари беёҳшов керилди. — Нимадан?

— Ўрнингизни билдирамай дедим-да.

- Ишқилиб, Мутал ўлди деб ўйламабмидинг?
- Унда деманг, худо асрасиний!
- Нега унда бирорнинг маршрутига бурун тикиб юрибсан?
- Айтдим-ку, ўрнингизни билдирамай деб...
- Ий-ий, ўрнимни билдирамагич сени энангни... — Мутал сариқ кўпол сўкиш қилди.

Новча ҳадемай бошига мушт тушадигандек кўнишиб, ортига тисарилди.

— Билмай қопман, ака кечиринг, — деди зўрға.

— Ув-в! — Мутал сариқ уни ўзи томон тортиди. — Бу маршрутда мен ўн йилдан бери катнайман, тушундингми, ўн йилдан бери. Шу дамгача хали бирор тумшук сукмокка ботинмаган! — Энди сен, ярамас махлук, нонимни яримта қилмокчи бўлдингми! Солайми жағинга, а?!

— Кечиринг, ака! — жисмидан андоза олгандек, овози хам жонсизланиб борарди новчанинг. — Одамлар кутиб қолган экан... ўрнингизни билдирамай деб... Айборман, ака.

— Яна ўша гап! — Мутал сариқ унинг кўзларига қаттиқ тикилди. — Кутса кутавермайдими! Уларнинг иши кутиш. Бизнинг ишимиз эса бир-биримизнинг кўзимизга чўп сукмаслик. Шуни тушунасанми? Ий-ий, каллангни сени... Чала туғилган махлук! Қани, энди айт. Ким айтди мени тўйга кетди деб? Энасини учқўрғондан кўрсатаман мен унинг!

Бу хол шоирнинг кўз ўнгидаги содир бўлмоқда эди. У оғриётган биқинини эсдан чикариб, гоҳ Мутал сариқка, гоҳ ночор ахволда қолган новчага боқаркан, бирдан кўнглида шоирона нафрат кўзғолди: «Шахс хўрланмокда!» Унинг олижаноб қалбида бу тенгсизликка қарши исён уйғонди.

— Мен айтдим! — деди новчага очиқдан-очиқ хамдардлик туюб.

Ҳайратдан Мутал сариқнинг ўнг қоши бир кўтарилиб тушди. Бу ўзи ким бўлди, деган маънода унга бошдан-ёёқ кўз юргутириб чиқди.

— Қайси гўрдан кеп қолди, бу жипирик? — деди сўнг.

Шоир ўзини қаттиқ ҳақоратланган ҳис этди. Бир

хаёли Мутал сариқнинг бақрайган башарасига боплаб бир мушт туширмоқчи ҳам бўлди. Аммо зарбаси чивин чаққанчалик таъсир этмаслигини сезиб, ичиди алами келди. Кўмак истаб, аллақачон автобусга жойлашиб олган одамларга қаради, қарашида, автобусни мен сизлар учун гаплашгандим, бу эса мени ҳакорат қилаяпти, деган ифода барага акс этиб турарди. Бўлаётган ҳангомани дераза оша бир қадар лоқайдлик, бир қадар қизиқиш билан кузатиб турганлар унинг кўзларидаги илтижони пайқамаганга олишди. Бундан шоирнинг андак рухи тушди: «Муштлашув юз бермагунча мана шунака без бўлиб ўтираверадилар бўлар,» деб ўйлади ичидан зил кетиб. Аммо энди ортга чекиниб бўлмасди. Мутал сариқнинг куйдирувчи ўткир нигоҳини, нақ гарданида -хис этаркан, у томон кескин ўгирилди.

— Шахсиятимни ҳакорат қилишга сизга ҳеч ким хукуқ бермаган! — деди кейин ҳар бир сўзини чертиб-чертиб. — Оғзингизга сал қараб гапиrint!

Мутал сариқ унга энди ошкора қизиқиш билан тикилди.

— Нима деб чулдираяпти бу чулчут?

Новча ожизона ишшайди. Автобусдагилардан кимдир пиқ этиб кулиб юборди. Унга бошқаси қўшилди.

— Муталвой, бўлинг, кетдик, айтишманг шулар билан, — деди кимдир кулги орасидан.

Шоирнинг миясига қон тепди. Ҳакоратдан эмас, кулгидан фазаби келди. Ох, қанчалик ожизлик, қанчалик елпатаклик, деб ўйлади қаҳри ошганидан ошиб ва жўжаҳуроз қичқиргандай, хунук, ингичка овозда бақириб юборди:

— Э, одам эмас экансилар!

Табиий, бу гапни Мутал сариқ ўзига олди. Ҳеч ўйлаб-нетиб ўтирасдан шоирнинг кулоқ-чаккасига шараклатиб қўйиб юборди. Шоир йўл четидаги қизиган шағаллар устида юзтубан ётаркан, таҳқирланган қалбida аёвсиз қасос кўзғолганини хис этди. Шу қасос оғушида ётган жойида тимирскиланиб, тош қидирапкан, чиройли ибораларга кўниккан тили сўкинмоқдан истиҳола қилмади. Бироқ сўйиниб сакраб турган жойида

яна ерпарчин бўлиб тушди. Кўлидаги тош учиб кетиб, бошкасини олди.

Иккинчи бор туришида Мутал сариқни одамлар орасида кўрди. Улар бамисоли шердай хурпайиб, хезланиб келаётган Мутал сариқни зўр бериб тинчтишга уринишарди. Одамлар орасида оғзидағи носини тупришга улгуролмаганидан лаби дўрдайиб, икки оғиз сўзни эпакага келтиролмай, нукул шу-шулаётган бакалоқ ҳам бор эди.

Новча шоирнинг кўлидан тошни юлкиб олди. Кора-тўрдан келган бир йигит уни ортга сурди. Шоир бехуда тиршанглаб, олға интиларкан, ожизу заифлигини яна бир карра чукур ҳис этди. Йиғламоқдан бери бўлиб, шаҳардаги боксчи дўстини эслади. Агар у хозир ёнида бўлганида эди, манави безбетни бир зарб билан асфальтга чўзилтириб кўярди! Ўйидаги тилига куйидаги тарзда кўчди:

— Шахар борсанг, онангни кўрсатаман!

Мутал сариқ кулди. Унга кўшилиб бошқалар ҳам хиринглашди, ялтокланиб хиринглашди. Нега деганда, Мутал сариқ ўзлариники, ҳар куни керак у. Чехраси бежирим, сочи ўsic аллакандай йигитчанинг тарафи ни олиб зарил кептими уларга. Ўзи бу бола ким? Мехмонга ўхшайди. Мехмонга қўл кўтариб, Мутал сариқ кўп хунук иш қилди-да. Лекин унга гапириб бўларканми, жини кўзиса, бирор ўнгирга тушириб қолдиришдан ҳам тоймайди. Керак пайтда атай тўхтамай ўтиб кетади кейин.

Мутал сариқ одамлар куршовида автобус томон юрди. Голиб киши сифатида солланиб-солланиб юрди. Орада нимадир деб одамларни кулдирди. Барibir кимнингдир шоирга ичи ачиди.

— Мехмон, юрмайсизми? Юринг!

Шоир ҳайкирди:

— Чикмайман автобусига! Суф-ф сизларга! Онги ожиз елпатаклар!

Автобус ортидан кўкиш тутун пуркаб кўзғалди.

— Ким экан у?

Барчанинг хаёлида айланётган саволни ҳайдовчи-га яқинроқ ўтирган киши берди.

— Китоб ёзадиган шоир экан, — деди аллақачон

тили тагига мўлгина нос ташлаб олган бақалоқ ва ошиқмай қўйнидан шапалоқдай китоб чикарди. — Менга китобчаям берди. Фамилияси...

Кўшни ўринда ўтирган бирор ундан китобчани олди, вараклади. Сўнг уни ўзидан сал узоклатиб, шапкўр одамдай кўзларини сал қисиб турди-да, ярим овозда номини ўкиди.

— «Мухаббатим сизга одамлар!»

Аммо унинг овози ғала-ғовур ичида кўмилиб кетди. Одамлар кула-кулә шоирнинг калтак егани-ю, новчанинг қанчалик ўсал бўлганини мавзу сифатида чайнашга тушгандилар.

Бақалоқ ўзига узатилган китобчани кўлига оларкан, шунчаки вараклаб, кайта чўнтағига солиб қўйди. Кейин оғзидағи носини тупурмок ўйида дераза томон интилди. Бироқ дераза хўппасемиз аёл томондан тўсив кўйилган эди. Оёғи тағига тупурмоқчи бўлди-ю, аммо олдинги кўзгудан Мутал сариқнинг жиддий башарасини кўриб, тагин шаштидан қайти. Мутал сариқ салонни булғатганларни жинидан ёмон кўради, писта чаққанларни ҳеч гапсиз-сўзсиз йўлда тушириб колдиради. Шунда бақалоқнинг эсига китобча тушди. Қўйнига кўл солди. Китобчанинг дуч келган варагини йиртиб, карнай қилиб ўради-да, унга туфлаб, очик деразадан ташкарига улоктириди.

Тоғ эпкини булғанган қофозни асфальт йўл бўйлаб учирив кетди.

Бу пайтда шоир йўловчи юқ машинасида ортдан келарди. Фамгин, эзилган. Тиззаси ўстида, сумкасидағи китоблари эса кераксиз юқдай, ортиқ уни қувонтирумай қўйганди.

## ТУГАТИЛМАГАН СУРАТ

Бешинчи қаватга чиқиладиган зина тор эди. Аслида унчалик тор хам эмасди-ю, лекин Асадга шундай туюлмоқда эди. Зина экан, шу тобда, бутун олам тору танг тортган, кўзи илғаган жамики нарса мўрт ва омонат, кайборлик эса кир деворлардангина иборатдек эди. Кайфияти юзига тепчиган, тущкин, афтидан, гўё кимни-

дир ноҳақ ранжитгандай, ички бир қизғаниш ва дард билан супуриқсиз зиналарни бир-бир босиб юқориларкан, салгина шовқиндан пешонаси тиришар, зина тўсифини чангллаган бўёқ юки бармоклари титраб-титраб кетарди.

Хозиргина у, унинг таъбири билан айтганда, мольбертни қон йиғлатиб, оппок сурп юзидағи нуроний қиёфа устига қора чизик тортиб чиққанди. Ўзига колса-ку, асло бундай киммаган, ёруғ кунни қора тунга, қора тунни оппок тонгга улаб бўлса-да, ҳафтадирки, чиқмай қонга ташна килиб юборган суратни ниҳоялаш ниятида эди. Ижод оламининг ўзига хос инжик хусусияти, чиқмаган айрим суратлардек, вактинча уни четга суриб қўймоқчи эмасди. Бир амаллаб бўлса-да, тугатмоқчи эди. Сирасини айтганда, сурат деярли битган, факат кўзлар... Нигоҳ қаъридан уфуриб турган совуқликни йўқотолмай гаранс эди у. Қизик, отасининг қарашлари шунчалик тўнг ва қаттиқмиди? Тўғри, бўёқлар ёнида ётган кафтдек суратда у ўта жиддий қиёфада акс этган, аммо ҳаётда бағоят дилкаш, кўзлари тугил юзидағи ҳар бир ажиндан илиқлик ёғилиб турмасмиди? Мольбертдан узоклашганда, ё бўлмаса, аразлаган ёш боладай полга чўзилганда, ушбу қиёфа тасаввурида аниқ жонланар, ишга қўл урди дегунча эса, негадир, мўйқалам остидан тикондай қаттиқ бегона нигоҳ қалқиб чиқаверарди. Неча-неча бор додлаб юборай демади у. Аммо табиатан босик бўлғани боис, ҳар сафар жазавадан ўзини тияр, яна тонг бўзармай мольберт қаршисида михланарди. Қолаверса, бу ёқда муддат оз қолган, бурчакдаги телевизор устида ётган бир энлик қофоздаги қисқа жумла ортиқ ҳаяжонланишига изн бермасди. Хабарга кўра ўзи ўқиган мактабга отасининг номи берилмоқчи экан. Лекин унда сурат сўралмаган, бор-йўғи ўша куни етиб келиши илтимос қилинган, холос. У қуруқ қўл билан боришни истамай, рассом ўғил сифатида мактабга отасининг суратини ҳадя этмоқчи эди. Бироқ унга мудом ҳалақит беришарди.

Бугун ҳам шундай бўлди. Аввалига ётоқхона ҳаётининг бир маромдаги фувурини нимадир тарақлагани бузди. Сўнг хотинларнинг шовқини эшитилди. Қарғи-

шу хақоратлар гўё оламни тутди. Аёлининг овозини таниб, у йўлакка чикди. Анора қўшни аёл билан жиккиллашаётган экан, туртқилаб ичкарига олиб кирди. Кейин унинг дийдиёсига парво қилмасликка тиришиб, мольберт рўпарасига чўкди. Бирпастдан сўнг мўйқаламини четга улоктириб, алам тўла кўзларини суратга қадади. Йўқ, бу отасининг караши эмас, унинг кўзларига дунё сиғарди. Бунга эса... У беихтиёр инграб, сурат юзига чизик тортиб юбораркан, чора истаб атрофга аланглади. Шунда эсига бешинчи қаватдаги узун ва кенг айвон тушди. Айвондан шахар четидаги тоғлар яққол кўзга ташланади. Тоғларга бокса, кўнгли ҳамиша оройиш топади. Ётотхонанинг турфа ғалвага тўла хаётини унутгандай бўлади.

Асад шу ўй, шу умидда зиналардан юкориларкан, оқшом муқаррар юз бериши мумкин бўлган можарони ўйлаб, юраги баттар сиқиларди.

Аёлларини ажратиб, тўполонга чек қўйган эса-да, жанжалнинг зўри қўшни аёлнинг эри ишдан қайтгач бўлади. Хотинининг ёлғон-яшиқ гапларидан пишанг олган эр оқшом худди кечагидай эшик қоқиб келади. Тақиллатиши зардали, бокишилари қаҳрли, оғзининг икки чети кўпикланган, хотинингни тиясанми-йўқми, дея бақиради. Кейин ҳар галгидек гапига жавоб кутмай, ўдағайлашда давом этади. Асаднинг азалдан жанжалга тобе йўқ, ижод билан машғул пайтда эса бутунлай одамовига айланиб, гап англамайдиган даражага етади. Боз устига, худо уни куч-куватдан сикмаган. Табиий, кучли одам турли хашаваю, дўк-пўписаларга анчайин бепарво қарайди. Қўшниси унинг бу холатини ўзича тушуниб, баттар авжланади. Истаса, уни алланималар килиб ташлашга шальма килади. Шальмаси аччик ичакдай чўзилиб, газабдан қийшайган оғиздан кўпирлиб, кўпикланиб чиқаверади. Қисқаси, қўшниси гап билан ёруғ кунни кора қуюнга айлантиради, уни ерга кўмиб, сувга чўқтиради. Этими бурдалаб, суякларини майдалайди. Қани энди, Асад бу гапларни тузукроқ фахмлай олса, Мияси карахт, қўшнисига меровсираб тикилади. Қўшнисининг бутун борлифи оғизу, тарвақайлаган башарага жамлангандай туюлади. Таажжубланиб унга бошдан оёқ кўз солади. Шунда

унинг оёклари калта ва йўғон, қўллари эса гавдасига номуносиб тарзда узун эканлигини пайқайди. Бу қусури тинч вактда сезилмай, бунақа пайтда аниқ кўзга ташланишидан ажабланди. Бўғриқиб жавраётган шўрликнинг юзига тупургандай килиб, «маймун» дегиси келади. Бирок буни ўзига эп кўрмай, андиша қилади. Сўнгра бирдан унинг бу қадар жазавага тушишдан ҳайрати ошади: «Намунча кучанади бу, а? Нима бўлувди ўзи?» Аммо жанжалга сабаб бўлмиш воеа шу қадар майда эдики, тезда эсига туша колмайди. Ўйлай туриб, қўлидаги мўйқаламнинг кети билан иягини қашлай-қашлай, орада очик эшикдан хона тўридаги мольбертга ўрнатилган суратга қараб олади. Суратдаги тўнг нигоҳ ёқмай, беихтиёр шивирлайди: «Чикмаяпти!» «Сўкинма! — дейди қўшни буни ўзича тусмоллаб. — Комендант ошнам деб, ҳаддингдан ошаверма, керак бўлса, у билан ҳам гаплашиб кўямиз». Комендант номини эшишиб, у аввалига ҳайрон бўлади, сўнг унинг таклифига «хўп» деганига ачинади. Бир хаёли чўнтағидаги калитни қўшнисининг башарасига улоктироқчи бўлади. Қизғанади. Мехнатим эвазига-ку, деб ўзини овутади.

Ётоқхонани безатишда унинг беминнат меҳнатидан фойдаланиб келаётгани учун ўн кунча бурун комендант Асадга гадойнинг тўрвасидай торгина ёрдамчи хонани таклиф этганди. Тўрт киши кирса, бешинчи одам айланишга жой тополмайдиган шу арзимас бўлма катта тўполонга сабаб бўлади. Унинг талабгорлари кўпайиб, аввалига аёллар, сўнг эркаклар комендантни ўртага олишади: «Нима унинг шохи борми, қўшимча хона берасиз?» — дея бўкиришади, кичкиришади, бақиришади. Комендант бўш келмайди: «Рассом у, — дейди ҳақиқат учун курашаётган шоввоздай, ҳаммадан баланд қичкиришга тиришиб. — Ким билади, эрта бир кун миллатнинг фахри бўлар у. Юрасанлар кейин мақтаниб, фалончи билан бир вакtlар қўшни бўлгандин деб». Табиий, бу гап зифирча таъсир этмайди. Қўшнилар унинг ўзигаям, чизган суратларигаям тупуришларини, қўшимча хона ўзларига жуда зарурлигини очик изхор этишаркан, кимдир бола-чақасини, кимдир эса корхонада кўпроқ-чишлаб қўйганини рўкач килиб,

ҳар қайси ўз даъвосини олдинга суради. Аммо оғиз мингта, лукма эса битта дегандай, калит барибир Асадда қолади. Бўлма машмашаси ҳануз тутаб тургани боис, у анжомларини кўчириб киришдан ҳамон ийманниб келарди.

Асад калит турган чўнтағи устини кафти билан пайпастларкан, қўшниси хона вожидан кўнглида чексиз адоват сақлаб келаётган эсада, бугунги жанжалнинг сабаби бутунлай бўлак эканлигини англайди. Кўрсаткич бармоғини букиб, чаккасини қашлайди: «Жанжал нимадан чикувди, а?» Бу харакатини ўзича фаҳмлаган қўшниси баттар оловланади. Шу пайт унинг чап бети сояланиб, қаватида яна бир асабий қиёфа қўшни аёлнинг гезарган турки намоён бўлади. Шундагина воқеа эсига тушиб, Асад оғрикли жилмаяди. Қўшни аёл эрталаб ўғилчасининг йўлакда қолдирилган велосипедига қоқилиб кетган. Бор гап шу.

Асад жилмайиши билан қўшни аёлнинг юпқа лаблари пириллаб харакатга келади-да, топ йўлак шанғи овоздан жаранглаб кетади: «Нега тиржаясиз?!» У жавоб қайтаргунча бўлмай, чап елкасида шарпа илғайди. Кўз кири беихтиёр ўша томонга оғиб, Анорани кўради. Қаҳрланганида, аёлининг чехраси ғоят хунук тус олишини гўё энди кўраётгандек, унга ажабсиниб бокади. Хаёлидан ё, тавба, фирт алвасти-ку бу, деган ўй ўтади. Кейин ўйидан ўтганини қарши томон укиб қоладигандай, хавфсираб уларга карайди. Қўшниларининг турки-таровати аёлиникидан тузук эмаслигини илғаб, ўзини ёввойи йиртқичлар орасига тушиб колгандек хис этади. Этак силтаб боши оққан томонга қочиб кеткиси келади. Йўқ, кетгани қўйишмайди. Хотинлар пайдо бўлиши билан қайта бошдан куч олган жанжал ўпқони уни тобора ўз заптига торта бошлайди. Қўшни эркак ер тепиниб, унга бўкиради: «Мановунингни тиясанми, ё дабдаласини чиқарайми?» Унинг чиранишидан Асаднинг кулгиси қистайди. Бир ўйи, ёқасидан тутиб, йўлак тўрига улоқтиргиси келади. Тағин ўзини босади. Қўшниси эса энди хар иккала кўлини пахса килиб қичқиради: «Тилини тиймаса, ёмон қиласман лекин!» Ҳақиқатдан важохати шер тусига кириб, озгина имога маҳталдек туюлади. Аммо Аноранинг захар-

дан аччик луқмасидан сўнг ҳам негадир ҳаракатга кела олмайди. Бамисоли шердан итга айланиб, яна акилашда давом этади.

Асад ҳар иккала томондагиларга зимдан-зимдан боқаркан, ғазабкор нигоҳларнинг ғоят танишлигидан тажжубланади. Кўз кўрган танишлик эмас бу, балки бир-бирига ғоят ўхшаш ва бу ўхшашликни яна қайдадир учратганга хос танишлик эди. Каерда кўрган экан, а?.. Ва бирдан хона тўридаги мольбертга бириктирилган сурат эсига тушиб, ўша ёкка илкис ўгирилади. Ё дариф, ахир бу нигоҳларни ўзи яратган-ку! Отасининг кўз қарашларини чизаман деб, айни шу тўнг нигоҳларни неча-неча бор акс эттирмади. Куну тун адоват тўла нигоҳларга рўпарў келаверсанг, бу ёруғ олам шу хил қарашлардангина иборатдек туюлиб, кўлинг ўз-ўзидан кетиб колаверар экан-да.

У бу хақиқатни фавқулодда англаб, асосий айбдорларни топгандай, теварагидагиларга зардали боқади. Ижод килишимга халакит бераяпсилар, деб ҳайқиргиси келади. Бирок бу хил дил фарёдининг атрофдагиларга сарик чакалик қадри йўқлигини фаҳмлаб, ўз вактида тилини тияди. Қалб ёзғиригини ўта жўн тарзда ифода этади: «Кеча жанжал, бугун жанжал, уялмай силарми!» Гапи эътиборсиз колади. Бу вактда қўшни аёл Анорага эски бир аламини рўкач қилиб, шангиллаётган бўлади. Қаҳрдан гезарган афти шу даражада хунук ва тасқара эдики, Асад ихтиёrsиз равишда кўзларини олиб кочди. Дўриллаб воқеага ўз муносабатини билдириб турган эрига раҳми келиб кетади. Жаҳлга бўйсуниб, унинг тумшуғига мушт тушурмаганидан ичида суюнади: «Нимасини ураман буни». Шу ўйдан сўнг юзида эрмакловчи табассум пайдо бўлади-да, ўжар укасини тинчтишга уринган aka қабилида, қўшни эркакнинг белидан даст кўтариб, хонасига обориб ташлайди. Қўшниси унинг бекиёс кучини вужудида хис этса-да, бўш келишни хаёлига келтирмайди: «Кўпам кучингга ишонаверма, кўрганмиз сендан зўрларини-ям», дея ортидан бакириб, эргашиб чикади.

Асад тушкин ва эзилган бир ҳолатда зиналардан юкорилар экан, бу хол узок давом этмаслигини, бирор кун тоқати тугаб, қўшнисини боплаб дўппослашини

билади. Бу нарса балки бу оқшом юз берар. Нима бўлсаям суратни тезроқ тугатиш керак, акс холда жинни бўлиб колиш хеч гап эмас. У шу хаёлда зина санаб бораркан, дастлаб шу зина жуда кенг туюлганини ҳасрат билан эслади. Деворлар ҳам бу кадар сикмасди. Барча нарсадан янгилик ва яна алланималарнинг бўйи анқиб туради.

У бу ерга биринчилар катори кўчиб келганди. «Оиласий ётоқхона» деб аталмиш бу бино бошқа ётоқхоналардан икки бикинидаги узун ва кенг айвонлари билан фарқланади. Асадга иккинчи қаватдан жой теккан эсада, ўшанда у бутун бинони айланиб чиккан, бешинчи қаватнинг кун чиқиш тарафидаги айвонга ўтаркан, қаршисида юз очган манзарадан юраги ҳаприкиб кетганди. Олисдаги фусункор тоғлар, унга туташ кўнғир тус кирлар, кўксини дарё тилган кенг дашт худди кафтдагидек кўзга баралла ташланиб туради. Чап ёнидаги завод бинолари-ю, кўкка бўй чўзган кўш қувурдан кўтарилаётган кора тутун ҳам бу манзарага дахл қилолмас, тоғлар қаршисида завод тугул шахарнинг ўзи ҳам ғариб кўринарди. Тоғларни завқ билан томоша қиларкан, бешинчи қаватдан жой тегмаганидан ўкинганди, пастга тушиб, аёлига ўз туйғусини куйидагича ифода этганди: «Бешинчи қаватдагиларга маза экан, тоғлар кўринар экан у ердан». Хонани безатиш билан банд Анора унинг завқига аҳамият бермаган: «Манову ерга диван кўямиз, — деган. — Анову бурчакка шкафни. Ойнани эшик қаватига ўрнаштиrsак ҳам бўлади». Асад эса деразага хаёлчан термилиб, ўзиникини маъқуллайди: «Шаҳардан туриб тоғларни кўриб бўлмас деб ўйловдим. Йўқ, кўрса бўларкан. Дам олиш куни ўша томонга ҳайё-ҳыйт деб жўнаб қолмаймизми? Баҳонада, у-бу нарса коралаб келардим». Аёли жавоннинг силлиқ сиртини сийпалаб, бошини сараклатади: «Қаранг, манову ери тирналиби. Айтдим сизга, опкелишда эхтиёт бўлинг, деб». Эр ўйчан дейди: «Лекин бизнинг тоғлардан пастрок экан. Барibir тоғ-тоғ-да, қараган сайин баҳри-дилинг очилади». Шу куни иккиси икки хаёлда бўлсалар-да, бир-биридан асло ранжишмаган, негаки, бири тоғларни кўра олишидан, бири эса бошпанали бўлганидан мамнун эдилар.

Ўша кундан эътиборан Асад тез-тез юқорига кўта-рилиб, тоғларни узок-узок томоша килиб ўтиришни одат қилди. Тоғлар билан бахти эди у. Бироқ кейинги пайтда унинг бу бахти хийла омонатлашган, айвон-нинг хўжайинлари пайдо бўлиб қолганди.

«Айвон хўжайинлари»ни сўнгги зинага оёқ қўйган-дагина эслади. Дилгир кайфияти яна-да хуфтон тортди. Аммо изига қайтишни хаёлига келтирмади. Тоғларни кўрмаса хафагарчиликдан юраги тарс ёрилиб кета-дигандек эди.

У нимкоронги йўлак бўйлаб бораркан, нарда тахта-сининг тарақлашидан айвонда одам борлигини узокда-ноқ пайқади. Тағин гиди-биди бўлишини сезса-да, оқшом қўшниси билан юз берадиган можаронинг хиссасини ҳозирданоқ чиқармокчидай, қайсар бир кайфиятда ил-гарилашда давом этди: «Нима, бирор нарсани еб қўяр-мидим, — дея ғўлдиради. — Карайману изимга қайта-ман. Факат анову барзангини кўрмасам, бас. Ёмон жигимга тегаяпти, ярамас. Финг деса, аяб турмайман. Раъиига қараш йўқ энди. Жойни худди сотиб олгандай каттазанглиқ қиласди-я. Нечанчи қаватда яшайсан эмиш. Нечанчи қаватда яшашимни кўрсатиб қўяман!»

— Нечанчи қаватда яшайсан, э?

Илк бор учрашув беш кун бурун мана шу тарзда юз берганди. Асад бел баравар айвон тўсигига кўксини ташлаб, тоғларни мароқ билан томоша қилмоқда эди. Ўгирилиб, айвоннинг узок бурчагида кур тиккан ўн чоғли йигитни кўрди. Бари уй либосида, тагларида пастак-пастак курсичалар, хонтахта янглиғ ўртадаги столда бўшатилган шишалар, таом колдиқлари, сочилиган карталар, нарда донолари. У савол эгасини тус-моллаб, тўрда ўтирган қора барзангি йигитга қаради. Барзангининг нигоҳида кибр ва локайдлик шу даражада қоришиқ эдики, нимадир чайнаб, кимираётган лунжини демаса, тошҳайкалнинг нақ ўзи эди. Лунж харакатдан тўхтаб, қалин лаблар нописанд кимирилади.

— Қайси қаватда турасан деялман?

Асад икки бармогини кўрсатиб, пастга ишора қилди.

— Нима, силарда балкон йўкми? — дея, гапга

аралашди унинг қаватида ўтирган сарик, жиккак йигит.

— Бору, лекин у ердан тоғлар кўринмайди. — У шундай дея кунчикишга ишора қилди. — Бу ердан... қаранг, қанчалик чиройли манзара.

Давра ахли бараварига бошини ўша томонга бурди. Бироқ ланж ва локайд нигоҳларга завқ инмади. Шунчаки қараб қўйиши, холос.

— Шунинг нимасини томоша қиласан? — деди кимдир.

— Чиройли-ку жуда! — Асад енгил хўрсинди. — Жуда гўзал ва улуғвор!

Жиккак йигит барзангига ялтоқланиб, ҳиринглаб кулди.

— Томи кетганми дейман.

— Бу ерда бошқа ўралашма! — деди барзангি.

— Сабаб?

— Бизга тегишли бу ер.

— Сотиб олмагансиз шекилли.

— Нервга тегма.

— Яхшиликча айтаяпмиз.

— Бор, кайфни белига тепма.

Асад дарров кетмади. Тоғларга бокди — фусункор, салобатли, пастга қаради — одамлар бамисоли чумомидай ўрмалашиб юрибди. Тоғлар қаршисида улар майда, жуда майда эди.

— Кайфни бузаяпсан, братан!

Ўшанда у ноилож айвонни тарк этган. Ҳатто ўзини бир қадар айбдор санаған, улфатларга халақит бердим шекилли, деб. Аммо уларнинг қилиғидан ўта ажабланган: «Бунча феъли тор буларнинг, а?!» Ўша куни мольберт қаршисида узок ўтиrolмай, иккинчи қаватнинг айвонига чиқкан. Қаршисида хунук манзара-ахлатлар яшиги қалашиб ётарди. Айвоннинг бир чеккасида эса икки нотаниш йигитча сўзлашиб туради. Асадда ахмокона эгалик хисси қўзғалиб, уларга адватли тикиларкан, бир хаёли хайдаб юбормоқчи ҳам бўлди. Сўнг бу ўйи ўзига эриш туюлиб, ҳаҳолаб кулиб юборганди: «Нима бало, ёмон феъл юкумли бўладими дейман?..»

У нимкоронги йўлакни охирлатиб, айвонга чиқар-

кан, ўжарлик хиссини босиб, салом беришни унутмади. Давра тугал эмас, чамаси беш-олти йигит кундалик майшат билан банд эди. Асад, ҳозир кетаман, деган маънода ишорат билдириб, айвон тўсифига яқинлашди. Тоғларга боқиб туриб қолди.

— Братан, — деди давра ахлидан кимдир. — Нима йўқотдинг бу ерда?

— Ҳозир кетаман, — деди Асад тоғлардан кўз узгиси келмай. — Кетаман ҳозир.

— Ҳалиям коласан демаяпмиз, — деди яна ўша овоз. — Умуман, нега бу ерда ўралашиб қолдинг?

Асаднинг энсаси қотиб, жавоб беришни лозим топмади. «Нима, кармисан?» деган лукмадан сўнгина даврага кўз қирини ташлади. Тажавузкор, совуқ нигоҳларни кўриб, чикмай кийнаётган сурат тарин эсига тушди. Аламдан ичи зирқираб кетди: «Нега мудом ҳалакит беришади?»

— Сенга айтаяпмиз, ув!

У энди даврага рўйи-рост ўгирилди. Рангги оқариб, бақириб бергиси келди. Аммо ўзини босди. Чўнтағидан сигарет олиб тутатди. Давра ахли бёжо тикилиб турарди. Қўлларида чийланган қарта, лабларида сигарет, тезроқ кораси ўчишини кутарди. Агар шу топда Асад бир оз қайсарланиб ғулдираб, сўкиниб кетса-да, фик этишмасди. Энг муҳими, кўздан йўколса бўлди. Шунинг билан уларнинг эгалик ҳуқуқлари тўла қаноатланиб, гўё ҳеч нарса бўлмагандек, яна ўз эрмакларига тутинишади. Мабодо, иш тескари кетса, бир-биридан пишсанг олиб, ташланиб қолишдан ҳам тойишмасди. Буни била туриб, Асад кетишини хоҳламади. Пастга тушиб аёлинни ҳам, эшигини қарс-курс очиб-ёпиб, кириб чиқаётган аламзада қўшни аёлниям қўришга тоқати йўқ эди. Шунингдек, бекорга кўчада санғишгаям хоҳиш сезмас, бирдан-бир истаги, узокдаги тоғлардан таскин ва ором олиб, неча кундирки аёвсиз қийнаётган дардисар суратни тезроқ битказиш, оғир руҳий юқдан ҳалос топиш эди. Бирок бу истагига даврадагилар изн бермас, тикондек нигоҳларини мисоли ўқдек кадаб, тезроқ даф бўлишини кутишарди. Турган гап, бунакада кўнгил оройиш топмайди. Умуман олганда, кўнгил хоҳиши ва эркинлигига зуғум қилишга уларнинг нима

хакки бор? Айвон умумники, ҳеч кимга хатлаб берилмаган, қайси гўрдан хўжайн чикиб қолишиди булар? Шу ўй хаёлидан ўтаркан Асад қайсарлик билан қайта тўсикка суюнди.

— Итлик ҳам эви билан-да, — деди ранжиган оҳангда, уларга қарамай. — Худди сотиб олгандай, бунча пешгирилик киласилар. Бирпас тураману кетаман. Ётиб қолмасман, ахир.

— Нима дединг? — жиккак йигит қўлидаги карта ни стол устига ташлаб, ўрнидан иргиб турди. Бирок шериклари кўзгалавермагач, қайта жойига чўкди. Ке-йин ёнидагиларга караб деди: — Эшитдингларми, ит деди бизни. Равил эшитса, нима деган одам бўламиз. Бундан кўра ўлганларинг дуруст демайдими. Равил келсин, тиккалай сўяди буни.

— Ув, эшитдингми, энди ўзингга кафан бичавер! Асад ич-ичидан хуруж килиб келаётган алам ва ғазабини базўр жиловлаб, даврага ярим ўгирилди.

— Равил деганинг анову барзангими? — деб сўради сўнг, жиккакка истехзоли тикилиб. Тасдиқ ишора сидан кейин, хафталик изтироби маддалаб, ёриш дара жасига етган эмасми, ҳар бир сўзини салмоқлаб, ғоят босиқлик билан деди:

— Тупураман ўшангаям, сенгаям! Агар туришим ёқмаётган бўлса, марҳамат, ўзларинг гум бўлларинг! Нега турибсанлар, жўнамайсанларми? Ё бу жой ёлғиз силарга дахлдор эканини исбот килинглару, мен кетай. Ахир ҳамма нарсаниям чеки-чегараси бор, бунча итланишларинг нимаси. Индамаган сайин бетга чопсанлар, а!

Итлар тўдаси бегона жинсдошларини кўрганда не ҳолатга тушишса, ҳозир ҳам шу ҳолат юзага келди. Аввалига ҳаммаси сакраб туришди. Бунақа пайтда ўпкаси йўқлар шошқалоқлик килиб, кўпинча биринчи зарбага дучор бўладилар. Жиззаки шерикларига ишониб, унга ҳезланиб келаркан, охирги дакиқада хатосини англаб қолди-да, ортга чекинди. Хавфсизрок жойда туриб олиб, том маънода аккиллай бошлади:

— Ҳали биз сенга ит бўлдикми?! Ҳали сен бизга тупурмокчи бўлдингми! Кўрсатамиз ҳозир сенга итликни!..

Шериклари Асадни тевараклашгач, у яна олдинга югуриб чиқди. Кўлларини Асаднинг нак бурни тагига тўлғаб, бўралаб сўкина бошлади. Кейин бунга ҳам қаноат этмай, тўсатдан унинг юзига тарсаки тортиб юборди. Тарсаки кучли эмасди-ю, лекин моҳияти ёмон эди. Асад хўрланиш арафасида турарди. Агар жиндек бўш келса, ё боплаб калтаклашади, ё шафқат килиб хайдаб солишади. Аслида иккиси ҳам бир гўр эди. Бу орада жиккак иккинчи тарсакини туширди.

— Мана сенга итлик! Яна керакми?! Мана бўлмаса!

Аммо у навбатдаги шапалокка улгуролмади. Сабри тугаб, миасига қон куйилган Асад чапдастлик билан унинг ёқасидан тутди-да, силтаб четга улоқтириб юборди. Сўнг бошқаларга ҳамла қилмокқа ўтди. Бироқ мушти каршисидаги ракибининг башарасига етмай, даҳшатли чинкириқдан ўнг ёнига ўгирилиб қарашга мажбур бўлди. Жиккак кўл-оёғи тарвақайлган ҳолда пастга шўнгигб борарди.

У нима килиб кўйганини дастлаб англаб етмади. Кейин хуши ўзига келиб, инграб юборди. Буни истамаганини айтиб, бехуда ғўлдиаркан, чинкириқдан кеиниоқ ҳамма ўзини йўлакка уриб айвонда ёлғиз қолганини ҳануз сезмасди. Сезгач эса тўсиққа манглайнини тираб, хийла туриб колди. Сўнгра аста бошини кўтарди. Фам инган нигохи узокларга қадалди. Аммо бу сафар тоғларни кўра олмади. Кўз ўнгини қоплаган туман ортиқ нарсани кўришга изн бермас, пастда эса кўл-оёғи тўрт томонга чўзилганча жиккак тош котиб ётарди.

## ҚИЗ ЎФИРЛАШ

— Ўлдираман!

Бу хайкирик янграганда, кўча одамга тўла эди. Хотин-халаж бир томон, эркаклар бир томон, ўртада бўйчанг, маъюсликка мойилроқ нигоҳига айни пайтда қатъият инган бир қиз, эгнидаги қизғиш узун кўйлаги бензиндан намланган, оёқлари тагида яримланган чёлак турарди. Кўлида нимочик гугурт қутиси, букилган бармоқлари орасида «ажал чўпи», кўзи эса эркак-

лар тўпида бехуда тиршанглётган акасида эди. Бутун авзойидан бирор кимса яқин келса, ўзига ўт кўйиб юбориши якъол сезилиб турарди.

Киз отасини кутмаган, диккати акасида эди. Ота хайкириб даврага кирганида, каттиқ бир сесканди-ю, лекин ўзини йўқотмади. Кизнинг гугурт тутган бармоклари бежо харакатланиб, якинлашманг, деган маънода отага тик каради. Оқарган лаблари титраб нимадир демокка чоғланди. Демади. Бунинг ўрнига кўлидаги чўпни гугурт сиртига тегизиб, кўкси тўла армону, ўшани ичига сиёдиролмаётгандек, чукур бир хўрсиниб кўйди.

Отани тутиб колишга хали улгуришмаганди. У бостириб келаётган жойида такка тўхтади. Ўзича оралиқ масофани чамалади. Улгуролмаслигини сезди. Фазабдан кутуриш даражасига етган эса-да, кизини алана ичидаги кўришни истамади. Ўзини тутиб колишларини, колган харакатларини одамларнинг кўзи учун шунчаки қилмок истади. Унгача манову тентак кизга худоинсоф бериб қолар, деб ўйлади. Кўз кирида сал нарида, икки норғул йигит кўлида типирчилаётган ўғлига разм солди. Алам ва номусдан корайиб кетган йигитнинг важохати ёмон эди. Кўйиб берса, қисни ёб-ютиб ташлагудек. Отанинг кўнглида унга нисбатан адоват кўзғалди: «Ўз фарзанди эмас-да, эмасам бунчалик осмонга сапчимасди». Аммо тек туриб бўлмасди. Тек колса, мана бу одамлар эртага нималар деб валдирамайди. Зора, қаватимдагилар қимиirlаса, деган умидда ёнини тимирскилади, пичогини кидирди. Кидира туриб тағин бўкирди.

— Ўлдираман!

Яланчланган пичокни кўриб, ёнидагилар хушёр тортиди. Ота бирпасда эркаклар куршовида колди. Кимдир билагидан махкам тутди, кимдир пичогини тортиб олди. Бунга сари у баттар ирғишилади. Акл ва фаросат исканжасида колган ғазаби кайтадан кўпчиди.

— Кўйворинглар, сўяман! Ўлдираман!

Ўлдириш хаёлида йўқ эса-да, ичидаги карама-карши куч бетиним курашарди. Бир ўйи, бор-да чавақча десабири, шайтонга хай бер, қизинг-ку, дерди. Кизини яхши кўрарди у. Даладан қайтганда, кутиб оладиге

нам, томорига қарайдиганам шу қизи эди. Аёли то ўрнидан қўзғалгунча, қизи хамма нарсани тахт қилиб кўярди. Туш пайтида кизининг мана шу хилдаги меҳрибончилигию, елиб-юғуришлари учунгина кайнок тупроқ кечиб, уйига қайтарди. Кизининг хизматидан хузурланиб, пешона ва қураклари терлаб-терлаб чой ичарди.

Бугун ҳам шу умидда уйига қайтганди. Аввал қизини омбортомдан — «уй қамоги»дан озод этиб, икки оғизгина насиҳат қилиб қўймоқчи эди. Назарида, қизи қилмишларидан пушаймон, узр сўрайдигандек эди. Бирок ҳовлисига етиб-етмай бутунлай ўзга манзара устидан чиқди. Бошда қайсар бу қизни боплаб таъзирини бериб қўймокчи бўлди. Бирок унинг ажал билан юзма-юз турганини кўриб, тайсаллаб қолди.

У ўғли каби кўпам иргишламаётган бўлса-да, лекин ўзини қутурган айикдай тутмокда эди. Аммо бу нарса теварагига зехн солишга халал бермасди.

Аёллар тўпида гумбаздай бўлиб турган аёли кироат билан қарғана, овози баланд ҳам эмас, паст ҳам — худди ҳаракатидек бир хил ва бир текис эди.

Аслида аёли қизга унчалик ачинмаётган эди. Бурч важиди чутилига эрк берарди. Буни сезган отанинг томорига ёнғоқдек нарса келиб такалди: «Ўгайлик курсин, — деди сассиз инграб. — Қозон бир эсада, кўнгли ҳар хил бўлиб колавераркан-да...»

У аёлидан нигоҳ узиб, қизига кўз солди. Қиз хануз шу созда туарар, эгни ва ҷелакдан бензин ҳовури кўтарилар, озгина учқундан қизининг жизғанак бўлиши турган гап эди.

— Эсингни йиғ, қизим, — деди у нихоят бемаъни ҳаракатдан тийиларкан, билакларини бўшатишини хаёлига келтирмаган холда. — Отанг тенги одам сенга эпми? Қара, соқоли селкиллаб турибди.

Ота ўз ёшига тенгсиган одам — Уста Расул кўча четидаги симёғоч ёнида, отининг юганидан тутган кўйи зўр ҳавотир оғушида турарди. Унинг ҳавотири қиздан эди. Агар ота-бала ғазаби ёлғиз ўзига қаратилганда ва қиз туйқусдан бу карорга келмаганида, у бу қадар ташвиш тортмаган, ҳарнеки балога пинак бузмай бет бўла оларди. Ҳозир у ноилож ахволда қолган, қизга

яқинлашмоқнинг асло иложи йўқ, гар яқинлашса, тўдадаги йигитлар қўзғалишар, оқибат, кизнинг жонига жабр бўларди. Қиз бошдаёқ, «бизга қотинсаларинг, ўзимга ўт қўяман», деб огохлантиргани боис, йигитлар сукутда турадилар. Ота Уста Расулни ўз тенгига мензаган эса-да, ўртадаги тафовут катта эди. Эндиғина киркни хатлаган бу банда, чиройли кузалган қоп-кора соқолини демаса, ёшига нисбатан хийла ёш кўринар, келбатидан эса от хурккилик эди.

— Берман кел, кизим, — деди йигитларнинг қўзғолишидан ҳадикланиб, тўда олдида нари-бери бориб-келаётган Ашур чўтири, қизни челакдан узоқлаштириш ниятида. — Кўрқма, силарга хеч ким тегмайди. Финг деганига ўзим товин. Берман кел.

Киз саркашона бош чайқаб, юзини тескари ўғирди.

— Кизим, — деди Ашур чўтири ўша-ўша босик оҳангда. — Емон ўйни хаёлингдан ҳайдада, гапимни эшиш.

Аммо жўралари қўлидан чиқолмай, гоҳ қизга, гоҳ Уста Расул томонга талпинаётган aka сўкиниб, гапни гапга қўшмасди.

— Қуйворинглар, тиккалай сўяман икковиниям!

Ашур чўтири ҳали нафасидан ўт қайтмаган дангал одам эмасми<sup>1</sup> типирчилаверганидан фарқ терга ботган аканинг бу қилифи охири жонига тегди.

— Бирпасга жим бўласанми, ё овозингни ўчириб қўяйми! — деди унинг қошига бориб.

— Ўлдираман! — aka лабига оқиб тушган терни пуфлади. — Тиккалай бўғизлайман!

— Улгурасан. — Ашур чўтири гарданини қашлаб, аёвсиз ёндираётган офтобга бир қараб қўйди-да, яна деди: — Ҳозирча бу ишни бизга қўйиб бер.

— Қўймайман!

Ашур чўтири нарилаётган жойида кескин изига қайрилиб, йигитнинг ёқасидан тутди.

— Менга кара, шервачча! — деди таҳдид тўла оҳангда. — Сенга ўхшаган сўйғичларнинг патини хўп юлганман! Чотига чивин ёпишган танадай типирчиламасдан, бир гапга жавоб бер. Нега синглинг уйдан безиб кетаяпти, а?

Ашур чўтирининг гап оҳангидан ўзига нисбатан хай-

риҳоҳликка ўхшаш ниманидир хис этган киз ялт этиб улар томон боқаркан, акасини унинг чангалида кўриб, аввалига жиндеқ шодлангандай бўлди. Кейин акасидан еган калтаклариям эсидаң чиқиб, унга ичи ачиди. — Тегманг, — деб бақиргиси келди. Ҳайтовур, Ашур чўтирик кўпда зуғумланмай, бир-икки силтov билан чекланди.

— Нега безди уйдан? — дея саволини қайтарди, кўлини бўшатмай.

— Буни ўзидан сўранг, — aka унинг чайир бармоқ, ларидан кутулишга уринди. — Кўйворинг!

— Унда сўрашга бер-да.

— Сўяман!

— Ўчири-ий!

— Ўлдираман!

— Ҳозир кўл-оёғингни чантиб ташлайман.

— Чидаёлмайман!

— Ўлмайсан! Агар тилингни тиймасанг, ўттиз икки тишингни уриб синдираман! Аччувимни чиқарма кўп!

Ака унинг айик билан олишувдан қолган бўйни ва чаккасидаги узун-узун чандиқларга боқаркан, юлкинишни бас қилди.

Ашур чўтири залворли одимлар билан нари кетаркан, куёшнинг қайнок таптидан норозилангандай, яна кўкка қараб қўйди-да, яктагининг ёқасидан тутиб елпинди. Шунда кўксидаги кўш чандик кўриниб кетди.

— Хўш, қизим, — деди сўнг беихтиёр гувранишга тушган отанинг бикинига бир тутиб. — Анову тусинг ўчкур чавандоз яқинда неваралик бўлганидан хабаринг борми? Бу ярамас, отагина эмас, бобо бўлди энди. Буни биларсан балки?

Киз, биламан, деган маънода бош иргади.

— Билсанг, яхши, — Ашур чўтири Уста Расул томонга қарамасликка тиришиб, гавдасига мос йўғон ва салобатли овозда давом этди: — Ўйлабманки, билмайсан. Билганинг-ку тузук-а, лекин... манову килинг фалати чиқаяпти-да, қизим. Аллақандай қари тақани деб ёш жонингга жабр килишинг нимаси, а? Шдайман, сен аста ҳовлига кираколсанг, бу билан ўзмиз секин гаплашиб қўйсак. Иккинчи дафъя ёш кибларнинг бошини айлантириб юрмасин деймиз-да, эна қизим.

— У кишига котинсангиз... — Киз ютиниб, кўлида-  
ги гугурт қутисини очиб-ёпти. — Ҳазиллашманг мен  
 билан, амаки.

— Қизим, миянгга иссиқ ўтганга ўхшайди, — деди  
Ашур чўтири янада босиклик билан. — Салқин уйга  
кириб, би-ир ўйлаб кўрсанг, яхши бўлармиди дейман-  
да.

— Ўйлаб кўрганман, амаки.

— Қайсар бўлма, қизим.

— Бўлганим шу.

— Ҳар холда отанг тенги одамман-а.

— Ҳурмат қиласман сизни, факат ўйлимга кўнда-  
ланг бўлманг, амаки.

— Тўғаноқ бўлмоқдан худо асрасин, қизим, —  
ѓапи икки бўлаётганидан оғригандай, Ашур чўтири хўрси-  
ниб қўйди. — Лекин тенг-тенги билан, тезак қопи  
 билан деган гапам бор-да.

— Тенгим шу киши.

— Шу гапинг гапми, қизим?

Киз тасдиқ маъносида бош эгди.

Ашур чўтири ўйчан туриб қолди. Ўртага тушган  
оғир сукунат хотинлардан бирининг аччиқ пичинги  
 билан бузилди. Яна ғала-ғовур қўпти. Қизнинг акаси  
тағин юлкиниб кўрди. Уни тезда босиб қўйдилар. Она  
 бир меъёрда қарғанишга тушди. Энди унинг карғишла-  
ри Уста Расулга қаратилганди.

— Бас! — Ашур чўтири ер тепиниб, ўнг қўлини  
баланд кўтарди.

Тағин жимлик чўқ. Кимdir пик этиб кулди. Ашур  
чўтири кулги эгасини бехуда қидираркан, бирдан тува-  
киб, симёғоч томонга ўгирилди.

— Уста Расул! — деди баланд овозда. — Уста  
 бўлмай, ўл! Чавандоз номига қора тортмай, ўл! Қизни  
 нима кип қўйдинг?! Нима деб бошини айлантирдинг?

— Тўғри, устаман, озми-кўпми улок ҳам чопиб  
 тураман, — деди Уста Расул иссиқдан бетоқатланаёт-  
 ган отини тинчтишга уриниб. — Лекин бош айланти-  
 риши касб қимаганман.

— Эса, бу киз нима деяпти?

— Ҳақ гапга қийшиқ тўн бичманг, ака.

— Қизинг тенги... уялмадингми, уйинг куйгур.

- Уяладиган нима иш қипман?
- Бу нимаси энди? — Ашур чўтирир қизга имо килди.
- Бандаси кўнгил берса, мен нима қилай?
- Бу-ку ёш, сен гўрсўхтани қайси ажина чалди, а?
- Кесак эмасман-ку, ака.
- Тенгингни топсанг ўлармидинг.
- Кўнгил-чи.
- Кўнглинг қурсин сени, — Ашур чўтирир ғудраниб сўкинди. — Караб турсам, сув сен томондан лойқаланганга ўхшайди.
- Нима деб ўйласангиз ўйлайверинг.
- Балки ими-жимида кетарсан?
- Буни ташлаб-а, — Уста Расулнинг юзи бир тус гезарди. — Агар бу, кет, деса... Яхшиси, кўнгил ишига аралашманг, ака. Қишлоғингиз бир бўлиб тепкиласада, қайтмайман бу ишдан.
- Қиз Уста Расулга миннатдор қараб қўйди. Бошқаларга яққол сезилиб турган ёшдаги фаркни у пайқамас, унинг учун дунёда Уста Расулдан навқирон, гўзал одам йўқ эди. Ўзига қолса, унинг кенг кўксига бошини қўйиб, бекиёс кучини хис этган бўларди-ю, бунга атрофдагилар изн бермасди. Қизик, унинг туйфуси билан одамларнинг нима иши бор экан-а?
- Кўркмаслигингни биламан, лекин аҳмоқлигингни билмас эканман.
- Тилга эрк берманг, ака, — Уста Расулнинг овози ўзгарди. — Овга бирга чиқиб, бирга от чоплан одамлармиз. Андишанинг бети тупурманг.
- Қизинг шу кўйга тушса, берармидинг?
- Берардим.
- Кап-катта одамга-я?
- Берардим, ака.
- Нега унда отасининг олдидан ўтмай, буйтиб дов тўкиб юрибсан?
- Эшитмагандай гапирманг-да энди? — Уста Расул норозиланди. — Бир эмас, бир неча марта ўтганман. Окибати мана, кизни кишангага солиб қўйишди.
- Кутқаргани келдинги?
- Опкетгани.
- Калтак еб ўлмокчимисан дейман?

— Калтакдан кўрқадиган банда эмасман. Кўрқканимда кеп ўтирасдим.

— Қара, хешлари ейман деяпти.

Киз тўдани кўздан кечирди. Кейин Уста Расулга қаради. Калтак еганини кўргандан кўра, ўлганим яхши! У киши томонга факат жасадимни ҳатлаб ўтасанлар! Бу ўй хаёлидан ўтаркан, ҳаётида илк бор аёл жинсининг нозик яратилганидан ўкинди. Агар анову Ашур чўтирай бахайбату бақувват бўлганида, гугуртга ёпишмай, Уста Расулнинг қаватида енг химариб турмасмиди.

— Еса, суягим қолади-ку... — деди Уста Расул бошини сараклаётган отининг юганидан калтарок тутаркан. — Сўйдим шу қизни, ака!

— Шарм деган нарса қолмабди сенда.

— Агар ёшимни назарда тутаётган бўлсангиз, мени йигирма беш яшар чоғланг.

Кизнинг кўзига у бундан ҳам ёш кўринди.

— Бетингга бўёқ сурмайсан-ку, — Ашур чўтирилдинг баттар энсаси котди.

— Сиз кувватдан келинг, ғайратдан гапиринг.

— Ғайратингга хўқиз тиз чўқади. Лекин ҳар иш ҳам эви билан-да.

— Нима қиласай, айни қирчиллама ёшимда кўнгил маъшуқа тилади, — Уста Расул забардаст елкаларини ғалати учирди. — Билмайсиз, шу қизни деб тунлари тиконга ағанаб чикаман. Кўнгил иши ёмон экан. Энди билсам, раҳматли кампиримгә кўнгил қўймаганаканман. Суярман деб ўйларканману, суйиш нелигини билмас эканман.

— Нима қил, дейсан?

— Қизни беринглар менга.

Аёллар тўвидан она тилга кирди. Ўша-ўша гумбаздай бўлиб турганича сўзлар тизмасини эринмай эша бошлади.

— Сўймай, илойим соколингга ўт тушсин сени! Сўйдим деган тилларингга куйдиргилар чиксин сени! Илойим, аёлингни арвоҳи чиркиллаб ёқанинангга ёпишишин сени!

Киз онасига истеҳзоли тикилди. Унинг бу қадар туслана олишидан ажабланди.

Ашур чўтири «ўчир» демаганида, у халивери тинчи масди. Унинг биринчи замзамасидаёқ аёлнинг уни ўчаркан, «қироат»дан шипшишга ўтди. Кўзларини лўк килиб, бир хаёли, қиз меники, нега сиз кайвонилик киласиз, дегиси келди-ю, лекин ботинмади. Шундан сўнг иссикдан жуда лоҳас бўлаётганини сезиб, кўча бўйидаги дарахт кўланкасига илҳак қараб қўйди. Жилишни ўйламади. Юз берган воқеага нисбатан муносабати кишилар назарида эканини яхши биларди. Билгани боис, ўзини куйинчак онадек кўрсатмоққа тиришарди.

Эркаклар кўлидан чиқишга уриниб, ўқтин-ўқтин тиршанглаб кўяётган ота қизига ғазаб билан тикиларкан, шу дамгача унча пайқамаган бир ҳолдан ажабланди. У қизнинг қатъият инган чехрасида ўз момосининг киёфасини кўриб қолди. Раҳматли момоси чапдаст ва чўрткесар эди. Тўрт қизини тўрт қишлоққа узатиб, ўзи отда айланиб, уларнинг ҳолидан хабар олиб юрарди. Ота унинг катта қизидан эди. Момо ўлгунча отдан тушмади. Унинг қишлоққа кириб келиши узоқданок сезиларди. Аввал бир зайлда туёқ товуши, сўнг қир бетида суворийнинг ўзи пайдо бўларди. Беш-олти рўмол устидан ташланган бошидаги кордек оплоқ киймонасининг этаклари белигача тушган, боши тик, комати адл, қарашлари шиддатли, бамисоли қарчигайдай елиб келаверарди. Момога ҳамманинг ҳаваси келарди. Ота эса ундан болаларча фахранарди. Бироқ момо уни зигирча ёқтирамасди: «Бу улинг бунча пурриқ<sup>1</sup>, — дерди ҳар келганда қизига, пешонаси тиришиб. — Ул дегани чакмоқдай чакнаб турса экан. Бизга тортмаган бунинг. Асли қизлигингда ўзинг ҳам гўр эмасдинг. Эчки сузсаям йиғлаб ўтирадинг». Момога гап қайтариб бўлмасди. Айтгани-айтган, дегани-деган шиддаткор момо эди. Жаҳли қўзиса, қизлари тугул куёвлари ҳам лаббайлаб туришарди.

Ота қизнинг жиддий ва ўқтам карашларида момосини кўриб тураркан, Уста Расулга ҳаваси келаётганини туйқусдан пайқаб қолди. Бундан қаттиқ ғижинди. Ала-мидан лабини тишлади. Ўзига қолса, мўйловини юлар-

<sup>1</sup> П у р р и к — лапашанг.

дию, аммо кўллари банди эди. Лекин ҳаваси келаётгани аниқ эди. Негаки, кўнгил дегани нелигини бир пайтлар бошидан кечирган. Иккинчи аёлига уйлангунча Чукуркудуқлик бир қизга кўнгил қўйганди. Қиз ройиш билдиргач эса, журъати етмай, тенг-тенги билан дея, Салим сариқнинг бевасига уйланганди. Қизнинг баджахл акаларидан хайиқиб, унга оғиз солишига ботинмаганди. Бу аёлидан бир неча фарзанд кўриб, ёши бир жойга етибдики, хануз ўша қизни эслаб, ботбот хўрсиниб қўяди. Бироқ шу топда буни тан олгиси келмас, Уста Расулнинг журъатини бехаёликка йўйиб, кўзимга чўп сукди-я, номард, деб ич-ичидан янарди. Бу ҳол қандай содир бўлганини идрок этолмай қийналарди: «Нимадан бошланди ўзи бу? Ҳа... уйга уста солмай мен ўлай. Ахир бутун машмаша шундан бошланмадими? Манову ярамас бир ой уйимда иш қилди. Қизим унинг нон-чойига қаради. Шунда топишган булат. Лекин қизим унинг нимасига учди экан?»

Бу савол турганларнинг ҳаммасини бошида айланарди. Бундан фақат бир йигитгина мустасно, воқеа сабабини яхши биларди у. Агар, айни топда, одамлар гув этиб қўзғолгудек бўлса, Уста Расулга ташланишният-ташланмаслигиниям билмай, калласи гаранг эди. Бу йигит қизнинг собиқ синфдоши Рауф новча эди. Қизга ўнлаб мактуб ёзиб, бирор сатр жавоб ололмагани етмагандек, бир куни кўшни қишлоқлик Уста Расул қизга совчи қўйганини эшитиб, ҳайратдан донг қотиб қолганди. Уста Расулнинг қизга эгалик қила олишини тасаввурига сифдиrolмагандек, бугунги воқеани ҳам мутлақо кутмаганди. Қаранг, устаси тушмагур қизни тутқундан халос этибгина қолмай, опкетмоқчи ҳам бўлиби. Онаси лапанглаб кўчага югуриб ҷиқибдида, бошига одам йигибди. Вазият чатоқлашганини сезган қиз кўп ўйлаб турмай, кўшникидан бензин олиб чиқаётган боланинг қўлидан челакни юлқиб олибди. Гугурт каердан пайдо бўлди, худо билади. Агар бизга яқин келсаларинг, ўзимга ўт қўяман, деб огоҳ этибди.

Рауф новча қизнинг жувонмардлигини яхши билади. «Совчи» воқеасидан сўнг қизга ўзича насиҳат қилгани борган. Ёлғиз жийда тагида сухбатлашган. Янгича урфда ўстирган узун соchlарини ортга силкиб таш-

лаб, қизга ғоят ачиниб, Уста Расулни эса ерга уриб деган: «Чол сенга эпми, Нозима!» Ботаётган күёшга хаёлчан термилиб турган қизнинг юзига истехзоли табассум калкиб, унга ажабсингандай қараган: «Кўздан копсан шекилли!» Йигит турган ерида товонида чирайланиб, яна унга рўпарў бўларкан: «Синфимизда энг сулув қизлардан бири эдинг сен, — деган бўғрикиб, қўлларини пахса қилиб. — Шунча йигит турганда, катта ёшли одамни бошингга урасанми, тентак». Қиз уни сухбатига арзитмай, юзини терс ўғиргач, йигит гоҳ хаяжонланиб, гоҳ ғазабланиб, узундан-узун нутқ ирод этганди, орада ўз мухаббатини ҳам қистириб-қистириб ўтган. Қиздан садо чикавермагач, агар устага тегсанг, униям, ўзимниям бир бало қиласан, дея оғиз кўпиртирган. Шундан сўнггина қиз унга бир ён ўтирилган, кўзлари оловланиб деган: «Кўлингдан келмайди бу иш. Жонинг ширин сени. Яхши кўраман деб чиранасану, лекин кўпроқ ўзингни яхши кўрасан. Ўзингдек мухаббатинг ҳам худбин. У киши эса тўғри сўз, мард одам. Эзилган қиз кимга суянади, мардга суянади. Силар омонатсилар, майда-чўйдасилар. Чиранишдан бошқасига ярамайсилар». Йигит аламидан иргишилаган, мардлигини исбот этмокчилик, кўкракларига уриб алланималарни алжиган, аммо қиз сухбатга ортиқ ройиш бермай, мухаббатга ҳали ёшлик киласан, Рауф, дея уни боплаб тузлаб кетган.

Рауф новча қизнинг журъати-ю, Уста Расулнинг дадиллигидан хайратланиб тураркан, бу хил иш кўлидан келмаслигини сезгани сайин, уларга нисбатан хайриҳоҳлиги ортиб борарди.

Бу орада Ашур чўтири асосий масалага ўтганди.

— Қиз сени деяпти. Бунга ўзинг бир нима де, Уста Расул. Ҳарна иш тинчгина ҳал бўлсин. Ўзим сенга бошқасини топиб бераман.

— Менга шуниси керак, ака.

— Фалча бўлма, Расул.

— Топадиганингизни ўзингиз ижаблаб олаверинг, мен шуни деганман.

— Орсизланма, Расул.

— Обрўйингиз бор, яхшиси, отасидан розилик оберинг.

— Йўқ! — Ота тук босган ингичка бўйини олдинга чўзиб, ер депсинди. — Бекорларни айтибсан!

Отага қизнинг раҳми келди. Аммо шафкат хисси кандай тез келган бўлса, шу тарзда изсиз йўқолди. Вазият ўта танг эса-да, у чекинмоқни хаёлига келтирмасди. Нарида тоғдай бўлиб турган Уста Расул уни бу тангликдан халос этиб, номаълум ва сирли келажак сари етаклай олишига ҳануз ишонарди.

— Агар қиз гугурт тутмаганда, сен қари ошиқнинг дабдалангни чиқариб ташлардига! — деди эркаклар тўвидан кимдир.

Ашур чўтириб чўчиб кутган ҳол юзага кела бошлаганди. Шунинг-чун, у эркаклар томон бетланиб, қизим сенга гапираман, келиним сен эшиит, қабилида жizzакироқ бир йигитга тирғалди.

— Нима, биз ўлдикми? — деди. — Ё сондан чиқиб қолдикми? Унда, марҳамат, ўзларинг ҳал қилинглар. Бир чақалик обрўйимиз йўқ экан, нима қиламиз оёқ остида ўралашиб.

Каттарок ёшдагилар йигитни турткилаб, четга чиқариб қўйишиди. Шўрлик йигитнинг, оғиз очганим йўқку, деб тавалло қилишларигаям эътибор беришмади.

Ашур чўтириб иddaоли қараш билан эркакларни бир-бир кўздан кечириб чиққач, тағин Уста Расулга юзланди.

— Кет, Расул! — деди бир қадар жаҳлланиб. — Обрўйинг борида жўнаб қол!

— Мен обрў талаб қилиб келмадим ака.

— Гапни кўпайтирма, кет!

— Демак, бермайсизлар?

— Йўқ, бермаймиз, — Ашур чўтириб яна кескинлашди. — Чунки ота норози.

— Бу банданинг ҳоли нима кечади? — Уста Расул қизга ишора қилди.

— Ёш нарса, йиғлаб-йиғлаб тинчиб кетади.

— Омбортомда-я?

— Нима омбортомда?

— Омбортомда йиғлаб-йиғлаб, а...

— Қўл тегиздирмайман. Бу ёғини менга қўйиб бер.

— Кўнгил иши нима бўлади?

— Одамни коғир қилма, Расул, — Ашур чўтири

вазият таранглашаётганидан ҳадикда эди. Йигитлар яна гурпанглашга тушганини елкасида хис килиб турарди. Шунингчун, кейинги гапини ўтинч тўла охангда айтди: — Эсли одамсан, кейин бафуржа гаплашамиз. Ҳозир кетгин, иним.

Тўдадаги ҳолат қизнинг кўз қарашларида тўла акс этиб турарди. Йигитлар тинчланганда, хотиржамланар, бежоланганда эса гугурт тутган бармоқлари қатъий ҳаракатланиб, кўзларидан учқун чакнарди: «Қани, бирортанг яқин келиб кўр-чи!» Бундан ота ҳам ташвишга тушди. У, ўзларингни босинглар, деган илинжда теварагидагиларга жавдираса-да, ўқтин-ўқтин тўлғаниб кўйишни барибир канда қилмасди. Ака эса бамисоли камон ўқидек таранг туар, қани энди, манову ярамасларни кунпая-кун килиб ташласа!

Уста Расул тўдага зимдан назар соларкан, ортиқча эзмаланиши қизга зиён етказишини англаб, оғир нигоҳини унга тикди.

— Бундай қилма, Нозима, — деди илтижоли охангда.

Киз унга ажабланиб бокди: «Наҳотки, иккиланаяпсиз? Сиздай одам-а?

— Сен кўтсанг, бари яхши бўлади, — деди бу ёқда Ашур чўтири.

Уста Расул лабларини қаттиқ қимтиганча, ерга тикилиб қолди. Сўнг аста бошини кўтариб, яна тўпга юзланди. Хайриҳоҳ нигоҳларни Ҳидиргандай, шу созда бирпас тек қолди. Кейин негадир, Ашур чўтирга ғалати қараш қилди-да, ўнг ён ўгирилиб, манглайнини эгар қошига тиради. Чуқур нафас олди. Бақувват елкалари енгил титраб, от ёлига бармоқ ботирди. Бармоқлари тугун тортди. Жони оғриган от бетоқатланди.

Бир оздан сўнг у ҳолатини ўзгартирмаган кўйи, секин бошини кўтариб, бу томон бурди. Кўзларида ёввойи ўт ёлқинланиб, нигоҳи қизда қотди. Бу ҳол узоқ давом этмади. У, кўзи қизда, енгил сакраб отга минди. Кетадиган бўлди деб, ҳамма енгил нафас олди. Киз шўрликнинг қўллари кўксида қолди. Бармоқлари жонсизланиб, гугурт челак ёнига тушди. Катта очилган кўзлари ёшланиб, унда ўқинч ва алам акс этди: «Наҳотки!..»

От устига бамисоли бургутдай қўнган Уста Расул дарров жўнай қолмади. Эгнидаги жийдаси барларини такимига йиғиштира туриб, одамларга юзланаркан, ўқтамлик барқ уриб турган чехрасидан қизиллик ариб оқаринқиради. Кўз қарашларига одатдагидек мағурлик иниб, қамчисини ўнгай тутди. Сўнг от бошини хиёл ортга бурган бўлди. У видолашаётгандек, елкаси оша қараб қўяркан, туйкусдан ҳайкирганча отга қамчи босди. Югани каттиқ тортилган от юқорига сапчиркан, шу аснода чавандознинг амрига бўйсуниб, одамларга бетланди. Туёқлар зарбидан тупрок қўпчиб, чанг кўтарилиди. Уста Расул яна ҳайкирганча ўртага от солди-да, хануз ҳайкалдай қотиб турган қизни илиб кочди.

Буни сира кутмаган эркаклар довдираб қолишиди. Хотинлар қий-чув кўтаришиди. Қизнинг отаси анграйди. Акаси ўқдек олға ташланди-ю, бор бўйича гулилаб тушди. Уни Рауф новча чалиб юборганди. Ашур чўтири унинг бу қилифини маъқул топиб, киши билмас, кўз қисиб қўди.

Бу пайтда тўриқ қир бетига ўрлаган, чавандознинг жийдаси барлари қизнинг қизғиши қўйлаги этагига айкашиб, шамолда хилпираб борарди.

## ОЛИМ ЎФИЛ

Ўфил, фалончи чолнинг ўртанчиси олим бўпти, деган гапнинг эртаси кишлоққа кириб келди. Бу пайтда Шайман чол эндиғина сомондан қайтиб, айвонда чалоп ичиб ўтиради. Тўнг чехрасига иш қайнаган кезлари юзланмиш тажанглик инган, ора-сира гапириниб, оғиздаги лукмасини ошиқмайроқ чайнаркан, кечгача даштга яна икки-уч бор қатнашни ўйларди: «Ҳафта-ўн кун шу созда қимирласак, бу ёқдан Вали гуппи озгина химмат қилса, етиб қолар шу билан. Ишқилиб, киш оёғи қоп кўтариб бировга ялингилик қилмасин».

Тик офтобдан тандирдай қизиган ховлида ўфил пайдо бўлганида, чол шу хил ўйлар билан банд эди. Ўғлини кўргач, одатига хос жиддий тарзда кампирига им қокди.

— Мехмонга кара!

Ўғлига кўзи тушган кампир, азбаройи қувонганидан, жойидан қўзғалаётib, чойнакни ағдариб юборди. Чол парво қилмади. Ўғлини соғинган, лекин аксарият оталар каби сир бермай ўтираверди. Ҳамиша ўғли келиб кўришмоққа қўл чўзгандан кейингина ўрнидан туриб, бағрига босарди уни. Ортиқча хаяжону ялаб-юлқашни ёмон кўради у. Бирок бу сафар узок ўтиромади, ўғлининг олимлиги бирдан эсига тушиб қолиб, ўзи сезмаган ҳолда ирғиб ўрнидан турди. Ялангоёк ховлига тушди. Минг кўйли бойга рўпарў бўлган юпундай қимтиниброк ўғлига яқинлашди. Кучоклашишдан аввал унга бошдан-оёқ разм солишга улгурди. Бир оз озганини демаса, ўғли ҳеч ўзгармабди. Ўғил отани дадил бағрига тортаркан, меҳри товланиб койинди: «Ҳалиям ер тирнаб юрибсизми, ота!.. Чол ситам тортган одамдек минғирлади: «Тирикчилик-да, болам!» Бунга жавобан ўғил унинг эгнига илашган хас-хашакларни терган, қоқкан бўлди. Бундан чолнинг кўнгли ўси. Бир вактлар туман катталаридан бири елкасини қоқиб мактаганида ҳам шу ҳисни туйган эди. Юраги ҳаприкиб, ўғлига соғинчла боқаркан, катта одам бўлгани чинга ўхшайди деб ўйлайди. Боя ялпайиб ўтирмай, дарров пешвоз чиқа қолмаганидан хижолат тортди ҳам.

Бирор соатлардан сўнг, ўғлининг кёлганидан беҳад димоги чоғланган чол эшак аравасини шалдиратиб, даштга жўнади. Адирда сомон тўдалаётган кенжা ўғил билан бирга қайтмоқчи эди. Нега деганда, мёҳмон шарофати туфайли ховлида иш кўпайган, кечгача ҳам-масига улгуриш зарур эди. Аммо қишлоқдан чиқаверишдаги жувозхона олдида тўхтамасдан ўтолмади. Ёнғоқ тагидаги узун харида катор тизилишиб ўтирган чоллар томон юаркан, тезда жиддий хатога йўл кўйганини фахмлаб колди. Қадам олишлари олим одамнинг отасига муносиб эмасди. Қанақа юриш керак, буниям билмасди. Бошда раис юриш қилиб кўрди: қўллари ортда, оёқ учлари икки ёкка керилган... Ўн-ўн беш одим юрмай, тиззалари шиқирлаб, чотига оғриқ кирди. Сўнг товоңларини кўтариброк ҳаракатланди. Туяқушга ўхшаб лўкиллаб, юриши хунук чиқди. Охири ғоз .

юришни маъқул топиб, шу созда чолларга яқинлашиди.

Назарида, чоллар ўғли ҳақида гапираётгандек эди. Яқин бориб қарасаки, кундалик минғир-минғир. Шайман чол уларни гумроҳ санаб, ичида янди. Таклиф этилган ўринга чўқмай, фўддайиб тураверди. Олим одамнинг отаси келса-ю, буларнинг ялпайиб ўтиришлари ни қара. Аммо шу пайт Ўрқ чол гапириб қолди.

— Улингиз олим бўпти деб эшитди, — деди куртдек бошини у томон буриб. — Қандай чикин олим бўпти, а, Шайманвой?

«Олим» дегани турли хил бўлишини Шайман чол энди эшитиб туарди. Ажабланди.

— Қандай чикини нимаси, — деди сўнг қаншари остидан иddaоли тикилиб. — Олим дегани битта бўлади-да.

— Улингиз кишлоқнинг олди бўлди, — дея гапга аралашди Тожи чол унга хавасланиб боқаркан. — Ҳамманинг оғзида шу гап. Вактида тузук ўқимагансизлар-да деб кеча барини тўзғитиб сўқдим.

— Бизда ўқишга хавас йўқ, — Ўрқ чол тили тагига нос ташлаб, кафтини тиззасига суртди. — Ана шўрқудукликлар, итидан-битигача ўқиган. Районди тус катталариям шулардан.

— Лекин уларда олим йўқ, — деди Кудрат чол иягини хассасига тираб. — Ўқишга келсак, анову Эшқул чўлоқнинг боласиям ўқиган-да. Ҳалиям тузук укол қилишни билмайди. Қайтамга келини дуруст, чимиllатмасдан қиласди.

— Чин гап, олим чиқмаган улардан, — уни қувватлади Ўрқ чол. — Эшқулнинг боласи бачалигидаям гўр эмасди. Кўринган билан тебалашиб, энди дўхтир бўпти. Сала чўтирининг кампириниям ўша ўлдирган.

— Үндай деманг, эшитган қулоққа ёмон.

— Кампирни районди дўхтирлари ўлдирмадими?

— Районга етганда килдай жони қолган экан, — Ўрқ чол ҳассасини қия тутиб, ўнг оёғини унинг устидан ошириди. — Айбдор Эшқулнинг боласи. Тузалиб кетади деб, уйида уч кун саклаган. Районга кеч оборишган. Оборгандага кампирнинг ҳаром ичаги ёрилиб бўлган экан. Сала чўтири буни тушунмай районди

дўхтирлари билан ёқалашиб юрибди. Мен айтдим, кампирингди район дўхтирлари эмас, Эшқулнинг ули ўлдирган деб. Эшқулни ули нима дебди денг. Шодикул машинасини луқшитиб ҳайдагани учун кампирни ичаги ёрилиб кетибди дебди. Сала чўтири, мошинангга ўт кўяман деб, бир ғовим Шодикулга ҳезланиб юрди-да, сўнг тинчиб кетди. Кампирини йилини ўтказиб, Абройнинг бевасига уйланмокчи эмиш.

— Абройнинг беваси уни эр қилмайди, — деди кимдир. — Байталдай тирсиллаган нарса, Сала чўтири ни писанд қиласмиди.

— Кўнгил-да...

— Сала чўтири ўзи бўлмайдиган одам, — деди Кудрат чол. — Кеча, эшитдингизми, Шайман чолнинг ўртансиси олим бўпти десам, нима, менга бир сўм берармиди деб, ёмо-он тўрсиллаб берди. Қишлоғингдан олим чиқиб, шўркудуқликларнинг олдида тилимиз устун бўлганидан кувонмайсанми, аҳмок, деб ўзиниям тоза тузладим. Баданини тук босган бу қари маймунга хотини кандай чидаган экан, а?

Бу гапдан Шайман чолнинг ичи ёнди. Сала чолнинг ҳовлиси тарафга ёвқараш қиласкан, деди:

— Ҳали шундай дедими? Даشتдан қайтай, тилини узуб қўлига бераман!

— Олим одамнинг отасига ярашмайди бу ишингиз, — деди Ўроқ чол бошини чайқаб. — Оғир бўлинг.

— Кичкина одаммассиз энди, — деди Кудрат чол. — Майдалар билан тенг бўлманг.

Мактов хуш ёкиб, Шайман чол, энди ўтирсам бўлар, деб ўйлади. Бориб Поён чолнинг ёнига чўкди. Ўзини бепарво тутишга уринсада, ияги ўз-ўзидан олдинга чўзилиб, ичидан мамнунлигини билдириб қўйди.

— Ўзиям улингиз тоза ўқиди, а, Шайманвой, — деди Поён чол катордан қолмаслик учунгина гап котиб. — Бирор ўн-ўн беш йил ўқиди-ёв.

— Ха, энди, эсини танибдики, шаҳарда, — деди Шайман чол ясама лоқайдлик билан. — У олим бўлмай, мен бўлайми.

— Сиз бундай нописанд бўлманг, Шайманвой.

— Кувонинг.

— Кўкракни кериб юринг.

— Улларимди бири шундай бўлганида, силар билан гаплашиб ҳам ўтирасдим.

— Ҳамманинг оғзида шу гап. Улингиз катта одамга ўхшайди. Одамлар бекорга гапирмайди.

-- Муаллимлар талашиб юрганимиш, асли у менинг шогирдим эди деб.

Чоллар узун-қиска кулишди.

— Олимлиги яхшику-я, кишлоққа кам келиши ёмонда, — дея бирдан ҳасратга тушди Шайман чол. — Йилда қорасини бир кўрсатади. Бундай бўлмайди да энди. Бу сафар яхшилаб бир терграб қўймоқчиман. Сўкиб қўймасам бу бола жуда шитираб кетаяпти.

— Сўкманг сиз, — Ўроқ чол унга чеграйиб каради. — Ҳадеганда чопиб келаверса, олим бўлармиди. Олимлик сизга осонми. Осон бўлса, ҳаммаям бўлмасмиди. Эсимни танибманки, кишлоғимиздан энди олим чикиши.

— «Олим» дегани нима ўзи, а? — деди боядан бери гапга қўшилолмай, бир чеккада мусичадай беозоргина ўтирган Садир чол, кўзларини пирпиратиб. — Кечадан бери шу гапни эшитаману, нималигига хеч фахмим етмаяпти.

«Олим» нелигини бошқалар ҳам билмасди-ю, лекин сўздаги мавхумлик улар онгидаги сирли ва гаройиб тасаввур уйғотгани боис, унинг маъноси ҳакида хеч ким бош қотирмас, қолаверса, юзага келган тасаввурни сўзда ифода этмоқ осон эмасди. Ҳамма бир-бирига жавдираф турганида, ҳамиша ўзини билоғон чоғлаб, бирорвга сўз бермай юрадиган Ўроқ чолнинг ўқтам овози сукунатни бузди.

— Муллаларнинг мулласи дегани.

— Шароф мулланинг уйи куйибди-да унда, — деди Садир чол ачиниб.

— Нега?

— Бу ёқда муллаларнинг мулласи турганда, кишлоқда унга нон қоладими энди.

— Ундаи чикин мулла эмас у, — унинг нодонлигидан Ўроқ чолнинг жаҳли қўзиди. — Профессир. Шайманвойнинг ули профессир бўлган.

— Ана эшитдингизми? — Қодир чолнинг овози давра узра қалкиган умум хитобни босиб тушди. —

Эшитдингизми, Шайманвой? Бундан кейин тезликни бас қилинг. Олим одамнинг отасига шашшаклик ярашмайди. Тунов куни кенжангизга қамчи ўқталиб юрибсиз. Шу иш сизга эпми. Кўрган кўз демайдими, ули олим бўлсаям, отаси қип-қизил жинни экан деб. Бундан сўғин босиқ бўлинг, ха.

— Шайманвой чатоқ, — деди хари четида илиниб ўтирган Олим пакана. — Дамида ош пиширади бу киши. Бизди уллар мендан сира ҳайкишмайди. Болани асли бачалигидан кўзини кўркитиб олиш керак экан. Эсайгач, тарсаки тугул қамчиданам кўркмай кўйишаркан.

— Энди сиз аёлга ўхшаган одамсиз-да, Олимвой,— деди Ўроқ чол. — Бундай отадан бола кўркмайди.

Асосий масала бир четда колиб, улар айтишиб кетиши. Олим пакана ўзининг эркаклигини пеш қилиш учун туриб сўкиша бошлади. Шайман чол унинг пачоқ жуссасига боқаркан, Ўроқ чолни ҳақ деб билди. Сўнг унинг диққатини дала йўлини чангитиб келаётган қора торти. Йўл бўйидаги эшаги бетоқат оёқ қоқди. Шайман чол пинак бузмай, чолларнинг тинчишини кутди. Бу орада қора нукта аравачали мотоциклга айланди. Унда бети товоқдай, корни қопдай бўлиб Кобул участкавой келарди. Чолларнинг сўкиши адоклаб, ҳамманинг диққати унга қаратилди.

— Чангитмай ўли-ий! — Кудрат чол башарасига ёпирилган чангни елпиб, сўкинди. — Худди отасининг ўзи-я. Соли ўпкайм шунаقا ҳовлиқма эди. Ўпкалиги туфайли отдан йиқилиб ўлди-да.

— Шу елиши бўлса, буям... — Ўроқ чол ўнғайсиз ўтталди. — Саломиниям ўзи билан олиб кетди шекилили?

Олим пакана гийбатга аралашмоқчи эди. Аммо Ўроқ чол билан айтишганини эслаб, Кобулни ёқлади.

— Салом берди. Бошини ирғаб-ирғаб ўтди.

— Унда яхши, — Ўроқ чол кулди. — Боши йўқмикан деб ўйловдим мен.

— Сиз шунака, — деди Олим пакана ачитиб. — Ҳамиша кир излайсиз.

— Улларни ўқитиб-сўқитиб юрмай, милисага ишга киритиш керакмикан деб ўйлаб қоламан, — деди Поён

чол негадир оғир сўлиш олиб. — Биттаси манову Қобул шапка. Бунда на сомон ташвиши бор, на хашак. Таёғини бир силкитса сомониям, хашагиям ҳовлисига тушиб турибди.

— Ҳавас қиласиган ишми шу, — Ўроқ чол истехзоли илжайди. — Берадиган одам бекорга беради деб ўйлайсанми. Ичиди ҳей энангни фалон қилай деб, тўқсон тўққиз марта сўкиб берар. Нафс дея ҳар нарсага энангни рўпарў қиласириш эркак кишининг иши эмас-да энди. Бундан кўра иссиқда чанг ютганинг афзал эмасми.

Олим пакана кичик жуссасини бежо тебратиб, қарши гап қилмоқчи эди, Қудрат чол вактида орага сукилди.

— Майда-чуйда гапни кўйинглар-да, яхшиси, Шайманвойнинг олим улидан гапиринглар. Ишқилиб, улингиз келадиганми, Шайманвой?

Шайман чол унга миннатдор караб қўяркан:

— Ул келган, — деди андак димоқ билан. — Бу ерда бекорга гап талашгандан кўра бизди ҳовлига ўтинглар. Улга бир қўчкор атаб кўйгандик, шуни сўйиб саронжомлаб туринглар. Мен даштга бораману, қайтаман. Кенжамиз даштда... иссиқда хийла бўлган чиқар. Қани, Ўроқвой, бошланг бобойларни. Нима қаердалигини кампирга тушунтириб келганман.

— Бу ишингиз соз бўпти, Шайманвой.

Чоллар бири олиб, бири кўйиб, уни алқаб кетишиди. Кутимаган тадбиридан ўзида йўқ рухланиб кетган Шайман чол викорли одимлар билан арава томон юрди. Эшакаравада юриш биринчи бор эриш туюлиб, отни орзулади, аммо унга емиш етказиш қийинлигини ўйлаб, тағин аҳдидан қайтди.

... Оқшом зиёфат тўкин бўлди. Фала-ғовурдан чол шу нарсани билдики, ўғли осмон жисмларини ўрганадиган олим экан. Тунда у супада осмонга тикилиб ётаркан, эшитганларини ҳазм қилолмай, ғоят ажабланди: «Тавба, осмонни нимасини ўрганар экан? Отам замондан бери сўнариб турган манову юлдузларнинг нимасини ўрганиш мумкин? Тағин ердан ўн хисса катта юлдузларам бор деганига ўласанми. Ҳеч вактда юлдуз ҳам ердан катта бўларканми? Нари борса мушт-

дайдир, ҳай, қўшмуштайдир. Қандайлиги ана кўриниб турибди-ку. Ўнтасини йиғсанг, бир чўнтак тўлмайди. Улим ё ўтирикчи<sup>1</sup>, ё ўзим ҳеч балони тушунмайман». Аммо чол кейинги гапга қўшилмасди. Ўзини жуда ақлли хисобларди. Кўрганларини бор ҳолича идрок этиб, шу йўсинда фикр қиласди. Шу боис, юлдузларга янада дикқат қилди. Эсини танигандан бери илк бор самога айрича назар солмокда эди. Бора-бора коинот кўзига олтин тангалар сочилган баҳмал тусини ола бошлади: «Улни осмонга тикилишида бир гап бор, — деб ўйлади. — Ниманидир билади бу бола. Ҳукумат бунга ўхшаганларга пулни қоплаб берса керак, эмасам, ер қолиб, нега осмонга термулади бу бола».

Юлдузлар олтин тангалар тусини олгани сайин чолнинг димоги чоғлана бошлади. Охири, олим деганига ҳукумат пулни аямаса керак, деган ширин ўйга борди-да, фаройиб тушлар оғушида аста уйқуга кетди.

Эртаси пешиндан кейингина ота-бола ҳоли қолишди. Бошда гаплари унча қовушмади. Отa шўрлик нима деб сўрашни билмас, ўғилнинг жавобларига эса унча тушунмас, оқибат, гап тополмай иссиқдан шикоятланди. Ёлпинган киши бўлди. Ҳолбуки, улар шабаданинг кўзида ўтиришар, кенжа ўғил ҳавасга қурган баланд шийпондан чор-атроф кафтдагидек баралла кўзга ташланиб турарди.

Шайман чол ўғлининг озғин чеҳрасидан кўз узиб, теваракка алаҳсиди. Кўча бошида икки қоп сомон юкланган эшагини олдига солиб келаётган Ҳайдар кўса кўринди. Уни кўргач, кундалик ташвишлари эсига тушиб, чолнинг қовоғи хиёл солинди.

— Ҳайдарвойга куда бўляяпмиз, — деди сўнгра ярим оҳангда.

— Эшийтдим, — деди ўғил бепарво.

— Қалинни сағал кўпайтираман деётганмиш, — деди чол норози оҳангда. — Шайман чолнинг ули олим бўпти, олим дегани пулнинг исига ётолмайдиган ҳалқ бўлади, шундаякан, чол қалиндан қизғанмасин деб, эрталаб укаси Салом кўсадан айттириб юборибди. Совчилар орқали етказишга ҳам сабри чидамабди.

<sup>1</sup> Ўтирикчи — ёлғончи.

Ўғил кулимсираб, Ҳайдар кўса томонга караб кўйдию, лекин индамади.

— Қайси қизига? — деб сўради бир муддатдан кейин ҳардамхаёллик билан.

— Қенжасига.— Чол ёнбошлаб, бошини сийпалади. — Укангни ишқи ўшангга тушибди. Ҳашша шуни олиб берасилар деб туриб олгач, нима қилайлик, рози бўлдик. Эмасам, Ҳайдар кўсани ўзимга тенгситармидим. Начора, тўйни гуруллатиб ўтказамиз энди.

Шу гапларни айтаркан, чол ўғлининг ранг-рўйига, сўнг чўнтакларига ўғринча қараб кўиди. Ўғлининг чўнтаклари у қадар дўппайиб турмасди. Кейин у шийпон четидаги каттакон қора сумкага умидвор тикилди. Ялтироқ темирлар билан зийнатланган сумка чолга жуда сирли туюлди. Боз устига, ўғли юрт сўраган кишидай хотиржам ўтирас, чолнинг ташвишларига алоқадор харажатларни эшитгач ҳам пинак бузмади. Авзойидан чолнинг бир оғиз гапиданоқ олдига бир дунё пулни нописанд итқитиб ташлайдигандек эди. Шунда чол унинг қанча маош олишини билгиси келди. Қани, олим дегани қанча ойлик оларкан? Ўзича у катта ракамларни кўз олдига келтириб сўради:

— Мана, олим ҳам бўлдинг, — деди кироат билан сўзлашга уриниб. — Ойига қанча оласан?

— Нима қанча?

Шайман чол Сардор магазинчидай бармокларини бир-бирига ишқалади.

Чолнинг қилифи ғалати туюлиб, ўғил кулиб юборди. Бундан чол яйраб кетди: «Айтдим-ку, бунда пул кўп деб, эмасам, буйтиблар ёзилиб ўтирасди. Аммо қайтиб сўрайман? Фарзанддан пул сўраш... э-э, укаси учун сўрайман-да. Шундай пайтда қайишмаса, қай пайтда қайишади. Хай, киши билмас қитиклаб кўрайчи. Тушунса тушунар, тушунмаса, отасининг жилиги-га, дангалини айтаверамиз-да».

— Индамайсан? — Чол кулоғини ортини қашлаб, унга зимдан тикилди.

Ўғилнинг жавоби бўғотдаги мусичанинг кукулашига қўшилиб чиқди. Чол гапни тўла англамаган эса-да, нохушроқ сўзни илғашга улгурди. Шу боис, пешонаси

тиришиб, мусичага норози бокди. «Кишт», дея қўлини тўлғаркан, қайта сўради.

— Ангсармадим, қанча дединг?

Ўғил бу хил сухбатни хушламаслигини билдириб, нигохини пастга оларкан, жавобни жуда қиска килди ва бир муддатдан сўнг бошини кўтариб, отасининг холатидан донг котди. Чолнинг жағи осилган, кўзлари бақрайган, мусичани хайдамоққа кўтарилган ўнг кўли ҳавода муаллақ қолган. Бамисоли ҳайкал, ҳатто киприк қоқмасди.

Нихоят, «ҳайкал»га жон кирди: кўли шалвираб пастга тушди. Ияк жойига қайтиб, кўзлари оғрикли ифода билан аста юмилди: «Ҳазиллашмаяптими бу бола?» Кўзлар энди яна-да каттарок очилди. Ўғилга синчков қаради. Йўқ, ўғил тамомила жиддий эди. Чол тирсагини болишидан узиб, қаддини хиёл олдинга ташлади.

— Одамни калака қиласынми?

Таажжуби баттар кучайган ўғил, йўқ, дея бош чайқади.

Шайман чол ўтирган жойида ғалати чайқалди. Туси ўзгариб, кўллари билан ниманидир қидирди. Қидирган нарсасини тополмагач, тиззаларини чанглаб, ўғилга газабкор бокди.

— Ули олим бўпти деб, Ҳайдар кўса у ёқда қалинни оширган бўса, — деди сўнг алам тўла оҳангда. — Мен сенга ишониб, бу ёқда катта кетиб кўйган бўсам, оладиган ойлигингга дурустстроқ бир кўй кемаса, шунча ўқиб нима қиласинг сен, а?

— Илм пул билан ўлчанмайди-ку, ота, — энди ўғилнинг ҳам ранги ўзгарди.

— Эмасам, нима билан ўлчанади? — Чол унга еб кўйгудек бир важоҳатда тикилди. — Сени ўқитаман деб қанча кўйим кетди, биласанми шуни ўзи? Ана Кобул шапка ҳеч қаерда ўқимаган, лекин таёфини бир силкитса, ховлисига сомониям, хашагиям тушиб турибди. Отаси Узок гуппи сомон ташвиши нелигини билмайди. Тўй-маъракаларда чулдираб бировга гап бермайди.

— Майдаларга тенглаштирманг ўзингизни, ота. — Ўғил илм дея чеккан заҳматларини эслаб, бир зум сукутга толди-да, сўнг чехрасини донишмандона бир

ифодага тўлдириб деди: — Агар хамма ўзини тирикчиликка қурбон қиласерса, буюк кашфиётларни ким қилади? Тирикликин ҳар ким ҳар хил тушунади, ота.

— Билдик, жуда гапга ўқибсан, — деди ота ўғлиниг мантикли гапларини олифтагарчиликка йўйиб.— Айт-чи, сенам бир имо билан уйимга сомон тушуроласанми?

— Йўқ, — деди ўғил қатъий. — Бу хил ишлардан жирканаман!

— Жирканаман? — Шайман чол баттар тутакиб, тарин қўллари билан пайпасланди. — Унда олимлигингдан менга нима фойда!

Чолнинг қўлига илинган пиёла четга учди. Азиз меҳмонлар келгандагина дастурхон юзини кўрадиган пахтагулли пиёла ховли сахнида чил-парчин бўлди. Ортидан иккинчиси, кейин учунчиси шу ҳолга тушди. Шундаям у тинчимади. Қаршисида ўғил эмас, баттол душманни ўтиргандай, гап билан уни ер қилиб ташлади.

Бу хил ҳақоратларни умрида эшитмаган ўғил бошда ҳанг-манг туриб қолди. Кейин этак силкиб, ўрнидан қўзғолди. Кетаман, деди аразлаб. Она хай-хайлаб орага тушди. Чолини карғаб, ўғлининг қўлидаги сумкага ёпишиди.

Шайман чол алам ва разабдан чаёндай гажакланиб, ташқари йўналди. Негадир Ҳайдар кўсани топмоқقا, колган аламини ундан олмокка қасд қилди. Шу топда чолга икки дунё бир, яккаш бакиради: «Осмонингдан не фойда менга! Жавдираган туссиз юлдузларингни бoshимга ураманми! Э, сени ўқитганнинг падарига лаънат!»

У остона хатларкан, кўча бошида сомон юкланган машина кўринди. Чолнинг ажин тилган юзи баттар тиришиб, буришиб кетди. Нега, деганда машина олдида улкан қорнини намойишкорона силкитиб, мотоциклда Кобул милиса келарди. Товоқдек башараси одатдагидек ўта жиддий, гўё зўр бир ишни тиндиргандай, димогидан эшак курти ёғиларди. Бу манзарадан чолнинг ичи яна куйди. Диконглаб, беихтиёр ўша томон юрди. Кейин бирдан фикридан қайтиб, изига бурилдида, кўча бўйида чим чимдиётган эшагининг қорнига бир тепиб, куйига одимлаб кетди.

Бу вактда олим ўғил, коинот сирларини англамоққа етган ақли ердаги бу хил синоатни идрок этмоққа ожиздек, түшкін бир кайфиятда оёғи остидаги чинни бўлакларга термилиб турар, кетиб қолишидан ҳайик-кан она шўрлик эса ҳануз унинг кўлидаги сумкага тармашар, ора-сира чолини яниб кўярди. Салдан сўнг тобора олислашиб бораётган жахлдор отанинг узук-юлук сўкинишлари-ю, онанинг жонсарак койинишли-ри машина овозига коришиб кетди. Щовқинни эши-тиб, ўғил секин бошини кўтарди. Кўзи девор ортида харакатланаётган сомон ғарамига тушаркан, олган би-лими бу даргоҳда сариқ чақалик қимматга эга эмасли-гини фавқулодда англаб етгандай, аста юлқиниб, дар-воза томон юрди.

Она чирқираганча унга эргашди.

## О Р И Я Т

Бозорга жўнаш олдидан Ҳусан полвоннинг дили ёмон ранжиди. Аслида барисига ўзи айбор. Бўлмаса, эрта тонгда кичик хотини Зухрахонникида пишириб қўйибмиди. Бор гап кечасиёқ гаплашиб олинган, қопингни орқалаб йўлингга кетавермайсанми. Йўқ, бирров кириб ўтмаса, нимадандир куруқ қоладигандай, кўшни ҳовлига бош суқишдан эринмади. Елкасидаги гўшт тўла, зил-замбил қопини супа четига қўяётиб, кетаяпман, бирор гапинг борми, деган маънода томоқ қирди. Зухрахон худди шуни кутиб тургандай, гапни кўпда чўзиб ўтиrmади.

— Кеча айтиш эсимдан чикиби-я, отаси, — деди куралай кўзларини пирпиратиб. — Битта кўрпалик ҳам қўшиб ола келинг. Факат бирорта аёлдан сўраб-сuriштириб олинг. Тағин сатин ўрнига чит кўтариб келманг, қайнумга ўхшаб.

Бу гапдан Ҳусан полвоннинг пешонаси тиришиб, юзига ўнғайсизлик ифодаси қалқиди.

— Кўрпалик дейсанми? — деди талмовсираган оҳангда. — Бу айтганинг... эркак кишининг иши эма-сов, хотин.

— Унда мениям оборинг, — деди Зухрахон. —

Кўриб-билиб оламиз. Неча йилдирки қишлоқдан чикмай, тоза торифиб кетдим. Баҳонада би-ир айланиб келардим.

Бор гап шу. Лекин ўта арзимас туюлган бу гапдан Ҳусан полвоннинг туси кутилмаганда кескин ўзгарди: аввалига қалин қошлари хунук тугун тортди, сўнгра кўзлари оловланди. Панжалари беихтиёр муштга айланиб, аёлига еб-ютиб кўйгудек бир важоҳатда тикилди.

Эрининг авзойидан не гаплигини англаған Зухрахон, кетига тисарилар экан, илтижоли оҳангда шивирлади.

— Қайтиб... қайтиб олдим гапимни. Бўлди, болаларни чўчитасиз...

Ҳусан полвон базўр ўзини босиб, супада катор ухлаб ётган болаларига кўз кирини ташларкан, ичидагини сиртига чикармаса, бўғилиб қоладигандай, тишлари орасидан сўзланди:

— Нима, шартимиз эсингдан чиқдими?! Каттанг мактаб ёшига етмагунча шахар демайсан демаганимид! Ё менинг гапим ерда қолдию, уни топтаб ўтиш мумкин деб ўйлайсанми?!

Аёли маъюс ер чизиб, енгил хўрсинаркан, эрининг кўнглини юмшатмок илинжида аста гап қотди.

— Каттангизнинг оёғи тўзибди. Боргач, бирор нима қараб кўринг. Ҳикқиллайвериб тоза жонимга тегди.

Ўқ нишонга урилди. Ҳусан полвоннинг чехрасига табассумга ўхшаш нимадир иниб, бу сафар болаларига меҳр-ла бокди. Аммо буни аёлига билдиргиси келмади.

— Бунинг акасиникини кийсин, — деди қўшни ҳовли томонга имо қилиб. — Унисига бошқасини обераман. Туфлим кисаяпти, деб кеча фингшигандай бўлувди. Барига бошма-бош буюм обераверсам, эртан уйимни каердан топаман. — Шундан сўнг кўзларини яна аёлига наизадек қадади: — Хай, туфли бир гап бўлар. Сен бир гапга жавоб бер-чи, қачондан бери кўнгиллари шахарни тусаб қолди?

Шу пайт катта хотини Ойсанам у унутиб колдирган носковокни кўтариб келиб қолмаганда, бу можаро нима билан якун топиши номаълум эди. Ҳархолда

Ойсанам вактида келди. Ҳусан полвоннинг, алами ичидা, йўлга тушмокдан ўзга иложи қолмади.

Аммо қуиға энаверишдаги сўқмок бошига етганда, алами қайта жунбишга келди. Бозоригаям, шахаригаям лаънат, дея елкасидаги қопни пастга улоқтириб юбормокчи ҳам бўлди. Ҳартугул, шайтонга хай бериб, ўзини қўлга олди. Бир зумга тўхтаган ерида қуидаги иланг-билинг сой ёқалаб кетган, икки кир оралиғидаги қишлоғига, сўнг узоқдаги тош йўлга разм соларкан, негадир оёғи тортмаётганини хис килди. Елкасидаги қопини енгил силтов билан ўнглаб, ортига ўгирилди. Кир бетида ёнма-ён тушган қўш ҳовлисига назар ташлади. Катта хотини чеълак тутганча молхона томон кетиб борар, кичиги эса ранжитиб қўйганидан ўкингандай, қўллари кўксида, унинг ортидан термулиб турарди.

Ҳусан полвоннинг кўнглида шафқат хисси уйғониб, аёлинин кечирган бўлди. Лекин барибир дилидан ғашлик аримади. У истамайгина йўлда давом этди.

Сирасини айтганда, Ҳусан полвон азалдан камюорим одам. Тўй, кўпкари демаса, бошқа пайт қишлоғидан бир одим нари жилмайди. Шахарни-ку гапирмаса ҳам бўлади. Айникса, Зухрахон билан боғлиқ воқеадан сўнг шаҳар деса жини қўзийди. Ўзига колса, шаҳар деб кир ошиб, ўр ошиб ўти́рмасди-ю, лекин шу тобда тирикликининг зилдай тоши унинг нозик кечинмалиридан устувор чиқиб турарди. Чўнтағида елвизак айланиб қолгани боис, кўйларидан бирини бўғизлаб, шаҳарда пуллаб келмокчи эди. Унинг ўрнида бошқа бирор бундай пайтда карз кўтарган бўларди. Аммо унинг чарс феъли қарз олмокни ёқти́рмайди. Қарз деганлари елимдек бир гап, бир ёпишса, тамом — ажрашиш кийин, деб ўйлади.

У ёлғизоёқ сўқмокдан пастга энаркан, Зухрахоннинг гапини эслаб, тағин ғижинди. Унга боғлиқ хотираларни хаёлидан кувишга тиришди. Аммо хотира деғанлари жуда беандиша нарса, эшикдан қувсанг, тёшикдан суқилади.

Бир вактлар эллик хонадонли мўъжазгина қишлоғининг бир чеккасида Зухрахон деган кўхликинина қиз мавжудлигини у ҳатто хаёлига келтирмасди. Тўйларда

кураш тушиб, кўпкари чопиб, тинчгина умргузаронлик килиб юрарди. Шу кунларнинг бирида қулогига нохуш гап чалиниб қолди. Нима эмишки, Холпош кампирнинг шахарда ўқийдиган кизи ёмон йўлга кириб кетибди. Кимdir бошини сарак-сарак килиб, фийбат халтасини кенгрок очди, кимdir кампирга ачинган бўлди. Кимdir эса, қизни нордон гаплар билан сийлаб, қишлоқка оёғини доритмаслик керак, деди.

Ҳусан полвон бу гапларни кўклам оқшомларидан бирида кир бетида ёнбошлаб ётган холда эшилди. Ўзларича хиринглаб, ўзларича куйиб-пишаётган жўраларининг оғзидан эшилди. Эшилди-ю, лекин гурунгга қўшилмади. Қишлоғига ҳасрат ва надомат ила тикилганча ёнбош тушиб ётаверди. Зохиран у жуда сокин эди. Ичиди эса олов қайнарди. У ўлгудек оркаш йигит эди. Жўраларидан ушбу сифати билан ажралиб турарди. Бундай олганда, оркаш йигитнинг кўрган куни курсин. Ҳар неки балога ўша балогардон. Дейлик, бирор тўйда қишлоқ полвонлари товок ололмади. Бу вактда қишлоқ ахли куймайди, бозорчи хотинлардай фала-ғовур кўтаради, холос. Оркаш эса куяди, ёнади, портлайди. Яна дейлик, қишлоқнинг бирор йигити бегона ердан калтак еб қайтди. Қишлоқ ахли бу кезда фийбат билан чекланади. Оркаш эса тагин куяди, тагин ёнади. Эвини топса, ўша ерга «қўшин» тортиб боради... Бу хил воқеалар Ҳусан полвон хаётида кўп бўлган. Шу боис, қишлоқда обрўйи зўр. Аммо ҳозир у танг аҳволда қолганди. Нега деганда, қишлоқ тарихида бундай шармандали ҳодиса ҳали ҳеч юз бермаганди. Боз устига, айбдор заифа. Ҳўш, заифани нима қилиш керак? -

У бу саволга жавоб тополмаган эса-да, ич-ичидан оташ бўлиб ёнарди: «Қишлоқни бадном қипти! — деб ўйларди яккаш. — Қишлоқни хароб қипти! Уни тўшига тортган ҳар бир наҳс биз тўдақайрағочликларнинг устидан иршанглаб кулади энди! Ўлибмиз ҳаммамиз!» Ҳаёлан у қизга қарши «уруш» эълон килди. Бир ўйи, кизнинг сочидан судраб келиб, анову жардан пастга улоқтириди. Бўлмади. Болаларини ўйлади. Ахир одам ит эмас-ку, ўлдирсанг-у, индамай қўлингни қоқиб кетаверсанг, жавобгарлик деган нарса бор. Яна бир ўйи,

қизни тилкалаб ташлади. Бу ўй олдингисидан, кейин-гилари бунданда даҳшатли эди. Ҳар бир даҳшатли режадан сўнг беозоргина аёлини эмас, бир-биридан ширин ўғилчаларини ўйлади. Ана шунда оила ва фарзанд дегани оркаш йигит учун тушов эканини англа-ди. Англаши баробар ўзини ожиз ва жирканч бир махлук хис этди. Қаватида ўтириб, бизам бориб бир мазасини тотиб кўрсак ёмон бўлмасди, дея хирингла-ган яқин жўрасининг кулок-чаккасига тарсаки тортиб юборганини билмай колди. Давра сергак тортди, давра сукутга чўмди. Унинг бу ҳолатини ҳар ким ҳар хил англади. У эса этак қоқиб ўрнидан турди-да, кирга ўрлади. Қирнинг қоқ чўққисига чиқиб, оғир хаёлга ботди. Номусдан сассиз ўртанди, ингради. Инgrab ту-риб ерга панжа урди. Тирноғи синиб, чангалига чағир тош аралаш нам тупроқ илашди. Тошлар озор чеккан-дай гижирлаб, кафтига қадалди. Нам тупроқ қонни ўзига тез сингдирди. Лекин у буни сезмади.

У оғир ўйлар исканжасида уч кун юрди. Уч кун паришонхотир бир ҳолатда мол сўядиган пичогини қайради. Тўртингчи куни икки қир наридаги тегирмон-га ҳам шу ҳол, шу алфозда борди. Тирик жонга гап қотмай бир четда чўк тушиб ўтириди. Шунда бехос қулоғига бир гап чалинди. Кўзлари бургутникидай чақнаб, аста гапга қулок тутди. Нарида кур тортган икки йигитнинг гапларини чала-ярим, лекин асосийси-ни эшитди. Биринчи йигит иккинчисидан кимнидир таниш-танимаслигини сўрарди. Иккинчи йигит деди: «Тиркашми? Зухра бузуқни қишлоғидаги Тиркаш кора-ни айтаяпсанми? Танийман уни...»

Бу гапдан Ҳусан полвоннинг ичидан нимадир чирт узилгандай бўлди. Қишлоғининг номи не атама билан алмашганини чукур хис этди. Бу ҳол тўла косага томган сўнгти томчи бўлди. Эртаси Холпош кампир-дан қизининг туар жойини сўраб олди-да, шаҳарга энди. Аммо, ўзи кутганчалик, Зухрани бирорвнинг оғушида эмас, маъюс қиёфада ёлғиз кўрди. Ўртадаги хонтахта устига пичогини чиқариб қўйиб, не мақсадда келганини сўzsиз ифода этди. Қиз алпқоматли бу йигитнинг аҳди қатъийлигини бир қарашдаёқ билди. Жони тавонига тушган эсада, негадир қиз ўзини айб-

дор сезмади. Энгил-бошидан дала-дашт хиди уфуриб турган йигит қарисида чўккалаб, зор қақшаганча ўзини алдаб кетган қайси бир йигитнинг номини тутиб, йигига зўр берди. Ҳусан полвоннинг қалбида ўша номард йигитга нисбатан қасос ўти алангалангунча бўлмай, қиз яна бир-икки йигитнинг номини тилга олишга улгурди. Ҳусан полвон энди қарисида бузукини эмас, алданган, шунингдек, эндиликда номи бутунлай булғанган бир муштипарни кўрди. Йўлдан тойған бу қиз энди хеч қачон номини оқлаб ололмаслиги ни пайқади. Бошида кора бўлмаса, у тийғанишда давом этиб, чохга кулашини сезди. Нима қиласири билмай, боши котди. Сўнг иккиси, бошлари хам, узок сукутга толишли.

Бир маҳал Ҳусан полвоннинг кўли беихтиёр пи-чоққа чўзилди. Қиз сесканиб, бақа мисол котди. Аммо йигит, у кутганча, пичоқни унга ўқталмади. Пичоқни ўнг кўлидан чап кўлига олиб, ўнг панжасидаги синган тирноқларидан бирини кесиб ташлади. Тиф этга ботиб, тирноқ гирди конга тўлди. Қиз олдиаги буклоғлик сочиқни шоша-пиша унга узатди. Ҳусан полвон олмади. Конга тикилганча ўйда давом этди. Қиз чой дамлаш хаёлида ўрнидан кўзғалганди, йигитнинг ўткир нигоҳига дуч келиб, таппа жойига чўка қолди. Шунда полвоннинг қалин лаблари илк бор ҳаракатланди:

— Энди нима қиласиз?

Қиз ер сузиб, чурқ этмади.

— Бу шармандаликни қайтиб ювамиз энди?

Қиз елкасидан нафас олиш билан чекланди.

— Гапир!

— Пешона... пешонамда не бўлса шуни кўраман.

— Пешона! — Ҳусан полвоннинг кўзлари тагин конга тўлди. — Пешона дейсанми? Бутун қишлоқнинг манглайини кора килдинг-ку, пешонанг қурғур!

— Унда нима қил дейсиз? — Қиз яна хиққиллашга тушди.

Буни полвон хам билмасди. Тагин ўйга толди. Күёшдан қорайган этдор афти, ўйдан зўриққаниданми, буриқиб кетди. Пичоқ яна ўнг кўлига ўтди.

Қиз унинг ҳар бир хатти-харакатини кўз қирида жонсарак кузатиб, жимгина ўтиради. Оркаш бу йи-

гитнинг феълини яхши билгани боис сукутдан ўзга иложи ҳам йўқ эди. Йигитнинг ўрнида бошқа бирор ўтирганида, отаммисиз, ё акаммисиз, нима ишингиз бор мен билан, дея пешкирлик қилишиям мумкин эди. Аммо полвонга бундай деб бўлмасди. Боз устига, қўлидаги пичоқ тобора бежо харакатланмоқда эди.

Бир пайт Ҳусан полвон кенг кўксини тўлдириб, икки бор чукур нафас олди-да, тўйқусдан бошини илкис кўтариб, ўткир кўзларини унга ўқдек қадади.

— Унда менга хотин бўласан! — деди катъий оҳангда. — Сени бугун ё чаваклаб кетишими керак, ё кора қисматингга шерик бўлиб, номингни оқлаб олишим лозим! Эмасам, қишлоқнинг шўри қурийди! Кўринган ит устимиздан иршанглаб кулади! Э-э, куляптиям!

Қиз полвоннинг ўзига хос мантигини идрок этолмагандек, гапини ҳам ҳазм қилолмади. Унга ажабланиб тикиларкан, буям қулогимга танбур чертмоқчими, деган ахмокона шубҳага борди. Бироқ йигитнинг ғазаб ва аламдан буғриқкан чехрасига кўзи тушгач, шубҳаси тумандек тарқаб, кўнглида унга нисбатан хурматга ўхшаш нимадир ўйғонгандай бўлди: «Қани энди, ҳамма йигитлар шу кишидай бўлса, — дея аёлларга хос мулоҳазага берилди. — Бизга ўхшащ ахмоклар буйтиб қон йиглаб ўтирасди».

Аммо йигитнинг ўқтам овози уни узоқ ўйловга кўймади.

— Хўш, нима дейсан?!

Қиз шундагина йигитнинг мақсади жиддийлигини пайқади. Унга хотин бўлишни хаёлига келтирмаган ҳолда, зора ҳовридан тушса деган умидда деди:

— Кўйинг, ўзингизга гап орттириб нима қиласиз.

— Бу ёфи билан ишинг бўлмасин!

— Ўзим қилдим, ўзим жабрини тортсам девдим.

— Биз-чи?! — хонтахта устига гурсиллаб тушган муштдан чойнак-пиёлалар чор-тарафга сочилиб кетди.

— Номустан бош эгиб юраверишимиз керакми!

— Демак, — қиз тиззаси устига келиб тушган пиёлани жойига олиб қўяркан, йигитга қарамасдан давом этди: — Орият учунгина менга уйланмоқчисиз...

— Эмасам-чи. Нима, чиройли кўзларимга учди деб ўйлабмидинг.

— Йўқ десам-чи?

— Сўйман! — Бу жумла полвоннинг тишлари орасидан даҳшатли тарзда сирғалиб чиқди.

— Ахир бу зўравонлик-ку.

— Олифта гапингни қўй! Қани, кийин!

— Шахарда бундай қилишмайди.

— Бизда эса қилишади!

Йигитнинг қатъяти ўзига ёка бошлаганини сезиб, киз ажабланди. Унинг дала хиди анқиб турган энгилбошига бу сафар айрича назар билан разм соларкан, андиша тўла оҳангда деди:

— Янгам нима деркин?

— Номусдан куяётган эрни тушунмаган хотиннинг боридан-йўғи яхши.

— Болалар...

— Сени олдим деганим, хотинимни қўйдим деганим эмас-ку.

— Бунакаси ҳали хаётда бўлмаган.

— Сенга ўхшаганиям кишлоғимизда бўлмаган...

— Унда ўзим ўлиб қўя қолай.

— Бўлмайди, кора номинг қолади.

— Барибир сиз... — Киз унинг қўлидаги пичокка имо килди.

— Бу бошқа гап. Гуноҳингни қонинг билан ювган бўласан!

— Кейин сизга ёмон бўлади-ку.

— Яхши бўлса келиб ўтирмасадим.

— Қизик мантиқ.

— Кийин!

Қизнинг кейинги мулоҳазалари Ҳусан полвонга чивин чаққанчалик таъсир этмади. У бу гапларга лоақал жавоб айтишниям лозим топмай, кўз қарашлари билан қизнинг дамини ўчирди, кийинтириб, йўлга отлантириди. Эшикдан чиқаётиб, олдига шу шартни қўйди:

— Тўнғичнонг мактаб ёшига етмагунча шахар демайсан!

— Э!

— Ха!

Ойсанам оркаш эрини базўр тушунди. Тушунгунча бир-икки тиришлик қилди. Аввалига аразлаб отаси-никига кетиб қолди. Кейин хиққиллаб талоқ тўради.

Бунга жавобан полвоннинг гапи битта бўлди: «Бекор айтибсан! Шу хафта уйга қайтмасанг, сочингдан судраб келаман! Феълимни биласан!»

Буни қарангки, бутун қишлоқ англашга ожизлик қилган ҳолни оркашлиқда күёвидан сира қолишмайдиган қайнота тушунгандай бўлди. Қизини ўзи олиб келиб ташлади: «Номус дея номи корани қўйнига солған одам ўз хотинини буйтиб диконглатиб қўймайдида, нодон!» — дея от устида куёвини сўкиб-сўкиб кетди.

Хусан полвон Зухрахонни ҳали қўйнига олмаганди. Укасига аatab қурдирган уйига уни солиб, пешайвон устунига катта пичок осиб қўйганди. Турган гап, укаси уй важидан эмас, одамларнинг пичир-пичир гапларидан безор бўлиб, жанжал кўтариб келди. Хайданг, бу бузукни, деди. Ака уни бир тарсаки билан ерпарчин қилиб, бошида ғоз котди: «Биринчидан, бу бузук эмас, янга сенга! — деди. — Иккинчидан, уйга ичинг ачиётган бўлса, қўрқма, келаси баҳорда бундан зўрини солиб бераман!» Ука йиғлади. Йиғлаб туриб шу гапларни айтди: «Уйнинг энасини фалон қиласай, ака! Гап уйда эмас, одамларда. Ана, нималар дейишмаяпти! Эркак бўлмай ўл дейишяпти!. «Эркак нелигини билсанми ўзинг? — Хусан полвон аччик кулди. — Ё факат қиз болага уйланганларни эркак санайдиларми? Йўлдан озган ожизага паноҳ бўлган, элни бадномликдан асраб қолган кимса сенинг назарингда ким? Асил эркаклик ўша эмасми?» Ука туриб ўтирди. Уй томонинг адоватли тикилди: «Эл дейисизми? — деди кейин истехзо билан. — Ана, элингиз сиз тўғрингизда нималар деяпти!» «Майли, дейишаверсин, — деди полвон хотиржам оҳангда. — Бугун бўлмаса, эртага тушунишади».

Одамларнинг гапи тайсаллади-ю, лекин қишлоқ мулласи Ёдгор қийшиқ қилиқ чиқарди. Қизнинг икки йил бурун ўлиб кетган отасига нисбатан эски адовати эсига тушиб, никоҳ ўқищдан бош торти. Ўзининг бу қилигини, элнинг юзини ерга қаратганга никоҳ ўқиши буюрилмаган, деган гаплар билан пардаламоқчи бўлди. Полвон ялинмади. От устидан илкис эгилиб, мулланинг белидан даст кўтарди-да, олдига ўнгарди. Йўлда

мулла чиранди, типирчилади, кимларгадир арз қила-ман, деди. Полвон, унда Чори муллага ўқитаман, деганидан сўнг ҳалимдек юмшоқ тортди. Қўшни қишлоқ-лик Чори мулла унинг эски рақиби, у қишлоқ ораласа, Ёдгор қийшикнинг тутқаноги тутиб қолади.

Табиий, буларнинг ҳаммасини Зухрахон кўриб-билиб турарди. Бунга сари Ҳусан полвонга меҳри кун сайин кучайиб бораарди. Аслида бу меҳр ўша биринчи учрашган кунлариёқ куртак отганди. Акс ҳолда қизни ёлғиз қўркув билан тутиб туриб бўлмасди. Номардликнинг аччик мевасидан обдан тотинган қиз мардликнинг нечоғли тотли эканлигини фарқлай билганди. Полвоннинг кенг ва забардаст елкаларига кўзи тушгани сари ич-ичидан ўша елкаларга билак ташлаш истагини хис этарди. Натижада бир йил ўтмай кундоши иккиси полвонга биттадан ўғил хадя этдилар. Қизнинг кора номи ўз-ўзидан окланиб кетди. Бироқ шунга қарамай, эри шартидан воз кечмади. Шахар номини эшитса, ҳали-ҳали жини куришади.

Хотиралар исканжасида қолган Ҳусан полвон сўқмоқдан эниб, қишлоқ йўлига тушди. Қишлоқ йўлидан катта йўлга чиқди. Дуч келган машинага ўтириб шаҳарга йўл тортди.

Узокдан шаҳар бинолари кўзга ташлангачгина ёқимсиз хотиралар ниҳоят уни тинч қўйди. Кўнглига ташвиш оралаб, эндиги ишлари ҳакида ўйлай бошлади. Бозор ишида уни пишиқ деб бўлмасди. Ташвиши шундан эди. Шу боис, қаватида чинкиллаб гурунг бериб кетаётган ёнгоқфурууш ўигитдан уни-буни сўраб олди. Ёнгоқфурууш йўл-йўриқ кўрсатибгина қолмай, растага жойлашиш, тарози топишда кўмаклашишга ваъда ҳам берди. Кўтарафурушларга асло сотманг, деб қайта-қайта тайнинлади.

Буни қарангки, даштда бургутдай керилиб юрган полвон бозорда чумчукка эргашган лочиндан унга дум бўлди. У нима деса шуни қилди. Бир муддатдан сўнг ўзини раста ортида, бир уюм гўшт тепасида кўрди. Аввалига унча қовушмади. Икки-уч харидордан кейин бозорнинг хавосини тезда ўзлаштириб, яна бургутона келбатга кирди. Алпдай коматига хавасланиб зимдан-зимдан боккан бир-икки жувоннинг нигохидан ғаши

келди. Келбатини аллабалоларга менгзаб, мақтаб, арzon-гаровга гўшт олмоқчи бўлганларга гапнинг дангалини айтди: «Уйимда бир мошина еярман-ичарманим бор, аканг айлантур. Тили ширин экан деб сенга қайишсам, мақтади деб унга қайишсам, чурвакаларимни ким бокади. Бу елкада кўпчиликнинг ризки бор. Кўп тортишмай, эл баҳосида олавер».

У бир уюм гўшти тушга қолмай сотиб бўлди. Чоғроқ тарвуз сиққулик қопдек кенг чўнтағидаги пулларни ҳафсала билан санаб, иккига бўлди-да, бир бўлагини қўйин чўнтағига, иккинчисини ён чўнтақка солди. Ён чўнтақдагиси бозор-ўчарга, қўйиндандагиси эса уйга боради.

Пул деган жониворнинг хўп ажойиб қуввати борда. Ҳусан полвон керилиб бозор оралади. Аёллари айтган нарсаларни харид қилиб, копга жойлади-да, қўшни растага ўтди. Ёнғоқфуруш йигитни тушликка таклиф қилмоқчи бўлди. У чинкиллаб савдо килаётган экан, узрини айтди.

Ҳусан полвон тентираб, бозор биқинидаги тамаддихонага кирди. Кабобпазга бирталай кабоб буюриб, бўш столлардан бирини эгаллади. Яхши савдо димогини чоғлагандек, кабоб хиди иштаҳасини қитиқлади. Унинг ичкиси келди. Оғир тебраниб бориб, буфетдан бир шиша арок олиб келди. Бошқалардек стаканга куйдириб олишдан уялди. Бирор ичарман, кеп колса куйиб берарман, деб ўйлади.

Биринчи стакан ёдек кетди. Иккинчисида боши кизиб, олам кўзига мунаvvар тус олди. Ўриндиққа ястаниб, кавшанишда давом этаркан, қўшни столда ўтирганларга эътибор берди. Аникроғи, уларнинг ғалати гап-сўзлари дикқатини тортиди. Стол атрофида бир киз, уч йигит ўтиради. Стол устида бўшатилган, бўшатилмаган шишалар турарди. Така мўйлов қўйган гавдали йигит биринчи карашдаёқ унга ёқмади. Ёнидаги шериги ундан-да совук эди. Киз новча, озғин, учинчи йигитга тегишли шекилли, баҳс давомида, бас килинг, деган маънода уни киши билмас тутириб қўяди. Сирасини айтганда, бу баҳс эмас, даҳанаки зуғум эди. Така мўйлов оғиз кўпиртириб, нималарни дир уқтиришга уринар, турки совуғи эса тутун пуркаб, бир

нуктага маъносиз тикилиб ўтиради. Озғин йигит ҳам тингловчи, ҳам инкор этувчи эди. Гап чамаси аёллар хақида борарди.

Агар кабобпаз йигит совуган кабобни янгилаш баҳонасида ёнига келиб, кўп тикилаверманг, жаҳллари чиқади, у киши шу ернинг шефи, демаганида, Ҳусан полвон уларга ортиқ эътибор бермай, таом билан андармон бўларди. «Шеф» сўзидан сўнг у тақа мўйловга янада диккат қилди. Нега деганда, у бу сўзни кўп эшитган, лекин шу номга сазовор бандасини хеч кўрмаганди. Кизиксениб тикилди. Пайқас қиласа, «шеф» деганлари оғзи жуда шалоқ одам экан. Аёл зоти борки, барини тупрокка кориштиrmокда эди.

— Аёлнинг фариштаси бўлмайди, — деди тақамўйлов бир зум тин олгандан сўнг, турқи совуқ узатган пиёладаги ичимликни ликқа ютаркан. — Мановунгни фаришта деб ўйлайсанми? Толибсан фариштангни. Сен йўғингда чўнтак кавлаб бир им қоқай, кўзи йилтилламаса, отимни бошқа кўяман.

Ҳусан полвон бу қадар андишасизликдан лол қолди. Ҳозир новча йигит тақа мўйловга шердай ташланади, деб ўйлади. Аммо уни донг колдириб, новча йигит минифрлашдан нарига ўтмади.

Ҳусан полвоннинг ғазаби қўзиб, вужуди бўйлаб иссиқ бир нима таралди. Бу орада тақамўйлов яна бир-икки куракда турмайдиган гап қилди. Полвон чидаёлмади.

— Ув-в, жонинг борми, сосанг-чи жағига! — деганини билмай қолди. Қўшни столдагилар ялт этиб у томонга карашди. Ҳусан полвон ғазабини базўр жиловлаб, новчага қаттиқ тикилди.

— Э, йигит бўлмай ўл! — деди. — Шунча гапга қайтиб чидаб ўтирибсан? Уриб жағини ушатмайсанми?! Энди хотинингни қандай қайтиб тўшингга тортасан? Ҳалиям бўлса сол жағига айлантириб!

Тақамўйлов бир зум ҳайратдан сўнг маънодор ишшайди. Турқи совуқ килт ҳам этмади. Новча йигит остки лабини шалвиратиб, гоҳ унга, гоҳ ёнидагиларга жавдирарди.

— Синглим, — деди Ҳусан полвон, оғзидаги лукмани чала-чулпа ютиб. — Кеч бундай эрдан! Ному-

сингни химоя қилолмаган эрдан кўра фўла кучиб ётганинг афзал!

Тақамўйлов ошиқмай ўрнидан қўзғолди. Ҳусан полвон унга қайрилиб ҳам қарамади. Бутун қаҳри энди новчага қаратилган эди. Тақамўйлов бамайлихотир ёнидаги бўш ўриндикқа жойлашаркан, чалиштирган бармоқларини ияига тираб, унга пастдан нописанд, ўта нописанд бокиб деди:

— Қишлоғингга ўзинг кетасанми, ё йўлингни кўрсатиб қўяйликми?!

— Сенлама, эшшак! — Ҳусан полвон унга кескин ўгирилди. — Аёл кишиниям шунчалик бадном қиласанми, ахмоқ! Йигитнинг нори ғийбатдан нари юради. Сени эса бир соатдан бери оғзинг тинмайди. Майдо одам экансан лекин! Тарин мўйлов қўйганингга ўлайми?! Бор жойингга, эмасам, бир нима қип қўяман хозир!

Ҳусан полвон сўнгги жумлани зўрға тугатди. Тўсатдан лунжига келиб тушган тарсакидан бир зумга қаловланди. Лекин эс-хушини йўқотмади. Лабларини сийпаб, кафтида қон кўрди. Кейин кучига ишонган бир тарзда кулемсираб, энди сени ейман, деган маънода тақамўйловга қаради. У эса, етадими, ё яна керакми, деган йўсинда ўшшайиб туради. Чамаси, полвоннинг, тавба қилдим, дейишини кутарди. Аммо у кутганча бўлмади. Ҳусан полвон чапдаст бир ҳаракат билан унинг энсасидан тутди-да, манглайнини столга қарсилатиб ура кетди. Учинчи урушдаёқ шўрлик тақамўйлов ҳушидан мосуво бўлган эса-да, полвон буни сезмади, пешонасини дўқиллатиб столга уришда давом этди. Югуриб келган турки совуқ бир силтоваидаёқ нарига учеб тушди. Турки совуқ ёввойи овозда нимадир деб бўкириб, чамаси, шерикларини кўмакка чорлаб, яна унга ташланди. Ҳусан полвон бу сафар аяб турмади. Белидан даст тутди-да, елкасидан ошириб отди. Турки совуқ кабобпазнинг қўрасини ағдариб, нарига думалаб кетди.

Шу билан Ҳусан полвон, ишим битди, деб ўйлади. Энди кетаверсамам бўлар, деб хаёл қилди. Аммо уни кетишига қўймадилар. Осмондан тушгандай бир зумда атрофида пайдо бўлган бир гала йигитлар унга ташла-

нишди. Ҳусан полвон кимнидир уриб йикитди, кимни-  
дир силтаб отди ва кимнингдир муштидан кўзи кўкар-  
ди, бурни қонади.

У бир тўда шаколлар орасига тушиб қолган арлони  
бўридай забт ва шиддат билан олишаркан, ахволи  
ночорлигини пайқади. Қўлига пичорини олди. Тевара-  
гидагилар тисарилгунча бўлмай пичорини кимнингдир  
думбасига тиқиб олди. Кейин қолганларини тамадди-  
хона бўйлаб қувлай бошлади. Етганини уриб-тепиб,  
пичорини сирмаб борди.

Кўпчиликни бир кишига ташланишини у ўта адом-  
латсизлик деб биларди. Билгани учун ҳам жони ҳалку-  
мига келганди. Шердай олишмоқда эди. У дуч келгани-  
ни уриб йикитаркан, кўзи бошдаёқ юзига мушт туши-  
ришга улгурган кора, гўлабур йигитга тушиб қолди.  
Уни пешайвон устуни атрофини айлантириб қува бош-  
лади. Етай-етай деганда бошига урилган кучли зарбдан  
ухлаб юборди. Ортига ўгирилиб, ўша номардни бир  
кўриб қўйишни истаса-да, холи етмади. Кўз ўнги қорон-  
филашаётганини сезиб, йиқилиб тушмаслик учун сўл  
кўли билан устунни маҳкам кучди. Чор-атрофидан ке-  
либ тушаётган зарбаларга чидамок душвор эса-да, устунни  
қўйиб юбормади. Карактлашган миясида бир ўй  
чарх уради: «Ўлсам ҳам тик туриб ўламан! Сен номард-  
ларнинг пойингда чўзилиб ўладиган ахмоқ йўк!»

У бир лаҳзага ўзини йўқотди. Яна қайта хушига  
келаркан, бозор майдони оралаб шошиб келаётган  
милиционерларни, турли томонга қочиб бораётган шар-  
паларни илғади. Ва шунингдек, томошабин бўлиб ту-  
ришган оломонни кўрди. Шунча одам қаердан йиғила  
қолди, деб хайрон бўлди. Одамлар орасида кўзи ёшга  
тўлиб, қўллари ёкасида котган бояги жувонга, унинг  
каватида ранг-кути ўчиб турган новча йигитга кўзи  
тушгач эса, ич-ичидан даҳшатли оғриқ қўзғолиб, ву-  
жудини титратиб юборди. Бу оғриқ тилида қуйидагича  
ифода топди.

— Сен яшаб юрган бу дунёга ўт кетсин-а, иним!  
Заифангни бадном қилишларига қўйиб бердинг-га! Бу  
кунингдан...

У сўнгги жумлани тугатолмади. Тағин хушини  
йўқотди. Лекин устунни қўйиб юбормади. Бамисоли

Коя янглиғ дов тўкиб тураверди. Биринчи бўлиб етиб келган милиционер негадир унга яқинлашишга журъат этолмади. Иккинчиси ҳам тўхтади...

Хусан полвон шу туришида гўё уйкудаги шер ва жоҳатида эди. Кишилар назарида, уйғониб кетса дунёни остин-устун қиласидандек эди.

Милиционерни беихтиёр чўчитган нарса шу эди.

# **ҚИССАЛАР**

## **БЕКАТДАГИ ОҚ УЙЧА**

Шаҳар биқинидаги темир йўл бекати мўъжазгина эса-да, унда хаёт кечаю кундуз кайнайди. Шаҳардаги асосий корхоналару, йирик-йирик омборларга хизмат кўрсатувчи бу кичик жамоанинг ўз машинистлари, юкчилари, йўлтovловчилари, созловчилари бор. Кискаси, йирик бекатларда иш тартиби қандай бўлса, бу ердаги меҳнат тарзи ҳам айни шу йўсинда кечади. Фарқи — фақат бир қадар тинч ва осойишта. Тартиб эса ўша-ўша вактида келиб, вактида кет, иш бўлмаган кезлари, марҳамат, ётиб дамингни ол, аммо зинхорбазинхор ўз ҳолингта улокиб кетма. Бу коида кекса ишчиларнинг кон-конига сингиб кетган, қўллари сал бўш колди дегунча ё нардага тутунишади, ё ёзинкишин эгниларидан тушмайдиган пахталигини юмалоклаб бошлари остига кўйишади-да, дуч келган ерда юмалаб кетаверадилар. Ёшларгина бир оз сиқилади, холос. Уларга қолса, ишни тез-тез дўндирсалару, қолган пайт ўз майлларида ялло килиб юришса. Шу боис, ёшлар бу даргоҳда кўпда кўним топавермайдилар.

Бундан фақат юкчи бригадаларнинг бирида ишловчи Муродгина мустасно. Новчадан келган, комати пишиқ ва пухта бу йигит ишни ва ҳамкасларини фавқулодда бир меҳр билан яхши кўради. Юк кўтаришда бу атрофда унга тенг келадигани йўқ. Чатоқ феъли тиниб-тинчимаслиги ва қитмирлиги. Хиёл бекор колди дегунча қитмирлик қиласвериб, гоҳида ҳамроҳларини конига ёмон ташна килиб юборади. Унинг бу хил шумликларига бригада бошлиғи Шукур акагина бардош бера олади.

Шукур ака, ўз навбатида, уни меҳнатсеварлиги ва беғуборлиги учун яхши кўради. Гоҳо тўйқусдан таъ-

сирланиб кетиб, «ўғлим» деб ҳам қўяди. «Ўғлим» деганида овози товланиб, мижжаларига ёш қалкийди. Сабаби, Шукур ака ўзича бахтсиз одам. Биринчи хотинидан бўлган ўғли уни тан олмайди. Иккинчи хотини туғмас чиқди. Ўлгудек заҳар бу хотинидан Шукур ака каттиқ ҳайиқарди. Ҳар икки гапининг бирида барибир ташлаб кетаман уни, деб қўяди. Йигирма йилдан бери шу гап — ташлаб ташлаёлмайди, шунингдек, тузукрок кўнгил қўйиб ҳам кетолмайди. Бамисоли занжирбанд фил, занжирларини узмокқа қодир эса-да, уни узмокқа на фаҳми, на журъати етади. Аникроғи, бахт нелигини фаҳмлаган холда бахтга интилишдан ҳайиқадиган, ўзи тўқиган ширин эртаклари билан овуниб юрадиган одам. Яна бир феъли, бир карасанг ўлгудек зикна, бир карасанг, ўта кўли очик, дам-бадам сахийлиги тутиб колиб, измидаги одамларни сийлаб туради. Сал кайфи ошса, бикинида ўтирган Муроднинг елкасидан қучиб, сен ўғлимсан, ўғлимдай яхши қўраман сени, дейди. Унинг бу қадар меҳр қўйишига яна бир сабаб бор. Гап шундаки, Мурод уни бировга хафа қилдириб қўймайди. Шукур акага тирғалмоқчи бўлган кимса, ким бўлишидан қатъий назар, Муроднинг ўтли ғазабига рўбару келади. Муштлашишни обдон ҳадисини олган бу йигит, агар ҳақлигини сезса, ҳеч балодан тап тортмайди. Ишга келганига бир йил тўлмай, бекат атрофидаги маҳалла безориларига отнинг қашкасидек танили бўлиб колган, улар ўртасида ўзига яраша обрў-эътиборга эга. У бор пайтида маҳалла безорилари бекатга ўйлашиб-роқ яқинлашишади.

Вагон туриб колмаслиги учун бекат маъмурияти кўпинча четдан ишчи кучи ёллади. Юкчилардан ортган вагонларга чет кишилар жалб этилади-да, меҳнат ҳаққи ўша куниёқ қўлларига тутқазилади. Ёлланма ишчиларни юпун талабалар ва маҳалла бекорчилари ташкил этади. Талабалар борига қаноат қилиб кетиша-веради-я, лекин маҳалла бекорчилари чатоқ — энг яхши вагонларни кўзлашади улар. Баъзан бригадани ҳайдаб, уларга тегишли вагонларни эгаллаб олиш ҳоллари ҳам юз бериб туради.

Мурод ишга келган дастлабки кунлари худди шунга ўхшаш ҳодиса рўй берганди. Ўшандан бригада тунги

сменада эди. Бино пештоқларига ўрнатилган улкан пројекторларнинг ўткир нуридан сутдек ёришган омбор ховлисидағи қатор вагонлардан бирини бўшатмокда эдилар. Ҳар тўпи юз килодан ошиқ брезент ўрамларини елкада ташиётгандарида, уч йигитни эргаштириб смена бошлиғи Ўнар найнов келиб қолди. Кўшни вагонлардан бирини уларга топшириб, ўзи соядай ғойиб бўлди. Кўшни вагон тўла картон кути экан. Картон кутига брезентга нисбатан ўн баробар кам ҳақ тўланади. Табийй, бу нарса келганларга хуш ёқмади. Вагон эшиги очилиши захотиёқ иккиси ишдан бош тортиди. Сочи елкасига тушган новчаси бир қарорга келишга ошиқмади. Кўлларини белига тираб, бир муддат бригаданинг ишини кузатиб турди-да, ма нову вагон бизники, булар эса наргисига ўтишади, деди. Бригада аъзолари уни яхши танишаркан шекили, бу гапдан саросималаниб, ялинишга тушдилар. Айниқса, Шукур акага қийин бўлди. Бригада бошлиғи сифатида кўп нарсаларни ёлғиз ўзи ҳал этиши лозим эди-да, шу боис ўғли тенги йигитга ёлвориб, уни инсофга чақира бошлади. Аммо йигит ўта сур экан, лоақал пинак бузмади. Охирида ҳадеб минфирлайвериши жонига тегди чамаси, Шукур аканинг кўкрагидан итариб ташлади. Шукур aka ерда ётган брезент ўрамига қоқилиб, оёғи осмондан бўлиб тушди. Бўлаётган воқеани ҳанг-манг кузатиб ўтирган Мурод шу ерда чидаб туролмади. У ўрнидан иргиб турди-да, бора солиб йигитнинг нақ ияги тагига мушт қўйди. Сочи алвости йигит бу зарбдан коптоқдай думалаб кетди. Колган иккиси нима қиларини билмай, каловланиб қолишиди. Атрофга сув қуйгандай жимлик чўқди. Мурод навбатдаги ҳамлага шайланиб, ўз ўрнида, унинг шерикларини кўздан қочирмай турди. Аммо йигит ўрнидан қўзғалишга ошиқмади. Юлдуз тўла осмонга бир муддат термулиб ётди-да, сўнг қўлларига таяниб, туриб ўтирди. Оғриқни қувмоқчидай бошини кескинекескин чайқади. Кейин қархисида оёқларини кериб турган Муродга хотиржам тикилиб, этни жунжиктирувчи осойишта оҳангда деди: «Сен мени танийсанми?» Мурод, ўйқ, дея бош чайқади. «Танимасанг, танитамиз! — деди йигит ўша оҳангда. — Бекатдан

ўлигинг чиқади энди!» «Нима, бекатдан нариға ўтмасликка қасам ичганмисан? — деди Мурод унинг нимага шаъма қилаётганини англаб. — Адашмасам, кунда уч бор ўтасан шекилли». Йигит ажабланди: «Нима эди? Агар жанжалнинг изидан қувиб, кўп ғашимга тегадиган бўлсанг, бекатдан нариға ўтишни ўйлаб кўй! Бу ишингни Кобул кечирмас деб қўрқаман!» Гапнинг сирасини айтганда, Мурод Кобулни танимайди, таърифини эшитган холос. Ўшанга асосланиб, оғзига келганини валдиради. Натижа кутилгандан зиёда бўлиб чиқди. Йигит енгил сакраб ўрнидан тураркан, шими ни қоқа-қоқа деди: «Унда бизни кечиргайлар. Лекин илгари сени қўрмаганман. Якинда келдингми?» Мурод бош иргаб тасдиқларкан, Шукур ака томонга ишора қилди: «Кечиримни мендан эмас, манову одамдан сўрашингга тўғри келади...» Йигит, бунинг нимаси қийин экан, деган маънода елка учирди-да, кечирим сўради: «Отец... кечиргайлар бизни! — Кейин шерикларига имо қилди. — Кетдик!»

Улар кўздан фойиб бўлар-бўлмас, Шукур ака ўрдак юриш қилиб, унинг қошига келди. «Ўғлим! — деди овози қалтираб. — Сен менинг ўғлимсан, бугундан бошлаб!» Шундан сўнг қопдай чўнтагини ковлаштириб Муроднинг кафтига бир сиким магиз тўкди. Бошқаларга ҳам оз-оздан улашиб чиқди. «Нега емаяпсан? — деди йигитнинг кўзига меҳр ва ихлос билан тикилиб. — Еябер, таги мўл. Кенойинг кондитирскийда ишлади. У ишхонасидан ўмаради, мен эса уйдан. Ўзи емайди, торт-портга ишлатади. Менинг тишимгаям унча ботмайди. Силар енглар деб опкеламан. Еябер. Ўрикники».

Мана шундан бери иккиси қадрдон, бирга ёб-бирга туришади. Мурод уни ҳам қадрлайди, ҳам ўткир ҳазиллари билан жонини олади. Ҳар бир ҳазилдан кейин Шукур ака бирор беш дақика қовок уюб юрган бўлади-ю, сўнг ҳеч нарса рўй бермагандек гаплашиб, кулишиб кетаверади. Қисқача қилиб айтганда, Шукур ака ноёб феълли одам, бундай дўлвор, бундай содда феълли одам мингдан битта бўлса ажаб эмас: Юргандаям, тургандаям юзидан кулгу, димогидан қўшиқ аримайди. «Эй-й-й, жони-и-им...» Қўшиғи мана шу икки

оғиз сўздангина иборат, колган қисми ижрочининг кайфиятига қараб турли хил иборалар ва оҳанглар билан бойиб боради. Шукур акани жуда яқиндан билмаганлар «Муаммосиз одам» деб ўйлашади. Аслида эса...

Бригаданинг колган учта аъзоси турли ёшда бўлиб, узок йиллардан бери бекат чангини ялаб келишади. Бири — хомуш, бири — серзарда, бири — ичимдагини топ, хуллас, учаласи ҳам ўзига хос яхши одамлар. Айни дамда ўзига яраша баҳтсиз одамлар. Бири хотинидан куйган, бири фарзандидан сиқилган, бирини эса умуман ҳеч нарсага қизиқиши йўқ. Қўлларига пул тушди дегунча ҳамжихат холда хафагарчиликни қувишади. Каллалари қизиган сайин ҳар бири ҳали аёл зотини ҳидлаб кўрмаган Муродга насиҳат қилмоқни ўз бурчлари деб билади: Уйланма ҳеч, — дейди Ринат узундан-узун кекириб; юзтасидан биттасини танлаб уйлан ва ҳеч вакт хотинга бўш келма дейди, Абдулла шангиллаб; аёл кишининг макри қирқ эшакка юк бўлар, буни унута кўрма, студент, дейди Шукур ака катордан қолмасликка тиришиб. Факат Колягина умумий насиҳатга қўшилмайди, сигарет тутинига хаёлchan термулганча ёшлигида бўлиб ўтган бир севги тарихини юзинчи бор хикоя қилишга киришади. Ҳикоя қилингани сайин кўзлари алланечук ёниб, рангпар чехраси ҳаяжонли тус олади. Унинг айни шу ҳолати Муродга жуда ёқади, ёккани боис, хикоясини юзинчи бор берилиб тинглайди.

Мурод бир нарсани, яъники атрофидаги бу одамларнинг ўзича ёлғизликларини, оддий инсоний меҳрга ташналикларини аллақачон англаб етган. Ва шу боисдан, шунга қараб муомила қилишга, озми-кўпми уларни қувонтиришга тиришади. Қувонтиришга қувонтирадиу, аммо қитмирлиги тутиб, баъзан жуда ҳаддан ошириб юборади.

Бу галги воқеа ҳам шунга ўхшаш бўлди. У, ўзи билмаган ҳолда, аёл деса, лабидан учук тошадиган Шукур аканинг юрагига муҳаббат ўтини солиб қўйди. Албатта, бу ҳодиса ўз-ўзидан юз бергани йўқ, бунга Мадина холанинг бобиллашию, Шукур аканинг қаттиқ эзилишларидан бири сабаб бўлганди.

Ўша куни бригада тунги сменага келганди. Кундан туннинг фарқи бор дегандек, тунги смена ҳаммага ҳам ёқавермасди. Тунги сменага келганлар овқатдан сўнг бир оз мизғиб олмок умидида ишни эртароқ бошлашга харакат қилишади. Тартиб бўйича бу мумкин эмас, аммо истисносиз қоида йўқ деганлариdek, ким ҳам бунга бўйсунарди. Боз устига, ухлаш учун ишчилар шундай жойларни танлашардики, смена бошлиғи кепрак пайтда чироқ ёқиб топмасди уларни. Аслида смена давомида белгиланган вагонлар бўшатилса бўлди, қолгани билан бирорвнинг иши йўқ эди. Энг муҳими, ҳар ким ўз аравасини ўзи тортсан, ўзга бирорвга юк бўлмасин, деган ақида бўйича иш олиб бориларди бу ерда. Ишни дўндиридингми, хоҳла, ётиб ухла, хоҳла, ўйнабкул, факат менга гап тегизманглар, эрталаб бошлиғнинг олдида бўйин эгиб туришга тоқатим йўқ! Смена бошлиғининг ягона илтимоси шу эди. Шунингчун тунга келганлар дарҳол вагон суриштиришар, бор бўлса, яхши, акс ҳолда ковок осиб тўнғиллашар, бекордан-бекорга смена бошлиғи билан диспетчерга ғашаво қилишарди.

Оқшом Мурод ишга келса, Шукур ака, лаби четида сигарет, бекат ховлисидағи сўрида қовок уюб ўтирган экан. Саломига алик йўқ, нега кечикдинг, дея тўнғиллади. Шундан билдики, демак, вагон йўқ, эмасам Шукур ака бундай демасди. Шунга қарамай, бу хил муомила Муродга ёқмади. Билагидаги соатни Шукур аканинг нақ бурни тагига тақаб деди:

— Кечикдингиз нимаси? Ҳали беш минут бор-ку.

— Ҳамма келган, сендан эса дарак йўқ, шунинг учун айтгандим, — деди Шукур ака одатдагидек бирдан паст тушиб. — Ўтиришдан бошқа иш ҳам йўқ бугун.

Мурод унинг қаватига чўкиб, теваракка разм солди. Бригаданинг қолган аъзолари узун очик айвон тўридаги стол атрофида давра куришган, чамаси нардани эрмак қилишарди. Улардан сал берида нотаниш йигитлар овқатланиб ўтиришарди. Айвон ташқарисидаги суюнчилик узун ўриндикин кундузги смена ишчилари банд этишган, хозиргина ювуниб чиқишган чамаси,

афтлари қип-қизаришиб, чойни майдалаб ўтиришарди. Бекат биносига тақаб қўйилган бошқа бир ўриндиқда икки нафар кранчи эзилишиб пиво ҳўплашарди. Юз-кўзларидан, ишни қотириб қўйдик, бу ёғига энди эркимиз ўз қўлимизда, хохласак, пиво ичамиз, хохласак, ўткирроғидан тортамиз, деган иддаоли ифода барқ уриб туради. Иккисининг бу хилда мазза қилиб ўтириши эндигина келиб турган тунги смена кранчисига кор қилди шекилли, йўқ ердаги баҳонани рўкач қилиб, тирғалишга тушди. Улар эса боплаб сўкиб беришди. Буниси, бошлиққа арз қиласман, деб пўписага ўтди. Улар нописанд кўл силтаб, ишшайиб қўя колишди.

Бекат ишчилари ўз ҳак-хуқуқларини яхши билишади. Смена давомида ўзларини бинойидек тутишади-ю, иш вакти тугаши билан алланечук талтайишиб қолишади. Бир-икки чойнак чойни бўшатишмасдан хеч қаёқка жилишмайди, гоҳо ўткирроғини майдалашга ҳам улгuriшади. Тирғалмоққа ботинган раҳбарга айтар гаплари битта: «Сен бизга иш пайтида хўжайнсан, — дейишади бурунларидан эшак курти ёғилиб. — Ҳозир эса ишдан ташқари ҳолатдамиз. Смена тугаганига яrim соат бўлди. Дам олишимизга халақит берма!» Бунинг устига, бекат ховлиси хордиқ чиқаришга жуда боп жой. Уч йил бурун ишга келган бекат бошлиғи Ўлмас бу борада анча жон куйдирган. Ҳовли юзига кўрк бағишлиб турган ёзги айвон у кишининг ташаббуси билан қурилган. Кейин бундай каралсаки, чойхона билан айвон ўртасида анча ер бўш қолаяпти. Ўртада чоғроқкина ҳовуз ковлатиб, теварагига қичик-қичик сўри қўйдирди. Ҳовлидаги жамики саранжом-саришталикка жиккаккина бир кампир жавобгар. Кунда уч маҳал супуради, сидиради, гоҳида эса, енг ичиди арок, вино деган нарсаларни пуллаб туради. Қисқаси смена алмашув пайларида-эрталаб ва окшом пайлари ҳовли фавқулодда гавжумлашади ва бунда ажиб бир хушкай-фият ҳукм суради.

Факат Шукур акагина ҳозир бу умумий кайфиятга қўшилмай бир четда тумшайиб ўтирарди.

— Uriшгандай нега бўлак-бўлак ўтирибсизлар? — деди Мурод.

— Келишмаса, нима, кўтариб келайми, — деди

Шукур ака айвон томонга норози тикилиб. — Уларга нарда бўлса, вагон борми-йўқми, бирортасининг иши йўқ. Ҳаммасига Шукур бош котирса. — Шу пайт ховли юзида смена бошлиғи Ўнар найнов пайдо бўлди. Шукур ака ўтирган жойида унга ўдағайлаб кетди: — Ўнар! Нима, пашша қўриб ўтираверамизми энди! Телефон қил станцияга, тезроқ юборишин вагонларини! Ҳеч айрони ачимаган одам экансан-да ўзинг ҳам! Уни қара, пинак бузмайди-я баччафар!

Унинг кейинги гапини тасдиқламоқчидай, Ўнар найнов лоақал қайрилиб қарамади. Диққати қўшимча йўлда хартумини чўзиб турган кранда, ҳамкаслари билан аллақачон тил топишиб, уларнинг насибасига озми-кўпми шерик бўлишга улгурган кундузги смена кранчисидан ора-сира уни-буни суриштириб қўяди. Бирор икки дақиқалардан кейингина, тўсатдан қўзи тушгандай, Шукур ака тарафга ўгирилиб, салом деган маънода, аввал чап қўлини, сўнг ўнг қўлини кўтариб, силкиб қўйди. Бунга жавобан Шукур ака темирийўлчиларга хос жаргонда ўхшатиб сўкиб берди.

Чўзинчоқ қорамагиз юзидан таббасум аrimайдиган бу одам қувноқликда Шукур акани ярим йўлда қолдирив кетарди. Кулай пайт топди дегунча ҳазил-хузул қилавериб, Шукур аканинг холи-жонига қўймасди. Ҳозир ҳам унинг бўғриқиб сўкинишларига парво қилмай, илжайганча у томон юрди.

— Нимадир деб маърағандай бўлдингизми, Шукур ака, — деди қўришмок ниятида кўл чўзаркан, биқинига секин тутиби.

— Нима, мен сенга кўймидим маъраб, — Шукур ака унинг қўлини итарган бўлди. — Торт қўлингни. Фаянинг биқинини чимчилаб келиб, мен билан қўришсанми энди. Сен менга вагондан гапир.

— И-и, вагонни бошингизга урасизми, Шукур ака, — Ўнар найнов қўли муаллақ қолганига зифирча оғринмади. — Вагон дегани — иш, иш дегани — терлаш, хориш, чарчаш... Нима киласиз ишни? — У сўри четида ётган кутидан битта сигарет олди. Маза килиб, оёқни узатиб ётавермайсизми. Мана, Муродга оёқни уқалатинг, мен устингизга чиқиб тепкилай. Маъқуллми?

— Бола-чакамни сен боқасанми, нима? — Шукур

ака сигарета кутисини чўнтағига яшириб, унга таънамомуз тикилади.

— Дарвоке, еярман-ичарманингиз кўп-а, — Ўнар найнов юзига қайгули тус берди. — Майли, бу ёғини хеч ўйламанг, «простой»га кўпроқ ёзаман.

— «Простой»инг нима, уч-тўрт сўм пул-да, — Шукур ака баттар норозиланади. Ўтган сафаргисигаям носпулини ёзисбсан.

— Шукур ака, сиз хеч ўйланмай, бола-чақани кўпайтираверинг, — Ўнар найнов сигарет кулини ерга эмас, унинг этиги қўнжига чертиб туширди. — Унгача «простой»нинг ҳақи ҳам ошиб қолар.

Шукур ака ўзининг майна бўлаётганини пайқамайди. Нега деганда, бола-чақа унинг энг зўр химоя воситаси. Одатда, кўшни корхона ва омборларда юкчиларнинг қилган ишига қараб бекат маъмуриятига маълумотнома берилади. Маъмурият ушбу маълумотнома асосида юкчиларга иш ҳақи чиқаради. Шукур ака ўша маълумотномани олишга устаси фаранг. Аммо хаммаям унинг раъига қарайвермайди. Шунда у, бунакада бола-чақани қандай бокамиз деб, йўқ бола-чакасини пеш қилиб туриб олади. Корхона вакили унинг турқитароватига қараб, бирор ўн боланинг отаси бўлса кепрак, деб ўйлайди. Қилинмаган ишни қилинди деб қофоз ёзиб беради. Таниш-нотанишга шу гапни такрорлайверганиданми, бу нарса одат тусига кириб қолган ва баъзан бу гапга ўзи ҳам чиппа-чин ишониб қолади. Ҳозир ҳам шундай бўлди. У калта-калта бармокларини бирин-кетин букиб, дийдиё қилишга тушди.

— Ўзинг ўила, бирини ўйлантириш керак, бирини узатиш керак, бирини... «простой»га берадиган пулинг нима бўлади? Бу томонини ўйлайсанми хеч?

— Айтганча, — Ўнар найновнинг афтига шум ифода қалқийди, — бола-чақадан нечта, Шукур ака?

— Бир вагон.

— Ўнда менга эмас, ана Фаяга ёпишинг, — дейди Ўнар найнов уни баттар қўзғаб. Станцияга тепловозни кеч юборган ўша. Яхшилаб бир сўкиб қўйинг. Кейинги пайтда жуда қулоксиз бўп кетаяпти.

Дакиқа ўтмай, Шукур аканинг ўткир овози ҳовлини тутади.

— Фая! Фая дейман!

Дистпечерхонанинг очик деразасидан сочи қип-кизил рангга бўялган бош кўринади.

— Нима?

— Вагонлар қани? — дейди Шукур ака оғзидан тупук сачратиб. — Нега тепловозни вактида юбормадинг?

— Қайси тентак айтди бу гапни? — дейди Фая. Тепловоз ўз вактида кетган.

— Кетган-кетган, — Шукур ака жаҳл ва зарда аралаш сўри суюнчигига мушт туширади. — Вактида юбориш керак эди! Бунақада бола-чақани қандай боқамиз, а? Сенга ўхшаб битта боланинг ташвиши бўлса экан менда. Бутун бир вагон. Телефон қил, тезроқ юборишин вагонларни!

Фая деганлари бошда ажабсинади, сўнг эрмакка у ҳам кўшилади.

— Қачон улгурга қолдингиз, Шукур ака? — дейди кулиб.

— Нимага? — Шукур ака тезда ангсармайди.

— Бир кечада шунча бола-чақа орттиришга? — Фаянинг бу гапи умумий кулгуга сабаб бўлади. Кулги босилгач, у бот сўрайди: — Ахир куни кеча биттаем йўқ эди-ку, а? Қачон улгурга қолдингиз?

Шукур ака қовун туширганини англаб, тумшайиб олади. Ўнар найновнинг ҳазилларига жеркиш билан жавоб кайтаради. Шунда Ўнар найнов уни тинчитмок ниятида аста елласига қўл юборади.

— Кўпам куйинаверманг, — дейди секин шипшиб. — Вагонларнинг хўроздлари келаяпти. Битта цепли, иккита краскали...

Бундай серпул вагонлар бекатга кам келарди. Бу хил вагонларнинг биттаси бундайроқ вагонларнинг ўнтасига арзиди. Шу боис, ҳозиргина тумшайиб ўтирган одамнинг рангига кон югуриб, оғзининг таноби қочади. Ўтирган жойида, ёш боладай, ғалати ирғишлиб қўяди.

— Шу-у, биттасини студентларга берсаммикан деяпман, — дейди Ўнар найнов тағин унинг юрагига ўтёкиб. — Уч вагонни бўшатишга улгуармикансилар. Махалланинг болалари ҳам иш сўрагандай бўлишувди.

Шукур аканинг рангги кув оқариб, шоша-пиша чўнтақ ковлашга тушади.

— Улгурамиз, — дейди чўнтағидан конфет чикариб. — Ма, мановуни оғзинга сол-да, тек ўтири.

— Нима, мен сизга ёш боламидим, — Ўнар найнов оғринган киши бўлади. — Конфет билан алдайсиз одамни.

— Ўткири эртага, — дейди Шукур ака хаяжони зўридан пешонасига тепчиган терни кафти билан сидириб. — Худо хоҳласа, эртага маза қип бир ўтирамиз. Ҳозир эса сасингни чиқармай, тинч ўтири. Ойда́йилда бир келади, бундай вагон, нима қиласан ҳаммага овоза қилиб. — Шундан кейин бригада бошлиғи сифатида ёнида ўтирган Муродга жиддий буюради: — Нега ўтирибсан, бор, кийиниб чик! — Қейинги гапини охиста шипшийди: — Эшитдинг, вагонларни хўрози келаётганмиш. Бор, боракол.

Мурод кийиниб чиқса, Шукур ака жойида йўқ эди. У атрофга аланглаб қидиринди. Топди. Шукур ака лапанглаганча дарвоза томон кетиб бораради. Мурод унинг изидан тушди. Шукур ака дарвозадан чиқиб, йўлни чапга солди. Мурод унга муюлишда етиб олди. Шукур ака димоғида ўша қўшик, одатдагидек, чойхона ортидаги, катта йўл ёқасидаги ола-була кўтарма ёнида қўнқайган оппоқ уйчани мўлжал тортган эди. Муроднинг «дум» бўлгани унча ёқинкирамади.

— Вагон келгунча, нарда-мардами, карта-партами ўйнасанг-чи, — деди пўнғиллаб: — Орқамдан эргашганинг нимаси. Ё Мадина олдида пишириб қўйибдими сенга?

— Ҳа, — деди Мурод сиртига сув юқтирмай. — Аччиқкина малина чойи пишириб қўйган экан, биргалашиб ичиб келамиз.

— Сенинг ёшингда мен қизларнинг ортидан қолмасдим, — деди Шукур ака йўлдан ўтиб бораётган қизларга имо қилиб. — Қара, мўрчамиён, бодом қовок, ширмой юзли... ох-ох!

— Ҳаммаси Мадина холанинг чойидан ўтаверсин, — Мурод баттар унинг жигига тегади. — Кўп гапирмай, тортиңг. Бир-ир чойхўрлик қип чиқайлик. Ё Мадина

холани кизғанаяпсизми? Қизранаётган бўлсангиз, хозироқ изимга қайтишим мумкин.

— Жим, — Шукур ака уйча томон ишора қилиб, бармогини лабига босди. — Эшитмасин. Эшитса, иккакаламизни хам олдига солиб кувлади. Малина чойни кейин тушингда кўрасан. Лекин чойни зўр дамлайди-я?

Иккиси бир-бирини турткилашиб, эшикка рўпарў бўлишди. Ташқарида шом чўка бошлаган, ичкаридан ўткир ёғду тарапар, бурчакдаги чойгумнинг бир текис шифиллаши аниқ-таниқ эшитилиб турарди.

Уйча бекаси Мадина хола вақт-бевакт бош суқуб турувчиларни аччиқ малина чойи билан сийлаб туарди. Тўрт киши кирса, бешинчи одам айланишга жой тополмай қоладиган бу хона хайратли даражада шинам ва саришта эди. Бекат бўйича энг енгил ва бегалва иш аслида холаники. Юк состави завод томонга ўтганда гина йўл кўтартмани тушириб-кўтаришни демаса, қолган пайт уйчадан чикмай алланималарни тўкиб ўтиради. Феъли хам касбига хос-гоҳ худ, гоҳ бехуд. Нафси-ламрини айтганда, Мадина хола ҳаммани хам хуш кўравермайди, унинг хузурига Шукур ака билан Муродгина бемалол кира олади. Мурод ўзининг бегараз ҳазил-хузуллари ва шунингдек, вагондан ўмарган у-бу нарсалари билан кўнглини овлаб туради. Дейлик, бригада бирор жойда совун туширди. Билингки, ўша куни Мадина хола ҳам беш-олти юмалоқ совунга эга бўлади. Қисқаси, рўзгор учун керакли нимайики туширмасин, Мадина хола ҳеч қачон қурук қолмайди.

Шукур акага келсак, у холадан ширинликларни аямайди. Хола у билан деярли тенгдош, ҳар иккиси хам аллақачон элликни хатлаб қўйишган. Турмуш аччиқ-чучукларини меъёридан ошикроқ тортишганиданми, ўлгудек серзарда, салга урушиб, салга ярашиб кетаверадилар.

Улар ичкарига бош суқушганида, Мадина хола, одатдагидек, бурчакда пайпоқ тўкиб ўтирган экан. У кўзойнаги устидан аввал кирувчиларга, сўнг оёқлари-га разм солди-да, жуда кисқа лутф қилди.

— Оёқ...

Шукур ака қўймичини кулгили ликиллатиб, бўсаға-

га ташлаб кўйилган нам латтага оёкларини сурта бошлади. Беихтиёр унинг ортида туриб қолган Муроднинг шумлиги тутиб, коржомаси остидан аста бикинига кўл юборди-да, каттиқ қитиқлади. Қитиғи зўр Шукур ака ҳе-хелаб диконглаб кетди. Шу диконглашда деразага тақаб кўйилган чоғроккина столга қўймичи билан бориб урилди. Стол устидаги чойнак-пиёла шакирлаб, Мадина холанинг ўтакаси ёрилай деди.

— Синдирасан! — деди столнинг бир четини жонжаҳди билан тутиб. — Айикқа ўхшаб лапангламай кет, сен қўпол! Ўзингни тутиб юрсанг ўласанми!

— Мен... мен эмас, — Шукур ака оғриган қўймичини сийпалаб, худди ёш боладай ўзини оқлашга тушди. — Манову қитиқлади мени. Биласан, қитифим ёмон. — У шундай дея Муродга ўдагайлаб кетди: — Нега қитиқлайсан?! Нима, мен сенга ёш боламидим, ҳадеб жигимга тегаверасан?! Соламан айлантириб ҳозир бир, кейин юрасан ўпка-гина қилиб! Бундан кейин қўл чўзганингни кўрмайин! Кўрсам, чаток қиласман, бола!

— Ё тавба, нима қилдим сизга, Шукур ака? — Мурод гуноҳсиз бир киёфада кўлларини кенг ёзиб турарди. — Ўзингиз юришни эплаёлмайсизу менга ёпишганингиз нимаси. Тухмат ҳам эви билан-да. Худо шоҳид, қўлимниям тегизганим йўқ сизга.

— Унда шайтон қитиқлабди-да, а? — Шукур ака содда, бу хил сурликдан баттар бўғилади. — Қип туриб, қимадим дейди-я, нахал! — У бармокларини ғалати харакатлантириб, баайни кимнидир қитиқлагандай бўлади. — Мана бундай, мана бундай қитиқлайдинг-ку ахир.

— Қип-қизил тухмат, — Мурод ранжиган киши бўлади. — Қиладиган бошқа ишим йўқдай нега энди кир-чир бикинингизга кўл тегизишим керак. Минг сўм берсангиз ҳам тегизмасман қўлимни баданингизга. Яхшиям қиз бола эмассиз, йўқса, одамни қип-қизил тухматга колдириб ўлдиаркансиз. — У бурчакдаги курсига чўкиб, аразлаганнамо юзини ўгириб олди.

— Қип туриб қимадим дейди-я. Қанака одам ўзи бу, а?

— Қимаган ишимни қимадим дейман-да, — Мурод кулгусини яшириш учун аввал шифтга, кейин оёклари

остига тикилади. Этигининг сўкилган чокини бармоклари билан пайпаслаб, ўзича минфирилаган бўлади: — Юрған йўлида қоқилиб юради-да, яна тухмат қиласди.

— Қоқилмадим, қитиқладинг-ку, номард! — Шукур ака ҳақиқатни исбот этмоққа чинакамига киришади. — Мен мана бундай-мана бундай қилиб, — у этикларини полга ишқаб кўрсатади, — оёғимни артаетган эдим, сен эса орқамда туриб эдинг. Киши билмас қитиқладинг. Кейин, мен чўпчиб-чўпчиб кетдим. Ўрта ерда Мадинанинг чойнагини синдириб қўяй дедим. Эндијам ёлғон де?

— Ёлғон, — Мурод афтига сурбетона тус беради. У пайтда мен ичкарида эдим. Мана шу жойимда тинчгина ўтирган эдим.

— Ё тавба! — Шукур ака қулочини кенг ёзганча, кўзларини шифтга тикиб, бир зум хайратда қотиб қолади: — Тавба! — дейди кейин ҳам ҳолатини ўзгартирамай. — Бу не балоки, қип туриб қимадим дейди-я!

Қўлидаги тўкиётган пайпоғи билан юзини тўсганича, елкалари титраб, сассиз кулаётган Мадина хола ўртага тушмаганида, бу кулгили сахна қанча давом этиши номаълум эди. Шукур аканинг беҳуда куйибишишларига раҳми келди шекилли, у орага сукилди.

— Нима, бу ерга жанжаллашгани келганимисилар? — деди жиддий тортиб. — Жуда уришгиларинг келаётган бўлса, ана, ташқарига чиқинглар. Нимаси бу, э!

— Гапини эшитмаяпсанми, — Шукур ака кўзлари жавдира, унга тикилди. — Қип туриб қимадим деб ўтирибди-ку!

— Киз болага ўхшаб сал нарсага диконглайвермада сен ҳам, — деди Мадина хола койиб. — Ким айтади сени эркак деб.

— Қитиқлагандан кейин диконглайман-да, — Шукур аканинг қовоғи осилди. — Ё сенда қитиқ йўқми?

— Эрсиз хотинда қитиқ нима қиласди, Шукур, — Мадина хола ишини йиғишириб, чой дамлашга тутинади. — Қитиқнинг ҳаммаси... эрим билан кетган.

Шукур ака бошини бир ён кийшайтириб, унга бошдан-оёқ тикилади.

— Дўндиқкинасан-ку халиям, — дейди сўнг. — Қитиғинг ўлмаган чиқар. Қани, бир қитиқлаб қўрай-чи.

— Ҳаддингдан ошма кўп! — Мадина хола қўзойнаги устидан унга жиддий тикилиш килади. — Ёшлигингда еган калтагинг эсингдан чикдими. Яхшиси, тинчгина ўтириб чойингни ич.

— Чойга йўқ демаймиз, Мадинахон, — Шукур ака «қитиқ жанжали»ни пакқос унутиб, тагин асл ҳолига қайтди. — Лекин чойни қуруқ ҳам ичмаймиз. — У чўнтағидаги майиз ва конфетларни столга тўқди. — Бунақаси дўконда йўқ, бизди чўнтақда бўлади факат.

— Бунақада одамни ширин қилиб юборасан-ку, Шукур, — Мадина хола ширинликларга анчайин қараб кўйиб, икки-уч оғиз ширин сўзини аямайди. — Сендай меҳрибон эркакдан яна битта бўлса, эрниям кераги йўқ.

— Ширингина бўп юргин деймиз-да, Мадинахон, — мақтовдан у талтайиб кетади. — Мен тургандা бошқа эркакни бошингга урасанми. Ҳаммасига мана биз ба-логардон-да.

Мадина хола мийигида кулимсираб, деразадан ташқарига караган бўлади.

— Анову келаётган хотинингми?

Шукур ака қалқиб кетиб, оғзидағи магизни кафтига ташлади-да, жонхолатда ўгирилиб, ташқарига мўралайди.

Кўчада оқсоқ кампирдан ўзга зор йўқ эди.

— Қани?

— Ҳолинг шу-ю, хушомадга бало борми! — Мадина хола мириқиб кулади.

Шукур ака кафтига йўталиб, гоҳ унга, гоҳ баланд овозда ҳахолаётган Муродга боқаркан, чуқур сўлиш олади.

— Шуни эслатма, — дейди кейин ҳазин оҳангда. — Ҳеч бўлмаса, ишда тинчгина юрай. Куй. Чойингдан куй. Мураббодан кўпроқ сол. Нега бунча қўлинг қалтирайди. Сол кўпроқ.

Мадина хола чойини қизғанмайди, лекин мураббонинг икки қошиғидан ортиғига рухсат бермайди. Ошкора бобиллаб беради. Онда-сонда Шукур акани сийламаса, колганлар учун бу тартиб бузилмас қонун. Бу қонунни факат Муродгина бузиб туради.

Одатда, чойни ҳар ким ўзига қуяди. Ҳозиргидек

ҳолат камдан-кам ҳоллардагина юз беради. Қолган пайт Мадина холанинг мезбонлиги чой дамлашу, ким қанча мураббо солаётганини кузатишдан нарига ўтмайди. Муродга навбат Шукур акадан кейин келади. Стаканга икки қошик мураббо согланидан сўнг, бирдан у бирор бурчакка анграйиб тикилиб қолади-да, суваракми, дейди. Мадина хола суваракни жинидан ёмон кўради. Шу боис, кўллари харакатдан тўхтаб, бутун гавдаси билан бурчакка ўғирилади. Аввал кўзойнаги устидан, сўнгра кўзойнаги орқали тикилади. Азбаройи диккат билан тикилганидан даҳани осилиб, оғзи яrim очилиб колади. Бу орада Мурод стаканга учинчи, баъзан тўртинчи қошик мураббони солишга улгуради. Қани, кўринма-япти-ку, дейди охири Мадина холанинг токати ток бўлиб. Мурод стакан тўла хушбўй чойни кафтлари орасига олиб, курсилардан бирига жойлашаркан, бамайлихотир чой хўплаб, кўзимга кўринибди шекилли, дейди. Мадина хола енгил тортиб, ишига тутинади.

Муроднинг бу хил киликларидан Шукур аканинг завки келади. Қойил, дейди ташқарига чиқишгач, Мадинани ёмон бопладинг! Баъзида ўзи ҳам алдамоқчи бўлади-ю, лекин сира эплаёлмайди. Ўтган кундузги сменада шундай бўлди. У иккинчи қошик мураббодан сўнг, бошқа баҳона куригандай, кўчага ишора қилди: «Анову ким?» Мадина хола кўчага қаради. Ўткинчилар сероб, кайси бирини сўраяпти бу? Холанинг чалғиши хийла фурсатга чўзилган эса-да, Шукур ака барибир учинчи қошикни эплаёлмади, довдираб мураббо идишни ағдариб юборди. Кейин шолромдай қизариб, Мадина холадан эшитадиганини эшитди.

Бу сафар Мадина хола стаканларга ўзи чой қўйди, мураббониям ўзи солди. Сўнг конфет тишлиб, чойдан бир хўплади-да, яна ишига тутинди. Бу ерда ортиқча мулозаматга ўрин йўқ, ҳар ким ўз-ўзига хизмат қилаади. Шукур ака узалиб стаканлардан бирини кўлига олди. Мураббо идишнинг ёнида битта стакан қолди. Мурод ўша стаканни олмок мақсадида ўрнидан кўзғаларкан, тўсатдан печка турган бурчакка бакрайганча тикилиб қолди. Мадина хола безовталаниб, гоҳ унга, гоҳ бурчакка аланглади.

— Яна нима бўлди? — деб сўради шубҳа тўла

охангда. — Кўзингга тағин нима кўринаяпти? Лекин, сен боладан ёмон юрак олдириб кўйибман, қачон қарама аллабалоларни кўриб юрасан.

— Ўргимчак! — деди Мурод бурчакдан кўз узмай. — Ох-ҳ, канчалар жирканаман бу ярамаслардан!

— Қани? — Мадина хола ярим ўгирилганича, печка билан девор оралигини кўздан кечиришга тушди. Бу орада Мурод тезгина стаканга бир эмас, икки қошиқ мураббо солди-да, яна бояги холатига қайди. Бурчакка жиддий ва хаёлчан тикилганча серрайиб тураверди. Мадина холанинг сабри тугаб, жеркиб берди: — Қани ўргимчак? Куни кеча тозалаб чикканман, ўргимчак нима килади бу ерда?

Мурод холатини ўзгартирмай, бурчакка тикилиб тураркан:

— Ох-ҳ, канчалик жирканаман бу туси совук ҳашоратлардан! — деди хаёлчан охангда. — Кўрсам этим жунжикади!

— Қани? — Мадина холанинг жони ҳалкумига келиб, ер тепинди. — Кўрсат! Ҳозироқ супуриб ташлайман.

— Бе-е, ўзимнинг кийим ечадиган жавонимни айтаяпман, — деди Мурод унга, намунча безовта бўласиз, деган маънода караб қўйиб, жойига келиб ўтириди: — Боя ечинаётиб, бундай зехн солсан, бурчак-бурчакларини ўргамчак ини босиб кетибди. Ҳар бири бармоқдай-бармоқдай келадиган семиз-семиз ўргимчаклар. Ок, кора ва аллабало тусда. Энди оралиқ жойга кўзим тушди дегунча эсим кетаяпти. Худди бир галаси ғимирлаб юргандай. Караганимнинг боиси шу. — У шундай дея печка билан девор оралиғига кўрқкан киши қабилида караб қўйди. — Ишқилиб, манову ерни супурибсидириб юринг-да. Ўргимчак деганлари мана шундай жойларни хуш кўради.

— Ҳа, тозалаб туриш керак, — Мадина хола ижирғаниб уни қувватлади. — Тез-тез тозалаб туриш керак. — Йўғасам, ҳамма ерни босиб кетади. Айтганча, усти-бошингни яхшилаб қоқдингми? Тағин бу ерга илаштириб келган бўлма.

— Икки-учтаси чўнтағимга тушиб колгандай бўлувди, — Мурод ўтирган жойида чўнтақларини кўздан

кечиришга тушди. — Э, семиз-семиз иккитаси ғимирлаб юргандай назаримда.

— А?! — Мадина холанинг кўзлари пешонасига чикиб кетди.

— Қокканман, — Мурод уни тинчлантиришга тушди. — Кийимларимни симёғочга уриб-уриб қокканман. Қаранг, кийимимга ҳатто симёғочнинг изи тушиб қолган.

Мадина хола тинчланса-да, шубха тўла нигохи билан уни бошдан-оёқ кузатиб чиқди.

— Ҳашорат зотидан жуда жирканаман, — деди сўнг стаканни кўлига олиб. — Кўрсам алиргиям кўзиди.

— Аммо Шукур аканинг жавони меникидан баттар, — деди Мурод тагин шумлиги тутиб. — Суварагу ўргимчак деганлари фиж-фиж, нак ҳашоратлар фермаси дейсиз.

Шу гапдан кейин чойниям худо кўп кўрди. Мадина холанинг стаканга чўзилган лаблари чўччайган кўйи қотиб қолди. Кўзлари даҳшатдан бир тус олайиб, gox унисига, gox бунисига қараб турди-да, ўқчиган овозда ўдағайлаб берди. Орада стакандаги чойни дераза оша сепиб ташлади.

— Чик, иккаланг ҳам! — Мадина хола бўлиқ коматини камалакдай эгиб, уларнинг устига бостириб келди. Кўли билан эшикка имо қилиб, пол тепинди: — Кани, ўргимчак-пўркимчакларинг билан хозирроқ кўзимдан даф бўлинглар!

— И-и, жигита тегма шуни, — манглайи терлаганча мирикиб-мирикиб чой хўплаётган Шукур aka Муродга норози бокди-да, сўнг нак тепасида туриб олиб, ташкарига чиқишлиарини талаб қилаётган холага кўзларига жавдираб қаради: — Сенам қизиқсан, келиб-келиб шунинг гапига ишониб ўтирибсанми, — деди негадир кўлидаги стакани кафти билан паналаб. — Ишонма гапига. Шутник бу. Ўргимчак нима килади менда. Суваракни эса сендан баттар ёмон кўраман. Биласан, хотиним кондитерскийда ишлайди. Суварак тугул, пашшани доритмайди уйга. Мен ким — кондитерскийнинг эриман. Суваракни кўярканманми ишкафимга. Тозаман, жуда тозаман. Ишкафимни ҳафтада ювиб, ар-

тиб-суртиб тураман. Ишонмасанг, бориб қарагин, сенинг уйингдан тоза.

Кейинги гап Мадина холанинг нафсониятига тегди. Асосий масала бир ёқда колиб, у бошқа гапга ўтиб кетди.

— Нега энди шкафинг менинг уйимдан тоза бўларкин? — деди уришқоқ хотинлардай қўлларини белига тираб. — Нима, мен сенингча исликиманми, а? Ҳали мен сенга ислики бўлдимми?

— Ҳар гапдан ўзингга нам олаверма, — гўё ҳозир чойини тортиб оладигандек, Шукур aka кетма-кет чой ҳўплади. — Сени ислики деб ўлибманми. Дунёдаги энг чиста хотинсан.

Нафсонияти тўла-тўқис қонган Мадина хола ўргимчагу суварак масаласини қайтиб қўзғомади. Ўзига чой куйиб, жойига бориб ўтирди.

Мурод ҳам чой билан андармон бўлди. Бу орада нариги икковининг гапи яна чап тушиб қолди. Оқибатда, ўртада, одатдагидек, самарасиз баҳс бошланди: Баҳсга, ҳар сафаргидек, Шукур аканинг хаёлий ширин хикояси сабаб бўлди. У узилиб қолган сухбатни давом эттириш умидида гап бошларкан, негадир ўзининг озодалиги хусусида сўз юритгиси келиб қолди-да, ҳамишадагидек орага олдинги аёлидан бўлган ёлғиз ўғлини кистириб кетади, дейдики, ўғлим ҳам ўзимга тортган, жуда озода йигит, пўрим кийиниб, пўрим юради, ота, дўст бор-душман бор, пўрим кийиниб юринг деб, кеча яп-янги костюм-шим совға қилди. Чиста шерст.

Табиий, Мадина хола аввалига унинг гапларига эътибор бермайди. Негаки, Шукур аканинг гаплари рирт ёлғон. Ўғли янги костюм-шим совға қилиш у ёқда турсин, лоақал эсламайди. Буни бекатдагиларнинг ҳаммаси билади. Билишгани учун ҳам индашмайди, майли, ўз кўнглини ўзи чоғ қилиб юраверсин, дейишади. Бирок бу сафар Шукур aka тотли эртакни сал ошириб юборди, дедики, ўғлим ишлашимни истамаяпти, етар шунча ишлаганингиз, тинчгина уйда ўтиринг, сизни ўзим бокаман, ота деяпти. Айни шу гапдан кейингина Мадина холанини тутади. Бирданига тутмайди, аввалига энсаси қотиб, пешонаси тиришади, сўнг маънодор томоқ қиради, бошини сарак-сарак қилиб, чукур-

чукур нафас олади. Қани энди, Шукур ака тийила қолса. Тийилмайди. Ҳатто чой ҳўллашни ҳам унутиб, ўслини таъриф ва тавсиф этишда давом этади. Шундан кейин Мадина хола секин портлайди.

— Ним-ма? — дейди у кўзойнаги устидан унга ўшшайиб тикилиб. — Ўғлим ишлама деяпти дейсанми? Ўғлинг-а? Сен кимнинг бошини қотираяпсан? Топган-тутганингни бу ёққа чўз деса дерки, ишлама демас ўша хомсемизинг. Ё, мен бола ўстирмабманми. Эримнинг ўрнини билдирмай деб, иккисини ҳам бирордан кам килмай ўстирдим, топган-тутганимни йигиб-териб эрга бердим. Зора энди тинарман деганимда... Йўқ, Шукур бошимиз то гўрга кирмагунча сен билан менга тинчлик йўқ. Белимиз майишиб, ўз аравамизни ўзимиз тори тверамиз бундан кейин ҳам. Сен эса ўғлим дейсан. Биламан, ўғлингни қанақалигини...

Шукур акани, ўғлига нисбатан шаъма эмас, ширин эртакнинг белига тепилиши қутуртириб юборди. Қўлидаги ширинликни олдириб қўйган боладай, бирпас анг-танг бўлиб турди-да, кейин кутилмаганда рэнги окариб-бўзариб, холага ёмон тикилди. Азбаройи жаҳли чикканидан бақбақаси ликиллаб, юпқа лаблари бир томонга тортишиб-тортишиб, бирор муддатлик дудукланишдан сўнг, тўсатдан ёрилди.

— Мен галирганда, сен жилпангламай ўтири! — деди бақириб. — Нега гапни гапга қўшай демайсан?! Ўғлингни биламан эмиш! Нимасини биласан ўғлимни! Керак бўлса, менинг болам сенинг болангдан минг маротаба оқибатлироқ! — У шундай дея эгнидаги ишчи коржомаси этакларини жаҳл ила тортқилади. — Манову костюмни кўраяпсанми, ўз қўли билан совға килган! Қара, кандай чиройли! Бунақасини сен тушингда ҳам кўрмагансан!

Мадина хола унинг эгнидаги кир-чир коржомага анкайиб каради. Бошини қийшайтириб, тикилиб-тикилиб каради. Бунга сари Шукур ака баттар авж олди.

— Эгнингдан кишин-ёзин битта кўйлак тушмайди, тагин боламни ёмон дейсан! Қишга томон ҳали пальто олиб бермоқчи, чет элникидан.

— Манову... костюминг ҳам чет элникими? — Мадина холанинг кўзларида кулгу учкунлади.

Шукур ака, кўзлари холада, эгнидаги либоснинг этакларини авайлаб силаб-сийпаб қўяркан:

— Албатта, четники, — деди.

— Хеч четниқига ўхшамайди-ку, — деди Мадина кола кулгусини яширишга тиришиб. — Агар четники шундай бўладиган бўлса, кийгандан кўра киймаган маъкул. Эгнингдагини ҳатто гадой устига илмайди.

Бу гапдан сўнг, Шукур ака унга ҳайрат аралаштикилиб турди-да, кейин кўнгли бир нимани сезгандай, аста эгнига разм солди.

— Э! — деди қип-қизарби.

Хола билан Мурод хохолаб кулиб юборишгандан сўнг яна жаҳл отига минди.

— Ишқафда! — деди ўрнидан илкис кўзғаларкан, нега куласанлар деган оҳангда. — Ишга киймайман-ку ахир. Ҳозир опкеб кўрсатаман.

— Шимини унутма, — Мадина хола баттар кулди.

Шукур ака, кўлидаги стаканни стол устига тўнкариб, остонаяги пол латтани бир тепиб чиқиб кетди.

У чиқиб кетиши билан кулгу бирдан босилди. Ўртага ўнғайсиз жимлик чўқди. Мурод бир нуктага термулганча чой хўплашда давом этди.

— Бахтсиз одам, бечора, — деди Мадина хола килган ишидан пушаймон егандай. — Бахтсизлигини яшириш учун йўқ ердаги гапларни тўқиб-бичиб юради. У ёқда ёлғиз ўғил отам демаса, бу ёқда тугмас хотин нақ аждоҳа бўлса... нима қилсин, шўрлик. Қарға қаф этади, ўз кўнглини чоғ этади дегандай, юриби-да, буям.

— Ха, меҳрга ташна одам, — деди Мурод хаёлчан.

— Ҳаммамиз ҳам меҳрга зормиз... — деди хола маъюс тортиб:

— Лекин... яхши иш бўлмади.

— Нима деганинг бу? — Мадина хола ажабланди.

Мурод кўлидаги стаканни андак зарда аралаш бир четга суриб кўйди-да, секин ўрнидан кўзғалди. Эшикка етган жойида ортига ўгирилди. Аммо бир сўз котмай ташқарига юрди.

Мадина хола унинг ортидан жимгина термулиб қолди.

\* \* \*

Узокдан тепловоз чинкириги эшитилганда, Мурод ховлига ўтганди. Ховли энди анча тинчиб, тунги смена ишчиларигина қолган. Коля ўша жойда хануз юлдуз тўла осмонга тикилиб ётарди. Абдулла билан Ринат хафсала билан нарда суришар, Шукур aka эса ғамга ботган кўйи сўри четида мунгайиб ўтирарди. Бармоклари орасида ўчиб қолган сигарет, кепкаси юкорига сурилган, тор елкалари алланечук шалвираб тушган, мискин ва эзилган бир холатда эди у.

Шукур aka бундай холга ширин эртакларига эътиroz билдирилганда гана тушарди. Бу пайтда яхшиси унга яқинлашмаган маъкул. Аммо Мурод ўзини тутиб туролмади, фоят раҳми келганидан секин бориб, елкасида учди, чой опкелайми, деб сўради. Шукур aka бош чайқади. Ўчиб қолган сигаретини қайта тутатди. Кейин, мени тинч кўй, деган маънода бутун гавдаси билан тескари ўгирилиб олди.

Очик деразадан дистпечернинг боши кўриниб, вагон келтирилган жой маълум қилинганида ҳам Шукур аканинг авзойи ўзгармади, ҳар галгидек, қисқа-қисқа буйруқлар билан ҳаммани ўрнидан қўзғамади, тошдек қотиб ўтираверди. Қачонки, бошқалар ўз майлида йўл тадоригини кўра бошлагандан сўнггина, малол келгандай секин оёққа қалқиди.

Вагон сопол заводи ёнидаги омборда, оралиқ бир ярим чакирим, шпал санаб аста йўлга тушдилар. Энг олдинда Коля, елкасида узун мисранг, сигарет тутунини буркситиб бораради. Ундан сал кейинда Абдулла билан Ринат, Шукур aka эса одатига хилоф равишда энг охирида судралиб бораради. Одатда, у ҳамиша олдинда юрар, жағи бир зумга тинмас, вак-вак қилаверив, гоҳо ўта ғашга тегарди. Эътиroz билдирилганларга ҳамиша гапи тайёр эди: «Сўзлаб борсанг, йўл ўнар, — дерди. — Йўғасам юрагингдан чўғ сўнар». Баъзида гап сотиш жонига тегиб, тўсатдан ўдагайлаб қоларди: «Нима, оғзиларингга талқон солдиларингми, гапирсаларинг-чи! Юзтадан отмагансиларда, а? Ана унда тилларинг ечилади. Ё яримта оберайми?! — У хехелаб кулади. — Э-ха, ҳаммангга бирдан жон кириб қолдими?! Абдулланинг кўзлари мов мушукникидай ёниб

кетди-я. Коля, кўп лабингни ялама, ҳаммаси ишдан кейин... Худо хоҳласа, эрта Набининг чойхонасида битта ош уюштирамиз. Майли, харажати мендан». Коля жонланиб гапга аралашади: «Яна чойхонами? Яхшиси, муюлишдаги пивохонада ўтира қолайлик. Балиғи мендан». «Туфий! — Шукур аканинг афти бужмайиб, ерга тупуради. — Шу сассик пивохонада нима бор? Сен билан мен-ишчи, яъни (бу гапни у Муроддан ўзлаштирган) маданиятли одамлармиз. Маданиятли одамлар эса фақат чойхонада ўтириши керак. Пивохона алкашларнинг жойи». «Шукур, ошни ўзинг дамлайсан, — дейди фавқулодда очилиб кетган Абдулла унга бақамти келиб. — Фақат ўзинг. Сеники бир бўлакча-да, худди балиш егандай маза қиласан киши». Шукур ака мақтовдан дарров талтаймайди. Абдуллага юкоридан қараб, аввалига писандада қилади: «Сен тотар ошни қачондан бери фарқлайдиган бўп колдинг? Балиш эмиш. Балиш хотинларнинг овқати. Ошни эса фақат эркаклар ейди. — Кейин бундай караса Абдулланинг ковоғи тушиб кетаяпти, у дарҳол шеригининг елкасидан дўстона қучади. — Ҳазил. Ош сендан айлансин, ўрток! Эртан шундай бир ош қилайки, ошнинг зўридан Риммаям сендан хурсанд бўп юрсин...» Уларнинг ёш боладай қувониб чуғурлашларидан негадир Ринатнинг энсаси қотади: «Эртан ош ейиш учун хали бутун тунни ўтказиш керак». Ошга пашша тушгандай бу гапдан ҳамманинг таъби тирриқлашади ва барава-рига унга ёпишиб кетишади.

Ринат улардан узоклашибгина қутулади.

Шукур ака ваъдасида туради. Эртаси эрталаб, ишдан сўнг чойхонада ош дамлайди. Кейин бу ошни эслалиб, бирор уч-тўрт кун ширин тамшаниб юришади. Умуман олганда, Шукур ака дилкаш ва серзавқ одам. Шу боис, сукунатни ёмон кўради. Унга қолса, ҳамма очилиб-сочилиб юрса. Бир жихатдан, Муродни шунинг учун ҳам яхши кўради. Ўз навбатида, Мурод ҳам ўзининг бетизгин ҳазиллари билан у шўрликни ноқулай аҳволга солиб туради.

Ўтган кундузги сменада худди шўнга ўхшаш воқеа юз берганди. Тушгача вагон бўлмай, Мурод ўзича улоқиб кетганди. Кизлар ётоқхонаси атрофида ўрала-

шибина қолмай, орада пивохонага ҳам бош сукуб чиққан, қайтишда ўша муюлишдаги магазиндан тузуккина шим харид қилишга ҳам ултурганди. Қофозга үралган шимни қўлтиғига қисиб бекат ҳовлисида пайдо бўлганида бригада аъзолари сўрида тушлик қилиб ўтиришган экан. Шукур аканинг ёмон феъли, вакт-бевақт бригадирлигини эслаб колади. Ўзича қўл остидагиларни тергаб туради. Ҳозир ҳам шу одати тутиб колди.

— Каерда юрибсан? — деди Муродга ўдағайлаб. Оғзидан отилган нон ушофи сўлак аралаш Абдулланинг афтига чапланганига эътибор бермай, овозини яна бир парда кўтарди: — Эрталаб қорангни бир кўрсатдингу кейин... Нима бу ер сенга ишхонами ё подахонами, хоҳлаганда келиб, хоҳлаганда кетадиган! Каерда эдинг?

— Уроднинг чарс феълига бу хил муомала сира ўтиришмасди. Шул сабаб саломига яраша алик қайтарди.

— Каерда бўлардим, томга чиқиб ухладим, — деди кўзларини лўқ қилиб. — Аҳмоклар ерда юрганда, оқиллар томга қочади-да.

— Қўлтиғингдаги нима?

Айни шу гапдан сўнг Муроднинг кўнглига шумлик оралади. Ҳап сени бир бопламасамми, деган ниятда секин шипшиди.

— Сир. Кейин айтаман.

Шукур aka ўтирган жойида бесабр тебраниб, кисталанг қилувди, Мурод, буларнинг олдида айтиб бўлмайди, деган ишорада секин кўз қисди. Азбаройи қизикиши органидан Шукур аканинг пешонасига тер тепчили. Тушлик тамом бўлгунча аранг чидади. Мурод чойини ичиб ўрнидан қўзғалиши билан лапанглаб ортидан эргашди. Үнга кийиниш хонаси йўлагига етиб, енгидан тутди.

— Нима эди?

— Шим, — Мурод ўта бепарво бўлишга тиришди.

— Қанақа шим?

— Мукофот.

— Қанақа мукофот?

— Рахбариятнинг мукофоти-да.

— А!

— Э! — Мурод унга, нима, ҳали хабарингиз йўқми

деган маънода, ҳайрон тикилди. — Ҳар бир бригадага биттадан-иккитадан ажратган экан, шундан бири бизга тегди. Яхши ишлаганинг учун деб беришди. Нима, сизга беришмадими ҳали?

— Йўқ, — Шукур ака негадир шимни эзғилаб кўрди, хидлаб кўрди, сўнг аллақандай бегона овозда сўради; — Ким берди?

— Ўнар ака, — Мурод шимни қайта қофозга ўрай бошлади. — Кабинетига чақириб берди. Агар шундай ишлай берсанг, орден ҳам бераман деди. Яна дедики...

Шукур ака унинг гапи тугашини кутмай, кескин ортига ўтирилдида, ердаги оёқтагликни тарак-турук босиб, ташқарига отилди. Текин томошадан куруқ колмай дея, Мурод ҳам изидан юрди.

Шукур ака ҳовлига чиқиб, атрофга аланг-жаланг қаранди-да, бекат идораси томон зипиллади. Икки зинани бир хатлаб ичкарига кирди. Нимкоронғи йўлак тўридаги хона эшигини тортди. Эшик берк экан. У эшик ёнида бир тарафдудланиб қолди.

— Боя устахона томонда кўргандай бўлувдим, — дея ёлғонлади Мурод.

Шукур ака уни туртиб ўтиб, йўлак эшиги томон юрди. Тапур-тупур қадам товушини эшитиб, эшикдан мўралаган идора ходимлари-хотин-кизларнинг таъна дошномларига парво қилмади. Қайтамга чойнак кўтариб каршисидан чиқкан ҳисобчи аёлни, немушай, қоч, дея қаттиқ жеркиб берди.

Буни қарангки, Ўнар найнов устахона дарвозаси ёнида аллақаерга гум бўлишга созловчиларни кутиб турган экан. Шукур аканинг томдан тараша тушган қабилидаги талабидан анкайиб қолди.

— Қанақа шим? — деди сўнг косасига чукур ботган кўзларини пир-пиратиб.

— Мукофот! — Шукур ака бармоқларини ўйнатди. — Гапни чўзма кўп, ишга тушишимиз керак.

— Тушунтириброк гапиринг, — Ўнар найнов елка кисди, — канака шим, канака мукофот?

— Меровсирамай, чўз! — Шукур ака бармоқларини ўйнатишда давом этди. — Ўттиз беш йил меҳнат кип қўйган мендай одам четда қолиб, нега энди кечак ишга келган бола шим кияркан. Чўз!

Ўнар найнов, ё тавба, бу бало қаердан ёпишди деган ўйда, атрофга хайрону лол алангларкан, кўзи анча нарида илжайиб турган Муродга тушгачкина во-кеани англади. Кўпинча бу хил ҳазил-хузулларда улар бир-бирларига эш бўлишарди. Ҳозир ҳам у, сенинг ишингми ҳали бу, деган маънода қош чимириб қўйида, кейин туйқусдан юзини таббассумга тўлдирди.

— И-и, аввалроқ шундай демайсизми, — деди кувноқ оҳангда. — Буни қаранг, паккос эсимдан чи-кибди-я. Ҳақиқатдан сизга мукофот бор. Кабинетда турибди. Кабинет эса ёпик. Калитини йўқотиб қўйибман. Очиб боришармикан деб слесарларни пойлаб турибман. Сиз бемалол ишга бораверинг, кечкурун оласиз мендан.

— Шукур aka шошқалоқлик билан ўз хизматини таклиф этди.

— Ўзимиз очамиз эшикни. Лўм билан...

— Кабинет вагон эмаски, эшигини лўм билан очсангиз, — Ўнар найнов кулди. — Иван келсин, мих билан бирпасда очиб беради. Сиз эса бораверинг, оқшом оласиз. Еб қўймайман-ку мукофотингизни, бораверинг.

Шукур aka устахона ховлисига кўз югуртириди. Шундай пайтда созловчиларнинг йўқлигидан ёмон ачинди. Ноилож изига қайриларкан ишонқирамай қайта сўради.

— Кечкурун-а?

— Ха.

— Агар алласанг, кўрасан, — Шукур aka пўписа килди. — Шимингни ечиб оламан.

Ўнар найнов чиллакдек озғин оёқларида ҳалпиллаб турган шимини баландроқ кўтараркан, беғараз жилмайди.

— Барибир... сифмайди сизга.

— Сифмаса, сотаман.

— Хай, боринг, — Ўнар найнов юзига ясама со-вуққонлик тусини берди. — Вагонлар тўртинчи базада турибди. Бориб ишни тезлатинг.

Буни таъкидламоқчидай узоқдан тепловоз чинқириги эшитилди.

Ўша куни Шукур aka ажиб бир гайрат билан ишла-

ди. Ишдан қайтишда, отасидан байрамлик ундиради-  
ган боладай, одимлади. Ўнар найнов уни бекат ҳовли-  
сида каршилади. Қўлида каттакон оппроқ тугун, жид-  
дий қиёфада оёқларини кериб турарди. Тугунни Шу-  
кур акага узатаётib, расмий оҳангда тўнғиллади.

— Мана олинг, оманатингизни. Кўп йиллик ҳалол  
мехнатингизни хисобга олиб, кўпроқ нарса билан тақ-  
дирладик сизни. Фақат бошқаларга овоза қилманг.  
Буюрсин, тепиб-тепиб кийинг.

— Ра... ра... рахмат! — Шукур ака ҳаяжондан  
бўғилиб қолаёзи. — Тепиб-тепиб эмас, силаб-сийпаб  
кияман! Бола-чақангни ҳузурини кўр, ука!

— Тезроқ обориб шкафга тиқинг! — Ўнар найнов  
катта ишни тиндиргандай, узок-узокларга димоғ билан  
тикилди. — Абдулла кўрса... тўпалон қилиб юрмасин  
тагин.

Шукур ака хийла ортда судралиб келаётган бригада  
томон боқаркан, очкўз хотинлардай тугунни бағрига  
босиб, ечиниш хонасига йўргалади. Изидан қолмай,  
соядай эргашиб келаётган Мурод тугуннинг бир чети-  
дан тутди.

— Тек! — Шукур ака такадай ирғишлиб, силтаниб  
баттар зипиллади.

Хира ёритилган хонага киришгач, Мурод баттар  
тиргалди.

— Кўрайлик-чи, нималар беришибди сизга, — деди  
тугунга қўл чўзиб. — Тугунингиз намунча катта? Нима  
бало, бутун бошли қишлиқ уст-бошли дейман. Мени  
битта шим билан алдаб, сизга... Йўқ, бунақаси кетмай-  
ди. Мукофот дегани тенг бўлиши керак. Нима, сиз-  
нинг шохингиз борми, мукофотнинг каттасини оласиз.  
Кўрсатинг, нималар бор экан.

— Ахир мен... ахир мен ўттиз беш йилдан бери  
ишлайман-да, — Шукур ака қизғаниб, тугунни ортига  
яширди. — Сенам шунча ишла, кейин талаб қил.

— Абдулла-чи? Абдулла кам ишлабдими сиздан?

— Тиш-ш! — Шукур ака эшикка олазарак караб,  
бармоғини лабига босди. — Унингни чиқарма!

— Үнда кўрсатинг, — Мурод баттар хираглик қил-  
ди. — Йўқса, овоза қиласман.

— Елимдан баттарсан-а, — Шукур ака унга орка-

сини ўгириб, титрок бармоқлари билан тугунни еча бошлади. Мурод кўрмок истаб, ўнг ёнидан сукилганди, у тепадиган отдай ўша томонга оркасини бурди. Бу ёнидан интилганди, яна ўша хол такрорланди. Қизғанишдан елкаларигача титраб, бўғик ва бегона овозда деди: — Ўзим... ўзим кўрсатаман! Факат қўлингни торт! Торт қўлингни! Биласан сени, биттасини шиппа кўйнингга урмоқчисан! Шунча йил ишлаб, биттагина совға олдим... шуниям кўймайсан-а! Нари тур! Тирғалма! Тирғалма дейман!

— Хай, мана тирғалмадик, — Мурод икки-уч одим ортга тисарилди.

Шукур ака хаяжондан бўғриқиб, тугуннинг бир четини очди-да, қўлига учраган биринчи буюмни торди. Тортдию хайратдан «И-и!» деб юборди. Унинг беихтиёр юкорига кўтарилган кўлида кимнингdir бирор йил беармон хизмат қилган кир-чир ва илматашик пайтаваси саланглаб турарди. У пайтавани бир четга улоктириб, ошигич холда тугун ичига кўл юборди. Бу сафар қўлига мойга ботган йиртиқ шим илашди. Ундан сўнг енгизз пахталик, энг охирида эса қуришган, майишган бир пой этик илиниб чиқди.

Мурод ўзини тутолмай кулиб юборди.

Шукур ака қутуриб, оёқи остидагиларни чор тарафга тепа-тепа, ташкарига отилди. Йўл-йўлакай боя ўзининг биринчи тепкисиданок йўлакка бориб тушган бир пой этикни қўлига олволди.

— Ўлдираман!

Аммо Ўнап найнов аллақачон гум бўлганди. Шукур ака сўкинганча уни бутун ховли бўйлаб қидириб чиқди. Тополмай қайтгач, аламига чидаёлмай Муродни сўкди. Хеч гапдан хабари йўқ бошқалар ҳам бу нордон насибадан бебахра колмадилар. Хуллас, Шукур ака ечинаётib сўкинди, баданига совун суркаётиб сўкинди, бошидан сув оқизиб сўкинди, кискаси, беармон сўкинди. Кийиниб-тараниб ташкарига чикишгач эса, хар галгидек, ҳаммасини унутди. Ҳатто, қойил, бопладинглар, деб Муродни мактаб ҳам кўйди. Охирокибат, бу ҳазил яримтани майдалаш билан якунланди.

Мана шундай одам энди қайғу ва аламдан бошини кўтаролмай борарди. Боз устига, тун аллақандай рутубатли, кунботишда пайдо бўлган оғир кора булут бутун залворини ерга ташлаб, димликни баттар оширган, озгина харакатдан одам жикқа терга тушарди. Кишининг тинмай сув ичгиси келарди. Ишчилар бундай хавони «биқин тешар ҳаво» деб атайдилар. Негаки, юк тушириш пайтида қўл ишда, оғиз сувда бўлар, иш унмагани устига ўз-ўзидан тинка қуриб кетаверарди. Вагоннинг ярми бўшамасдан мана-ман деган одам ҳам ҳолсизликдан чўзилиб қоларди. Бундай пайтда, яххиси оғизга сув олмаган маъкул, лекин томоқ қуриб кетавергандан кейин қандай қилиб сув ичмай бўлади? Етакчи сифатида, Шукур ака, сув ичманглар деб, таъкидлаб туради, аммо ўзи биринчи бўлиб сувга югуради. Сув тинкани қуритади, ичманглар, дейдию сув идишни қўлидан қўймайди. Кейин бирдан хавони ёмонлаб чангитиб сўкинади, сўкингандаям сувдан хўплаб-хўплаб сўкинади. Сўнгра ўтирган жойида ўзини ортга ташлаб, оғир сўлиш олади: «Қани энди бир қултумгина чой бўлса, бунда хавода чойдан тузуги йўқ». Бирок сув идишни чойга тўлдириб келишга хеч кимнинг бўйни ёр бермайди. Шундан сўнг у, ишёқмас дангасалар, деб ҳаммани ёппасига сўқади-да, бамисоли эркак ғоздай лапанглаб чойга ўзи кетади. Сўкишнинг колганини чойхонада давом эттиради. Тунги овқатланышдан кейин эрталабгача бирпастгина мизғиши умидида эндигина чўзилган чойхоначи эшикнинг гумбурлашибдан капалаги учиб, сапчиб туради. Ким, дейди кўзларини йириб очиб, ичида куртдеккина сўкиниб. «Оч! — дейди Шукур ака эшикни бот тақиллатиб. — Болалар ташналиқдан ўляяпти. Чой бер». Табиий, чойхоначи тихирлик қиласи. Бунга жавобан эшик баттар гумбурлайди. Чойхоначи энди барабалла сўкинади. Шукур ака сира бўш келмай, биттасига ўнтани қўндиради. Ниҳоят унча-бунча одамга очилмайдиган эшик зарда билан очилади. Шукур ака вақтида ўзини ортга олиб, пешонасини фурра бўлишдан саклаб қоларкан, янада баланддан келади: «Пешонамни фурра қилганингда нақ тумшуғингни уриб ёрардим-да ўзимам!» Каттакон чойгум қайноқ сувга тўлгунча иккиси икки ёнда туриб яна

сўкинишда давом этишади, гўё ит — ҳамла қилишга ботинмайди-ю, лекин ҳуришдан тийилишмайди. Бу ҳол кизик якунланади: чойхоначи унинг ортидан эшикни қарсиллатиб ёпаркан, бисотидаги энг сара сўкишни ҳадя этади. Аллақачон ҳовлига тушиб олган Шукур ака ортига кескин ўгирилади-да: «Сени фалон қилай! — дейди бор овозда бўкириб. — Ҳи-и, корнингга сени... мешдай бўлмай! Ётибсанда рабочийларнинг нонини яримта қип! Текинхўр! Ишёқмас! Чиқиб бир вагон туширгин эди, кўрадим ҳолингни! Ҳали қайтай, онангни кўзингга кўрсатаман!» Ичкаридан бўғик жавоб овози эшитилади: «Сурбет! Аблаҳ! Кўса!» Бунга жавобан Шукур ака, туксиз иягини қашлаб, чунонам бўралаб сўкинадики, Ўнар найнов билан диспетчер ҳовлига югуриб чиқишига мажбур бўлишади. Шукур ака уларни ҳам бенасиб қолдирмайди: «Бекорга ўтиргунча бизга чой-пой ташиб турсаларинг ўласанларми! — дейди йўқ ердаги талабни ўртага ташлаб. — Болалар у ёқда ташналиқдан ўляяпти, силар эса бу ерда ўпишиб ўтирик силар! Ҳолимиздан хабар олмасанг, нима қиласан начайник бўлиб! Ҳи-и, сўппайган бўйингга... сени!» Улар бу талабу тухматга парво ҳам қилмайдилар, қайтанга, чойингиздан озгина қуиб кетинг, дея баттар жигига тегишади.

Четдан туриб кузатган одам Шукур ака билан чойхоначи энди бир-бирларини ўлаколса кечиришмаса керак деб, ўйлаши мумкин. Қайдам, ишдан сўнг гўё ҳеч нарса юз бермагандай яна апоқ-чапоқ бўлиб кетаверадилар. Ярашув Шукур аканинг ташрифидан бошланади. У эрталаб бригадани бошлаб бекат ҳовлисига кириб келаркан, одатдагидек, ювенишга ошиқмайди. Сўри четига чўкиб, сигарет тутатади. Кундузги сменага келаётган ҳамкаслари билан хушсизгина салом-алик қиласаркан, чойхона томонга тез-тез қараб қўяди. Сўнгра сигарет қолдигини ерга ташлаб, этиги учиди эзғилаб ўчиради-да, эран-қаран чойхона томон юради. Эшикдан кираётиб юзига хоргинлик тусини беради. Столлар оралаб ўтиб, шу алфозда чойхоначига рўпару бўлади. Қўли-қўлига тегмай мижозларига хизмат кўрсатётган чойхоначи уни кўргач, хўмраймоққа уринади. Аммо эплаёлмайди. Кошингда бирор илжайиб тургач

хўмрайиб бўларканми. Оғзининг таноби қочиб, кел, Шукур, деб юборганини билмай қолади. Бу гапдан Шукур ака эриб кетади-да, тирсагини пештахтага тираб, юзи-даги ҳорринлик тусини янада бўрттиради, яrim овозда дўстона пўнгиллади: «Ўлдим, битта чой дамла, аччик-кина бўлсин». «Колбасадан ҳам кесайми? — дейди униси колбасанинг энг яхши жойини кўзи билан чамалаб. — Қанча кесай?» «Кес, — дейди буниси иштаҳаси йўқ эса-да, унинг кўнгли учунгина. — Бирор юз грамм кес. Негадир иштаҳам йўқ, чанқабман шекилли». Узр сўраш йўқ, хижолат тортиш йўқ — осонгина ярашиб оладилар. Орадан ҳафта ўтиб-ўтмай, дим тунларнинг бирида яна уришадилар ва яна шу тариқа ярашиб кетаверадилар. Шукур аканинг ўзига хос ажиб феъли ўртада гина-кудурат сакланишига йўл қўймайди.

Гапнинг қисқаси, Шукур ака йўлда учраган кора билан уришиб-сўкишиб вагон ёнига етиб келганида, «ишёқмас дангасалар» бир вагонни бўшатиб, аллақачон иккинчисига ўтишган бўлади. Шукур ака кечикиш сабабини куйидагича изоҳлади: «Борсам, чойхоначи касал бўп қопди. Овқатни кўп еб қўйганми, искорий помош опкетиб қопти. Чойни ўзим қайнатиб келаяпман». Эрталаб бригада чойхоначини соғ-омон кўришади. Аммо хеч ким, нега алдадингиз, демайди. Нега деганда, Шукур аканинг феъли маълум, хеч киприк коқмай бунга ҳам бирор баҳона топа олади. Йўқ деганда, ошқозонини ювиб қайтариб юборишибди, қаранглар, корни анча пучмайиб қопти, деб қўя қолади.

У қанча ёлғон гапирса, бригада шунча яхши кўради уни. Мурод кула-кула унинг елкасидан кучади: «Агар сиз бўлмасангиз, бу ерда бир кун ҳам ишламасдим, зерикиб ўлардим!».

Хозир у Шукур аканинг жим кетишидан жуда си-килмокда эди. Боз устига, ҳавонинг димлигини айтмайсизми. Оқшом фир-фир эсиб турган шабада каерга йўқолди? У кўйлагини ечиб, елкасига ташлади-да, темир йўл ёқалаб кетган симёғочдаги чироқлар нуридан хира ёришган бекат устахонаси деворларига, чап ёқдаги шувоқзор паст-баландликлар ортидан мўралаб турган кулбаларга бир-бир нигоҳ ташларкан, сукунатдан юраги безиллаб, тавба, яrim чақирим нарида шахар

нафас олаётганига хеч ишонгинг келмайди-я, деб юборди. Аммо унга жавоб берувчи бўлмади. Сукунат елкаларидан босгандай, ҳамма жим бораарди. Бундан, айниқса, Мурод бехад азоб тортмоқда эди. Назарида, кимдир гапириши, гапиргандаям ҳазил-хузул билан гапириши, йўқса мана бу рутубатли тун ҳадемай ямламай ютиб юборадигандек эди.

Олга босган сайин дилгирилиги ортиб бораётган Мурод мадад истаб Шукур акага яқин келди. Устига устак, унинг маъюс бош эгиб бориши юрагини баттар ғамламоқда эди. Бундай пайтда ҳар қандай гап, ҳар қандай туртки бефойда. Маълум муддатсиз Шукур ака ўзига келолмайди. Бунга эса Муроднинг сабри чидамётган эди.

Шукур акани гапга солиш йўлидаги барча уринишлиари зое кетгач, Муроднинг эсига қайсиdir бир китобдан ўқиган доно бир ўгит тушиб қолди. Китобда айтилишича, кишини оғир ғам-аламдан фақат муҳаббат ку қарап экан. Бу гап қанчалик ҳақ, Мурод билмайди-ю, лекин юраги ториқкан кезлари темир йўлга яқин маҳаллалардан бирида истиқомат қилувчи қоракўз қизни эслаганида дили ўз-ўзидан бирдан равshan тортишини яхши биларди. Шу боис, навбатдаги уринишида оғзига келган биринчи гап шу бўлди. Нега энди айнан шу фикр хаёлига келди, ҳозиргacha ўзи ҳайрон. Аммо у пайтда бу ҳақда мулоҳаза қилиб ўтиришнинг вақти эмасди. Хуллас, Шукур акага яна қамти келаркан, аввал бошда унинг эгик бошига, сочи тақир кирилган энсасига, шалвираб тушган елкаларига кўз ташларкан, овозига андак сирли, андак қувноқлик, андак ҳаяжонли тус бериб деди:

— Шукур ака, биласизми... сизни ҳалиги... Мадина хола яхши кўраркан, яъни... севиб дегандай... Боя сиз чикиб кетганингиздан кейин ўзи тан олди. Шукур акангни яхши кўраман, деди.

Шукур ака чурқ этмади, лоакал қайрилиб қарамади. Шпал санаб бораверди. Орада қокилиб кетиб, тўнғиллаб сўкинди холос.

— Хола айтдиларки, — дея гапида давом этди Мурод, — Шукурни бир кўриш учунгина ишга кела-ман, мураббони эса унинг учун пишираман, фақат сир

бермайман, сир берсам уят бўлади деб кўркаман, деди. Яна мени айтиб кўйманг, сотибсан-да деб мендан хафа бўлишлари мўмкин.

Бу пайтда улар навбатдаги симёғоч тагига келиб қолишганди. Тепадаги чироқ нурида Шукур аканинг энсаси ғалати титраб кетганини Мурод аниқ-таниқ кўрди. Ҳатто у бир оз гандираклаб кетғандай бўлди. Лекин бу ҳолатини устамонлик билан яшириб, мушту-мига кетма-кет йўталиш билан чекланди.

— Айтишларига қараганда, — деди Мурод унинг ҳолатини синчков кузатиб, — бошда негадир уйла-нишдан кўрқкан экансиз. Сизни дея тунлари тиконга ағанаб чиқаркан. Аммо сиз қайрилиб қарашдан хайи-қибсиз. Сизни кута-кута охири бошқа бирорвга турмуш-га чиқиб кетибди. Лекин юраги сизда қолаверибди.

— Шуниям айтдими сенга?! — Шукур ака кутилма-ганда кескин қайрилди. — Бу аёлнинг ичидаги ҳеч гап ётмас экан-да!

Тахмини бу даражада тўғри чиқишини кутмаган Мурод бир муддат довдираб қолди. Нима деярини билмай бошини тез-тез иргади.

— Неча замонлар ўтиб кетди бунга, — деди Шукур ака юришда давом этиб. — У пайтда туғилган болалар ҳозир ўттиздан ошди. Лекин ҳаммасига ўзи айбор. Бир сафар бикинидан ушлаганимда бошимга ёғоч билан туширган. Ҳафта бошимни боғлаб юрганман. Ўшанда уйланмокчи эдим. Ургандан сўнг уйлангим келмай қолди. Уйлансанм, ким билади, бепичоқ сўярмиди. Кизлигига ўлгудек шаддот эди. Ҳозир сал босилган.

— Униям айтди, — Мурод ёлғонни ямламай юта бошлади. Шукур аканинг кайфиятини созламоқ учун шу тобда у ҳамма нарсага тайёр эди. — Шу воқеадан сўнг, қўлим синсин, деб бир умр ўзимни қарғаб кела-ман деди.

— Бекор айтибди, — деди Шукур ака жиндек тутоқиб. — Бошим тузалганидан сўнг бир кун қар-шимдан чиқиб, агар яна қўлингни бежо ҳаракатлан-тирсанг, темир билан тушираман бошингга деган.

— Айтди униям, — Мурод бу ёғига ўз тажрибасига таяниб сўз юрита бошлади. — Севаман демасдан ту-риб қўл чўзганига жаҳлим қўзиди, деди. Мени енгил-

так қиз деб ўйлади дея жоним чиқди, деди. Бир оғизгина, сени севаман, тег менга деганида ўзимни унинг оғушига отардим, деди. Орияти бутун қиз бўлган эканда у, а?

— Ким билади дейсан? — Шукур ака елка қисди. — Биқинига қўл юборганимни биламан, бошимга қарсилатиб соп қолган. Шундан кейин қайтиб гапирмаганман.

— Лекин хола зўр экан, — Мурод танглайнини тақиллатди. — Қаранг-га, хозиргача сизни яхши кўраркан. Йиллар ўтгани сайин меҳрим кучайиб кетаяпти дейди.

— Нимамни яхши кўраркан ўзи у? — Шукур ака куруқ гапиришга уринса-да, ҳаяжонини билдириб қўйди.

— Сўрадим, — Мурод бепарво бўлишга тиришиди. — Дедики, сизнинг фигурангиз ҳақиқий мужской фигура эмиш, — Шукур аканинг эгик қадди бирдан тиғланди. Мурод ич-ичидан тўлқин уриб келаётган кулгусини базўр жиловлаб, бир оз сукут саклади-да, Яна давом этди: — Бетингиз ажинсиз, сизга хеч ким олтмиш бермас эмиш. Яна дедики...

— Эллик беш! — Шукур ака илкис ўгирилиб, ўшқириб берди. — Ким айтди сенга олтмиш деб?!

— Ҳеч... хеч ким, ўзим, — Мурод ўқдек қадалган нигоҳ қаршисида тағин довдираб колди. — Лекин хола эллик дегандай бўлувди. Шахсан мен сизга қирқ беш бераман.

— Яна нима деди? — Шукур ака бу гапдан мамнун бўлиб, томоқ кириб қўйди.

— Айниқса характерингиз... — Мурод тағин танглайнини тақиллатди. — Сиздай одам юздан битта бўлармиш. Агар хотини бўлганимда бор меҳримни унга берган бўлардим деди. Яна дедики, ҳар оқшом оёқлари ни ювиб, уқалаб қўярдим, ёш боладай авайлаб-асрапдим. У эса менга киё бокмайди деди.

— Бошимга урмасин эди, — Шукур ака димоқланди. — Ким айтди унга урсин деб.

— Кечиримли бўлинг-да, Шукур ака.

— Кечирмайман! — Шукур ака баттар димоқ-фироқ қилди. — Нега кечирар эканман. Урган жойи

хозир совуқда лўқ-лўқ оғрийдиган бўлган. Кечирмайман уни! Менга деса... ўлиб кетмайдими!

— Бунча қаҳрингиз қаттиқ бўлмаса, — унинг гапга киришганидан ичида мамнун бўлган Мурод баттар аравани қуруқ олиб қочишгә тушди. — Бирор севги-дан ўламан деяпти-ю, сиз кечирмайман дейсиз-а. Бу килифингиз яхши эмас, Шукур ака. Мусулмон одамнинг иши эмас бу.

— Нега унда боя устимдан кулди? — Шукур ака унга иддаоли тикилди. — Яхши кўрар экан, нега устимдан кулди-а? Тағин аллабало деб пичинг қилганига ўлайми. Нима, унинг қизлари менинг ўғлимдан пешми? Бундай олганда ҳаммаси бир гўр!

— Юрагининг тафтини босмок ниятида шундай деди-да, — деди Мурод. — Яхши кўришлигини билдирмаслик учун баъзан одам шундай қилади. Сиз киё бокмаганингиздан кейин нима қилсин, бечора.

— Ҳар куни олдига кириб турибман-ку, яна нима керак унга?

— Шунисигаям шукр, йўқса ўзига ўт қўйиб юборармиди.

— Нима? — Шукур аканинг юриши секинлади. — Нега энди ўзига ўт қўяркан? Нима миясини еб қўйганими у?

— Севги ёмон нарса, одам гоҳо миясини йўқотиб қўйиши хеч гап эмас, — деди Мурод. — Сиз бир хафта аразлаб юринг, жудоликка чидаёлмай ўша куниёқ у ўзига ўт қўйиб юборади.

— Олиб қоча сенам, — Шукур ака ишонқирамай кулди. — Шукур деган маймоқ аразлагани учун, Мадина деган жинни ўзига ўт қўярканми. Топган гапингни қара-ю. Яхши кўраркан, нега шу пайтгача ўзига ўт қўймади, у?

Мурод гап тополмай бир муддат эсанкираб қолди. Ҳатто қокилиб кетиб оёғини қайириб олди. Бир оз хаялласа миси чикишини сезиб, хотирасига зўр берди. Мухаббат масаласига оид эшитган, билганларини эслашга уринди. Шунда хотирасининг бир четида жонсарак киёфали ёш бир жувон пайдо бўлди. Сопол заводида ҳисобчи бўлиб ишлайдиган бу аёл озғин, новча эрини еру қўкка ىшонмасди. Айтишига қараганда, бу

эркак унинг биринчи маҳбуби, иккинчи эри экан. Биринчи эри ўлгач улар қайта топишган экан. Ўша аёл шундай деганди: «Эрим тириклигида бу эсимгаям келмасди. Эрим ўлгач, юрагим бирдан бўшаб қолди. Кейин бунга чиқдим. Хотинидан ажраб боши гаранг бўлиб юрган экан, имо қилишим билан югуриб келди. Энди яна қайтадан яхши кўриб қолдим. Бунга бирон нима бўлса ўлиб қолсам керак».

— Аввал эри бўлган, сизни кўп ўйламаган-да, — деди Мурод. — Эри ўлгач, юраги бирдан бўшаб, эски севгиси қайта жунбушга келган-да. Ўзининг айтишича, юрагидаги мухаббатни ўчиришга роса ҳаракат қипти, бўлмабди. Юраги қурғур косадайин мухаббатга тўлавериби-тўлавериби... Хозир энг тўлган пайти эмиш.

— Баттар бўлсин! — Шукур ака очик тантана қилди. — Қизлигига Шукурнинг қадрига етмаганди. Мана энди... Менга деса севиб ўлмайдими!

— Аблаҳ одам экансиз! — Мурод ўзи тўқиётган ёлғонига ўзи ишонб, беихтиёр унга ёпишиб кетди. — Қаҳри қаттиқ, ярамас одам экансиз! Одам ҳам шунчалик бўладими, тавба! Бир киши ўламан десалару, бу кишим ноз қилсалар! Яхшилик ёқмайдиган одам экансиз! Боринг, гаплашмайман сиз билан! Афtingизни кўришга тоқатим йўқ!

Мурод ростданам аразлаб, олдига ўтиб кетмоқчи эди. Ҳатто уч-тўрт одим олға босди ҳам. Аммо бирдан ҳаммаси Шукур аканинг кайфиятини яхшиламоқ, уни гапга солмоқ ўйида қилинаётгани эсига тушиб, ўзининг ҳолатидан кулиб юбораёзди. Лаблари узра жилваланган табассумини зўрға босиб, Шукур ака томонга ўгирилди.

— Холанинг севгиси эски, сизники эса ундан-да кўхна экан, — деди ҳазили ғоят асосли чиқиб қолганидан ичидатаажжубланиб. — Ҳолбуки, шундай экан, эркак сифатида энди бир иш қилинг.

Шукур ака унинг оғзига анқаяман деб қоқилиб кетди-да, шпаллар устига бор бўйи билан гупиллаб тушди. Ноқулай тушди ўекилли, бир майдон Мадина холани, холага кўшиб Муродни, Муродга кўшиб, нима бўлди дея, ортларига ўгирилишган бошқаларни обдон

чангитиб сўқди. Сўкиб-сўкиб хуморидан чиккач, зарда аралаш сўради:

— Гапир, нима демокчи эдинг?

Аммо бу вақтга келиб Муроднинг иштиёки хийла сўнган эди. Негаки, Шукур ака асл ҳолига қайтган, сабр этса, бирор беш дакиқалардан сўнг одатдаги ҳазил-хузулларини бошларди. Шу боис, Мурод истаристамас жавоб қайтарди.

— Севинг ва юринг...

— Нима? — Шукур ака тушунмади.

— Хола билан юринг дейман.

— Эсинг жойидами? — Шукур аканинг туксиз қошлари тепага сапчиди. — Нима деб валдираяпсан?

— Унда уйланинг.

— Кеннойингни нима қиласман?

— Ҳайданг! — Муроднинг кўнглида Шукур аканинг хотинига нисбатан ададсиз нафрат яшарди. Бу нафрат Шукур аканинг баъзи бир нолишлари туфайли юзага келганди. Ҳозир ушбу туйғу остида нима деётганини чуқур ҳис этмаган ҳолда сўзламоқда эди. — Унисини ҳайдаб бунисига уйланинг.

— Йўқ, бўлмайди, — Шукур ака чуқур хўрсинди. — Кеннойинг ўлдиради кейин мени!

— Унда ўлинг!

— А!

— Кеннойидан кўрсангиз, ўлинг! — Муроднинг овозига шиддат инди. — Бирордан кўркиб яшагандан кўра ўлган яхшироқ-ку ахир! Нимаси бу, кеннойини кўрсангиз худди баргдайин қалтирайсиз!

Шукур аканинг боши эгилиб, қомати шалвираб тушди. Шундагина Мурод ҳис-ҳаяжонга берилганини англади.

— Лекин хола сизни жонидан ортиқ яхши кўради, — деди у ҳазилини давом эттириб. — Мен сизга билганларимни айтдим. Факат бу ҳақда холага чурқ эта кўрманг. Мухаббатим ичимда, буни Шукур аканг билмасин деганлар. Аммо гапнинг очиги, сизга жуда хавасим кела-япти. Негаки, аёл кишининг бу қадар ўтли мухаббатига камдан-кам одам сазовор бўлади. Ҳар жихатдан баҳтли одам экансиз. Умуман олганда, сизда нимадир бор, йўқса, аёл киши бу қадар жон куйдириб севмасди.

— Сен бола ҳар балони биласан, — ўзидан мамнунланган Шукур аканинг овози товланиб кетди. — Лекин бу гапни кеннойинг... эшитмасин. Эшитса менниям, кампирният тинч қўймайди.

— Нимаси кампир? — деди Мурод. — Сиздан кичик шекилли?

— Йўқ, бир ёш катта, — Шукур ака кўрсаткич бармоғини тепага нуқиди.

— Билмадим, лекин сиздан ёш кўринади.

— Фам кўрмаганда, — Шукур аканинг овозига файир инди. — Менга ўхшаб фам-алам кўрганида эди, аллақачон туршакдай буришиб қолган бўларди.

— Нима, муҳаббат фам-алам эмасми? — Мурод унинг елқасига енгилгина туртди. — Агар мен бирорни севсаму, севгимни унга айтольмасам, билмадим, бир кундаёқ ўлиб қолсан керак. У эса сизга бўлган муҳаббатини бир умрга яшириб келмокда. Нима, бу фам-алам эмасми? Мураббосини ебсизу, муҳаббатини сезмабиз-да, а?

— Қайдам, — Шукур ака бир муддат жим қолди-да, сўнг ўйчанг оҳангда деди: «Кампир эсини еб қўйибди. Ўзимам ўйлардим-а, нега қараашлари бежо деб. Демак, гап бу ёкда экан-да. Кеннойинг эса, сенга ит ҳам қарамайди дейди. Мана, қааркан-ку. Йўқ, кампир бутунлай эсини еб қўйибди».

Бу орада улар манзилга яқинлашиб қолишганди. Мурод хазилга ортиқ рағбат хис этмай бошлади. Нега деганда, Шукур ака энди бутунлай ўзига келган, паст, ширадор овози тун сукунатини тилкалай бошлаганди. Салдан сўнг Шукур ака энг олдинга ўтиб олди. Ердан тош олиб, қаршиларида пайдо бўлган улкан темир дарвозани тақиљатишга тушди. Ичкаридан таниш қорувунинг уйқусираган овози эштилди.

— Ким у?

— Ойингни эри, — деди Шукур ака илгаригидек хушчақчақ оҳангда. — Оч эшигингни!

— Ойимнинг эри ер кучганига анча бўлди-ю, бу бетайин арвоҳ ким бўлди экан? — Ичкаридаги одам атайин имиллар эди. — Инструкция бўйича арвоҳ ичкарига қўйилмайди. Қани, қабристонга қараб бир зинфиллачи.

— Қабристонга хали эрта, оч эшикни!

— Айтдим-ку, арвоҳ ичкарига қўйилмайди деб, — ичкаридаги одам чуқур хомузга тортиб, суюкларини қисирлатиб, хузур килиб керишди.

Хазилга унча токати йўқ Абдулла бақириб берди.

— Қанака арвоҳ? Оч эшикни! Бу биз!

— Мана буниси одамга ўхшайди. — Коровул шарак-шуруқ килиб, дарвозанинг бир қанотини қия очди. — Арвоҳдан ташқари, ҳаммага марҳамат.

Биринчи бўлиб Абдулла кирди, кейин Коля. Коровул Шукур акани остононда тутиб қолди.

— Сен қаёққа? Айтдим-ку, арвоҳ кирмайди деб.

Иккаласи хехелашиб бир майдон туртқилашди. Бир ичкарига интилди, иккинчиси кўкрагидан итарди. Шукур ака чалиб йикитмоқчи бўлиб роса тиршанглади. Аммо коровул баққувват экан, уни хийла терлатди. Сўнг иккиси ҳамжихат ҳолда дарвозани ёпиб, кулишакулиша ҳовли ичкарисига юрдилар.

— Бугун ҳам ишдамисан? — сўради Шукур ака.

— Шеригим касал бўп олди, — деди коровул. — Ўрнига тўрибман.

— Одамни ёмон терга ботирдинг лекин, — деди Шукур ака елпиниб. — Битта чой қўйиб юбор энди.

— Ҳаво ёмон дим бўлди, — деди коровул ҳам елпиниб. — Чойинг нимаси, ана кран, ичавермайсанми.

— Бир пачка чой мендан, кўп курумсок бўлма.

— Йигирма йилдан бери шу ваъда.

— Янаги сафар тучно опкеб бераман.

— Кўрамиз, — коровул изига бурилиб кетди.

Шукур ака ортидан бақириб қолди.

— Аччиқроқ дамла.

— Суюғиям тешиб чиқмайди.

— Бошингдан куяман-а!

— Ҳали мен сенга чой қўйдиму, сен ноз қилдингми.

— Қайсаарлик қилма, ўрток.

— Отажон дегин.

— Хўп, мана, отажон дедик.

— Бу бошқа гап.

Ҳадемай бригада қувнок бир кайфиятда ишга тушиб кетди.

\* \* \*

Ярим тундан сўнг шабада кўзғалиб, димлик ариди. Дим ҳавода ғарқ терга тушиб, вагон бўшатаётган ишчилар кўкракларига шамол тегиши билан енгил тортишиб, баттарроқ ишга ёпищдилар ва овқат маҳалигача икки вагонни бўшатиб бўлдилар. Сўнгра гангир-гунгур сұхбатлашганча бекатга қайтдилар.

Бекат ҳовлиси, одатдагидек, чароғон ёритилган, чойхонанинг ланг очик эшигидан кишилар кириб-чикиб турардилар. Чойхона расман бекатга қарашли эсада, аслида тунда ишлайдиганларнинг бариси шу ерга оқиб келишарди. Бу ерда милициядан тортиб тунги коровулгача, тез ёрдам ходимларидан тортиб сув сепадиган машиналарнинг ҳайдовчилари гача учратиш мумкин эди. Хуллас, кундузигига нисбатан тунда мижозлар сероб бўларди бу ерда. Шу боис, пештахта тепасига «Бекат ишчиларига навбатсиз хизмат кўрсатилади» деган лавҳа осб қўйилганди. Акс ҳолда хиёл кечиккан бекат ишчилари узун навбатнинг охирига туриб колардилар.

Бекат ишчиларига берилган бу имтиёздан Шукур aka ғалати йўсинда фойдаланади. Эшикдан кириши билан ҳўмрайганча аввалига навбатга разм солади. Навбат, юкорида айтганимиздек, қурама кишилардан ташкил топган — кишилар зўр тоқат билан ўз навбатини кутмоқдалар. Шунда Шукур aka ўзининг устунлигини бутун вужуди билан чукур хис этади ва гурс-гурс юриб, намойишкорона олдинга ўтади. Навбатда турганларга ғолибона бир қараб қўйиб, йўлига чойхоначига дафдара қиласи, гоҳо бир оз тантикланишдан ҳам ўзини тиёлмайди. Чойхоначи унинг талабини фийқ этмай адо этади. Шукур aka эса чойхоначининг бир озгина имиллашини, навбатдагиларнинг янада кўпроқ маҳтал бўлишини истайди. Навбатдагилар қанчалик маҳтал бўлса, ўзининг устунлигидан шунчалик сархушланади. Аммо чойхоначи бу ширин дақиқаларнинг чўзилишига унчалик изн бермайди — оғзидан чиққанини пештахтага териб ташлайверади. Охир бўлма-

тач, у чойнақдан камчилик қидиради, нега ямоқ чойнакка чой дамладинг, дейди. Чойхоначи, феълини билади-да, баҳслашиб турмай бутун чойнакка чой дамлаб узатади. Навбатдагилар унинг бу хил инжиқликларига ғийқ этмай чидашади. Бунга сари Шукур ака хузур қилади.

Бирок бу сафар Шукур ака ана шу лаззатдан возжечди. Ҳовлида бир муддат бош қашлаб турди-да, сўнг, менга ҳам бирор нарса обқўйларинг, дея секингина Мадина холанинг олдига зипиллади.

У бу қарорга бирдан келмади. Аввалига Мадина холанинг яширин муҳаббатидан ўзича роса роҳатланди, мағуруланди. Кимdir сени севсаю, буни бошқалардан сир сакласа жуда ажойиб бўлишини юрак-юракдан илк бор ҳис этди. Ўзини бамисоли кирчилла-ма йигитдай сезди. Оlam кўзига бошқача кўриниб кетди. Кейин эса бирдан вахимага тушиб қолди: «Шошма, буни хотин билиб қолса нима бўлади? Кўнглидагини бугун Муродга айтдими, демак, эрта бир кун бошқа бирорвга лақиллаб кўйиши ҳеч гап эмас. Гапчувалиши хотинбойнинг қулогига етса, худо урди-да. Йў-ўқ, эсини бутунлай еб кўйибди бу Мадина».

Шукур ака хотинидан азроилдан қўрқандай қўркарди. Тумас хотиннинг меҳри ёмон бўладими, ё ўзи ўта сершубҳами, Шукур акани ҳатто тиккайган дараҳтдан қизғанарди. Бекат якинидаги маҳаллалардан бирида турувчи синглисини баҳона килиб, вакт-бевакт Шукур акадан ҳабар олгани келиб турарди. У келганида Шукур ака алланечук иршангларди-ю, кетгач эса хийла муддат маъюс тортиб қоларди. Бошқалар бунга кўниккан — сира эътибор беришмайди. Лекин, Мурод бу хил ташрифни ҳеч ҳазм қиломасди. Соддалигига бориб, гоҳо ёмон қовун тушириб қўярди, дердики, сизнинг нимангизни қизғанади, Шукур ака, ёш бўлмасангиз, ёмон йўлга юрмасангиз, бу текширишлар не даркор, солмайсизми жағига айлантириб! Шукур ака каншари остидан унга мунгли тикиларкан, кафтини пешонасига сурисиб, ялаганнамо харакат қилади, дейди: «Пешона шўр-да, Муродвой, пешона, қара, шўрлиги тилни ўйман дейди». Мурод яна ёшлигига боради, у-бу маслаҳатлар бера туриб, дейди: «Сиз қулсиз, Шукур ака!

Одам деган кўкракни кериб яшаши керак. Қани, бошни ғоз тутинг, кўзларингиз узок-узокқа тикилсин!». Шукур ака беихтиёр қаддини ғоз тутади. Ўзича узок-узокларга тикилган бўлади. Аммо нигохи бекатнинг бетон деворига тушиб, сал дилтангланади. Бир оздан сўнг адл туриндан чарчаб, яна шалвираб тушади. Кейин эса яна ҳаммасини унутади.

Шукур ака эшикдан бош сукқанда, Мадина хола мудраб ўтиради. Қадам товушларини эшитиб, бошини кўтаради. Кўзойнаги устидан ғалати тикилиб, кўлига ишини олди. Бармокларини жадал харакатлантириб, пайпок тўкиркан, кел, деган маънода «хим-м» деб кўйди. Аммо Шукур ака ичкарига ошиқмади, бўсарага ташлаб қўйилган намлассатага оёқларини суро-суро, кетма-кет томоқ киришда давом этди. Томоқ қиравериб охири ҳоланинг жонига ҳам тегиб кетди.

— Кир, ўтири, — деди сабри чидамай. — Лойга ботган отдай намунча депсиниб қолдинг?

Шукур ака бекорга депсинмаётган эди. Гапни нимадан ва қандай бошлишни билмай гаранг эди. Боя келаётганида эътирозларини айтиш жуда осондек туълганди. Аммо Мадина холага рўпарў бўлгач, юз иссиқда, тили танглайига ёпишди қолди. Боз устига, ҳоланинг, уйқусираб, муштипаргина бўлиб ўтириши туйкусдан меҳрини ийдирди, хафа қилиб қўйишдан чўчиди. Қачонки, ҳоланинг қуруқ оҳангдаги гапини эшитгачкина кўнглида йилт этиб уйғонган шафқат хисси изсиз йўқолди. Ҳоланинг зимдан боқиб турини келбатига нисбатан ҳавас деб билди. Бундан бот мағрурланди. Аммо шунга қарамай, гапирмок қийин бўлди. Ҳоланинг юзига тикилса, сўзлай олмаслигини сезиб пастга қаради. Ялтираб артилган пол юзидағи аллақандай доккә термулганча тилга кирди.

— Биламан, — деди гап бошлиди депсинишдан тўхтаб, ҳар бир сўзида томоқ кириб, анча кўримли одамман мен. Нима қиласай шундай булиб туғилганманди. Бунга мен айбдор эмасман-ку ахир. Яхши кўришингни... биламан. Демоқчи эдимки, яхши кўрмагин мени. Яхши эмас бу.

— А! — хайратдан Мадина ҳоланинг пастки жаги шалвираб тушди. Агар шу тобда эрининг арвоҳи қар-

шисида кўндаланг бўлганида ҳам бу даражада ажабланмаган бўларди. Ҳайтовур, у тезда ўзини қўлга олди. Шукур акани маст гумон қилди: — Нималар деб валдираяпсан, — деди, ичдингми, бор-да бирор бурнакда тинчгина ухла! Тавба оғзига озгина тегди дегунча алжишга тушади-я, бу эркаклар.

— Алжиётганим йўқ, — Шукур ака ичкарига бир одим кўйди. Хона ўртасида қакқайиб, енги билан манглай терларини сидирди. Ҳолага, иддао ва зарда аралаш тикиларкан, деди: — Яхши кўра туриб уришганинг нимаси? Кўп уришма мени, э!

— Қани уришганим, — Мадина хола тумшайиб, кўлидаги ишини давом эттириди. — Ичиб олиб гапирган гапини қара буни! Пиянчук!

— Ўзинг пиянчук! — Шукур ака андак тутокди. — Раз пиянчук эканман, нима қиласан мени яхши кўриб, а? Тўрингдан гўринг якин, яхши кўраманинг нимаси?

Мадина хола унинг мастилигига шубҳаланди. Гўё буни аниқламокчидай, бурнини жийириб ҳавони ҳидлади. Нотаниш ҳидни сезмагач, ҳайрати баттар ошди.

— Кимни яхши кўрарканман? — деди воқеанинг тубига етмоққа тиришиб.

— Мени.

— Сени? — Мадина хола унга кўзойнаги устидан тикилди.

Шукур ака уни ўйин қилаяпти деб ўйлаб, бу сафар овозига замзама тусини берди.

— Ха, мени!

— Сени?! — Мадина холанинг қўллари ёқасига югрди. Яrim тўқилган пайлоқ полга тушди. Хола ёқасини жуфтлаб тутаркан, беихтиёр ўзини ортга олди: — Ёollox, нимаси бу энди? — деди кўзлари пирпираб. — Ичавериб миянг суюлиб қопти сен бечоранинг!

— Артистлик қилаверма кўп! — деди Шукур ака ҳукмона оҳангда ва сигарет тутатиб, секин изига қайрилди. Эшикка етиб, яна тўхтади. Бошини яrim ўгириб, ўша оҳангда таъкидлади: — Бундан кейин яхши кўраманингни ташла. Ичингда қанча яхши кўрсанг кўргину, лекин ҳар кимга валдирашни бас кил! Эшитган кулокқа яхши эмас! Хотин эшитса... ёмон бўлади.

— Шошма, Шукур! — ҳануз бақа бўлиб ўтирган

хола унга ғазабнок тикилди. — Тўғрисини айт, бу ҳазилингми-чинингми? Агар ҳазил бўлса, қайтиб бу гапни оғзингга олма! Ўн саккиз яшар киз бола эмасманки, ҳазил кўтарадиган. Агар чин сўзлаётган бўлсанг, эртан ўзингни бир дўхтирга кўрсатиб олгин. Миянг айниб қопти... — Шундай дея хола лабини бурди: — Ҳолига боқмай ҳазил қилганини қара бунинг!

— Қанақа ҳазил, — Шукур ака тўла ўгирилиб, унга ўшшайиб тикилди. — Ярим тунда ҳазилга бало борми. Ўзи корним очиб, уйқум кеп турибди. Ёмон йўлдан қайтгин деяпман, холос. Хотин эшитса... сочингни битталаб юлади-я!

— Нега энди сочимни битталаб юларкан? — Мадина хола кўзлари пирпираб, унга бошдан-оёқ тикилди.

— Мени яхши кўрганинг учун.

— Қачон сени яхши кўрибман?

— Ҳамма вакт, — Шукур ака ишонч билан таъкидлади. — Ҳамма вакт мени яхши кўриб келгансен. Нима билмайди деб ўйлайсанми!

Холанинг қўллари яна ёқасига ёпишди. Қаршисидағи кимсани энди кўраётгандек, тағин бир сира унга бошдан-оёқ кўз ташлаб чиқди.

— Ё тавба, бу не тухмати бўлди энди? — деди ёғириган оҳангда.

— Яхши кўрмайман дегин? — Шукур ака унга калакаомуз тикилди. — Унда мураббони ким учун пиширасан, а?

— Ким учун бўларди, ўзим учун, — Мадина хола тамомила гарангсиб қолди. — Ким учун пиширишим керак экан?

— Мен учун пиширасан, — деди Шукур ака ички бир қониқиш билан. — Нима, бўйнингга олсанг, бир еринг камайиб қоладими? Сен учун пишираман деб тўғрисини айтда-кўй. Нима, мен сени пишириб ермидим. — У ўзича холага раҳм қилган бўлди: — Майли, мураббони ейман, атказ қилиш йўқ. Раз мен учун ҳаракат қиларкансан, нега емас эканман, ейман. Лекин сенам, мураббо беряпман-ку деб, яхши кўришинг ҳакида кўп валдирاما. Тўғри, яхши кўрмасдан илоҳинг ҳам йўқ, анча кўримли йигитлигимни ўзим ҳам

биламан. Ана, хисобхонадаги хотинлар баъзан бошқача-бошқача қараб қўйишади. Лекин мен ҳаммангга эр бўлолмайман-ку ахир. — У сигаретни чукур тортиб, ташкарига туфлади. — Агар... жудаям эрсираб қолган бўлсанг, ана Абдуллага тег. Бечорани хотини уйдан ҳайдаб юборибди. Сенга жон деб уйланади. Лекин мен сенга уйлана олмайман. Ўрта ерда хотиндан балога қолганим қолади, холос. Биласан, хотин эмас, аждаҳо у...

— Мен сени яхши кўрмайман, Шукур, — Мадина хола кўллари ёқасида, тавалло оҳангига гапирди. — Қайси гўрдан топдинг бу гапни? Нима бало, жинни-пинни бўлиб колдингми бугун дейман. Сенга минг маротаба айтганман, камрок ичгин деб. Мана оқибат... Васвас бўлиб қопсан, Шукур.

— Сен яхши кўриб турганингдан кейин васвас бўлади-да, киши.

— Яхши кўрмайман сени, э! — Мадина холанинг афти тиришиб, қўлинни тўлради. — Бор! Алжийверма кўп!

— Кўзларинг айтиб турибди, ишқинг баланд менга,— Шукур aka пинак бузмади.

— Менга қара, нимангни яхши кўришим керак, а? — энди Мадина холаники тутди. — Индамаган сайин, ўзингдан кетасан бунча! Айт, нимангни яхши кўришим керак? Милтиллаётган манову бит кўзларингними? Ё тук битмас кўса башарангними? Ичи тушган тарвуздай дўппайиб турган манову қорнингни яхши кўришим керакдир балки, а?

Бу қадар ғазабни кутмаган Шукур aka довдираб қолди. Довдирашда оғзидан чиққаниям шу бўлди.

— Қаердан билай нимамни яхши кўришингни. Яхши кўргич сен, ўзинг биласан-да буни.

— Мен?! — ғоят ҳокисорона айтилган бу гапдан хола бот анқайди. Ғазабдан бўғриқкан юзига тағин хайрат ифодаси қалқиди. Бошини бир ён қийшайтириб, унга синчков тикилди. Сўнгра ўрнидан туриб, Шукур акага яқин келди. Оғзини хидлаб кўрди-да, ўзича ғудранди: — Кайфи йўқ, исча, хиди келарди.

Бу орада анча ўзига келиб олган Шукур aka унинг бу килигини ўзича тушунди.

— Коч! — деди бошини орқага ташлаб. — Индамасам, ўпид олишдан ҳам тоймайсан, а. Тағин яхши кўрмайман дейсан-а.

Мадина хола хиёл ортга чекиниб, бир муддат унга тикилиб қолди.

— Мабодо, устимдан кулмаяпсанми, Шукур? — деди кейин негадир ўксинган оҳангда.

Шукур ака мағрур бош чайқади.

— Йўқ.

— Унда нега бунақа алжираисан? — деди Мадина хола шубҳа тўла кўзларини ундан узмай. — Касал бўлсанг айт, скорий чақирай.

— Бу нумириинг ўтмайди, — Шукур ака пиҳиллаб кулди, яхши кўришингни биламан мен.

— Нимангни? — Мадина хола бир сира бошдан-оёқ кўз югуртириди.

Шукур ака елка қисди.

— Балки манову сурбет башарангни яхши кўрарман! — Мадина холанинг ғазаби тағин жунбушга кела бошлади. — Балки... балки... Э, йўқол, башаранг курсин, сени!

— Башарамга тил тегизма, илтимос! — Шукур аканинг ранги бир тус оқарди. Бу гапни у ҳисобчи хотиндан эшитган эди. Ойлик маошни кам ёзибсан деб, шўрлик аёлни сариқдан олиб сариқка соганида, аёл ғоят босиклик билан шу гапни айтганди. Ўшанда бу гап Шукур акага қаттиқ таъсир этганди. Шояд бунга ҳам таъсир этар деган умидда, ушбу гапни қайта такрорлади: — Илтимос, башарамга тил текизма!

— Э, башаранг курсин сени! — Мадина хола баттар авж олди. Биткўз! Мешқорин! Хомсемиз!

— Нима, ўзинг хурлиқомисан? — Шукур ака ҳам тутоқиб кетди. — Қатламага ўраб ташласа, ит емайди, тағин осмондан келасан-а!

— Йўқол кўзимдан! — Мадина хола ажиб бир чапдастлик билан унинг кўкрагидан итариб юборди. Шукур ака остонаяга қоқилиб, кети билан шағал тўшалган йўлакка бориб тушди. Хола эшикни қарсиллатиб ёпаркан, ичкаридан туриб бақирди: — Яна корангни кўрай сени, нак оёғингни уриб синдираман! Сурбет!

Шукур ака ўтирган жойида пайпасланиб тош қидир-

ди. Шунинг баробарида атрофга олазарак қаранди. Борлик маст уйқуда. Факат чароғон ёритилган чойхона деразаларида соялар ўйнарди. Ўзининг бу шармандали ахволини бирор кимса кўрмаганига қаноат хосил қилгач, қўлига илинган тошларни четга улоқтириди-да, секин ўрнидан қўзғалди. Шимини ҳафсала билан қоқди. Сўнг чойхона томон ўрдак юриш қилиб жўнади. Йўл бўйи тўнғиллаб сўкиниб борди.

\* \* \*

Кундузги сменага келишгач, Мурод уни яна тунд холатда кўраман деб ўйламаганди. Қувноқ қайфиятда ҳовлига кириб келаркан, ҳар сафаргидек, кўзлари билан Шукур акани қидирди. Шукур aka сўри четига омонатгина чўкиб, ҳушсизгина чой хўпларди. Ёнида Абдулла, чап кўли сўри суюнчиғига ташланган, ўнг елкаси ғалати қийшайған, оёғи остига хаёлчан термулиб ўтирас, чамаси, Шукур aka айтган қайсиdir бир гапнинг мағзини чақмоқ билан овора эди. «Бўлмайди,— деди у бир маҳал қаддини ростлаб, чойнакка қўл чўзаркан, бошини чайқаб. — Бўлмайди». Нима бўлиш бўлмаслигини Мурод англамади, тўғрироғи, қизиқмади. Уларга яқинлашиб, Шукур аканинг елкасига дўсто на қўл ташлади.

— Раҳбарларга саломлар бўлсин!

Шукур aka унинг қўл зарбидан енгил қалқиб, у томонга қайрилди. Одатдагидек, ҳазил-хузул қилмади. Анчайин қўл ташлаб, хим-м, келдингми, деб қўя қолди. Мурод унга ажабсиниб боқди, яна нима жин чалди бу одамни? Шукур aka эса сезиларли даражада терс ўгирилиб олди, кўрмайин ҳам, куймайин ҳам! Бу хил муносабатдан ҳайрати ошган Мурод бир муддат какқайиб турди-да, сўнг ортиқ тирғалишни ўзига эп кўрмай, кийимини алиштиргани ичкарига йўналди. Остона ҳатлаб, тағин ортига ўгирилди. Шукур aka ўша-ўша хомуш ўтиради. У ичкаридан чиқиб келаётган Колядан, чолни нима жин урди, деб сўради. Коля унинг елкаси оша ҳовлига қўз ташларкан, аввалига елка қисди, сўнг сўрашгани қўл чўзаркан, деди: «Тегишадиган сен, бирон нима деб хафа қилган чиқарсан». Мурод катъий йўсинда, йўқ, деди. Шукур акага ортиқча гап қилмага-

нини у яхши биларди. «Ҳечкиси йўқ, — деди Коля беларво оҳангда. — Одам деган гоҳ ундоқ-гоҳ бундок бўлиб туради-да. — У шундай деярқан, бирдан сергакланиб Муродга умидвор тикилди: — Иш олдидан... балки оз-озгинадан тортармиз, а? Кайфият учун-да. Орада бригадирнинг қайфияти хам яхшиланарди. Биласан, қаватингда бирор тунд юрса, одам унча маза килмайди. Хўп десанг, зингиллаб бориб келаман.»

Бригадада яхши бир одат мавжуд эди. Ҳамма бир-бирининг қайфиятини ўта зийраклик билан қузатиб боради. Мабода бирортасининг қайфияти сал носоз бўлса, кўлларидан келганича яхшилашга харакат-килишади. Бу борада Колянинг таклифи кўпинча жуда кўл келарди.

Мурод ихтиёrsиз равишда чўнтағига кўл юбораркан, Коляга синовчан тикилди. Коля хижолатомуз томок қириб, ерга қаради. Муроднинг чўнтақдаги кўли имиллайвергач, шоша-пиша изоҳ берди: «Менда тушликка етгулик пул бор. Борини беравер, кейин суришиб кетаверамиз». Коляда ҳеч қачон ортиқча пул бўлмайди ва у буни яшириб хам ўтиrmайди. Аммо айни мана шу рўйиростлик Коля учун жуда оғир кечарди: бошда томок қириб кўзларини олиб кочади, сўнгра кўзлари жавдираб юқоридаги гапни айтади. Тиник, мовий кўзлари бу холни янада бўрттириб кўрсатар, лаблари узра жилваланган хокисор табассум эса таънага изн бермасди. Мурод унинг мана шу холатини яхши кўрар ва яхши кўргани учун хам атай имилларди.

Коля бетоқатланиб, оғирлигини у оёғидан-бу оёғига согландан кейингина у чўнтағидан пул чикарди. Коля унинг қўлидан пулни илиб олиб ташқарига отилди.

Аммо мазкур тадбир бу сафар иш бермади. Шукур aka ичишдан бош торти. Бу пайтда улар бекатдан икки чакирим олисдаги иккинчи омборда, вагон соясида чекишиб ўтиришарди. Бригада ишни ҳар вақт чекишдан бошларди. Айни шу аснода Коля қўйнидаги шишани намойишкорона чиқарди, шишани кўриб, Шукур акадан бўлак ҳаммага жон кирди. Ринат тагига тахта бўлагини қўйиб, жойлашиб ўтирди. Абдулла ўқловдек йўғон бармоғини оғзига тикиб, шампан шишичининг очилишига монанд «пак» этган овоз чикар-

ди. Кейин бунга қаноат этмай, ўтирган жойида ғалати чайқалиб кўйди. Шукур ака эса манглайи остидан гоҳ шишага, гоҳ Коляга қараб ёмон чимирилди.

— Иш пайтида... нимаси бу?

— Буми? — Коля қўлидаги шишани боши узра баланд кўтариб, қувноқлик ва сўзамоллик билан деди: — Кайфиятни созлайдиган дори. Бундай қарасак, хурматли бригадиримиз Шукур Салаевнинг қовоғи мен туғилиб ўсган Сибир қишидан баттар тундлашиб кетибди. У кишининг қовоғини очмок, кайфиятини яхшиламок ниятида бригада эрталабдан нуш этмоққа карор қилди.

— Кайфиятим яхши, — деди Шукур ака пўнрилаб. — Буни хозирча яшириб кўйларинг. Ишдан сўнг бафуржа оларсилар.

— Бригада қарорини бузишга ҳаққим йўқ, — Коля овозига ёлрондакам расмий тус берди. — Халқ норози бўлади.

— Йўқот дедим сенга!

Коля, нима қиласай, деган маънода атрофдагиларга жавдиради.

— Шукур ака, озгинадан... — деди Ринат шишага очкўзлик билан боқаркан, илтижоли оҳангда. — Озгинаси ишга ҳеч ҳалакит бермайди-ку.

Кирланган яримта қуртни тиззаси устига кўйиб, шиша очилишини зўр сабр ва бардош ила кутаётган Абдулланинг жони ҳалқумига келди.

— О-оч! — дея бакирди у кўзлари ола-кула бўлиб. — Бир қултимдан тегадими-йўқми, таранг килганларинг нимаси! Оч тезрок!

— Хойишларинг, — Шукур ака иддао билан ўрнидан туриб кетди. — Лекин мен ичмайман.

— Ичасан! — Абдулла унга ўқрайиб, бурнини хунук тортиди. — Томоғинг тақиллаб турибди-ю, ичмайманинг нимаси! Коля, куй бунга!

Коля корни пачоқ кружкага ароқ қўйиб Шукур акага узатди. У, ичмайман дедим-ку, дея вагон эшигига чирмалган симни ечишга тутинди. Мурод ялинди, Абдулла сўкинди, Ринат хиринглади. Коля эса ихтиёrlари дея, кружкадагини ликка ютуб юборди. Бундан Абдулла ёмон тутокди, Коляни сўкишга кўмиб ташла-

ди. Аммо Коля унинг сўкишларига парво қилмади. Одати бўйича енгини хидлай-хидлай, тагин Шукур акага ароқ куйиб узатди. Қараса, бўлмайдиган, Шукур aka сув олиб келиш баҳонасида чойгўмни кўлига олдида, ховлининг нариги бурчаги томон жўнаб қолди.

— Буни нима жин урди? — деди Абдулла тегишини ютиб, курсиллатиб қурт тишларкан, кўз кирида шишага қараб. — Финг демай ичадиган одам бирдан оёқ тираб қолди. Бундай феълий йўқ эди-ку.

— Хотини билан уришган чикар, — деди Ринат.

— Хотини билан уришган одам ароққа йўқ демайди, — деди Коля билағонлик килиб. — Масалан, мен хотиним билан уришсам, аламимни винодан оламан. Тўйиб ичаман-да, миқ этмай ётавераман.

— Мурод хафа қилган чикар, — деди Абдулла. — Доим жигига тегиб юради.

— Ўтган тундан бери қовоги солик, — деди Ринат ниманидир эслагандай, овозига чўзиқ тус бериб. — Силар йўқ, тўнгиллайвериб роса жонимни олган.

Ринат ҳак эди. Шукур аканинг хафалиги ўтган сменадан. Ярим тунда Мадина ҳоланинг олдидан дили ранжиб чиққанидан сўнг, у ҳеч кимга рўйхушлик бермаганди. Мурод сабабини сўрашга улгуролмаган. Нега деганда, овқатдан кейинок ўнар найнов бригадани иккига бўлиб, Мурод бошлиқ бир гурухни қувур юклагани сопол заводига жўнатган, Шукур aka эса Ринат билан омборда колганди. Тонгда қайтиб учрашмади. Мурод оёғини зўрға судраб бекатта қайтганида, Шукур aka алақачон уйига жўнаб қолган экан.

Шукур аканинг носоз қайфияти туфайли бугунги иш куни ўта зерикарли бошланди. Одатдаги, ҳазилхузул йўқ, ўн кило юк бамисоли юз килога айланди. Худди шу соатда Мурод Шукур акани қайта кашф этди. Билсаки, ундаги қувноқ қайфият Шукур аканинг шўхликлари туфайлигина юзага келаркан, унинг қарши жавобларисиз Муроднинг барча ҳазилларию қувноқликлари қоронғига отилган тошдек бир гап экан.

Вагон яримлагандан сўнг, Мурод охири чидаёлмади, секин бориб Шукур акага тирғалди. Аммо Шукур aka рўйхушлик бермади. Кимгадир аччиқ қилгандай, ажиг бир жаҳд ва жаҳл билан юк ташишда давом этди.

Ундан андоза олгандаи бошқалар ҳам миқ этмасди. Боя ичилган арокнинг кайфидан ном-нишон қолмаганди.

Кимсасиз саҳрого тушиб қолгандай, Мурод ёмон сиқила бошлади. Шукур акага бот тирғалди. Ҳайтовур, бу сафар у тилга кирди.

— Қоч, мушайт қилма! — деди тўнғиллаб.

— Нима бўлди сизга, Шукур ака? — Мурод унинг йўлига кўндаланг бўлди. — Нима тобингиз йўқми?

— Қоч, деяпман!

— Айтинг энди.

Шукур ака уни айланиб ўтмоқчи бўлди. Бироқ Мурод қўймади — йўлини тўсиб туриб олди.

— Айтақолинг, нима бўлди? — деди ялинчоқ охангда. — Йўғасам, тарс ёрилиб кетаман!

Шукур аканинг нигоҳига кўнган фамгинлик секинаста иддао билан алмашинди. Қаншари остидан Муродга зимдан тикиларкан, чукур сўлиш олди. Сўнг дабдурустдан деди:

— Мени... яхши кўрмас экан-ку. Нега шарманда килдинг одамни?!

— Тушунмадим, — Мурод ҳайрон бўлди.

— Тушунмадиминг нимаси! — Шукур аканинг овонзига зарда инди. — Қилғиликни килиб қўйиб, тағин тушунмадим дейсан-а, номард!

— Бирор нима тушунган бўлсам, тил тортмай ўлай, — Мурод елка учирди. — Очиқ... очикроқ гапи-ринг.

— Ия, ҳали эсингда йўқми? — Шукур ака унга ажабсиниб бокди. — Анову... анову Мадинани айтапман-да.

— Э-э... ха-а... ҳали шунгà қовоқ-тумшуқ кип юриб-сизми, — тунги ҳазили эсига тушиб, Муроднинг кулгиси қистади. Аммо Шукур аканинг эзгин ҳолати кулгуга изн бермади. Қадрли, жуда қадрли нарсасини йўқотган боладай ўксик киёфада мунғайиб турарди у. Бошда унинг бу ҳолати Муродга эриш туюлди. Шунга шунчами, нима ёш боламисиз, деб жеркиб ташламоқчи ҳам бўлди. Бироқ Шукур аканинг янада маҳзун тортишини ва бугунги куннинг расво бўлишини ўйлаб, ўзини босди. Узр сўрамоққа чоғланган тили беихтиёр яна ёлғонга айланиб кетди: — Яхши кўради, рост, —

деди кўзларини бакрайтириб. — Бу борада сизга зиғирча ёлғон гапирганим йўқ. Яхши кўради у сизни.

Шукур аканинг тунд ва ўқсиқ киёфасида сезилар-сезилмас жонланиш пайдо бўлди. Буни пайқаган Мурод баттар отини қамчилади.

— Агар гапимнинг бирор вергули ёлғон бўлса, хар нарса дeng мени, — деди жўшқин бир тарзда. — Керак бўлса, касам ичишим мумкин. Яхши кўради у сизни. Энди... севса севгуликсиз-да, Шукур ака.

Шукур ака гўдаклардай жовдираб, унга шубҳала-ниб бокди.

— Нега унда... — Шукур ака, итариб ташлади, дёйлмади. Уялди. Томоқ кира-кира шундай деди: — Нега унда итдай талаб ташлади.

— Нима шуни сўрагани олдига борибмидингиз? Шукур ака индамади.

— Демак, борибсиз-да, а?

— Тунда чой ичай деб олдига кирувдим, — Шукур ака ёнига сурилиб, юклар тахламига суюнди.

— Сотибсиз-да, Шукур ака, — воеани тусмолла-ган Мурод кулишниям, кулмаслигиниям билмай, унга бир зум тикилиб колди. — Намунча оғзингиз бўш бўлмаса. Айтдим-ку, гап ўртамиизда қолсин деб.

— Сотмадим сени, — Шукур ака шошиб эътироз билдириди. — Бордим-да, яхши кўрмагин, дедим, холос.

— И-и, одамнинг соддаси-я! — Мурод тиззасига шапатилади. — Хўш, у нима деди?

Шукур ака юк тахламидан елкасини узиб, ерга бокди. Манглай терларини енги билан сидириб, сига-рет тутатди. Орада Муродга бир-икки мунғайиб қараб кўйди. Саволга жавоб бермок нечоғли оғирлиги бутун вужудидан сезилиб турарди. «Кампири тушмагур қат-тиқ шахтини синдирганга ўхшайди», деб ўйлади Мурод ичи ачиб. Бундай пайтда чин ҳақиқатдан кўра ёлғон эртак кўл келишини англаш, гапни нимадан бошлишини билмай, у хам бир муддат гарангсиб колди. Ҳайтовур, бунга Шукур аканинг ўзи изн топиб берди.

— Ким билади, чойини кизғандими, — деди ёлғон важдан уялгандай, маъюс нигоҳини ердан узмай, — одамни ёмон беҳурмат қип ташлади.

— Кизик, — Мурод ажабланган киши бўлди, — жонимдан ортиқ яхши кўраман деб турган аёл қанақасига сиздан чойини кизғаниши мумкин? — У туйқусдан тутакқан бўлди. — Ҳозир бориб у билан гаплашиб кўяман!

— Шошма! — Шукур ака вагон соясига жойлашиб чекишига тутингланларга бир қараб кўйди-да, паст овозда сўради: — Менга қара, ростданам у мени... нима эди... яхши кўрадими? — Тасдиқ ишорасидан сўнг у баттар таажжубланди: — Нега унда одамни хафа қилди у? Итариб... э, уришиб ташлади?

— Биринчидан, аёл кишига «мени яхши кўрмагин» дейилмайди, — деди Мурод кулимсираб. — Иккинчидан эса, яхши кўришини билдирамаслик учун шундай қилган. Тунов куни айтдим-ку, буни ҳеч ким, ҳатто Шукур аканг ҳам билмасин, деди деб. Нима, эсингиздан чиқдими?

— Туфи-ий, шуям яхши кўриш бўлди-ю, — Шукур аканинг энсаси қотди. — Яхши кўрган одамини эшикдан итариб ташлайверар экан-да.

Бу гапдан Муроднинг жахли қўзиб, бир дамгина ҳазилни унуди.

— Ия, нега итари, у?

Шукур ака этиги учи билан ер чизиб, аста хўрсаниб қўйди.

— Сиз индамай туравердингизми? — Муроднинг қийик кўзларида ғазаб учкунлаб, ўзи сезмаган ҳолда қўллари мушт бўлиб тугилди. — Солмадингизми жағига айлантириб!

— Аёл кишини-я?! — Шукур ака бошини қўтарди. — Эсинг жойидами?

— Дарвоқе... — Мурод пешонасига бир туширдида, Шукур аканинг елкасига қўл ташлади. — Биласиз, сизга бирор тегса, асаб ўйнаб кетади. Ўзимни тутолмай қоламан.

— Шунинг учун ҳам ўғлим дейман-да сени! — Шукур аканинг овози товланиб кетди.

— Демак, — Мурод тийиксиз ички бир қитмилик исканжасида тағин гапни айлантиришда давом этди. — Холанинг хафалиги шундан экан-да. Эрталаб хонасига кирсам, хўнг-хўнг йиғлаб ўтирган экан. Ҳа, десам,

Шукур акангни ранжитиб қўйдим мен ахмок, деди. Лекин итариб ташлагани ҳақида чурк этмади. Этганида ернинг кўзига ёпардимам-да.

— Итаргани йўқ, — Шукур ака унинг пўписасидан ҳадикланиб, холани оқлашга тушди. — Остонага қокилиб тушдим.

— Қаттиқ тушмадингизми ишқилиб?

— Йўқ-йўқ, — Шукур ака беихтиёр кетини сийпалади.

— Лекин сизни жонидан ортиқ яхши кўради, — деди Мурод ундаги гайри шуурий жонланишни зимдан кузатиб. — Агар ғидинг-бидинг деяверсангиз, у ўзини бир бало қип қўйишданам тоймайди. Шукурсиз бир кун ҳам яшаётмайман, деганини мана шу кулокларим билан эшитганман.

— Йўғай! — Шукур аканинг овози титраб кетди.

— Факат сиз хеч нарса билмагандай, жимгина юраверинг, — Мурод унинг елкасига аста қокди. — Ўзи куйиб, ўзи ўлсин. Сизга нима.

— Кейин мен балога қоламан-да.

— Тушунмадим?

— Ўзини бир нима қип қўйса, мендан сўрашади-да.

— Нега энди?

— Нима қилсаям мени деб қилади-да, — Шукур аканнинг юзига ташвиш ифодаси қалқиди. — Кейин кўрасан машмашани. Обрўйимиз бир тийин бўлиб, ўрта ерда хотиндан балога қолади-да, одам. У тентакка айтиб қўйиш керак, ҳар хил хаёлларга бориб юрмасин. Махалламида шундай бир воқеа бўлиб, роса бир ой изини суришган. Майли, улар ёшлар эди. Лекин ҳозир катталар ҳам гўр эмас. Биттаси кеннойинг. Бурнидан сал баланд гапирсанг, ўзимни поезднинг тагига ташлайман, деб қўркитади. Бўлмаса аллақачон жавобини бериб юборардим. Туғмаслиги етмагандек, пўписаси ортиқча.

— Ха, кеннойим одам эмас! — Муроднинг чехрасига қаҳр инди. — Ундай хотиннинг онасини...

— Сўкма, — Шукур ака тумшайди. — Унча ёмон хотин эмас у.

— Нимаси яхши? — Муроднинг қалbidаги нафратга ўхшаш туйғу тишга кўча бошлади. — Эркак кишининг эркига қўймаган хотиннинг нимаси яхши? Сиз

аросатдаги одамсиз. Яшаб яшаёлмайсиз, ўлиб ўлолмайсиз. Доим хавотирда юрасиз... Э, қўйинг, кўп тилимни қичитманг.

— Нима қил, дейсан?

Мурод дўлворгина бу одамга ачиниб боқаркан, бирдан унинг севиб ва севилишини жуда-жуда истаб қолди.

— Севинг! — деди у шу истак оғушида тўлкинланиб.

— И-и, ҳазилингни қўй.

— Аммо Мадина хола ақлли экан, — деди Мурод ҳазилдан кўра истакка бўйсуниб. — Қўрқоқлигингиzinни билиб, мухаббатини сир сақлаб келаяпти. Агар сиз журъатлироқ бўлганингизда, аллақачон бўйнингизга ташланишиям мумкин эди. Биладики, сизда юрак йўқ. Шунинг-чун, атай ёмон кўрган киши қилиб кўрсатади ўзини.

— Ҳа, у... қизлигидаям ўткир эди, — деди Шукур ака оғир сўлиш олиб. — Агар бошимга ёғоч билан урмаганида, уйланардим ҳам.

— Йўлига шунчаки урган-қўйган-да.

— Қанақа йўлига, — Шукур ака тушунмади. — Бир ҳафта бошимни чирмаб юрганман. Улдириб қўйишига сал қолган.

— Ана энди ўзи юрагини чангллаб юрибди.

— Нима?

— Сизнинг ишқингизда юраги хун бўлиб юрибди деяпман.

— Сен бола, менга қара, — Шукур ака бирдан хушёр тортган одамдай, унга синчков тикилди. — Нуқул яхши кўради деяверасан, барибир ҳеч нарса сезмаяпман-ку мен. Яхши кўрган одамнинг кўзи сал бошқачароқ бўлмайдими? Масалан...

— Масалан, қанақа?

— Қанақалигини қайдан билай, — Шукур ака манглайини қашлади. — Шу... бошқачароқ бўлади-да. Унинг кўзи эса доим бир хил. Олдига одам киряптими, ит киряптими... қарashi доим бир хил.

Бу ҳақ гап олдида Мурод зигирча довдирамади.

— Мураббо-чи? — деди кўзларини лўқ қилиб.

— Нима, мураббо?

— Чой-чи?

— Нима чой?

— Ҳаммаси сиз учун-ку.

— Уни сенам ичаяпсан шекилли?

— Биздики энди... шолининг ортидан курмак сув ичгандай бир гап. Сиз бўлманг, чой тугул сув ҳам бермайди менга. Мана шунинг ўзи муҳаббат эмасми? Мураббони кошиқлаб урасиз, чойни хўриллатиб-хўриллатиб ичасиз, лекин бунинг ҳаммаси не вождан эканини хеч ўйлаб кўрганмисиз? Ёмон одамсиз, Шукур ака.

— Кўп мақтаверма, шуни, — Шукур ака енгил хўрсинди. — Мақтаганинг сари, яхши кўриб кетаяпманни дейман.

— Яхши кўришга арзийди-да. Қани энди, менгаям бирор мураббо пишириб келса, атай оғзингга тутса, бошимда кўтариб юрардим бундай аёлни.

— Сен ёшсан, олдинда ҳаммаси.

— Нима, сиз қаримисиз?

Бу гапдан Шукур аканинг чехраси гул-гул яшнаб кетди.

— Қари эмасмизу, лекин ёш ҳам эмасмиз-да, — деди мамнунлик билан.

— Ёшсиз, — деди Мурод қатъий йўсинда. — Мадина хола яхши кўрибдими, демак, сиз ҳаммадан ёшсиз.

— Одамни уялтирма, — Шукур ака хижолатомуз илжайди. — Негадир одам уяларкан.

— Сиз уялманг, фахрланинг, — деди Мурод бўш келмай. — Сизни қаранг Абдуллани қаранг. Ёшлинигиз деярли тенг, лекин у сиздан ўн-ўн беш ёш катта кўринади. Демак, сизда бир гап бор. Айтишадику, бир хил одамлар қаримайди деб. Сиз ана шу тоифадан бўлсангиз керак.

Шукур ака вагон соясида ўз майлида хўмрайиб сигарет чекиб ўтирган Абдуллага диққат билан разм соларкан, беихтиёр юзини сийпалаб кўйди. Ич-ичидан мамнунлиги шундоққина чехрасида акс этиб, оғзининг танобини йигиштиромай қолди.

— Сиз ҳатто Колядан ёш кўринасиз, — деди Мурод ундаги ўзгаришни синчков кузатаркан, қўлтиғига сув пуркаб. — Ишонмасангиз, ўзингизни ойнага соп кўринг.

— У энди.. арокни кўп ичади-да, — Шукур ака мамнунлигини яшириш учун Коляга ачинган бўлди. — Арок хуснни бўғади. Ичмагин, деб кўп айтаман унга. Кулок солмайди. Ёшлигига жуда хусндор йигит эди. Ичавериб рангини айнитиб кўйди. Ичишдаям ичиш бор. Масалан, мен кам ичиб, кўп ейман. У эса кам еб, кўп ичади. Натижада ранги айнимай, мен айнийми. Кейинги пайтда сенам шишанинг тубига кўп тикиладиган бўп қолаяпсан. Кўп ичма, рангинг кетиб қолади.— У ўзи сезмаган ҳолда тағин юзини сийпалаб кўйди. — Рангингни сакла.

— Бетингиз қизболанинг юзидай тиник, — деди Мурод. — Шунинг-чун ҳам сизни хотинлар яхши кўради-да.

— Э, яна ким? — хайратдан Шукур аканинг кўзлари қаншарига чиқиб кетди. — Одамни довдиратма кўп.

— Билганимни айтаяпман-да.

— Ким? — қизиқиши ва ҳаяжондан Шукур аканинг ҳатто корнигача силкиниб кетди.

— Бу ёфи энди сир, — Мурод сигарет тутатди. — Мадина ҳолага шунча ҳовлиқаяпсиз, бу ёғини эшитсангиз, биратўла ўлиб кўя колсангиз керак. Юракни авайланг, Шукур ака, юракни.

— Юрак бақувват, хавотир олма, — Шукур ака унинг билагидан тутди, айт. Ким?

— Ким эмас, кимлар, яъниким ишхонадаги жамики хотинлар.

— Ола-а, — Шукур аканинг юзидан қизиқиши ифодаси ариб, ўрнини иккиланиш эгаллади. — Пайқамайман-ку мен хеч.

— Пайқамаслигингиз табиий, — деди Мурод. — Чунки сиз кам эътиборли одамсиз. Чангитиб сўкишни биласиз, холос. Агар ўша хотинлардан бирини мен сўқайнин-чи, нима қиласкин. Дархол ёқамни йиртади. Сизга эса чурқ этишмайди, кулибгина кўя қолишади. Ё ёлронми?

— Гапинг чин, — Шукур ака ерга хаёлchan термулди. — Шунча сўксам ҳам фик этишмайди. Хотинларни гапирганинг сайин, ичим қизиб кетаяпти. Қани энди бирдан ёшарив қолсаму, танлаб-танлаб уйлансам.

— Мадина ҳолага ўхшаганига, а?

— Нега энди Мадинага? — Шукур ака илкис қарди. — Нима, бошқаси куриб қоптими.

— Сизга жонини хадя этмоққа тайёр тургани ўшада, — Шукур аканинг тамомила ўзига келганига қаноат хосил қилгач, Мурод гапни калта қилишга тириши. — Тунов куни, Шукур аканғга қараб юргин, ўзини кўп уринтирмасин у кишининг бармоғига санчилган зирапча юрагимга санчилган тиғдай таъсир этади менга, деди.

— Ў-ў, ростданми? — Шукур ака тўлқинланиб кетди.

— Нима, қасам ичайми?

— Йўқ-йўқ, — Шукур ака қулт ютуниб, унга жавдираб қаради. — Ишонаман мен сенга.

— Ишонсангиз, ўзингизга қараб юринг, — Мурод илдао қилди. — Тағин холадан балога қолиб юрмайин...

— Шундай дедими, а? — деди Шукур ака ўзига-ўзи гапирган оҳангда. — Вой, Мадинаси тушмагур-ей. Хотини билмасин, деб сасини чиқармас экан-да, бечора. Туриб-туриб раҳмим кеп кетаяпти унга. Лекин эри яхши одам эмасди. Менга тегса, баҳтли бўларди. У жинни ҳеч гапдан-ҳеч гап йўқ, ёғоч билан бошимга уриб ўтирибди. Кизлигидаям бировга сир бермасди. Дарди ичида эди. Қани энди, анову туғмас жодугар бўлмаса-ю, шартта уйланиб олсам. Сал бетгачопарлигини демаса, яхши хотин ўзи. Мехрибон. Ўша ярамас эрининг устида ўлиб бўларди. Корнинг оғрийди деб кўчанинг овқатини едирмасди. Ўзи пишириб, куйдирб келарди. Бизди хотинлар... ўлиб қолганинг билан иши йўқ. Кеча белимни уқалаб кўй десам тутқаноғи тутиб шундай ўшқириб бердики, кочгани жой тополмай қолдим. Мадина ундей эмас, кара, мурабболар пишириб келаркан менга... Вей, Мадинаси тушмагур-ей! Факат айтиб кўйиш керак, ўзига бир нима қип юрмасин тағин. Яхши гапгаям, ёмон гапгаям фаришта омин дейди...

\* \* \*

Тушликда Шукур ака кутилмагандан ҳаммани хурсанд қилди. Четроқдан жой танлаб, энди овқатла

Шунга ўтирганларида, боя аллақаергадир гум бўлган Шукур ака тўсатдан пайдо бўлиб қолди. Кўлтиғида ўзи қўлидан қўймай кўтариб юрадиган пахталиқ, негадир ранги сал оқаринкираган, кўзлари ўйчанг жаланглар, кепкаси чап томонга сурилиб қолганди. Бўш ўриндиқка чўкиб, қўлтиғидаги пахталикни ғайлаброқ четга қўяркан, кўз қири билан стол боғида ўтирганларни бир-бир кузатиб чиқди-да, овқатса қошиқ урди. Шўрванинг мазасини тотган бўлди. Сўнг бир ён энгалиб, пахталиқ орасидан бир шиша вино олди. Шиша каттагина эди. Ошикмай овқатлаништаётганлар бир овоздан «о-о» деб юбориши. Шукур ака, жим, дегач, вино шишаси Абдулланинг тиззасидан жой олди. Коля енгилгина сакраб туриб, бешта стакан кўтариб келди. Абдулла атрофга ўгринча аланграб, уларга қултиллатиб вино қўйди. Иш пайтида ичиш қатъян ман килингани учун, ортиқча шовқинсиз ичдилар. Лекин кейин маза қилишди. Винонинг кайфидан қулф-диллари очилиб, хузур қилиб овқатланишди, чойлашишди, ҳазил-хузул қилишди. Аммо Муроддан бўлак ҳеч ким Шукур аканинг алланечук дилгир кайфиятда ўтирганини сезмади. Шунингдек, столда нечук винонинг пайдо бўлиши ҳам хозирча сирлигича қолди.

Одатда Шукур ака бригадани бирор-бир қувончли воқеа эвазига ичимлик билан сийларди. Сийлаганида ҳам бугунгига ўҳшаб тушда эмас, ишдан сўнг қиласарди бу ишни. Не важдан меҳмон қилаётганини ҳамма билиб, кўриб турарди. Шунга караб муомала қилишар, йўлига эса-да, у-бу сўзлар айтишарди. Бироқ бугунгиси номаълум эди. Бу ҳакда Шукур ака сўз очмагандек, бошқалар ҳам айтарли даражада кизикмаётган эди. Сабаби, умумий кайфиятга соя соловчи вазият юзага келган, яъни тушдан сўнг йиғилиш бор эди. Йиғилиши ишчилар жинидан ёмон кўришар, ўзларига колса, олтмиш-етмиш киши базўр сифадиган чоғроққина залга ўлақолса киришмасди-ю, лекин Ўнар найнов қўймасди. Дарвозада туриб олиб, ҳаммани ичкарига хайдарди. Хозир ҳам ишчиларнинг овқатланиб бўлишини кутиб, дарвоза ёнида зўр чидам билан нари-бери бориб келарди. Кираверишдаги, чап қўлдаги доскада бугунги

Йиғилишнинг кун тартиби илова қилинган, бироқ уни хеч ким ўқимагани аниқ эди.

Туравериш жонига тегди шекилли, Ўнар найнов ўша ёқдан туриб тикилинч қилиб қолди.

— Тезрок тугатинглар, э!

Йиғилишга кирмасликнинг эвини тополмай ўтирганларга бу гап яхши баҳона бўлди. Улар ҳар томондан ёпишиб кетишли.

— Овқатлангани қўясанми-йўқми! — дея қичкирди кранчилар бригадасидан кимдир.

— Нима шундан бошқа ишимиз йўқми, — дея уни кувватлади машинистлар.

— Қачон қарама, меҳнат интизоми масаласи... — дея бақирди созворчилардан бири дарғазаб бўлиб. — Рости жуда жонга тегиб кетди! Мажлисга тўясанларми-йўқми?

Оғзига озгина тегиши билан ажабланарли тарзда рухланиб кетадиган Абдулла ўзича ҳазил қилмоқчи бўлди.

— Ур! — дея тўсатдан бўкирди-да, столга бир мушт туширди. — Мушт турганда муомала нимага керак. Ур!

Ҳазили ўринсиз эса-да, лекин қилиғининг оқибати жуда кулгули чиқди. У столга мушт туширганда, кўли тегиб кетиб, косадаги қошиқ учуб бориб Ринатнинг пешонасига тегди. Ринат додлаб, ховли кулгуга тўлди. Бу хил қизик ҳолни кутмаган Коля куламан деб стулдан ағанаб тушди. Шукур аканинг жаҳли чиқиб, ҳаммани ҳайдаб солди. Муродни эса олиб қолди.

Мурод чойни янгилаб келганда, Ўнар найнов иккинчи бор тикилинч қилди. Аммо ишчилар атайин имиллашар, ройишлари бўлмаса-да, чойга ружу қўйишарди.

Шукур ака чойдан хўплаб, теваракка бир кур разм солди-да, аста Мурод томонга эгилди.

— Холанг мендан жуда хафа шекилли? — деди охиста. — Боя юзини терс ўгириб кетди. Қовоқ-тумшук осилган, худди мен еб, у қуруқ қолгандай.

— Нима? — Мурод иссиқдан нолиб, елпинди.

— Мадинани айтаяпман, — Шукур ака овозини яна пастлатиб, атрофга тезгина аланглаб олди. — Боя винога чиқувдим. Силарни бир хурсанд қилай дедим-

да. Қайтаётиб Мадинани кўриб қолдим. Кўриб кўрмасликка олди ўзини. Ёмон кўриб қолганга ўхшайди мени.

— Ёмон кўрмаган, — Мурод, ўзида ҳазилга иштиёқ сезиб, шўхчан кулимсиради. — Шунчаки маскировка килаяпти.

— Нима деганинг бў?

— Никоб.

— Шунақасиям бўладими? — Шукур ака қаддини тиклаб, унга ҳайрон тикилди. — Холангни килиғи кўпми дейман?

— Албатта. Нима, яхши кўришимни Шукур аканг билмасин, дегани эсингиздан чиқдими.

— Билдирмаса, яхши кўриб нима қилади?

— Билдиришини истайсизми?

Шукур ака индамади.

— Бирор билмасин деб роса типирчилаган ўзингиз-ку, — деди Мурод. — Энди эса... Сизгаям тушуниб бўлмай колди.

Шукур ака тағин чурқ этмади. Бир нима топадигандай пиёладаги чойга тикилиб ўтираверди.

— Хоҳласангиз, айтаман. Билдиради.

— Биласанми, — Шукур ака пиёладан кўзини узмай, чукур хўрсинди. — Шу-у... нима десам экан... айтишгаям одам қийналади... халиги... холанг қовоғини уйгани сайин, — у бармоқларини фалати-фалати ҳаракатлантириди. — Юрагим ўз-ўзидан мана бундай-мана бундай ўйнаб кетаялти. Айникса, боя кўрганимдан кейин бутунлай бошқача бўлиб кетдим.

— Кўзингизга бошқача кўриниб кетдими?

Шукур ака кўзларини катта-катта очиб, тасдиқ ишорасини билдириди.

— Бу — муҳаббат! — деди Мурод кизгин. — Сиз... севиб қопсиз!

Шукур ака қизариб бошини эгди. Шу алфозда хўриллатиб чойини ичди. Кейин унга хижолатомуз кўз қирини ташлаб кўйди.

— Кейин орқангиздан қараб қолгандир? — деб сўради Мурод «ўйин»га кучли иштиёқ сезиб.

— Қайдам, уйчасига кирди-ю кетди.

— Деразадан қараган...

— Нега?

— Коидаси шунака, — деди Мурод. — Севган одам сездирмай қарашни яхши кўради.

— Энди нима бўлади, а, Муродвой? — Шукур aka унга жавдираб тикилди.

— Нима бўларди, — деди Мурод ишонч билан. — Ортиқ чидаёлмай охир бир кун юзидан маскани обташлайди-да, сизга юрагини очади.

— Қачон?

— Яқинда, — кулгусини жиловлаш учун Мурод лабини қаттиқ тишлади. — Лекин мен... шу кеннойни ўйлаб турибман-да.

— Кенойингни қўй, — Шукур аканинг афти кескин ўзгарди. — Онасини ўшани... Қачон?

— Нима қачон?

— Қачон?.. — Шукур aka юзини сидирғаннамо харакат қилди.

— Маскани айтаяпсизми?

Шукур aka бош иргади.

— Айтдим-ку яқинда деб. Хола, ортиқ чидаёлмайман, охири Шукурга билдираман, дегандай бўлувди.

— Демак, бу шунчаки... нима эди? — Шукур aka кафтини юзига босгандай харакат қилди.

— Маска, — деди Мурод.

— Кай гўрлардаги гапларни топасан-а, — Шукур aka, гапимизни ҳеч ким эшитмаяптимикан, деган маънода атрофга хавотирли қараб қўйди. — Ўзбекчаси нима эди?

— Ниқоб.

— Ҳозирги юриши шунчаки ниқоб дегин? — Шукур aka негадир бирдан жонланиб кетди. — Ичидан куйса-да, ташида билдирамайди дегин?!

— Албатта.

— Лекин ёмон кийналаётган бўлса керак, — дёди Шукур aka ички бир ачиниш билан. — Ранги анча кетиб қопти.

— Севмок осонми.

— Демак, бу никоб дегин?! — Шукур aka ўзича фўлдираб, кўкракларини очиб ташлади. Теваракка мағрур назар солиб, димоғида аллақандай қўшиқни фўнғиллаб, яна ўша гапни такрорлади: — Демак, бу... никоб дегин!

— Никоб-никоб, — деди Мурод унинг харакатларидан ажабланиб.

Шукур ака унга эътибор бермай, ўзича гапиришда давом этди.

— Мен ахмоқ не хаёлларга бориб юрибман-а. Ўйлабманки... Кеча хаёлимда хеч нарса йўқ эди, бугун эса... Юрагим ҳам тинч турмай қўйди. Дукурлагани-дукурланган. Одамзод кизик-да, — шундай деркан тўсатдан у Муродга юзланди: — Сен анову қорагина қизни кўрганингда, юрагинг шунақа бесаранжом бўладими?

— Ў-ў! — Мурод чап кўксига кафтини босиб, у ёнбу ён чайқалди. — Ёшимиз бир жойга етиб, менки шунчалик қийналаяпман, сенга тоза азоб бўлса керак.

— Азоб-азоб:

— Барibir бир кун очилади дегин? — Шукур ака елпиниб, атрофга яна бир курс магур назар ташлади.— Вей, Мадинаси тушмагур-ей, юрагингда шунча дардинг бор экан, нима қиласан мендан яшириб, очавермайсанми!

— Кеннойим билмасин дейди-да.

— Қўй, ўшани! — Шукур аканинг, нордон нарса егандай, афти бужмайиб кетди. — Эс... эслатма шуни!

— Хўп.

— Демак, бир кун келиб очилади дегин? — Шукур ака роҳатланиб керишди. — Вей, Мадинаси тушмагур-ей!

Шукур ака йигилишга кирганида ҳам юқоридаги гапни бир неча марта такрорлади-да, сўнг ҳар сафаргидек, секин пинакка кетди.

\* \* \*

Йигилиш одатдагидек, зерикарли тарзда давом этарди. Бошда меҳнат интизоми масаласи қўрилди. Ҳафта бурун юз берган бир ножӯя ҳодиса эзмаланиб атрофлича муҳокама қилинди. Кейинги мавзу эҳтиёт қисмлар етишмаслиги ҳақида борди.

Айни шу жойда Шукур ака уйғониб кетди. Шишган ковоқларини зўрға очиб, ён-верга лоқайд боқаркан, бошини Муроднинг елкасига қўйиб, тагин пинакка хозирланди. Кўзларини юма-юма, тамшанганча, шунчаки сўради:

значок эди у. Кўз ўнгингизда ўсиб-улгайдим, орден олсам билмасмидингиз. Бунинг устига орден хаммага ҳам берилавермайди». «Кимга берилади?» «Мехнатда намуна кўрсатганлафга». «Нима биз пашша қўриб юрибмизми?» «Хўш, нима қил дейсиз?» «Пенсиягача битта урден тўғрилаб бер энди, — Шукур ака унинг кўлидан тутди. — Биттагинаси етади менга». Ўнар найнов баҳс фойдасизлигини билиб, кўлинни кўксига кўйди: «Хўп. Қулай имконият туғилиши билан тўғрилаб бераман. Бўлдими?» «Бўлди, — орден эрта-индин кўлига тегадигандек, Шукур ака жиддий таъкидлади.— Факат эсингдан чикмасин!»

Бу воқеа эрта баҳорда юз берганди. Шукур ака бир хафтача орден жинниси бўлиб юрди-да, сўнг эсидан чиқазганди.

Мурод хозир ўша воқеани назарда тутиб, секин шипшиди:

— Орден улашишяяпти.

— Нима? — Шукур аканинг кўзлари ярқ этиб очилди-да, боши Муроднинг елкасидан илкис узилди.— Урден дедингми?

— Тис-с! — Мурод бармоини лабига босди. — Шовқин солманг...

Шукур ака атрофга аланг-жаланг қаараркан, яна Муродга ёпишди.

— Урден бераяпти дедингми?

— Ха.

— Кимга беришди.

— Беришгани йўқ, беришмоқчи.

— Кимга беришмоқчи?

— Абдуллага.

— Менга-чи?

— Йўқ, — Мурод бош чайқаркан, секин деди: — Лекин биттасини такиб, Мадина холанинг олдига кўкрак кериб борсангиз жуда зўр иш бўларди-да.

— Мадина холангни қўя тур, — Шукур ака ўтирган жойида безовта типирчилаб, бўйинни чўзиб олдинга тикилди. — Абдуллага теккан урден нега менга тегмас экан? Вей, онангни...

Худди шу пайт бекат бошлиғи гапини якунлаб, жойига бориб ўтирганди.

Шукур ака кутилмаганда чакқон ўрнидан қўзғалдида, ўнг қўлини шоп килиб деди:

— Менга кара, начайник! Нима, мен сенга ердан чиққан қўзиқоринманми?!

Бутун зал дув этиб унга ўгирилди.

— Нима гап, Шукур ака? — Ўлмас ҳайрон бўлди.

— Нима гаплигини сендан сўраш керак! — деди Шукур аканинг ғазаби тошиб. — Абдуллага теккан урден нега менга йўқ? Нима, унинг шохи борми? Ё мен ундан кам ишлабманми?

— Қанақа орден? — Ўлмас янада ажабланди. — Шукур ака тўғриси ҳеч балога тушунмаяпман.

— Бизга қолганда ҳеч нимани тушунмайсан! — Шукур ака оғиздан тупук сачратиб баттар бақирди. — Урденни эса бошқаларга берасан.

Ўлмас елка кисиб, гоҳ залдагиларга, гоҳ ёнида ўтирганларга қаради. Барча ханг-манг эди. Мудраб ўтирган Абдулла ҳүшёр тортган эса-да, хануз ҳеч нарсага тушунмай анграйиб турарди. Шукур ака унга еб қўйгудек қараб қўйиб, яна сўзида давом этди:

— Урденнинг зўри Абдуллагага, Шукурга эса ҳемири экан-да, а! Бу алкаш нима каромат кўрсатибдики, урденнинг зўрини олса! Дунёда ҳаққат борми ўзи?!

«Алкаш» сўзини эшитиб, Абдулланинг жони чиқиб кетди. Ўтирган жойида ортига ўгирилиб, тутакиб бўкирди.

— Ким алкаш, ув-в?

— Жим ўтири сен! — Шукур ака унга қўлини силтади. — Сенга эмас ановуларга гапиряпман. Нега аралашсан! Тек ўтири жойингда!

— Нега алкаш дейсан?

— Алкаш бўлмай кимсан? — деди Шукур ака. — Тағин урден олганларига ўлайми! Алкаш!

— Қанақа орден? — Абдулла ҳайрон бўлиб, ён-атрофга аланглади. — Нима деб валдираяпти бу?

Ҳазилнинг бу қадар жиддий тус олишини кутмаган Мурод шошиб қолди. Шукур акани тинчлантиришга уринди. Аммо Шукур ака уни силтаб ташлади:

— Ўлмас! — деди босиқ ва бегона овозда. — Ув-в, начайник! Мен бу ернинг тупроғини ўттиз беш йилдан бери ялаб келаман. Мен ишга кирган йилим туғилган

болалар ҳозир ўттиз бешга кирди. Тушунаяпсанми, ўттиз бешга! Ўттиз беш йиллик стажи бор мендай рабочийни нега битта орденга тенгситмайсан, а? Урденни зўрларини хар гал ўзларинг олиб, мени бармоқ учидай тақинчоқ билан алдаб келдиларинг. Нима деган гап бу ўзи, а? Агар урден бермасаларинг эртагаёқ ишдан бўшаб кетаман. Минг ялинсаларинг ҳам қайтмайман!

— Шукур ака, орден масаласи бугуннинг кун тартибида йўқ, — деди Ўлмас. — Иккинчидан эса...

— Бир-иккингни қўй, — дея унинг гапини бўлди Шукур ака. — Менга урден берасанларми-йўқми? Шундан гапир!

— Шукур ака, нима бало, жинни-пинни бўлиб қолдингизми? — деди Ўлмаснинг қаватида ўтирган Ўнар найнов. — Тинчликми, нега дабдурустдан тутқаногингиз тутиб қолди? Сал ўзингизни босинг!

— Сен тек ўтири! — деди Шукур ака. — Мен начайник билан галашаяпман. Урденни олиб, имижимида сандиққа ташлаб қўйиб, тагин нега аралашсан сен. Сандиқда сакламай, мана бизга ўхшаш камбафалларга бер, маза кип тақиб юрайлик. Иш қилган бу ёқда колиб, нега энди урденни ишёқмас алкашлар, олиши керак. Каердан чиккан закун бу ўзи!

Бошда сув сепгандай жимлик чўйкан зал секинаста жонлана бошлади. Кимdir пикирлаб кулди. Кимdir уни жеркиб ташлади. Ўнар найнов охири воқеани англаб, Муродга жиддий тикилди. Муштини кўрсатди. Кейин Ўлмаснинг кулоғига нимадир деб шивирлади, чамаси, воқеани англаатди. Ўлмаснинг юзига табассум югуриб, ўрнидан турди.

— Ўртоқлар! — деди жилмайишдан зўрга ўзини тийиб. — Ҳақиқатда бу масалани биз анчадан буён ўйлаб юрибмиз. Йилнинг охирида бир неча кишини орден ва медалларга тавсия қилмоқчимиз. Шулар орасида сиз ҳам борсиз Шукур ака. Кўнгилни бузмай ишлайверинг.

— Йил охирида дейсанми? — Шукур ака хиёл бўшашибди. — Унгача ким бору ким йўқ. Менга ҳозир беринглар. Кабинетингдаги темир ишкафингни титкилаб қара, бирор бурчакда ётгандир биттаси.

— Ҳеч вақо йўқ, — Ўлмас кулди. — Бўлмаса ҳозироқ кўкрагингизга тақиб қўярдим. Сабр қиласиз энди.

— Ҳай, — Шукур ака батамом бўшаши. — Нақди бўлмаса, насиягаям кўнаверамиз. Ишқилиб, берсаларинг бўлди. Абдулла олиб, мен қуруқ қолмайин, дейман-да.

Шукур ака жойига ўтириши билан Абдулла унга ўдағайлаб кетди.

— Менга қара, нега мени алкаш дединг?!

Шукур ака ўзини эшиитмаганга олди. Аммо ҳакорат қаттиқ ботган экан шекилли, Абдулла тинчимади.

— Боя оберган винонгни юзимга солаяпсанми? — деди тутакиб. — Бўпти бундан кейин ичмаганим бўлсин! Пасткаш!

— Ўзинг пасткаш! — Шукур ака юзини терс ўтириб олди. — Алкаш,ничасная!

— Нима-нима! — Абдулла ўрнидан туриб кетди. — Нима дединг, қайтар! Вой, ўрисча билган сени...

Шукур аканинг сўкиши уникидан ошиб тушди. Абдулла ёнидаги одамларнинг тортқилови остида қайтиб жойига ўтирапкан, чакалоқнинг бошидай муштини дўллайтириди.

— Ташқарига чиққин ҳали!..

— Нима қиласардинг? — Шукур ака Муродга ишора қилди. — Муродга айтаман этингни бурдалаб қўяди.

— Ўртоқлар-ўртоқлар! — Ўлмас мажарони кулимсираб кузатаркан, сув тўла графинга қалам билан урди. — Ёш бола бўлманглар. Жанжаллашган одамга орден йўқ.

Бу гап Шукур акага қаттиқ таъсир қилди. У қаддими ростлаб, мактаб боласидай одоб сақлаб ўтириди. Абдулланинг пўнғиллаб сўкишларига парво қилмади.

У йигилиш охиригача шу созда ўтириди.

Залдан чиқаётуб айтган гапи шу бўлди.

— Урденни бугун берганларида зўр бўларди-да, — деди Муроднинг билагидан тутиб. — Эртан ишга тақиб келардим, соз костюмимни кийиб. Холанг кўриб роса хурсанд бўларди.

\* \* \*

Ховлига чиқишгач, Абдулла Шукур ака билан ёқалашмади. Одатдагидек, яъни, гўё ўртада хеч нарса юз бермагандек, бирга ўтириб сигарет тутатдилар, аҳамиятсиз нарсалар ҳакида сўзлашдилар. Агар Ринат ўртага сукилмаганда, йиғилишда юзага келган низо кайтиб эсланмаслиги ҳам мумкин эди. Оғайниларнинг жанжали кўпинча дўқ-пўписадан нарига ўтмасди.

Уларнинг донга тўйган мусичадай мўмингина бўлиб ўтиришларидан Ринатнинг кулгуси қистади шекилли, аста келиб тиргалди:

— Ҳа, муштлашмайсиларми? — деди ҳиринглаб.—  
Боя важоҳатларинг... жа-а ёмон эди-ку, а.

Шукур ака пашша қўригандай уни нари ҳайдади.

— Бор-бор! Тумшуғимнинг тагида кўп ўралашма!  
Калтак еб коласан!

— Судьялик қилмоқчи эдим-да, — Ринат баттар хирадлик қилди. — Қани, муштлашмайсизларми энди! Ўзим судья. Лекин ҳалол судьяман. Бошланг, Шукур ака.

Абдулла унинг юзига синчков тикиларкан, воқеани дарров фахмлади.

— Фу-у, отиб опти-ку бу, — деди пўнғиллаб.

Бу гапдан Шукур ака сергак тортди.

— Бориб бирпас ухла! — деди ён-верига аланглаб.— Раҳбарлар кўрса, яхши бўлмайди. Бор!

— Кўрса кўрар, — Ринат енгил чайқалиб унга янада яқин келди. — Бригадир қуийб берди дейман, ўз кўли билан...

— Маҳаллага тушиб чиққанга ўхшайди, — Шукур ака тўнғиллаб сўқинди. Сўнг Муродга юзланиб деди:— Обор буни. Раҳбарларнинг кўзига кўринмасин. Эртаиндин урден оладиган одаммиз, шательмизга яхши бўлмайди.

— Орден? — Ринат қийқириб куламан деб гандираклаб кетди. — Бериб бўпти сизга. — У сўлагини базўр йиғиштириб, бош бармоғини икки бармоғи орасидан чиқариб, Шукур аканинг нақ бурнига такади. — Мана сизга орден!

Шу орада Мурод келиб, унинг қўлтиғидан тутдида, диконглатганча кийиниш хонаси томон етаклаб

кетди. Шукур ака унинг ортидан койиниб қоларкан, охирги сўзини алоҳида таъкидлади.

— Алкаш!

Айни шу сўздан сўнг Абдулланниг қовоғи осилиб кетди.

— Шукур! — деди ўпкаланиб. — Боя мёниям шундай деб сўқдинг-а! Алкаш дединг-а! Ёмон хафа қилдинг мени.

— Ҳазиллашувдим, — деди Шукур ака сиртига сув юқтирумай. — Нима ҳазиллашиб хам бўлмайдими энди.

— Ҳазил бундай бўлмайди-да, ўрток, — Абдулла чуқур хўрсинди. — Уйда хотин айтади, бу ерда сен... нима келишиб олганмисилар? Одамнинг кўнглига тегадиям демайсан. Қаттиқ хафа бўлдим лекин мен.

— Хафа бўлма.

— Ҳар икки гапнинг бирида хотин шундай деб тургандан кейин, бу ёқда, оғайним бўла туриб, сен аямаганингдан кейин... одам хафа бўлади-да.

— Ундей хотиннинг баҳридан кеч, — деди Шукур ака жиддий йўсинда. — Бошқа бирини топ-да, этагидан маҳкам тут. Дунёга икки бор келмайсанку ахир. Нима қиласан ўзингни қийнаб.

— И-и, ҳаммаси бир гўр.

— Бир гўр эмас.

— Сен айтмагин, хўпми?

— Нимани?

— «Алкаш» демагин дейман.

— Хўп, бошқа айтмайман.

— Боя чиқиб муштлашмоқчи эдим. Қарасам, минг йиллик оғайнимиз. Ўзимни босдим.

— Мурод қўяр сенга.

— Мурод... менинг ҳам укам.

— Унда... ҳадеб урден деяверма-да сенам.

— Деганим йўқ.

— Дегансан, — Шукур ака ишонмади. — Демасанг, қаердан чиқди, бу гап? Раз шундай дейишган экан, раз сен оғайним экансан, аввал Шукурга беринглар демайсанми. Шундай демаганингдан кейин, албатта, жаҳлим чиқади-да.

— Ўша орденнинг менга ҳеч кераги йўқ, Шукур, — деди Абдулла. — Нима фойдаси бор унинг менга.

- Фойдаси бор экан, — деди Шукур ака сирли оҳангда. — Мен... секин билиб олдим.
- Менга деса ўнта олмайсанми, ишим нима.
- Ундан кўра кулок-чаккамга яхшилаб бир тушир, лекин «алкаш» дема. Одамнинг хўрлиги келаркан. Хотин шундай дегач, қаҳрим келиб, қасддан ичаман...
- Ҳайда! — Шукур ака қатъий таъкидлади. — Кетига бир тегиб ҳайдаб юбор.
- Кимни? — Абдулла ҳайрон бўлди.
- Хотинингни.
- У мени ҳайдаб юборар, шусиз ҳам тўрт кундан бери уйга киролмай юрибман, — Абдулланинг боши маъюс эгилди. — Сен уни билмайсан...
- Унда сасингни чиқармай юравер.
- Абдулла уни энди кўраётгандек, ҳайрат аралаш тикилди.
- Бугун жуда ботир бўп кетаяпсанми?
- Тушунмадим.
- Хотиндан кўркмайдиган одамдай гапирияпсан-да.
- Кўркмайман мен хотиндан!
- Абдулланинг ҳайрати баттар ошди.
- Сен-а?
- Ҳа, мен! — Шукур ака нописанд бир қиёфада чиртиллатиб ерга тупурди.
- Тортган одамдай гапларинг ғалати.
- Биласан, сигаретдан бошқасини оғзимга олмайман.
- Абдулла, кўзлари пирпираб, унга бошдан-оёқ тикилди.
- Ё... кайфинг борми?
- Нима деганинг бу?
- Гапларинг пиён одамникидай... — Абдулла шубҳаланиб, унга қайта-қайта тикилди. — Ростданам кайфинг йўқми?
- Сенга бир нима бўлдими бугун? — Шукур аканинг ғаши келди. — Нега пиён бўларканман.
- Қайдам, — Абдулла елка қисди. — Гапларинг тушуниксиз. Бошқача одам... бўп қолгандайсан. Илгари бундай эмасдинг. Хотинидан зир титрайдиган одам бирданига кўрқмас бўлиб қолса, киши ҳайрон бўладида.

— Бекор гап, — Шукур ака атрофга мағрур назар ташлади. — Хотиндан қўрқмайман мен.

— Сен-а? — Абдулла баттар таажжубланди. — Йў-ўқ, бир нима бўлган бугун сенга. Ё... тортгансан, ё ҳақикатдан юрагингга қувват инган.

— Бошни қотирма! — Шукур ака жеркинди. — Аввал қандай бўлсам, хозир ҳам шундайман.

— Кизик... — Абдулла нима деярини билмай бошини қашлади. Бошини қашлай-қашлай, унга кўз остидан қаради. Аммо ортиқ сўз қотишга ботинмади.

Шукур ака сигарет тутатиб, кўлларини икки ёнга — ўриндик суюнчигига ташлаганча, оёқларини чалиштириб ўтиаркан, унга нописанд назар ташлади.

— Сен у, хотиндан қўрқадиган, — деди диморида. — Биз... қўрқмаймиз! Тўғри, олдин қўрқардим. Негадир энди қўрқмайдиган бўп колаяпман, — шундай деркан у бирдан ўз-ўзидан хайрон бўлди. — Нега қўрқмайдиган бўп колаяпман, а, Абдулла? Рости, нима бўляяпти ўзи менга? Хозир хотиним кўзимга худди пашшадай кўриниб колаяпти. Пуф, деб учирив юборадигандайман.

— Демак, тортгансан, — деди Абдулла. — Тортган кезлари, Ринат ҳам шунака қўрқмайдиган бўлиб қолади. Кўзлари қизариб, инсон зотини бир тийинга олмай қўяди. Сенам тортибсан-да.

— Тортмаганман.

— Унда... нега қўрқмайсан?

— Шуни ўзимам билмаяпман-да.

— Тортмаган бўлсанг, — Абдулла елка қисди, — бунинг устига, қўрқмасанг билмадим унда.

— Нимани биласан унда? — Шукур аканинг зардаси қайнаб, кўлларини йиғишилди. — Уни сўраса — йўқ, буни сўраса — йўқ, манову каллани нега кўтариб юрибсан ўзи.

Абдулла гуноҳкорона бошини эгиб, энсасини қашлади.

Шукур ака пича тутакқан бўлди-да, сўнг унинг бикинига бир туртди.

— Болаларни йиғ! — деди. — Коля қани? Чакир уни! Ринатга тегманглар, пича мизғиб олсин. Йўқса, минғирлайвериб жонга тегади. Нима, Мурод унга қўши-

либ пинакка кетдими дейман? Коля қайси гўрга йўқолди? Коля!

— Мен бу ёқдаман, — айвон тарафдан Колянинг овози эшитилди. — Нима дейдилар?

— Ишга! — деди Шукур ака ўрнидан енгил кўзғалиб. — Одамларни йиғ-да, иккинчи базага бошла. Мен хозир келаман.

У шўрлик Абдуллани ҳанг-манг қолдириб, дарвоза томон йўналди. Боши тик, қадам олишлари ёш йигитларникдай дадил ва ўқтам эди.

\* \* \*

Унинг кириб келиши Мадина холани зифирча ажаблантирмади. Бекат ишчиларининг уруши — дока рўмолнинг куришидай гап, бугун ёқалашиб эртасига ярашиб кетаверардилар. Шунга қарамай, Мадина хола кечаги можарони унутмаган, шекилли, пайпорини тўқиб, тумтайиб ўтираверди.

— Эшитдингми, менга урден беришмоқчи, — деди Шукур ака этигини остонаядаги намлассатага хафсала билан артаркан, томдан тараша тушгандаи қилиб. — Зўридан...

Мадина хола кўзойнаги устидан хушламайгина қараб қўйди.

— Нима қилай шунга? — деди сўнг.

— Кувонгин деб айтаяпман-да.

Хола ажабланиб, яна қараб қўйди. Лекин индамади. Ўзича ичи ачиб ўйлади: «Бечора карияптими, дейман, эси кирди-чиқди бўлиб қолаяпти. Тунов куни-ку аллабалолар деб бошимни қотируди, эндиниси эса умуман куракда турмайди. Тавба, бу орден олса, нега мен кувонишим керак? Ё аламинг келсин дея, устимдан кулмоқчими?» У Шукур акага шубҳаланиб тикилди. Унинг кўзларида бу хил маънони ўқимагач, хотиржам тортиб, тағин ишга тутиндиги.

Холанинг эпчил қўл харқатлари Шукур аканинг диққатини тортди. Бир муддат томоша қилған бўлди.

— Шу менгаям битта пайпок тўқиб берсанг бўлармиди, — деди кейин холанинг жим ўтиришидан хиёл оғриниб. — Кечалари чап оёғим ўқтин-ўқтин зирки-

раб оғрийди. Магазинди пайпоги ҳеч нимага арзимайди. Зўридан битта тўқиб бер.

— Нима хотинингни кўлига чечак чиққанми, — деди хола тўрсиллаб. — Айт, тўқиб берсин.

Бу гапдан Шукур аканинг юзига шум ифода қалқиди. Қизғанаяпти, деб ўйлади мағрурланиб, қизғанмаса, бундай демасди. Қара, ҳатто қовоқлари осилиб кетди. Ҳа-а, қовоққинангдан сени! Ҳозир шартта туриб, бетидан битта ўпид олсан нима қиласкин? Шартта бўйнимга осилиб олса керак, Шукуржон деб. Лекин мен ўпмайман. Бу таранг қылганда, нега мен юмшашим керак. Ўпмайман. Худди ҳеч нарсадан хабари йўқ одамдай бирпас ўтираману, кейин айтадиганимни айтиб чиқиб кетаман. Мадина, дейман, майли, мени истаганча яхши кўр, лекин зинхор-базинхор жонинга қасд кила кўрма, гап кўпаяди, дейман. Қўзимни яшнатиб олдимда юравер дейман. Сенсиз менга ҳаёт коронги дейман. Йўқ, бунисини кейин айтаман. Ё олдин битта ўпид олсаммикан? Йўқ, бўлмайди. Ўлиб турган экан деб ўйлаши мумкин. Аммо бу зўр артист экан, суйиб, сўймагандай бўлиб ўтиришини қара бунинг. Артистлик қилгани сари, тобора яхши кўриб кетаяпман. Ўзича куйдирмокчи бу мени. Ҳа, қовоққинангдан!

У шу хаёллар оғушида чўнтағидан сигарет олди. Бироқ хола хонада чекишга рухсат бермаслигини эслаб, қўлидагини чўнтағига солди.

— Шу бир жуфт пайпингга қанча тўлашади? — деди кейин гапни нимадан бошлашни билмай.

— Ҳар хил, — деди хола. — Катта-кичиклигига боғлиқ.

— Масалан, қўлингдагига қанча тўлашади?!

— Неварамга бу, — Мадина хола бурнини енгил тортиб, жимжилоги билан чаккасини қашлади. — Бозор учун тўкимайман, илтимос қилишса, йўқ демайман.

— Унда менгаям битта тўқиб бер.

— Ҳакини тўласанг, тўқийверамиз-да.

— Нима? — ўзини аллақачон хукуқли ёр каторига қўшиб кўйган Шукур аканинг ҳайрати ошди. — Пайпок учун менам ҳақ тўлашим керакми?

— Нега тўламаслигинг керак? — Мадина холанинг ҳайрати уникидан кам бўлмади. — Бир кило жун фалон пул турганда, нега тўламаслигинг керак?

— Гапинг тўғрику-я, лекин мен..

— Нима сен?

— Мен энди сенга...

— Кўзнинг нуридан яралади бу, Шукур, — Мадина хола унинг гапини бўлди. — Осонгина тўқила қолса кошки эди. Кечалари бармоқларимнинг зирқираб оғришларини айтмай қўя қолай. Ёғ билан силасам-да, сиркираб, кечалари уйқу бермайди. Азобини билмайсан-да сен буни.

— Қийин экан сенга, — Шукур ака ачиниб, унинг бармоқларига караб кўйди. — Ташла бу ишни. Ёлғиз бошинг бўлса, нимангга етказолмаяпсан, ташла бу ишни. Худо, деб, шлакбаумингни кўтариб-тушириб юравермайсанми.

— Ташлаб бўлмайди, Шукур, — Мадина хола чукур хўрсинди.

— Нега?

Мадина хола ипда хосил бўлган тугунни чуватаркан, ҳасрат истаб, қаншари остидан Шукур акага қарди. Ҳамсухбатининг чехрасида барқ уриб турган ачиниш ва шунингдек, меҳрга ўхшаш ифодани кўриб, кўнгли анча юмшади. У Шукур акани бу хил ҳолатда жуда кам кўрганди. Аксарият холларда ўз димофини ўзи чоғ қилиб юрган тентакдек тутарди у ўзини. Шу боис, Мадина хола кўпда унга юрак очавермасди. Энди эса Шукур акани бутунлай бошқа қиёфада кўриб, беихтиёр ҳасрат қилмоққа тушди.

— И-и, мен гапирмай, сен эшитма, Шукур, — деди дардчил оҳангда. — Катта куёвим куёв эмас, худонинг балоси чиқди. Ишлаб ишламайди, ўлиб ўлмайди. Топганини ичади. Қизимнинг қўлида ёш боласи бор, қўлимдан келганча уларга қарашаман. Буёқда кичкина қизимнинг хархашаси ортиқча, опасига қайишганим сайин ичи тутаб ёнади. Эр-хотин машина касалига чалинишган, топганларини тўққиз ердан туғишиб, машинага пул йиғишаётди. Ич ёнишдан бирор дард орттириб олмасин деб, унга тортинаман. Иккисини бир қориндан талашиб тушган демайсан, феъли-хўйи хилма-хил.

**Каттаси яхши, кичиги худонинг разаби. Нега шундай экан, а, Шукур?**

Шукур ака бу саволдан довдираб, елкасини қисди. Мадина холага ичи туздай ачиб қаради. Юпатишга сўз тополмай, кизи бўлмаганидан ичидা севиниб қўйди.

— Одамзодга фарзанд нима керак, а, Шукур? — деди хола қўлидаги ишни стол устига зарда ила иртиб, бармокларини силаб-сийпаркан, чукур хўрсиниб.— Оғир кунингга яраш ўрнига нуқул ташвиш келтиришади. Мен ахмок, отасидан кўрмаган роҳатни улардан кўрайин деб ўзимни ўтга-чўққа урибман. Мендайин простой рабочий бўлмасин дея, орзу-ҳавас нелигини тотмай ўтибман. Кеча десант, кичкинам роса бағиллаб берди. Нега уришди, нимадан норози бўлди, ёлғиз худога аён. Хўрлигим келганидан бир бурчакка бикиниб, роса йигладим, — Мадина хола унга мунғайиб қаради. — Юрагим тўлиб турганида келдинг сен ҳам. Энди чидайсан, Шукур.

— Чидайман-чидайман, — деди Шукур ака нимага чидаши лозимлигини англамаган холда. — Чидамай ўлибманми.

Мадина хола дарди-хол қилгани сайин, Шукур ака, худди уни энди кўраётгандек, баттар тикилар, ачинганидан қаншаригача ачишмокда эди. Кейин бирдан, кўзи холада, чўнтак ковлаб, қўлига илинган ширинликларни стол устига тўка бошлади, гўё хола шундан таскин топадигандек, овози тўлқинланиб деди:

— Е, ҳаммасини е!

Хола столдаги ширинликларга шунчаки қараб қўйиб, яна ишини қўлига олди.

— Баъзан, — дея гапини давом этди, оғир сўлиш олиб, — сал ёшрок бўлсаму, шартта эрга тегиб, бошим оққан томонга кетиб юборсам, деган хаёлларга бора-ман. Киши топмас бир тупканинг тўрида эрим билан тинчгина яшасам дейман.

Бу гапдан Шукур ака хушёр тортди: «Бекорга эрга текким келаяпти демаяпти бу, — деб ўйлади. — Менга уйлан, Шукур демоқчи. Бу ерда хотининг барибир кун бермайди, опкет мени бошқа томонларга деяпти. Вей, шайтон-ий, гапни созлаганини қара буни». У Мадина холага синчков тикилди, дурустгина нарса бу ўзи, деб

ўйлади ичи алланечук ёришиб, оппокқина, силлиқкина, дўндиққина, кучсанг кучоғинг тўлгудек. Шундай нарса кўнгил берибдими, демак, мен ҳам чакана эмас эканман. Анову жодугар эса нуқул камситгани камситган, ундоқсан-бундоқсан деб. Қани энди, иложи бўлса-ю, сен кўпам мени ерга ураверма, керак бўлса, мени Мадина суюди десам. Деб бўлмайди-да. Тутқаноги тутиб, бошига одам йигиши мумкин. Шошма. Бу ёқда буниси яхши кўриб тургандан кейин, нега мен униси билан ҳисоблашишим керак? Фиринг-пиринг дэяверса, унисини ташлаб, бунисига уйланиб олишим ҳам мумкин-ку. Нима, дунёга икки бор келармидим, таваккал килайми бир? Тили демаса, бу ўзи азалдан менга ёқади.

Шукур ака шуларни хаёлидан ўтказаркан, буйрук бермоққа ўзини ҳақли деб билди. Үриндиқ суюнчигига елкасини ташлаб, файритабиий оҳангда буюрди:

— Мадина битта чой кўйиб юбор!

Мадина хола кўзойнагини пастга тушириб манглайи остидан ҳайратланиб бокди: «Нима жин чалди буни? Ҳўжайниндай тўсатдан тўнғиллашга тушиб қолди? Ё манову конфетларини пеш қиласяптимикан? Бундай одати йўқ эди-ку илгари. Кейинги пайтда сал хаёли айниб қолди буни. Ўзини дўхтири-пўхтирга кўрсатмаса, эртанидин жинни бўлиб қолишиям ҳеч гап эмас». У шириналкларга киё боқаркан, бир хаёли шириналкларни қўлига тутқазиб, ҳайдаб чиқармоқчи ҳам бўлди. Аммо кўзи киймади. Оқшом невараларининг қанчалар севинишини ўйлаб, ўзини босди. Боз устига, бу хил шириналклар унча-бунча дўконлардан топилавермасди. Бунақаси факат Шукур аканинг кенг чўнтағида бўларди.

Сукутни итоаткорлик деб тушунган Шукур ака тағин ҳаддидан ошди.

— Бундан кейин сал ўзинга қараб юргин, — деди холанинг эгнидаги нимдошгина ҳалатга имо қилиб. — Кўзга анча якин аёлсан, кийиминг ҳам шунга яраша бўлсин. Дўст бор, душман бор, эгни-бошингга эътибор бериб юргин дейман-да. Чиройли хотин чиройли кийиниб юриши керак. Рабочийман, деб устингга ҳар балони илаверасанми. Бундан кейин бунақа юрганингни кўрмайин!

Мадина хола жуда қийин ахволда қолди. Жаҳлланай деса, Шукур ака мактаяпти, қувонай деса, бу банданинг гаплари ўта ғалати, бамисоли эридек тутаяпти ўзини, ҳатто туркидан ҳам шу нарса барадла акс этиб туради. У хиёл иккиланишдан сўнг, бир оз сабр этмоққа аҳд қилди, Қани, кўрайлик-чи, яна нималар деб валдиаркан бу!

Шукур ака кўп куттирмади. Мадина холанинг куттимаганда ройиш бераётганидан руҳланиб кетиб, яна бир оз тергагиси келди. Сабаби, неча йилдирки бу лаззатдан бебаҳра эди. Тергаши мумкин бўлган аёли бунга сира изн бермасди. Бобиллаб, оғзидан чиққанини ёқасига ёпиштиарди. Шу тариқа, эр сифатида койиниш неча йилдирки, унинг ушалмас орзузи бўлиб келарди. Холанинг ҳозирги мўмин хатти-харакатлари қалбининг бир чекъасида мудраб ётган ўша орзуни уйғотиб юборганди. Шу топда у ўзини юксакда, жуда юксакда ҳис этмоқда эди. Ўзини юксакда ҳис этгани сари хола кўзига ушок, жуда ушок кўриниб бормоқда эди.

— Агар мендан умидинг бўлса, ўзингга қарабгина юргин! — деди ўша-ӯша жиддий оҳангда. — Қизлигингда қандай бўлсанг, ҳозир ҳам шундай юргин!

Бу вактга келиб Шукур ака шу даражада юксакликка кўтарилган эдики, холанинг ҳанг-манг бўлиб колганини мутлако пайқамади. Бу камдек, айни шу пайтда, не мақсадда ташриф буюргани бирдан эсига тушиб колса бўладими.

— Сўйма демайман, — деди викорли оҳангда. — Сўйинг кептими, суввер! Қаршилигим йўқ. Лекин Шукур ўлса, ўзимни ўлдираман, бир кун ҳам яшамайман, дея ҳарҳаша килишингни бас қил. Яхши гапгаям, ёмон гапгаям фаришта «омин» дейди. Агар буни хаёлингдан чиқармасанг, билиб қўй, қайрилиб ҳам қарамайман сенга!

Мадина хола мўъжизага дуч келгандек, бир ахволда котиб колганди. У шу даражада анг-танг бўлиб колгандики, қўллари ёқасида қотиб, иши оёқлари остидачувалашиб ётарди.

— Ўзингча... нималар деб вайсаяпсан, Шукур? — деди базўр овоз чиқариб. — Нима бўлди ўзи сенга?

Аммо бу вақтда Шукур ака саратон осмонида сузаб юрган бир парча оппоқ парқу булутдан ҳам юксакда эди. Шу боис, ҳали-замон күтарилиши лозим бўлган бўроннинг илк шабадасини вақтида пайқамади. Қайтамга, буни мутелик, шикасталик деб билди. Шунингчун ҳам жавобга шошилмади, ўзича бир оз ширин қилгиси келди. Бироқ Мадина хола ноз қилишга кўпда йўл кўймади, тўсатдан бақириб берди.

— Хай, менга қара! Нималар деб алжираяпсан ўзингча, а?

Шукур ака чўчиб кетиб, осмону фалакдан ерга гурсиллаб тушгандай бўлди. Бошини ғалати силкитиб, ҳолага ажабланиб қаради. Қаради-ю, қархисида муте чехрани эмас, жангари бир қиёфани кўрди. Аммо ўзини йўқотмади: «Яна артистлик қилаяпти, — деб ўйлади ичидা, ўлай деб турибди-ю, ташида билдиргиси келмайди-я, шайтон, қизлигида ҳам шунака эди. Шу одати ҳеч қолмади-қолмади-да».

— Нима дердим, — деди бамайлихотир чўнтағидан сигарет олиб. — Сўйсанг суввергуни, лекин шу... ўзимни ўлдираман-пўлдираман дейишингни бас қил. Тағин... фаришталар «омин» деб юбормасин дейманда.

— Ия, нега ўзимни ўлдиарканман? — Мадина холанинг бир пайтлар чиройли бўлган лаблари таажжубдан бир томонга қийшайиб кетди. — Каердан топдинг бу гапни?

— Нелигини гўё ўзинг билмайсан, — Шукур ака сигарет тутатиб, истехзоли илжайди.

— Йўқ, билмайман.

— Биласан, — Шукур ака маъноли қош қоқди. — Ўтган исменда барини айтганман.

— Нима деганинг эсимда қоптими. Кеча еган овқатимни эслаёлмайман.

— Артистлик ҳам энди эви билан-да, Мадинахон, — Шукур ака андак жаҳлланган киши бўлди. — Яхши кўрдингми, кўрдим де. Нима қиласан бунча гапни айлантириб.

— Нима? — Мадина холанинг кўзи шифтга ўрлаётган тутунга тушиб, хаёли бўлинди. — Чекма бу ерда!

— Менга мумкин, — Шукур ака тантикланди.

— Нега энди сенга мумкин экан?

— Негалигини ўзинг биласан, — Шукур ака уй хўжасидек, ғалати ҳаракатланди. — Тунда ҳаммасини айтганман...

— Тунда мастдай эдинг.

— Маст эмасдим.

— Унда тентак эдинг.

— Худога шукр, аклим жойида, — Шукур ака сигаретли қўлини остоная чёртди. — Айтганча тундаги галимни кайтариб олдим. — Энди... бемалол яхши кўравер мени.

— Сени?

— Бўлмаса кимни? Ё бошқа кўз остингга олганинг ҳам борми?

— Ё тавба!

— Тавбалайверма кўп, — Шукур аканинг энсаси котган бўлди. — Агар ҳадеб артистлик килаверсанг, билиб қўй, умуман қайрилиб қарамайман.

— Вой, ўлай, ким сенга қара деяпти?

— Ўзинг, — Шукур ака яна қиқирлаб кулди. — Кўнглим илиётганда, сал тилингни ширин кил-да. Бўлмаса, айниб қоламан-а. Юрасан кейин ичингда куйиб.

— Сенга куярканманми?

— Бўлмаса кимга.

— Сени даволатиш керак, Шукур.

— Ўзинг даволайсан-да энди жонидан, — Шукур ака маъноли илжайди. — Аммо сир бермаслигинга қойилман. Ўзинг ўлай деб турибсану, сира сир бергинг келмайди-я. Лекин бизни кўнгил аста сенга оғаяпти... хурсанд бўлавер...

— Тундаям аллабалолар деб бошимни қотирудинг, сенга ўзи нима бўляяпти, а, Шукур?

— Сир берма, сир берсанг камайиб қоласан.

— Жаҳлим чикаяпти, Шукур!

— Бунга энди ҳаққинг йўк! — Шукур ака иддао билан столга нукиди. — Бундан кейин бетга сапчишингни бас қил!

— Кет, Шукур!

— Тушунмадим.

Мадина холанинг сабри тугаб, иргиб турди-да, кўли билан эшикни кўрсатди.

— Қани, йўқол!

— А! — Шукур ака ишонкирамай унга бокди. — Нима?

— Йўқол! — Мадина хола пол тепиниб, чинакамига жазавага тушди. — Йўқо-ол!

— Ке... ке... кетаман, — Шукур ака довдираб ўрнидан турди. — Кетаману, лекин бошқа қайтиб келмайман! Ялинсанг ҳам қайтмайман! Менга деса қуийб ўлмайсанми!

— Йўқол!

Шукур ака эшикка етган жойида ортга ўгирилди.

— Аммо тилинг жуда аччиқ бўп кетибди, — деди захарханда оҳангда. — Манову конфетлардан тишлаб тургин, зора ширин тортса!

— У кутилмаганда, қоқ пешонасига келиб теккан конфетдан чўчиб тушди. Қараса, боягина чўнтағида жимгина ётган конфетлар бамисоли ўқдек бирин-кетин учиб келмокда. У ўзини эшикка урди. Конфетнинг йирикроғи нақ энсасига тегиб, жони оғриди. Аламидан кутуриб сўкинди. Ичкарида қолган холанинг жавоби унивидан ҳам зўр бўлди.

\* \* \*

Шукур ака, разабдан бўғриқиб, диконглаб омбор ховлисига кириб борганида, бригада терга ботиб, юқ туширмоқда эди. У вагондан эллик-олтмиш одим бериди тўхтаб, кўл сирмаб Муродни чақирди. Шу тобда у бутун захрини Муродга тўкиб сочмоқчи эди. Аммо унинг гунохсиз бир қиёфада кўзларини пирпиратиб турганини кўриб, хиёл шаштидан тушди. Қаердан келётганимни бу ахир билмайди-ку, деб ўйлади. Кейин ҳаммасига шу айбдор, деган фикрдан қайта жунбушга келди. Аммо жаҳл қилмоқ, сирни очмоқ дегани эди. Шукур аканинг эса хеч сир бой бергиси келмасди. Бирок захрини сочмасдан ҳам туролмасди, разаб ва аламдан юраги ёмон ўрганмоқда эди. Шу боис, йўқ ердаги баҳонани рўкач қилиб, ўшкириб сўради:

— Пахталигим кани?

— Шу ерда, — деди Мурод унинг кутуришидан

ажабланган киши бўлиб. — Скамейкага ташлаб кетган экансиз, йўқолиб-пўқолиб қолмасин, деб опкелавердим.

Пахталиги қолиб кетмаганидан Шукур ака кўп афсуланди. Агар шу ходиса юз берганида, ичидағи бор аламларини тўкмоқка зўр баҳона топиларди-да. Мен силарнинг буюмларингни кўз корачигидай асрайман, силар эса ўзим йўқ бўлиб кетсамам ишларинг йўқ, деб хаммани бир бошдан сўкиб чиқсан бўларди. Унинг феъли шу — неки алам ўтса, бақириш-чакириш билан юрагини бўшатиб олади.

Хозир эса Муродга нима деб тирғалишни билмай туаркан, бирдан кўзи Абдуллага тушиб қолди. Назарида, Абдулла жуда имиллаб харакат қилаётгандай туюлди.

— Абдулла, — деди тажангланиб, — нима, абед қилмаганмисан! Чакконроқ кимиirlасанг ўласанми! Ё бутингга тош боғлаб олганмисан? Бунақада кечгачаям вагон бўшатилмайди-ку.

— Ўзинг-чи? — деди Абдулла ундан баттар тутақиб. — Ўзинг нима қилиб турибсан, хода ютгандай фўдайиб! Келмайсанми. Ё сенинг ишингниям мен қилайми! Айтганча, қаерда юрибсан шу пайтгача?

— Ўйнаб юрганим йўқ, — деди Шукур. — Завуддан ўтган кунги испарапкани ундириб келаяпман. Испарапкасиз ҳемириям тўламайди-ку. Бу ишни мен қилмай онангни эри қиладими! Ҳув-в, сўппайган бўйинга сени...

Иш бир ёқда қолиб, икки ошна чинакамига сўкишиб кетдилар. Орага тушувчи бўлмади. Чунки хамма билдики, Шукур ака нимадандир аламда, тутақиб-тутақиб ҳадемай ўзига келади. Бунақа пайтда Абдулланинг жонига тўзим берсин, факат угина чидайди Шукур аканинг бу хил инжиқликларига.

Шукур ака бақириб-чакириб ҳоврини босгач, хамма қатори вагон соясига эмас, анча наридаги юқ тахламла-ри соясига бориб ўтириди. Боши ҳам, кўзлари нам, кўйиб берса, ҳализамон йиғлаб юборадиган бир ҳолатда эди.

Мурод бориб унинг қаватига чўкди.

— Яна хайдаб юбордими? — деди секингина.

— Нима? — Шукур ака унга ялт этиб қаради. — Сен қаердан биласан буни.

— Кириб келишингиздаёқ сезганман, — деди Мурод ҳамдардлик билан. — Сезмай ўлибманми, Шукур ака. Ахир сиз жигаримдай одамсиз-ку!

— Сен бола... сезгир, — Шукур ака бош эгиб, чуқур хўрсинди. — Ҳаммасини сезасан сен.

— Нега борувдингиз?

— Боргим келди, бордим-да.

— Аникроқ.

— Конфет оборувдим, — Шукур ака сигаретини чуқур тортиб, омбор деворига маъюс термилди. — Оборган конфетим билан уриб, ҳайдаб солди.

— Шугинами, холос? — Мурод кулгисини яшириш учун юзини кафтлари орасига олди.

— Нима, бу сенга камми? — бошқалар эшитмасин деб, Шукур ака овозини хиёл пастлатди. — Башарамга тарсаки туширса ҳисобмиди? Яхши... яхши кўрганинг сайин... ёмон қилиқ чиқарайпти бу холанг. Ўтган сафар итариб ташлаганди, бу сафар... Нималар бўлаяпти, ўзим ҳам ҳайронман.

— Ха, яхши бўлмабди, — Мурод ачинган киши бўлди. — Лекин яхши кўриб қолганингиз ажойиб иш бўлти.

— Яхши кўрмайман! — Шукур ака тескари ўгирилиб олди. — Нимасини яхши кўраман шу жиннини!

— Аммо у сизни яхши кўради.

— Хай, билмадим-да, — Шукур ака унга жонсарак-ланиб қаради. — Қилиғидан яхши кўрадиганга ўхшамайди. Ўрта ерда ўзим яхши кўриб қолганга ўхшайман. Балки у чинданам яхши кўрмас, а?

Мурод унинг шалвираб тушган камбар елкаларига, маржон-маржон тер босган энсасига боқаркан, қаншари ёмон ачишиб, кўзига Шукур ака гўдаклардай ожиз кўриниб кетди. Ёлкаларини силаб-сийпаб, бағрига босгиси, юпатгиси келди. Аммо беихтиёр чўзилган қўли ҳавода муаллақ қолди. Кучишу юпатишдан йистиҳола қилди. Шунда бирдан ҳазили чинга айланганини, гар Шукур ака бунинг ҳаммаси шунчаки ҳазил эканини билгудек бўлса, энг азиз нарсасини йўқотган одам ҳолатига тушишини ва буни кўтармоқ унга жуда-жуда оғир кечишини ички бир сезги билан фаҳмлади. Ёш бўлишига қарамай, кўнгил ишида

юз берадиган сароб инсон зотини тушкунликнинг энг чуқур қарига улоқтиришини яхши биларди. Боз устига, меҳрдан йирок коронги турмуш тарзига кўнижкан, хаётида йилт этган бирор-бир янгилик бўлишини сира кутмаган ҳолда, фавқулодда ўша нарсага дуч келган одам учун аниқ ҳақиқатга рўпарў келиш ҳар ҳолда осон эмасди. Шукур ака ўзи билиб-билмай, худди парвонадай ўша йилт этган ёруғликка интилмоқда эди. Бу интилишда на келажак режа, на бирор-бир тадбир бор — ёруғликка интилишдан ўзга ҳеч нарса йўқ эди.

Мурод шуни англаб етаркан, ҳазил қиласман дея, не хатога йўл қўйиб қўйганини ич-ичидан хис этди. Бояги истихола қаергадир изсиз йўқолиб, Шукур аканнинг елкасидан дадил кучди. Димогига ачқимтил тер хиди урилди. Бундан у жирканмади, қайтамга уни янада маҳкамроқ бағрига тортди. Шукур ака бехуда тиршанглаб, унинг кучоғидан чиқмоқчи бўлди. Чоғи келмагач, йигитнинг кучига тан бергандай, бошини эгиб ўтираверди.

— Яхши кўради у сизни, — деди Мурод кайта таъкидлаб. — Мана кўрасиз, ҳадемай ўзи қошингизга бош эгиб келади.

— Қўйсанг-чи, — Шукур ака бод хўрсинди.

— Чин сўзим, — деди Мурод ишонч билан. — Эртагаёқ ўзи бош эгиб келади.

Шукур ака алланечук рухланиб кетди-да, бир силтаниб, унинг кучоғидан чиқди.

— Нима, мен сенга хотинмидим, бунча қучоқлайсан, — деди вагон соясида қалдирғочдай тизилишиб ўтирганларга ҳадикли боқиб. — Кўрган кўз нима дейди. Кулмайдими. Ана карагин, Абдулла ҳалитдан куйдирган калладай иршайяпти. Ўзиям ҳўкиздай кучинг бор-а, елкамнинг суягини синдириб юборай дединг. Яхвиси, сен холангдан гапир. Нега у бундай қилик килаяпти? Яхшиям кўчада ҳеч ким йўқ экан. Қочиб чиққанимни кўрган одам нима деб ўйларди. Эссиж шунча конфет. Бари нобуд бўлди. Унга бергунча ўзим емайманми, маза қип.

— Айтдим-ку, бу бир маска деб, — деди Мурод. — Вақтинчалик ҳолат бу.

— Тағин «маска» дейсан-а, — Шукур ака тупуриниб, яна чўнтағидан сигарет олди. — Э, ўша «маска»нгни ичига лаънат! «Маска» деганиям шунча бўладими! Одамни бепичок сўймокда-ку! Яхши кўраркансан, бундай чехрангни оч. Яхши гапингни аяма. Асли бу қизлигидаям фўр эмасди. Билиб билмасликка олиб юрарди. Ўшандада сал отдан тушиб, бир-икки ишва қилганида, анову алвастига уйланиб ўтирумасдим. Йў-ўқ, бу кишим ишва қилсалар ўлиб коларлар! Мумкин эмас у кишимга!

— Кенойимдан қўрқса керак-да.

— Нимасидан қўрқади?

— Ахир ўзингиз ҳам қўрқасиз-ку.

— Қўрқсам қўрққандирман, аммо ҳозир зигирча қўрқмайман, — шундай деркан, Шукур ака унга ҳайратланиб бокди. — Менга қара, нега мен... ҳеч балодан қўрқмайдиган бўл қолаяпман, а? Ишқилиб яхшиликамикин? Кеча хотиндиям сўкиб ташладим. «Шу туришинг бўлса, эрта бир кун «ошқасига уйланиб кетаман», дедим.

— Ростданам шундай дедингизми?

— Йўқ, ичимда ўйладим, — Шукур ака чаккасини қашлаб, хижолатомуз ишшайди. — Айтсам, тириклийин еб кўярди-да. Авваллари секин балконга чиқиб кетардим. Бу сафар без бўлиб ўтиравердим. Ўзи яниб, ўзи тинди. Пинак бузмадим мен.

— Маладес! — Мурод унинг елкасига қокди. — Эрта-индин бунисиям ипакдай эшилиб келади.

— Келмас-ов, — Шукур ака унга ишонқирамай бокди. — Қизлигига келмаган, энди келармиди. Ичида сўйиб, ташида сўкиб ўлдирса керак у мени.

— Келади, — Мурод жиддий таъкидлади. — Мана кўрасиз, ўзи югуриб келади.

— Ростданми? — Шукур ака унга умидвор тикилди.

— Албатта!

\* \* \*

Ишдан кейин, бригада ювенишга кириб кетиши билан Мурод оёғини-қўлига олди-да, уйчага қараб зин-филлади.

Мадина хола завод томонга жилган юк эшелонини ўтказиб юбориб, ола-була йўл тўскични кўтараётган экан, гап бор, хола, дея уни уйчага бошлаб кирди. Аммо бу хакда бирон кимсага чурқ этманг дея, деразадан ташқарига мўралаб ҳам кўйди. Бунга сари Мадина холанинг қизиқиши ортиб, сийрак киприклари тўхтовсиз пириллашга тушди.

— Нима гап? — деди у охири тоқати тоқ бўлиб.

Мурод айтишга ошиқмади. Ўтирган жойида типирчилик, стол четидаги чойгумнинг сиртини тутиб кўрди. Чойгум илиқ эди. Стол устидаги нарсалар йигиштириб қўйилган. Мадина хола сменани топширишга шай бўлиб турарди.

— Чой қўймабсиз-ку, хола, — деди Мурод гапни нимадан бошлашини билмай.

— Чойинг nimasi, ҳадемай смена топшираман, — деди Мадина хола энсаси қотиб. — Айт, гапингни, нима демокчи эдинг?

Мурод оёқларини чалиштириб, жойлашиброқ ўтишаркан, ажиб бир холдан таажжубланди. Бу ёққа келаетганида дилидаги уйдирмаларини тўкиб солиш жуда осондек туюлганди. Холани ҳам Шукур акадек боплаб гангитаман, деб ўйлаганди. Аммо ҳамма гап шундаки, бу сафар гап ҳазилдан ташқари, жиддий ёлғон асосида қурилиши лозим эди. Боя бир амаллаб Шукур аканинг кўнглини тинчитгандан сўнг, иш давомида Мадина холага айтадиган гапларини пухталаб олганди. Буни қарангки, энди дилидагини тилига чиқариш қийин кўчмоқда эди. Бундай ўйлаб кўрса, ҳазил осон экану, аммо уни маълум бир мақсадга йўналтириш хийла оғир экан. Муроднинг ҳатто оғзи қуруқшаб кетди.

Бу орада гап кутавериб, Мадина хола ҳам қийналиб кетди. Бетоқатланиб ўрнидан турди-ўтирди. Ялтиратиб артилган полни нари-бери босиб, у-бу юмушни бажарган бўлди. Орада Муроднинг ифлос пойафзалига бир-икки ҳўмрайиб қараб қўйди. Бошка пайт оёғини суртмай киргани учун боплаб койиб берган бўларди-ю, аммо ҳозир индаёлмасди. Сабаби, бу йигит бекорга ҳовлиқмайди. Ҳовлиқдими, демак, нимасидир бор. Бугун ё кирсовун туширган, ё бирор тансикроқ мева-чева. Ёмон одати, ичидагини тезда айта қолмай-

ди, пича ҳазил-хузулдан сўнгина, хола фалон жойда фалон нарса туширдик ёки туширияпмиз, сизга керак эмасми, деб сўрайди. Керак дейилса, ўша айтган нарсасини бир этак қилиб олиб келиб ташлайди. Эвазига хола уни мурабболи чой билан сийлайди.

Айни дамда Мадина холанинг тасаввури кирсовундан нарига ўтмаётганди. Ўн-ўн беш бўлак бўлса зиён қилмасди, деган ўйда йигитнинг кенг чўнтакларига ўғринча қараб кўйди. Чўнтакларнинг бўшлигига ишонч ҳосил қилгач, ўзини овутмокка баҳона топди: «Хойнахой, шкафига ташлаб, керакми-йўқми, деб сўрагани чиқкан. Боласи тушмагур қувгина-да».

У жойига ўтаётib, деразадан ташқарига мўралади. Узоқдан ниҳоят имиллаб келаётган сменадош кампирни кўрди. Тошбақага ўхшаб судралмай кет, деб тўнгиллади.

— Биласизми, — деди Мурод ниҳоят тилга кириб.— Шукур aka сизни яхши кўриб қопти.

Турган гап, хола буни одатдаги ҳазил деб билди. Эътибор бермай гапнинг индаллосини кутди.

— Бугун тушдан сўнг роса икки соат йиглади, — дея ёлғоннинг уйини куйдиришда давом этди Мурод.— Дардимни айтай, дея олдига кирсан, итдай қолиб берди, деб бошини вагонга уриб-уриб йиглади. Ўзимни осаман деб, ўзини у ён-бу ён ташловди, зўрға тутиб қолдик.

Мадина хола, олиб қоч-а, деб бошда кулмоқчи бўлди. Аммо қарасаки, йигитнинг қиёфаси ўта жиддий, хеч ҳазил қилаётганга ўхшамайди. У қаншари остидан йигитта ажабсиниб бокаркан, бир хаёли, йириштир сафсатангни дея, жеркиб бермокчи ҳам бўлди. Аммо йигит инъом этадиган ўша ниманидир хурматини килиб, ўзини босди. Берадиган совунга ўхшамайди, деб ўйлади, тансикроқ нарса бўлса керак, йўқса, бунчалик хаддидан ошмасди бу бола. Шу боис, киши дили ранжимайдиган бир оҳангда эътиroz билдириди.

— Ола-а, энди бизга мухаббатни ким кўйибди. Нега келдинг, шундан гапир. Ўмарганинг бўлса тезроқ оп-келақол. Тағин анову кампир шерик чиқиб юрмасин.

Мурод дераза томонга бир кўз ташлаб олиб, баландроқдан келди.

— Ўзини эрта гўрга тиқадиганларни жиним севмайди-да, — деди андак зарда билан. — Сиз ўзингизга Шукур аканинг кўзи билан каранг-да, хола. Ўшандаги кимлигингиз аён бўлади-колади.

— Гапирма шуни! — Мадина холанинг энсаси қотди. — Ўндан кўра дўхтир-пўхтирга кўрсатинглар уни. Эсини бутунлай еб кўйибди. Икки сафардан бери алланималар деб тўнғирлайвериб роса жонимга тегди. Айтиб кўй, яна келса манову темир билан нақ манглайига тушираман. Ўн саккиз яшар қиз боламидимки, менга хушомад қилади.

— Яхши кўрса нима қилсин, хола, — деди Мурод оғир сўлиш олган киши бўлиб. — Шул ёшида кўнглига муҳаббат уя курибди-да. Бу учун у айборд эмас-ку. Сал яхши гапирсангиз асакангиз кетмасди. Ана энди, фалончи холангиз менга кун йўқ деб, бошини вагонларга дук-дук уриб юрибди.

— Жинними у?! — Мадина холанинг ғаши келиб, кош чимириди. — Нега бошини уради?

— Севаман деса, йўқ дебсиз-ку.

— Ё тавба! — холанинг ўнг панжаси беихтиёр ёқасига тирмашди. — Ҳали бу тухматиям бормиди. Ана хотининг келаялти деса, юраги шиф этади-ю, суймокни ким кўйибди у кишимга.

— Биласиз, меҳрга зор одам у, — Мурод ўзи сезмаган ҳолда қизиша бошлади. — Сиздан ош-нон эмас, озгина меҳр талаб қилаялти, холос. Наҳотки, арзимас шу нарсаниям бериш кўлингиздан келмаса! Бунчалик ҳам тошбагир бўлманг-да хола!

— Гапларинг қизик-ку, — Мадина хола энди унга қизикиш билан тикилди. — Хотинли одамга меҳр не даркор.

— Хотинли одам ўзга аёл меҳридан дариф тутилсин, деган коида каерда бор? Озгина кўнглига қарасангиз, бирор ерингиз камайиб қолмасди, хола.

Йигитнинг замзамаси холага хиёл эриш туюлса-да, нафс балосига бўйсиниб, аччик сўздан тилини тийди: «Боласи тушмагур консерва-пансерва ўмарганга ўхшайди, бўлмаса тилига бунчалик эрк бермасди». У ўшшайиб тингламоқда давом этди.

— Инсон меҳру муҳаббат билангина тирик! — дея

гапида давом этди Мурод, жўшкин бир тарзда. — Мухаббат кишини қингайишдан, қийшайишдан, ҳатто кексаликдан асрайди. Немис шоири Гёте етмиш ёшида ошиқ бўлганида, нега энди Шукур aka севмаслиги керак? Айби — ишчилигими? Ахир у ҳам одам-ку. Мухаббат касб танламайди, холагинам. Тирик вужудни бир забт этдими, тамом, одамни ё бор килади, ё йўк.

Бу хил гапларни умрида эшитмаган хола «консервани» пақкос унугиб, анқайиб қолди. Нимадир демоқчи бўлди-ю, лекин кучи лабларини базўр қимирлатишгагина етди. Бу пайтда Мурод, одатдагидек, ўзи ўйлаб чиқарган уйдирмаларга ўзи ишониб, ҳаяжонга туша бошлаганди.

— У киши сизга ёпишиб олиш ниятида эмас, — деди бурчакдаги курсига чўкиб. — Ширин калому, озгина ишвангиз етиб ортади. Аслида шу билангина тирик у. Ҳар куни сизни бир кўрмаса, тўрvasини йўқотган девонадай гарангсиб қолади. Агар сиз бирон кун кўринмай қолинг, руҳи чўкиб, шалвираб, одам қаторидан чиқади-қўяди. — Мурод сигарет тутатиб унга бармоқ ўқталди: — Мабода у киши ўзига бир нима қип кўйса, кейин кўрасиз мендан! Бошингиз билан жавоб берасиз!

Галати бу таҳдиддан Мадина хола хушёр тортди.

— Нега мен жавоб беришим керак? — деди босинкираб уйғонган кишидай довдираб.

— Чунки нима қилса сизни деб қилади-да!

— Нега энди мени деб қиларкан?

— Негаки сизни яхши кўради у!

— Ё тавба!

— Нима, сизни дея фирт девона бўлиб турганидан хабарингиз йўқми? Гаплариям ғалати-ғалати. Бугун ўзимни ўлдираман деб роса тўполон қилди, аранг тутиб қолдик.

— Мени деб-а?

— Гапига караганда ёшлиқ чоғида каттиқ севган экан сизни. Орада бир оз совуган ҳам экан. Яқинда ўша севгиси қайта қўзғалибди. Бирор бу сафаргиси жуда бошқача эмиш, ҳеч нима кўзига кўринмаётган экан.

Мадина хола ёқасини маҳкам тутганча, унга синов-чан тикилди. Йўқ, йигит алдамаётган эди. Чехраси нимоятда ташвишманд, анчагина ҳаяжонда эди у.

Ҳаётда мухаббат деган нарса борлигини аллақачон унутган аёлнинг қалби беихтиёр секин-аста жунбушга кела бошлиди. Юрагини ҳаяжон чулғаб, ёноқларига қизиллик югурди. Қизлигидаги ҳаётининг асосий мазмунини ташкил этиб, кейинчалик турмуш ташвишлари-ю, боқибекам эрининг бепарволиклари таъсирида иззиз йўқолиб кетган мухаббатга ташниалик хисси астагина ӯзини билдиримоққа тушди. Кўксининг тўр-тўридан ширин бир хўрсиниш юзага қалқиб чиқди: «Эх-х, кимдир сени яхши кўрса, қандай яхши!»

Айни шу нарса барча аёллар қатори унинг азалий орзуси эди. Ёшлигидаги бу нарсага эришгандай бўлувди. Назаридаги, бахтининг чеки-чегараси йўқдай эди. Ағсуски, дастлаб еру кўкка ишонмайдиган эри кейинчалик унга оддий бир буюмга қарагандай боқадиган бўлди. Илк кониқмасликни ўшанда ҳис этганди. Мухаббатга ҳамиша ташна кўнгилда ғалаён юзага келганди. Аммо бу ғалаён иккисини икки кирғокқа итқитдики, асло бақамти келтиролмади. Натижада, қалбидаги ҳаяжон ўрнини зарда, меҳр ўрнини эса совуқконлик эгаллади. Елғизлигини ҳис этиб, бутун меҳрини болаларига тўқди. Бироқ бошда она сифатида эъзозлаган қизлари эндиликда унга бир дастёр сифатида қарашади, муносабатлари ҳам шунга яраша. Оқибатда, бора-бора у хиссиз, туйғусиз машинага айланганди. Ишни билади, кундаклик ташвишни билади, шундан ўзгаси қизиқтирмасти уни.

Муроднинг даъволари туфайли мудрок туйғулари қайта уйғонганди. Шунга қарамай, хануз кўнглидан шубха аримай турарди: ишонай деса, бу хил гапларни қизлигидаям эшитмаган, унинг учун ҳали хеч ким ӯзини ўлдираман демаган. Ишонмай деса, Муроднинг турқ-таровати шу қадар жиддий эдики, Шукур акаси учун ташвиш чекаётгани бутун қиёфасидан шундоққина сезилиб турарди. Боз устига, Шукур аканинг кейинги кунлардаги қиликлариям жуда ғалати, иситмаси бор одамдай, алланимани уқтироға уриниб келмоқда эди.

— Шукур ака жуда қийналиб кетди, — деди Мурод унинг хаёлидан нелар кечганини сезгандай. — Сиздан ўзини совутмок учун йўқ ердаги ишларни қип юрибди. Лекин фойдаси бўлмаялти, сиздан зигирча совумаяпти. Кейинги пайтда анчагина телбаланиб қолган. Яна билмадим. Балки менга шундай туюлаётгандир.

— Рост-рост, — Мадина холанинг овози андак титраб чиқди. Хийла телбасифат бўп қолган. Икки сафардан бери довдир-совдир гаплар қип кетаяпти. Ўзимам ўйладим-а, нима жин чалди бу тентакни деб. Демак, гап бу ёқда экан-да.

— У киши айтгандирки, — деди Мурод айтаётган гапига чиппа-чин ишонган ҳолда. — Мен учун иккита қуёш бор, бири осмонда, бири ерда, яъни у — сиз. Ердаги қуёш сўнган куни, мабода сиз ўлиб-нетиб қолсангиз, ўзимни поезднинг тагига ташлайман деди. Мадина холангсиз хаёт хаёт эмас, деганини мана шу кулокларим билан эшитдим.

— Чиндан шундай дедими? — Мадина холанинг овози бу гал қалтираб кетди.

— Бу борада алдаб бўлмайди, хола, — Мурод тумтайган кўйи сигаретни чукур тортди. — Гапнинг сирасини айтганда, бир жихатдан тўғриям қиласан. Севгилингдан сўнг нима қиласан яшаб.

— Ундай дема, — Мадина хола шошиб эътиroz билдириди. — Бориб айт, унақа тентак ўйларга бормасин.

— Ўзингиз яхши биласиз, Шукур ака баҳтсиз одам,— Мурод ўзини эшитмаганга олиб, гапида давом этди. — Ёлғиз, жуда ёлғиз одам у. У ёқда ўғли бир тийинга олмайди, бу ёқда хотини рангини чиқармайди. Унинг бирдан-бир илинжи сиз. Сиз борки, у тебраниб юрибди, эмасам, аллақачон ўлиб кетган бўлармиди.

Мурод гап билан бўлиб, сигарет кулини тўғридан-тўғри полга ташлади. Озодаликни ўлгудек яхши кўрадиган Мадина хола унинг бу қилигини сезмади. Ўзи билан ўзи бўлиб ўтиради у. Миясида илгари ҳеч айланмаган фикрлар чарх урмоқда эди: «Бундай олганда, Шукургина эмас, ўзим хам ёлғизман-ку. Кунлар фир-фир ўтаяпти, лекин мен ҳеч бир кувончли илинжни кўрмаяпман. Иш ва ташвишдан бўлак нарсанинг

Эзи йўқ. Тўғри, бир қарашда ёлғиз эмасман, қизларим ва невараларим бор. Аслида эса жуда яккаман. Ҳатто катта кизим ҳам тушунмайди мени, бир дастёр сифатида карайди. Кичигига эса гап йўқ. Унинг учун мен казноқман, ҳар балоларни тикиштираверадиган. Факат финг демаслигим керак. Финг дедимми, тамом, унда бизни туғиб нима қиласдингиз, шартта оғзимга уришади. Энди ўйлаб карасам, бола эмас, нуқул ташвиш туқкан эканман. Ташвишлар ичидаги ўралашиб, баъзан инсон эканлигингни ҳам унтиб кўяркансан киши. Фиринг деган одамга итдай ташланаман. Чунки кўнглимда нур йўқ, илинж йўқ, кўзимга одамлар жиндан ёмон кўринади. Аслида ўзим ёмонман, жуда ёмонман. Бўлмаса, Шукур бечорада нима айб, тузукроқ сўраб-сурештирасдан итдай талаб ўтирибман. Шўрлик бир оғизгина ширин сўзга зор бўлиб келаркан. Мен эса... Этимни нимталайдиган хотинман-да ўзимам...»

Бу орада Мурод сигаретини чекиб бўлди-да, қолдини ташкарига улоқтириб, унга юзланди. Мадина хола букчайиброқ ҳамон хаёлга ботиб ўтиради.

— Тёгсин менга демайман, лоақал чап кўзи билан яхши кўриб, тўрттагина ширин сўзини аямаса бўлди,— дедилар у киши, — Мурод холанинг ҳолатини синчков кузатаркан, ўз навбатида, қуюшкондан чиқиб кетганини фавқулодда фахмлаб қолиб, ичидаги жиндек изза ҳам тортиди. Аммо бу нарса кейинги «уидирма»ларига зигирича халақит бермади. Калта йўталиб ишонч билан таъкидлади. — Шугинанинг ўзи етиб ортади у одамга! Кувонч кўрмаган одамга озгинасиям етади-да!

Мадина хола индамади. Мижжалари қизарган кўзларини ердан узиб дераза томонга хаёлчан термиларкан, кафтини пешонасига босиб, беихтиёр бошини чайқади.

— Эҳ, мен тентак! — деди сўнг нолакор оҳангда.— Вой, мен аҳмоқ! Шундай одамни ўкситиб ўтирибман-да! Мен уни маст деб ўйлабман! Мазах қилаяпти деган хаёлга борибман!

Бу хил нолани кутмаган Мурод шошиб қолди. Нима қиласини билмай бир муддат гарангсиб турдида, сўнг стаканга сув кўйиб узатди.

— Сувдан ичинг енгил тортасиз.

— Енгил тортмай ўлай! — Мадина хола сувдан хўплаб, йигитга қаради. — Хозир қаерда у?

— Душда. Чўмилаяпти, — Мурод кайтиб жойига ўтириди. — Тайхардай ерга ағанаб йиғлагандан сўнг чўмилади-да.

— Бечора! — Мадина холанинг юраги ачишиб кетди. — Ерга ағанаб нима қиласди, а?!

— Унинг каби суйганингизда ерга ағанаб эмас, тупроққа беланиб йиғлардингиз.

Мадина хола бу даъво қаршисида чурқ этолмади. Куёви аразлаб кетганида, кичкина қизининг пол тирнаб йиғлаганини эслаб, бот хомушланди.

— Шўрлик... жудаям хафадир-а? — деди кейин хўрсиниб.

— Бир оз ўзига келган, — деди Мурод. — Туртиб туртиб анча тинчлантириб кўйганман.

— Нега туртдинг? — Мадина холанинг қошлари чимирилиб, унга норози тикилди. — Бечора баҳтсиз бир одам бўлса, яна сен уни туртсанг! Нега туртасан! Кўлларингга қара, ҳар бири белкуракдай-белкуракдай, туртканинг урганингдан баттар.

— Урмадим, хола. Туртдим.

— Туртма бундан кейин! — деди хола жиддий. — Нима жони бор унинг, туртма!

— Йиғламасин, эди, — Мурод хиёл жаҳлланган бўлди. — Суйиб қолдим деб ерга ағанаб йиғлаверадими киши. Шахсан мен ҳеч йиғламасдим.

— Сенда юрак йўқ-да, шунинг-чун йиғламайсан.

— Лекин сизга ҳавасим келаяпти.

— Нега?

— Бир одам сизни йиғлаш даражасида яхши кўради-да.

Мадина хола қизариниб, чехрасига мамнунлик ифодаси қалқиди.

— Қизлигингида хам сизни бирор бу қадар севмаган бўлса керак, а?

— Қайдам, — Мадина холанинг ишга ўргангандан қўллари стол бўйлаб изғиди. Бу ҳаракатида мамнунликдан ташқари ҳаяжон хам яширин эди.

— Сиз эса уни ҳайдаб ўтирибсиз! — Муроднинг овозига тағин идлао инди.

- Энди ҳайдамайман!
- Уришиб ўтирибгиз.
- Энди уришмайман! — Мадина холанинг овози янада майин тортди.
- Шундай қилинг, хола, — Мурод уни маъқуллади. — Бечорада нима айб.
- Шундай қиласман энди, — Мадина холанинг овозида хаяжон кўпчиди. — Аввал... аввал билмасдим-да мен уни!

Шу пайт кўчада бригада йигитлари пайдо бўлди. Улар орасида Шукур aka ҳам бор эди. У атрофга аланглаб кимнидир қидирарди. Мурод у ўзини қидирайтганини фаҳмлаб, деразадан четга сурилиброк ўтириди. Бу орада Шукур aka йигитлар билан ниманидир келишиб олди-да, сўнг ўрдак юриш қилиб, уларнинг олдига тушди. Кетаётиб, уйча томонга қараб-қараб қўйди. Кейин яна қаради, яна ва яна қаради.

Мурод холанинг диққатини ўша томонга тортди.

— Қаранг, хола. Шукур aka қараб-қараб кетаяпти.

Мадина хола деразага бурун тиради. Шукур aka-нинг ортига аланглаб кетаётганини кўриб, хаяжондан нафас олишигача ўзгариб кетди.

— Энди ишондингизми? — Мурод ошкора тантана килди. — Бунисига нима дейсиз энди?!

Шу дам эшиқдан сменадош кампир пайдо бўлиб, кексаларга хос заиф охангда салом берди. Аммо унга жавоб берувчи бўлмади. Саломи ҳавода муаллақ қолган кампирнинг сал жаҳли чиқинкиради.

— Нима гап? — деди уринган сумкасини бўш ўриндиқлардан бирига қўя туриб. — Пашибадайн деразага ёпишиб қопсанлар.

Яна жимлик. Кампир норозиланиб минғирлашга тушди. Мадина хола деразадан ўгирилмаган кўйи зарда ила қўл силтади.

— Бирпас минғирламай туринг!

Кампир қизиқсиниб, уларнинг тепасига борди. Эгilib деразадан ташқарига мўралади. Йўлакда қўлтиқлашиб келаётган қиз билан йигитни кўриб, ҳафсаласи пир бўлди.

— Фу-у, нимаси томоша экан буларнинг? Нимаякан деб ўйлабман.

Кўп ўтмай Шукур ака гурухи оқшом пардаси остида кўздан йўқолди. Мадина хола-лерараздан кетмай, бир муддат хаёлга ботиб ўтиради.

\* \* \*

Мурод тунги сменага сал кечикиб келди. Шукур ака кўринмас, бошқалар, одатдагидек, ховлида чойлашиб ўтиради.

У Шукур акани ичкаридан топди. Шукур ака кийим ечиладиган жавон қаршисида қаққайганча, шапалоқдай синик кўзгуга ўзини солмокда эди. Муродга кўзи тушгач, оғзи қулогига етиб, уни ёнига имлади. Эгнидаги оппоқ кўйлакка ишора қилиб деди:

— Қалай?

— Зўр, — деди Мурод хеч нарсага тушунмай.

Шукур ака мамнун томоқ қириб, кўзгуга бокқанча калта кирқилган сочини таради. Кейин кепкасини авайлаб бошига кўндириди. Кўзгуни ўзидан узоқлатиб, айтибашарасини обдан кўздан кечираркан, хийла ўзгарган овозда сўради:

— Фурашкам жойидами? Ё сал кийшайтириб кияйми? Сочимнинг чиқиб туриши қалай?

— Мана бундай кийсангиз дурустроқ, — деди Мурод, хануз хеч нарсага тушунмай, шунчаки йўлига унинг кепкасини тўғрилаб қўяркан. — Мана шундай. О-о, жуда ярашди лекин.

— Шимим қалай, шимим? — Шукур ака goх ўнга, goх сўлга ўгирилиб, ўзини намойиш қилди. — Кенг эмасми? Қопга ўхшаб ҳалпиллаб тургани йўқми?

— Шим-ку жойида-я, — Мурод шўхлиги тутиб, унинг қорнига нуқиди. — Лекин мановуни нима қиласиз? Дўппайиб чиқиб туриби-ку.

— Буни энди йўқотиб бўлмайди, — Шукур ака қорнини ичига тортди. Сал каттароқ-да сабил.

— Дарвоқе, қорнингизни ўзи бир хусн, — деди Мурод кулиб. — Коринсиз аллакимларга ўхшаб қоласиз.

Шукур ака қорнини кўйиб юборди.

— Аввалроқ шундай демайсанми, — деди шодланаброқ. — Сагал кичрайсинга деб эрталаблари раз-два кип юрибман-а. Назаримда, сал кичрайгандай.

— Менга ҳам шундай туюлаяпти.

Шукур ака бўйини эгиб, қорнига синчков разм солди. Кўли билан пайпаслаб кўрди.

— Барибир... қорин бемаъни нарса, — деди сўнг.

— Лекин сизга ярашади, — деди Мурод унинг кўнгли учун. — Сиздаги комат ҳеч кимда йўқ.

— Мақтама, кўзинг тегади, — Шукур ака яна ўзини ойнага солди. — Сен йигитларни бошлаб сопол заводига боравер. Икки вагон қувур юклашимиз керак экан. Мен ортларингдан етиб бораман.

— Сизга йўл бўлсин?

— Учрашувга.

— А! — Мурод қулокларига ишонмади.

— Айтмадимми ҳали сенга?

— Йўқ.

— Боя келаётсам... — Шукур ака атрофга ҳадиксираб қараб кўйди. — Мадина эшиги олдида турган экан, қизил-сариқ байроқчаларини кўлида тутиб. Мени кўриб иршайди. Иршайиб, чой ичишга кел, Шукур, деди. Овози бирам майнин, бирам майнин. Ўн саккиз яшар қиз боланинг овози дейсан! Мен, хўп, дедим, ҳозир келаман, дедим. — У уст-бошига яна бир қур назар ташлади. — Эсиз, янги костюм- shimimni kiyib келсан бўларкан. Иршайишини қаердан билай. Лекин буям ёмон эмас-а? Shimim сал чатокрок-да. Кеннойингга минг марта айтганман, shimimni dazmollab бергин деб, қайдам эшитгиси ҳам келмайди, сени бирор куёв килармиди дейди...

— Демак, ҳозир ўша ёқقا?

Шукур ака бош иргаб, тасдиқ ишорасини билдири-да, сўнг оғзингдан гуллаб юрма, деган маънода бармоғини лабига босди. Кейин кафтидаги кўзгуни ўзидан узоқлатиб, афтини яна бир карра кўздан кечириди. Кепкасини тўғрилаган бўлди. Сўнгра мамнун томоқ кира-қира, эшикка йўналди.

Салдан сўнг Мурод унинг изидан юрди. Вокеанинг тафсилоти билан ниҳоятда қизиқмоқда эди. Бахтига йигитлар чойхўрликни йифиштириб, айвонга ўтишган экан, ҳовлида ҳеч кимга тўқнаш келмади. Очик деразадан Ўнар найновнинг овози эшитилар, чамаси, телефон орқали ким биландир жанжаллашмоқда эди.

У оёқ учида юриб муюлишга етганда, Шукур ака ичкаридан нур ёғилиб турган уйча эшигига рўпарў бўлганди. У қаддини эгиб, остона ҳатлаши билан Мурод оёгини қўлига олди. Дераза ортига бикиниб, секин ичкарига мўралади. Одатдаги жойида ўтирган Мадина холанинг эгнида янги кўйлакни кўриб, кулиб қўйди.

Деразадан Шукур ака кўринмасди. Лекин депсиниб оёқ суртиши баралла эшитилиб турарди.

Мурод холага дикқат қилди. Дикқат қилди-ю, ҳайратдан оғзи ланг очилиб қолди. Аввал сезмаган экан, Мадина хола бутунлай ўзгариб кетганди. Чехрасидан азалий дилгирлик ва тажанглик ариган, яноқларӣ қизариб, ялтираб турарди. Кўзларидан шундай бир нур жилоланаардики, унинг аслида бақироқ ва серзарда аёллигига одамнинг ишонгиси келмасди. Мадина хола хозирги туриши ва холатида ўзи тенги ҳар қандай эркакнинг юрагига ўт ёқа оларди. Худди шуни тасдиқридан майин сўзлар тизими сирғалиб чиқди:

— Артмай-суртмай киравер, Шукур!

— Сурт... суртмай кириб бўлмайди-да, Мадина-хон, — Шукур аканинг овози униқидан-да майин чиқди. — Полни расво қиласиз-да.

— Қўявер, — деди Мадина хола ўша оҳангда. — Расво бўлса, суртилар. Кир, ўтири.

— Уринмагин дейман-да, — Шукур аканинг овози яна майин торти.

— Қийналиб кетдинг, Шукур!

— Ҳозир-ҳозир. Мана бўлди.

— Вой, у ёқка ўтирма, мана бу ёқка ўт, — Мадина хола деразага қарши томондаги ўринидик устини кафти билан сурти. — Шимингни расво қиласан. Мен йўғимда кимлар кирмайди бу ерга. Веранинг Сашкаси мой юки шими билан киравериб, ҳаммаёқни расво қип ташлайди. Верага неча марта тайинладим, слесарингга айт, мой юки шими билан киравермасин деб. Қайдам, гап у қулоғидан кириб, бу қулоғидан чиқиб кетади.

— Кишида фаросат бўлмаса қийин-да, — Шукур ака муштумига йўталди.

— Шуни айт.

- Шукур ака у кўрсатган ўриндиққа чўкиб, елпинди.
- Бугун... кун жуда дим-а.
- Дим, жуда дим.
- Айниқса, кундузи ёмо-он дим бўлди.
- Куйдикى куйди...
- Кундузги сменадагилар қандай чидашиб экан? —

Шукур ака кўйлаги тұгмаларидан бирини ечиб, кўксига пуллади. — Ҳойнахой, вагон тагига уриб кетишган бўлса керак ҳаммаси.

- Бу ёз жуда иссиқ келди.
- Ҳа, жуда иссиқ келди.
- Терлаб кетибсан, фурашкангни ечиб қўй, Шукур.
- Йўқ, унча иссиқ эмас, — Шукур аканинг кепкасига чўзилган қўли тез пастга тушди. — Ўрганиб қолганман.

— Сменага келсам, — деди шикоятомуз Мадина хола, — Веранинг Сашкаси бир оғайниси билан ичиб ўтирибди. Кийимиға қараб бўлмайди. Мозутга ботиб чиққандай. Гапирсам, тепловознинг ремонтини тугатдик, шуни юваяпмиз, дейди. Верани ёмон уришиб ташладим. Стулларни киртишлаб артмасанг, сменани қабул қилмайман дедим.

- Артдими?
- Артди.
- Сашка ёмон бола эмас лекин.
- Кўп ичади.
- Ҳа, шу феъли бор. Лекин ўзи ёмон эмас.
- Лекин Верани ёмон уришдим.
- Тўғри қипсан.
- Сашкяям хафа бўлди.
- Хафа бўлса, ундан нари, — Шукур ака ўз эгнига мамнун қараб қўйди. — Кир шим билан кирмасин эди.
- Шуни тушунмайди-да.
- Сен тушунтир-да.
- Тушунтирдим.
- Яхши қипсан.

Бир муддат жим қолдилар. Шукур ака сездирмай, бармоги билан пешона төрларини сидириб ташлади. Кўз кирида холага қараб-қараб қўйди. Ўша қарашларнинг бирида нигоҳлар тўқнашиб, қизаришиб ерга бо-

кишиди. Шукур ака оёғидаги туфлисини томоша қилган бўлди. Мадина холанинг туфлиси эскироқ экан, оёқларини оҳиста стул тагига тортиди. Шукур ака ўзини сизмаганга олди. Шу пайт Мадина хола паст овозда кичқириб юборди.

— Вой!

— Ҳа! — Шукур ака чўчиб тушди.

— Вой, мен тентак!

— Нима бўлди? — Шукур ака ўрнидан даст туриб кетди.

— Чой ичамиз демабман-а сенга, — эрмак топилганига хурсанд бўлгандай, Мадина хола чаққон ҳаракатланиб, чойни қайтаришга киришди. — Эсим курсин, совутиб кўяй дебман-а. Келишингдан сал бурун дамлагандим.

— Бизга... совуғиям бўлаверади.

— Сенга совуғини бериб ўлибманми, Шукур, — Мадина хола унга меҳр ва ғамза аралаш тикилди. — Қайноқ чойга нима етсин. Қара, қайноққина турибди. Ёлқич яхши нарса-да, иссиққина сақлайди.

Шукур ака ўтирган жойида хиёл этилиб, чойнак устидаги ёпқични тутиб кўрди.

— Лекин... жуда фаросатли аёлсан-да, Мадина!

— Одамни уялтирма, Шукур!

— Бошингдан сув ўгириб ичса арзийди!

— Шукур... — Мадина хола уялинқираб бошини эгди.

Аёлнинг бу қилиғи хуш ёқиб, Шукур аканинг кўзлари ғалати чақнаб кетди. Яхши гапириб, унинг кўнглини шодлантиргиси келди. Аммо тилига тузукроқ гап келмай, қийналарди.

Бу орада Мадина хола стаканга қуюқ қирмизи ранг чой қуя бошлади. Шукур ака, ток ургандай, унинг қўлига ёпишди.

— Ўзим... ўзим қуяман.

— Қўйсанг-чи, Шукур! — Мадина хола унинг қўлини оҳиста четлатди. — Ўзим хизмат қиласман сенга! Мураббодан қанча солай?

Бу гапдан Шукур ака қаттиқ ҳаяжонланиб кетди. Тор кўкси қўтарилиб-қўтарилиб тушаркан, қорни бил-киллаб кетди.

— Икки... икки кошиқ етади, — деди овози тўлқинланиб.

— Чойни нимтатир ичма, Шукур. — Мадина хола тўрт кошиқ мураббо солди. — Озгина колбаса опке-лувдим, ейсанми?

Бу қадар меҳрибонликни кутмаган Шукур ака, ҳаяжондан ўзига келгунча бўлмай, стол устида нон ва колбаса пайдо бўлди. Салдан сўнг улар қаватидан помидор билан бодринг жой олди.

— Ҳойнахой, Шукур оч келар деб опке-лувдим.

— Бекорга овора бўпсан-да, Мадина! — деди Шукур ака алланечук йигфламсираган оҳангда. — Келаётуб, мошхўрда ичувдим.

— Мошхўрданг коптими, — Мадина хола егуликларни у томон сурди. — Ол, тортина.

— Э! — Шукур ака титроқ бармоқлари орасидаги стаканни столга қўйди. — Менам сенга у-бу нарса опкевдим. Сал копти-я, эсимдан чикишига, — у копдек чўнтағидан сиким-сиқим мағиз ва конфет олиб, столга тўка бошлади. Иккинчи чўнтағидан дўконларда камдан-кам кўринадиган бир жуфт шоколад чиқарди: — Егин буларни, — деди сўнг ўта ғамхўрлик оҳанггида. — Тоза ишқалат, кувват бўлади.

— Вой, раҳмат! — Шукур акадаги кучли ҳаяжон энди Мадина холага ўтди. — Роса қиммат-ку була-ринг. Нима қиласардинг, овора бўлиб.

— Нимаси қиммат, — Шукур ака чойдан бир хўплаб стаканни қайтиб жойига қўйди. — Сен учун хеч нарса қиммат эмас!

— Сенам егин, Шукур, — Мадина хола шоколадлардан бирини очиб, ярмини унга илинди. — Юк кўтарадиган одамсан, кувват сенга керак!

— Сен есанг, мен егандайман! — Шукур ака аёлнинг билагини секин итариаркан, бирдан титраб кетди. Кафти беихтиёр билак бўйлаб сирала бошлади. — Сен есанг...

Мадина хола бир лахзага ҳушёр тортди-ю, сўнг худди Шукур акани хафа килиб кўйишдан чўчиғандай, кўзларини пастга олди.

— Кўй, Шукур! — деди пицирлаб. — Уят бўлади!

Шукур ака кўлинни тортмади, тўғрироғи, тортиб

ололмади. Бармоқлари билакдаги чўзиқ чандик устида ўралашиб қолди.

— Нима бу? — деди томоғи куруқшаб. — Нима килган?

— Ўтган хафта шлагбаумнинг сими тилиб кетганди.

— Эҳтиёт бўлгин-да, Мадина! — Шукур ака чандик устини оҳиста силади. Азоб бермадими, ишқилиб?

— Йўқ, — Мадина холанинг овози товланиб чиқди.

— Эҳтиёт бўлиш керак! — Шукур ака чаңдик устини силаб-сийпашда давом этди. — Бундан кейин эҳтиёт бўлгин, хўпми?

— Хўп! — Аёл билагини беозоргина бўшатди. — Қўй, уят бўлади, Шукур! Ишга борадиган одамсан, тамадди қилиб ол. Вой, чойингниям совутибсан-ку. Стаканни бер, янгилақ берай.

— Эҳ-ҳ, Мадина, Мадина! — Шукур аканинг овози бирдан тўлқин-тўлқин уриб чиқа бошлади. — Шундай меҳрибон аёл шундоккина ёнимда юрган экану, билмаганимни қара-я! Эҳ-ҳ, Мадина! Агар ўшандада уриб бoshimni ёрганингда, уйланган бўлардим сенга! Бунақа кийналиб ҳам юрмасдим!

— Айб ўзингдан ўтган, Шукур, — деди Мадина хола ачинган оҳангда. — Ҳеч гапдан, ҳеч гап йўқ, қўл чўзгансан-да менга.

— Ахмок бўлганман-да, ахмок! — Шукур ака бўш кўли билан пешонасига нуқиди. — Манову калла ишламаган-да!

— Қўй, ўтган ишни ўйлаб куйинма, Шукур!

— Куйинмай бўладими, — Шукур ака манглайига тарсиллатиб бир туширди. — Билмасдан баҳтимни учириб қўйганман-да! Мана шуниси алам қиласяпти-да менга!

— Бўлди. Ҳадеб куюнаверма.

— Эҳ-ҳ, Мадина!

— Овқатингни егин, Шукур, — Мадина хола колбаса бўлакларини икки нон ўртасига жойлаб узатди. — Корнинг оч кетмасин, еб олгин!

— Ейман, — Шукур ака унинг кўлидагини авайлаб олди. — Сен берган нарсанинг хаммасини ейман!

— Егин, жоним! — Мадина хола шўндаи деркан дув қизариб кетди. — Вой... Одамни жинни қиласан-а, Шукур!

— А! — Шукур ака бир қалқиб тушди. — Нима дединг?! «Жоним» дедингми? Яна бир қайтар! Биргина қайтар!

Шу пайт бекат томондан Абдулланинг бўғиқ овози эшитилди.

— Шуку-ур!

Мурод оёқ учида бекат томон учди. Ярим йўлга етмай, яна чакирув овози эшитилди. У ғазаби қайнаган холда бригадирга рўпарў бўлди.

— Ўчир овозингни! — деди шипшиб, Абдуллани бўғиб ташлагудек бир важоҳатда. — Оч қолган бузоқдай намунча бўкирасиз! Соламан айлантириб! Жим!

— Шукур қани? — Абдулла гоҳ сенлаб, гоҳ сизлаб, ўзича бўғилаётган йигитдан ҳайиқиб, беихтиёр ортга тисланди. — Ишга бормаймизми ахир?

— Ишга? Ҳа-ҳа, ҳамма ишга! — Мурод жаҳд ва жаҳл билан аввал Абдуллани, сўнг Колянинг билагидан, Ринатни кўкси билан итарди: — Ишга! Ҳамма ишга!

Фавқулодда нимадир содир бўлганини ҳамма англали. Аммо нима? Бунга жавоб топмоқ умидида ортга қарашга ултурғанлар Муроднинг каршилигига дуч келмоқда эди.

— Ишга! Ҳамма ишга!

— Нима юз берди, экан?

Нима содир бўлганини факат Муродгина биларди. Мўъжазгина бу бекатда ўзига хос ажиб бир мўъжиза юз берганди. Унинг назарида, бунга ҳалақит бермоққа ҳеч кимнинг хаққи йўқ эди.

— Ортга қаралмасин! — Муроднинг овози паст ва шиддатли, шунингдек, жуда қаҳрли эди. — Ҳамма ишга! Ортга қаралмасин! Қаралмасин ортга! Ишга! Ҳамма ишга!

Бриғада гўё ёв кувгандай, темир йўл бўйлаб узоқдаги сопол заводи томон жадал кетиб борар, ортда эса эшик ва деразасидан ўткир ёғду тараалган оппок уйча симёғочдаги чироқ нуридан оқариб туради. Дим сукунатни дам-бадам Муроднинг овозигина бузарди.

— Ишга! Ишга!

## ЧАНГАЛЗОР ИТИ

Қоравой туғилиб ўсган чакалакзор катта кирнинг этагида, Тошлисойнинг қуий ўзанида жойлашган. Энг яқин қишлоқ тўрт чакирим нарида, паст-баланд тепаликлардан иборат кенг дашт ажратиб туради уни. Тошлисой кўклам кезларидағина тўлиб-тошиб оқади. Айрим ҳоллардагина ёзниг ўрталаригача сув жилдираб туришини демаса, қолган пайт қуриб-қакшаб ётади. Шу боиским, сой, шунингдек, чакалакзор эътибордан холи — одамзод камдан-кам қадам босади бу ерга. Ахён-ахёнда бирор қишлоқ подаси яқин келмаса, бўлак вақт чангальзордаги жон ахлининг тинчлигига ўзга бирор дахл қилмайди.

Қоравойнинг кўз очиб, илк кўрган новдалари бирбирига чирмашган девордай қалин буталар бўлди. Буталар тагидан ўтган йилги хас-хашаклар мўралаб турар, муздек намхуш хавода шувоқ исига қоришиқ заҳхиди анқир, ўлик офтоб нурига кўмилган чакалакзор ўта адоксиздек таассурот уйготарди. Аслида ҳам чангальзор кичкина эмас, отда теваракланганда, ярим соатлик майдонда ястаниб ётарди. Қоравой ушбу чангальзорнинг қок ўртасидаги сайхонликларнинг бирида дунёга келганди. Мўъжаз бу майдон дастлаб унга кенг олам туюлганди. Оёқлагунча ялангликнинг поёнига етиш оғирдек эди. Чексиз даштга тушиб қолгандек хис этарди ўзини. Эсини танигач, бундай қарасаки, поёнсиз туюлган сайхонлик жуда тор у ёғи ўн-бу ёғи ўн беш одим, ўртада чоғроқкина камар. Камарга у бирор хавф сезсагина бикинади. Бошқа пайт кунини ялангликда ўtkазади. Орада дайдиш истаги жўш уриб, буталар оралаб ҳам қолади. Калта ва нимжон оёқчалари илдизу хас-хашакларга илиниб, «дод»лаб дунёни бузади. Ўшандай тентишларнинг бирида чукурга тушиб колиб роса таъзирини ҳам еган. Онаси келиб кутқармагунча ёмғир суви тўла чукурда аянчли ангиллаб ётган.

Она ит — Олапар кундузлари қорасини кам кўрсатади. Кун узоги қорин ғамида аллақаерларда санқиб юарди-да, чангальзорга тунга яқин қайтади. Ёлғизини ялаб-юлқаб эмизади. Тонгда эса тўсатдан яна йўқ бўлиб қолади. Ёввойи жониворларга хос қўнимсизлик,

Жонсараклик унинг қон-қонига сингиб кетган, тундан ўзга вақт бир дақиқа ҳам тиним билмас, гоҳо эса тунлари ҳам дайдиб кетаверарди.

Аслида у ёввойи ит эмасди. Ёввойиликни ўғри феъли туфайли бир йил бурун касб этганди. Унгача яккатомлик Ҳайдар кўсанинг эшигини қўриқларди.

Ҳайдар кўса табиатан ўта бадфөйл одам эди. Олапарнинг ўғрилигини кечира олмади. Чала ғажилган товукни унинг тумшуғига нуқиб, бошда роға калтаклади. Шўрлик Олапар хафта деганда зўрга ўзига келди. Яна хафта, ўн кун ювунди ичиб, дармонга кирди. Дармонга киргач, тағин нафси ҳакалак отиб, қонли, илиқ гўшт истаб қолди-да, кўп ўйлаб турмай, ҳовлидаги товуклардан бирини тинчтди. Бу воқеадан сўнг Ҳайдар кўса уни ўлимга маҳкум этди. Аввал бошда Нодир мерғанникига милтиқ сўраб борди. Нодир мерған иримчи эди, куш отадиган яроқда ит отиб бўлмайди, овдан барака кетади, дея куролини бермади. Шундан кейин Ҳайдар кўса итни осиб ўлдиришга қарор қилди. Бу ишга пухта хозирлик кўриб, аччик данак ўрик шохига арқон ташлади. Сўнг айбордни судраб келиб, бўйнига сиртмоқ солди-да, бор кучи билан арконнинг бериги учидан тортмоқка тушди. Сиртмоқ томогини сиққач, Олапар ўлимнинг не даражада даҳшатли эканини бутун вужудида хис этди. Бўғилиб силкинди, тебранди. Бахтига арқон узилиб, ерга гурс этиб тушди. Ютоқиб нафақ оларкан, эгасига ёлвориб бокди. Аммо Ҳайдар кўсанинг кўзлари қонга тўлган, шафқат ҳисси бёгона эди унга. Эгасининг важохатидан ўлим муқаррарлигини англаған Олапарнинг юрагидаги кўрқув туйғуси ғазаб ва нафрат билан алмашинди. Яғринидаги туклари хурпайиб, аввалига андиша ила ириллади. Ҳайдар кўса эътиборсиз арқон учларини тугунлашда давом этди. Олапар хурди, тегсанг, тишлайман, деган оҳангда ғазабкор акиллади. Эгаси, кўзи ишда, ўчир овозингни дея, унинг тумшуғига ўхшатиб бир тепди. Олапар, худди шуни кутиб тургандек, кескин бир зант билан унга ташланди-да, Ҳайдар кўса сергаклангунча бўлмай, билагидан ғарч тишлаб олди. Кейин бўйнидаги арқон бўлагини судраганча даштга қочди. Шу қочишда чангальзорга бориб биқинди.

Чакалакзорни ў илгаридан яхши биларди. Унга яқинроқ жойдаги товуқхонадан ўмарган ўлжасини асосан ўша ерда саранжомларди. Ўғри итларга хос шумшуклик ва синчковлик билан бу яқин-атрофдаги пастбаландликларни аввалдан обдан ўрганиб чиққан — чангалзор энг баҳаловат масканларидан бири эди.

Ушбу воқеадан сўнг Ҳайдар кўса уни ортиқ қидириб ўтирумади. Олапар эса ҳовлига қайтиб оёқ босмади. Насибасини гоҳ осонлик, гоҳ қийинчилик билан териб юрди. Товуқхонадаги Бўрибосар билан иличишгандан кейин емиши хийла яхшиланди. Деярли ҳар тун фермадан товуқ ўмарап, пашша учса сезадиган Бўрибосар унга ғинг демасди.

Ҳаводан қишининг заҳри кетмай, у чангалзордаги камарда болалади. Боласи иккита эди. Бири кўз очмай ўлиб кетди. У бор меҳрини ёлғиз боласига бағишлади. Аммо уни яхши она деб бўлмасди. Феълидек, меҳри ҳам тутуриқсиз — гоҳо Қоравойни ер-кўкка ишонмаса, гоҳо уни бутунлай ёлғиз ташлаб кетар, бир оз тин олмоқ илинжида чакалакзорга қайтгандагина боласи эсига тушиб қоларди. Олапарда ёввойилик билан хонақилик қоришиқ — аросатдаги ит эди у. Шунинг-чун ҳам чангалзорни ноиложлиқдан танлаб, кейинчалик базур кўниккан бўлса, Қоравой эса онасидан фарқли ўлароқ, чангалзорни бутунлай ўзиники деб билди. Эсини танимаёт ундан ёввойилик майллари пайдо бўла бошлаганди. Одатда, инсонга қарам бўлмаган итларда ёввойилик тез шаклланади. Нега деганда, унинг томирларида аждодларининг ёввойи кони яшайди. Инсон билан ит бақамти яшай бошлаганига мана неча замонлар бўлибдики, орадан неча-нечча асрлар соядай сирғалиб ўтибдики, ёввойилик, унинг асосий хусусиятларидан бири саналмиш ёвқурлик ҳали-ҳануз уларни тарқ этмаган ва бу ҳол озгина эркинликданоқ юзага тепчий қолади. Қисқача айтгандা, эркинлик ёввойиликни ўзига тез сингдиради.

Олапар гоҳида Ҳайдар кўса хонадонини, чети қийшиқ ялоғини, тутун иси сингган ювиндини қўмсаб, ғингшиб қолади. Қоравойга эса бу нарсалар бутунлай ёт эди. У чангалзорни хамиша ватан деб билди. Кейинчалик уни бир неча бор каттиқ туриб химоя қилди.

**Аммо ҳозирча унинг ватани-сарҳади гилам кенглигидаги сайҳонлик билан чекланар, илк қизғаниш эса унда тұсатдан содир бўлганди.**

Бу вактга келиб Коравой хийла тийраклашиб қолган, ўт поялари ва очик илдизларга ёпишиб, тишлаб тортқилайдиган, юлқилайдиган, ириллайдиган одат чиқарганди. Ялангликка ола ҳакка келиб қўнгган куни у камар чеккасидаги илдиз билан овора эди. Ингичка овозда ириллаганича, илдизни юлқиларкан, бу сафар күшга айрича назар билан разм солди. Унинг бамайлихотир думини ликиллатиб юриши негадир ғашини келтирди. Ўзини ер эгаси, күшни бегона ҳис этди. Бамисоли қора коптоқдай думалаб, унга сари ташланди. Шундан кейин у ялангликка парранда зотини доритмай қўйди, баъзан эрмакка, баъзан эса чин маънода қизғаниб, уларни кувиб соладиган бўлди.

Орадан сал ўтиб, Коравой яна бир сирдан огоҳ бўлди. Сиртдан ўта сокин туюлган чангальзорда ҳёт бетиним қайнашини илғаб колди. Бу нарса юрагида қизиқиш уйғотиб, у чангальзорни синчков ўрганишга киришди. Буталар ораларкан, хилма-хил нотаниш хидларни пайқади. Учиб-қўниб юрган күшларни демаса, бу хид эгаларининг бирортасини ҳали учратмаган эди. Илк бор учратгани қўшни сайҳонлиқдаги ёввойи мalla мушук бўлди. Мушук ербагирлаб ўсган юлғун ёнида чўнқайиб, ўзига оро бериб ўтиради. Коравойни қўриб у пинагини бузмади. Коравой бир зум бошини у ён-бу ён буриб, унга тикилиб турди-да, сўнг олд панжаларини ерга ботириб, кетини эса кулгили тарзда дўнг килиб, ҳайрат аралаш шўхчан акиллади. Аммо мушук қилт этмади. Тарғил кўзлари оловланиб, без бўлиб тураверди. Таҳди迪 кор қилмагач, Коравой у билан яқиндан танишмоқ истади. Ярим фингшиб, ярим ириллаб, думчасини ликиллатганича унга яқинлаша бошлади. Бироқ мушук танишувни хуш кўрмади. Жойидан қўзгалиб, ўсиқ жунли танасини аввал гажак, сўнг чўзиб, хузур қилиб керишди-да, аста бурилиб, буталар оралаб кўздан ғойиб бўлди. Коравой акиллаб унинг ортидан югурди. Аммо ярим йўлда диккати ўзга нарсага чалғиб, ўшанга алаҳсиди. Онасининг қисқа акиллашини эшитмагунча шу куни у чангальзорда роса изғиди.

Коравой кун сайн улғая бошлади. Авваллари айланиб ўтадиган тўсиқлар устидан энди осонгина сакрайдиган, чангалзорда бемалол дайдийдиган бўлди. Бу орада кўкламнинг тароватли кунлари бошланиб, борлик турли-туман хидларга тўлиб-тошди. Чангалзор одатдагидан гавжум ва сершовкин бўлиб қолди. Онаси уни эмизишдан ўзини олиб қочадиган одат чиқарди. Негаки, кучга тўлиб бораётган кучукча билиб-билмай унга озор бериб кўяётган эди-да. Бутазордан суюк топиб олган куни Коравойнинг ўзи онасини эмишдан бош тортди. Суюк сутдан тотли туюлди. Қувватга эна бошлаган ёш вужуд энди дағал емишларни талаб қиласар, бироқ Олапар бошқа ёввойи ҳайвонлардан фарқли, кўнолғасига емиш кўтариб келишни билмасди. Ҳона-килиги мана шундай пайтларда панд берарди. Бурчини бола эмизиш билан чегараларди.

Боласининг янги истак ва хоҳишларини қандай кондиришни билмай боши қотиб юрганида, бу масала ўз-ўзидан ҳал бўлди. Бир куни у, бемалол ғажийман деган умидда даштдан чоғроққина суюк кўтариб қайтди. Суюкка Коравой эга чиқиб қолди. Бошда Олапарнинг қаҳри келди. Енгил бир силтov билан уни нари улоқтириб ташлади. Коравой тўрт юмалаб тушди-да, яна қайта суюкка ёпишди. Ириллаб, қаҳру-ғазаб билан ёпишди. Олапар қаршисида бўлғуси ёвкур ىтни кўрди. Узоги билан яна уч-тўрт ойдан сўнг унга умуман чоғи келмаслигини англаб, ташвишга тушди. Кейин суюк талашаётган бу мурғак вужуд ўз боласи эканини ўйлаб, ўзини босди. Суюкдан четланиб, нари сурилиб ётди-да, сўнг емиш қидириб, тағин санқиб кетди.

Коравой бир неча соатлик оворагарчиликдан сўнг суюкни сўлаги билан юмшатиб, паққос туширди. Умрида бу қадар тотли емиш емаганди. Ўша куни суюк қидириб, бутун чангалзорни тити-пити қилиб чиқди. Натижада, кўклам туфайли юзага чиққан жуда кўплаб танишлар ортириди. Улар орасида тошбақадан тортиб типратиконгача, дала сичконидан юронқозиккача бор эди. Бироқ дарди суюк бўлгани сабабли уларга эътибор бериб ўтиrmади. Ҳали кон таъмини тотмагани боис бу жониворларга емиш сифатида қарамади.

\* \* \*

Қон таъмини у тасодифан тотди.

Кунларнинг бирида бутазор оралаб юриб, ғалати бир манзаранинг устидан чиқди. Кичикроқ мушуквачча ерга қалишганча нимадир пойламоқда эди. Ана, у ер бағирлаб олға силжиди-да, тағин тошдек котди. Бу холат бир неча марта тақрорланди. Қоравой қизикси-ниб, унинг харакатларини дикқат билан кузатаркан, ҳозир нимадир юз берини идрок этди. Ўша нимадир қизиктириб, сабр этмоққа қарор қилди. Эътибори мушукчада бўлиб, бута шохлари орасида чўзилиб ётган, ҳов бирда учратган малла, она мушукни пайқамади. Бошини бир ён қийшайтириб кузатишда давом этди.

Агар у хонаки ит бўлганида, бу қадар чидам билан кузатмаган, иккинчидан эса, акиллаб аллақачон ўзини билдириб қўярди. Ёввойи табиатидан ёввойи жониворларга хос хусусиятлар таркиб топаётган ва айни шу жиҳати билан онасидан кескин фарқланиб бормоқда эди. Боласи билан сүяқ талашганида, Олапарда ёввойилик бир лаҳзагина ўзлигини намоён этган эса-да, оқибат, барибир хонакилик устун чиқиб, у муросасозликни афзал кўрганди. Баҳсада оналик меҳридан кўра, хонакилик устувор чиққанди. Хонаки ит емиш талашиб ирилласада қатъият ва кескинлик қаршисида у доим бўшашади. Лаб ялаб, чекинмоқни маъқул топади.

Қоравой мушукчани чидам ва қизикиш билан кузатаркан, бир маҳал уни ғоят эпчилик билан дала сичқонини тутиб олганини кўрди. Бу холдан анг-танг туриб қолди. Ахир унинг кўз ўнгида бир жон иккинчи бир жоннинг ҳаётига тажовуз қилганди-да.

У ажабланиб турганида, мушукча сичқонни ўйнай бошлади. Гарангсиган сичқон пайт пойлаб қочишига уринар, у эса сакраб йўлига кўндаланг бўлар, ё панжаси билан бир уриб, баттар караҳтлар, сўнг ажалини кутиб жимгина ётган жонзотни туртқилаб, харакатга ундар, қимирилаши билан яна эрмаклашга тушарди. Бу килик Қоравойга жуда қизик туюлди. Бошини иккинчи ёнга қийшайтириб, кузатишда давом этди. Бу орада эрмак жонига тегиб, мушукча ўлжасини емоққа тушди. Худди шундагина қорни очлигини сезган Қоравой

мушукка ташланди. Ташлангандаям хеч бир шовурсиз, шовқинсиз от қўйди. Туйкусдан пайдо бўлган ғанимдан ўтакаси ёрилган мушукча оғзидағини ташлаб қочди. Қоравой у қолдирган ўлжани энди исказ кўраётганида, нақ ягринида кучли зарбани сезди. Ангиллаганича, бир сакраб ёнига ўгриларкан, қархисида важохати ўта қўрқинчли малла мушукни кўрди. Аммо Қоравой мурғаклик давридан аллақачон ўтган, тап тортмай мушукка ташланди. Табиий, мушукларнинг хужуми хеч вакт узокка чўзилмайди. У Қоравойнинг афтини бир-икки тирнаш билан чекланиб, ура қочди. Қоравой уни қувламади, оёқлари остидаги сичқонга интилди. Аввалига исказ кўрди, сўнг ялади. Кондан вужудига ажиб бир титрок таралди. У титрок босилишини кутиб ўтирамай, ўлжани бир ямлашда ютди-кўйди.

Шу кундан эътиборан теварагидаги жамики жонлиқقا емиш деб қарайдиган бўлди. Ҳатто чангалзорни макон тутган ёввойи мушуклар ҳам бундан мустасно эмасди. Аммо уларни тутмоқка унга йўл бўлсин. Ўша куни у юмонқозиқقا ташланиб кўрди. Юмонқозиқ инига уриб кетгач, беозор тошбақага оғиз солди. Чоффрок суюкларни майдалашга қодир тишлари унинг мединек косаси олдида ожиз қолди. Тошбақанинг сичқон каби юмшоқ эмаслигидан ажабланиб турганида, кўзи бирдан пилдираб бораётган типратиконга тушиб қолди. Бир сакраб унга оғиз урди-ю, тумшуғи яраланиб, ангиллаб юборди. Қайтиб бу жониворга қотин-майдиган бўлди.

Эртаси биринчи бор чангалзордан ташкарига чикиди. Ўзига қолса ҳаливери ташки дунё юзини кўрмасди-ю, лекин сичқоннинг юмшоқ ва мазали этини тотиганидан сўнг, иштаҳаси карнай тортиб, кўринган, шитирлаган нарсага ташланавериб, кенг даштга чиққанини сезмай қолди. Бир вакт бундай қарасаки, теварагини девордай ўраган буталар ортда колиб, сарин ел юнгларини сийпаламоқда. У кенг дунё қархисида лол қотди. Дунёнинг бу қадар чексизлигини хаёлига келтирмагани боис, кўз ўнгига тўсатдан юз очган манзарани идрок этолмай, нолакор ғингшиб юборди. Сўнгра оҳиста чўнқайиб, атрофни диққат билан кўздан кечира бошлади. Орада ортидаги чангалзорга бир қараб кўйди-

да, тумшуғини кўкка чўзиб, ҳавони исқади. Шунда димоғига қўлансароқ емиш иси урилди. Ютоқиб тумшуғини ялади. Кўзлари ёниб, бот теваракка аланглади. Емиш иси бамисоли оҳанрабодай ўзига торта бошлагач, ноилож йўргалаб, илгарилади. Ислага эргашди. Чамаси уч юз одимлардан сўнг бир дунё емишга дуч келди. Саёзгина чукурликда бутун бошли сигир лоши чўзилиб ётарди. Сигир лоши қишлоқ итлари томонидан аллақачон талон-тарож қилинган эса-да, тишга босгулик емиш ҳали сероб эди. У очофатларча лошга ёпишиб, майда, ўткир тишлари билан устихондаги қолдик этларни кемиришга тушди. Корни тўйгач эса, ички бир туйғуга бўйсениб, ковурға суякларидан бирини тишлаб изига қайтди. Уни сайҳонликдаги камарга беркитди. Анча бурун буталар орасидан топган суягини ялангликка келтириб, сўнг ғажигандай, кечгача камарга анча-бунча суяк ташиб қўйди.

Бу қилиқни у бирордан ўрганмаган. Аслида ўргатувчининг ўзи йўқ эди. Онаси ўғирлиknи балодай эпларди-ю, лекин ўлжасини қора кунга асраб қўйишни билмасди. Топарди-ютарди, аммо ғамламасди. Тўгри, кичиклигида аждодларининг одат ва хусусияти боис, ўзидан ортган суяк ва нон бўлакларини Ҳайдар қўсанинг ҳовлиси бурчакларига кўмиб, бекитиб қўяди. Кейин қарасаки, бунга ҳеч ҳожат йўқ, емиши етарли, вақтида томоғига қараб туришибди. Натижада, у ўзидаги нодир табиий хусусиятлардан маҳрум бўла борди. Қисқаси, қарамлик итларни текинхўр ва боқибегам, танбал ва бефаҳм, сусткаш ва журъатсиз қилиб қўйди. Коравой эса қарамлик тушовидан ҳоли, аждодларининг бор хусусияти унда тўлалигича қарор топмоқда эди. Суяк ғамлаш борасидаги улдабуронлиги табиий майл туфайли эди.

Коравой суяк мазасини тотган куниёқ Олапарнинг пинжига суқилмай қўйганди. Оқибатда, онасидан сут қочиб, у бутунлай оч қолиш ҳавфи остида қолганди. Ушбу майл туфайлигина бўлғуси бу ҳавфдан ҳалос топганди. Ўша куни суяк ғамлаб, хийла хотиржам тортган бўлса-да, ундаги бу осойишталик онаси келгунга қадаргина давом этди. Олапар қора бериши билан унда янги туйғу — қизғанчиклик бош кўтариб,

онасини камарга яқинлаштирмасликка уринди. Аммо Олапар сүякларга ҳатто киё боқмади. Қорни жуда түк эди унинг.

Эртаси онаси қорасини кўрсатмади. Индинига ҳам. Умуман, бошқа қайтиб келмади у. Олапар товуқ ферма қоровули томонидан отиб ўлдирилганди.

Ёлғиз қолгач, Коравой бир ҳафта сүякларни кемирди. Чанқовини ўзи бир пайлар йиқилиб тушган чукурдаги сувдан қондирди. Чуқур нишоблиқда бўлиб, ёмғир сувига доим тўлиб туради. Бу орада сигир лоши тугаб, йўғон оёқ ва умуртқа сүякларига унинг чоғи келмади.

Коравой онасини бехуда кутиб юрган кунлари сүяк фажишдан ташқари, ов қилмоқнинг ҳам ҳадисини олди. Ялангликдан юз одимча наридаги буталари сийрак майдонда юмронқозиқлар оиласи яшарди. У каттакон сокчи юмронқозиқни кўз остига олганди. Аммо уни кўлга туширмок осон эмасди. Коравой ўлжасига ҳар томонлама яқинлашиб кўрди. Бирор барча харакатлари зое кетди. Сокчи юмронқозик унинг қорасини илғаши билан «чийқ» этар ва натижада майдонда ўралашиб юрган юмронқозиқлардан асар ҳам қолмасди.

Орада у тўртта сичкон тутиб еди. Юмронқозиқни эплаёлмаган эса-да, уни пойлаш мобайнида шуни уқдики, бу дунёда ҳеч бир тирик жон осонгина ўлжа бўлавермас экан. Ҳатто оддийгина сичқонларни овла-гунча қанча эврилмади у. Мушукдайин писиб, сирғалишдан ташқари, қоплондек човут солмоққача бориб етди. Ўндан тўккиз ҳаракати бекор кетиб, неча-неча бор курук ерни чанглаламади. Ўлжаси қочиб, оғзига кесак илашмади. Тумшуғи новдаларга тилиниб, оғрик азобини тортмади.

У юмронқозиқни пуф сасикқа чиқариб, даштда изғий бошлади. Камардаги сүяклари тугаб, ўзга иложи ҳам қолмаган, боз устига, ёш ва навқирон вужуди ҳаракат истаб, аллақаेरларга ундалани-ундалан эди. Дастребаки куни улов минган эгасига эргашиб келаётган товуқхонанинг янги ити Бўйноқ уни олдига солиб роса кувлади. У дашт бўйлаб кочаркан, чанглазордан паноҳ топди. Дунёда емиш ташвишидан бўлак ғаним хавфи ҳам борлигини шундагина англади. Янаги сафар

Эса гайрати ичига сифмай қирга ўралади. Қирдан туриб бу ёруғ оламнинг ниҳоятда кенглигини, қирдан нарида тағин қирлар, қирлардан сўнг улуғвор тоғлар ястанганини илғади. Узокдаги қир бетига ёйилган сурувларнинг нималигини идрок этолмади. Билгиси келиб, ўша томонга юрди. Чўпонларнинг итига таланиб, қўнолғасига зўрга қайтди. Уч кун ёмон азоб тортиб ётди. Ҳамжинсларига нафрати ошса-да, лекин қасос олиш туйғусини ҳис этмади. Нега деганда, дунё ишларини ҳали тушунмас, уни қадам-бакадам ўзлаштиrmоқда эди. Ҳозирча англагани, чангальзордан нарисини бегона ер деб билди. У ернинг ўз эгалари бор экан, деган қарорга келди. Бу нарса уни чангальзорга яна-да маҳкам боғлади. Чангальзорни ёв ўтмас қалъя деб хаёл қилди. Чунки бу ерда ҳали хеч нима безовта қилмаган эди-да уни.

Аммо тез орада безовта қилувчилар ҳам топилиб қолди. Соғая бошлаган кунларининг бирида ғазабдан Қоравойнинг туклари тиккайиб, вужуди титраб кетди. Намчил тумшуғини олдинга чўзиб ҳавони ҳадик билан исқади. Бегона ҳид ва нотаниш шовурни тез илғади. Мулк эгаси сифатида қони қайнаб, ўша томонга писиб жўнади. Салдан сўнг кўрдики, иккита шохли жонивор бута новдаларини бамайлихотир куртиллатиб чайна-моқда. Ох, унинг жисмида ёввойи аждодларининг ёвқур қони шу қадар кўпирдики, қаҳру ғазабдан эси оғиб қолаёзди. Шу топда инига тажовуз қилинган бўридан ҳавфлирок эди у. Беозор эчкиларни даҳшатли ғаним деб билди. Эгалик туйғуси туфайли улар билан қонли жангга киришга шайланди. Тишларини иржайтириб, олға ташланди. Воажаб, ўта вахимали ва қўрқинчли кўринган ғанимлари шаталоқ отиб қочиб қолса бўладими. Бу ҳолдан у бир зум ҳанг-манг туриб қолди. Сўнг эса бутазордан ўқдек отилиб чиқиб, эчкиларни дашт бўйлаб қува кетди. Бу ишидан шу қадар роҳатланниб, шу қадар ҳузурландики, югуриб бораётуб иргишлиб-ирғишилаб қўйишдан ўзини тиёлмади. Ҳатто кўйничидаги жароҳати ҳам эсидан чиқиб кетди. Голиблик нашидасидан, том маънода, масрур эди у.

Эчкиларнинг бахтига Қоравой уларни емиш деб ўйламади. Акс ҳолда бирортасига жиддий зиён еткази-

ши тайин эди. Кувлаш билан бўлиб Коравой калтак тутган икки оёкли «махлук»ка рўпарў келганини сезмай қолди. У таажжубланишга улгурмай, нотаниш «махлук» нимадир деб бакирди-да, қўлидаги таёнини улоқтириди. Узун калтак зувиллаб яринини ялаб ўтди. Коравой тўхтаб, унга хайрон бокди. Сўнг ириллаб, энди уни олдига солмоқчи бўлди. Қайдам, бу «махлук» қочмоқни хаёлига ҳам келтирмади. Ерга бир зумга эгилди-да, шифаб тошбўрон килишга тушди. Тошлардан бири бикинига тегиб, оғриқдан у вангиллаб юборди. Ва шундагина хавфли ракибга дуч келганини англади.

Чангалзорга қайтиб, оёклари устига бошини қўйиб ётаркан, хозиргина кўрган-кечирганларини тасаввур доирасига сифдиролмай кўп қийналди. Қийналганидан нолакор ғингшиб юборганини ҳам сезмай қолди. Ҳартугул, дунё қарама-каршиликлардан иборат, юмонқозикларнинг чирқиллашидан хаёли бўлинниб, бу азобдан халос топди. Сергакланиб бошини кўтарди. Искаланиб, хид олди. Сўнг буталари сийрак сайҳонлик томон жилди. Бу эпчил, серҳадик жониворларни очик харакат билан кўлга тушириш мушкуллигини билгани боис, сайҳонликдан берида тўхтаб, ўзини буталар панасига олди. Бу ердан ялангликда югуриб юришган жониворлар яққол кўзга ташланар, ўртада эса ўша биққасемиз соқчи юмонқозик гўлдайиб турарди. Коравойнинг қорни гўлдираб, тумшуғини ялади. Кейин хонаки итларга хос бўлмаган бир йўсинда ербагирлаб олға силжиди. Аввалгидек кетини кулгили тарзда дўнг килиб эмас, бамисоли коплондек харакатланмоқда эди. Бу харакатни ўзи пайқамаган холда фоят усталик билан адо этаркан, бунинг учун укувлилигидан эмас, табиатдан миннатдор бўлмоғи лозим эди. Негаки, табиат зўр мураббий — қарамликдан холи, мустақил яшашга одатланган жонзотни шароитга қараб, ҳар кўйда тарбиялай олади.

Коравой соядай сирғалиб айчада илгарилади. Энди уларни серновда пастак бута ажратиб турарди. У бошини хиёл қўтариб, бот искаланди. Димогида гўшт хидини, гўшт хидинигина эмас, қайнок хаёт хидини туйди. Яринидаги туклари титраб, ерга яна-да қапиш-

ди. Бу ёғига қандай харакатланишни билмай, боши қотди: Олға юришдан наф йўқ, унинг қоп-қора туси тез кўзга ташланади. Кутишга тоқатиям йўқ, соқчи юмонқозиқни тезроқ қўлга туширгиси келарди. Негадир, айнан шуни, бошқасига эътибор ҳам бермасди.

У барибир яна итлигига борди. Сапчиб туриб, ўлжаси томон қуюндеқ елди. Қайдам, ялангликда бирпасда жон асари қолмади. Бир иш чиқаролмаган Коравой сайхонликда бехуда изғиркан, аламдан увлаб юборди. Дуч келган тешикка тумшуғини тикиб, ўлжа ҳидини ютоқиб-ютоқиб хидларкан, ер тирнаб, тупрокни ҳар томонга сочиб ташлади. Сўнг эс-хушини бир оз йигиб, пастак буталар панасига ўтиб ётди. Қайсар бир туйғуга бўйсиниб, ўлжасини пойламокқа киришди.

Коравой қуриган хашаклар узра мисоли арвоҳдай сирғала бошлаганда, юмонқозиқлар ялангликни тағин банд этишганди. Шу орада қўриқчи юмонқозиқнинг дикқати бир лâхзага бўлинди. У кўкда оҳиста парвоз қилаётган калхатни кўриб қолганди. Осмондаги фаними бутазорда унчалик хавф туғдирмаслигини билса-да, тарки одат дегандек, унга ҳадик билан тикиларкан, ортидан елдай келиб, нақ яғринига оғиз солган Коравоини пайкамай қолди.

Бу воеа ажойиб ёз кунларидан бирида юз берди. Борлиқ илиқ-иссиқ кунларга хос гўзал ва фусункор эди. Коравой эса бу тароватни ўлжасини қўлга киритиб, паккос туширгандан сўнггина сезди.

\* \* \*

Бу орада Коравой онасини бутунлай унутди. Уни тушида кўргандай элас-элас хотирлайдиган бўлди. Онаси уни туғди, бокди, лекин тарбиялай олмади. Коравой шароит тақазосига кўра мустакил равишда ҳаёт сабогини ола борди. Яшаш учун турли усулда эврила бошлади. Қорни очганда, кўнғизу чигирткалардан ҳам ҳазар қилмади. Парронда гўшти таъмини эса учирма бўлган қуш болаларини тутиб егач, билди.

У кейинги қисқа вақт ичida чангалзорни тамомила ўзлаштириб олди. Тошбака ва типратиконни демаса, қолган жониворлар осонликча тутқич бермаслигини

фаҳмлаб етди. Шунга қарамай, ҳамиша оч меъдаси нималарни хазм қилиб юбормади дейсиз. Тани кун сайин кучга тўлиб, ёзинг иккинчи ойда шундай бир ит бўлдики, аксарият итлар бу келбатга икки-уч йилда зўрга эришиши мумкин эди. Ётар ва туар жойи чангалзор бўлса-да, у ўз сарҳадини секин-аста кенгайтира борди. Дастлаб Тошлисойнинг юкори ўзани бўйлаб тентиди. Бу йил сув тезда қуриб қолмагани боис, сой ўзанида катта-кичик кўллар сероб эди. Қоравой ўша кўлларда чўмилиб яна-да чиниқди. Сувдаги яккамдуккам баликларни кўриб анкайса-да, биронтасини тутиб еёлмади. Лекин бир неча бор харакат килгани рост. Бироқ балиқ дегани ўзи ўйлаганчалик овсар эмас экан, бекорга урингани колди.

Тошлисой кишлок тарафдан янтоқзор дашт билан чегараланган, иккинчи соҳили эса тик жарлик эди. Жар бети қушлар уясиға тўла, сергак жонивор учун бу ерда емиш дегани мўл. Нимадандир яраланиб, йикилиб тушган қуш дейсизми, ё заҳда кулча бўлиб ётган илон дейсизми, хуллас, тимирскиланган жониворга ямлагулиқ нарса ҳамиша топилиб туради.

Илон овламоқни Қоравой чангалзорда ўрганган. Бу соҳада у типратикондан улгу олганди. Бошда у типратиконларнинг оғзидағини олиб юрди. Сўнг ўзи ўрганди. Типратиконга ўхшаб илоннинг думидан эмас, бўйнидан тишларди. Ҳар ҳолда унинг бу қилифи ит зотига хос эмасди. Аммо тинимсиз емиш талаб қиласиган юҳо нафсини қондирмоқ илинжида ҳеч балодан қайтмасди. У бу хил овни ички идрокка бўйсунган ҳолда роят чапдастлик ва эҳтиёткорлик билан амалга оширади. Илоннинг заҳарли маҳлук эканини бирор ўргатмаган эса-да, туйғуси асосида хис этарди буни. Энг қизиги, заҳарли жонивордан тап тортмас бу шоввоз ўта беозор сариқ илондан ўлгудек жирканар, кўзи тушди дегунча, пишқириб нари кетар, ё бу унинг ўша пайтдаги кайфиятига боғлиқ, эрмак қилиб ўйнарди.

Кунлар ўтган сайин сойнинг юкори ўзани секин-аста унга ўз бағрини оча бошлади. Бир сафар у жардан йиқилиб ўлган семиз қўйнинг жасадига дуч келиб колди. Ўша куни роса базм қилди. Корни ёрилгунча гўштга тўйди. Сўнг хаётида биринчи бор тўқ қорин

билан ялқовланиб, солланиб чангалзорга кайтди. Эртаси эса ўша ерга бориб, ғазабдан нақ шайтонлаб қолаёзди. Қайси кўз билан кўрсинки, насибасига иккита нотаниш ит шерик чиқиб турибди. У ириллаганча олга ташланди. Ўз навбатида нариги итлар ҳам унга қарши югуришди. Олатасир олишувдан жар туби чангигиб кетди. Итлардан бири яраланиб, оқсокланганча нетга чиқди. Коравой жуссадоррок Ола ит билан яккама-якка қолди. Бир муддат галма-гал бир-бирини тупроққа босишли. Охири ҳолдан тойишгандай, бетма-бет туриб қолишли. Тишлари даҳшатли даражада иржайган, ҳар қайсиси жангни тезроқ ўз фойдасига ҳал этмоққа интиларди.

Ола ит жўнгина хонаки ит эса-да, насибасини дала-даштдан териб ейишта ўрганган, оғзига тегиб турган хўрагини, табиий, етти ёт бегонаға қолдириб кетишга асло токат қиломасди. Ҳозир у рақибига қаҳр ила тикиларкан, уни қаерда кўрганини эслайлмай гаранг эди. Аммо у ер-бу ерда ҳидига дуч келгандай бўлувди. Мана энди қаршисида ғўдлайиб турибди. Ёш бўлса-да кучи бисёр экан, ҳеч чоғи қелмаяпти. Бундан у бир қаҳрланса, бегоналигидан икки бор ғазабланмоқда эди. Турган гап, ит зоти нотаниш ҳамжинсини ҳамиша душман ўрнида қабул қиласди. Тўқнашув пайтида муроса қилинмайди, факат қайси томоннинг зўр чикишигина орани очиқ қиласди, холос.

Рақибининг жон оловчи жағидан кўзини узмай, кулай фурсатни сабрсиз кутаётган Коравойнинг ғазаб ва нафроти ўта чексиз эди. Ахир у сой ўзанини алла-қачон ўзиники қилиб олганди-да. Хўрак унинг ҳудудидан топилган, демак, ёлғиз унга тегишли. Манову сурбет буни тушунишни истамагани етмагандек, пешкирлик қилгани-чи.

Ола итдан ўларок, Коравой рақибининг чекиниши билан кифояланмай, қандай бўлмасин, уни мавҳ этишини ўйларди. Ёввойи табиати шунга мослашган, ҳар қандай курашнинг оқибатини мавҳ этиш деб биларди. Ёввойилик унинг вужудигагина эмас, руҳига ҳам сингиб ултурганди. Корин тўйдириш ғамида турли йўсинда эврилишлар, ўлжа умидида ербағирлаб харакатлашишлар, тумшуғи етган нарсани нафсига уриш каби

хусусиятлари унинг ҳар бир мускулини қайишқоқ килибина қолмай, рухини чапдастлик ва ёвқурлик томон йўналтирган бўйиб, хозирча унинг ҳосиласи қорин тўйдириш билан якунланарди. Қорин тўйдириш эса кўп ҳолларда курашсиз бўлмайди. Кураш жониворда ёввойилик ва йирткичликка майл уйротгандек, эркинлик, ўз навбатида, бу майлни хаддан ташқари кучайтиради, шакллантиради. Табиатан ёввойи бўлган Коравойда бу хусусиятлар аллақачон таркиб топган эса-да, тажрибасизлиги ва кўникма олмаганилиги туфайли ушоқ молларни, аникрофи, уй жониворларини хали емиш деб билмасди. Билганида ҳашорату ер тешар жониворлар билан кифояланиб, эчкилар билан пачакилашиб юрмасди. Балик тутаман деб тумшуғини тошга уриб ёрмасди. Ахир қайси замонда ит зоти баликка ҳамла килган дейсиз. Қисқаси, нафс балоси ёмон. У шундай бир қудратли кучки, заптига олса, тамом ҳар қандай жонзотни ўз йўриғида йўргалашга мажбур эта олади. Бу куч эндиликда Коравойнинг феълида шафқатсизликни туғдира бошлаган эди.

У ириллаб пайт пойларкан, рақибида кўркувдан асар ҳам йўқлигини пайқади. Лекин бундан зигирча ажабланмади. Шундай бўлиши лозим деб биларди ва билгани учун ўзи ҳам кўркув ҳис этмасди.

Бу ҳолни Ола ит ҳам сезди. Уни тилка-пора қилмоқ истагида баттар ёнди. Аммо ҳамма бало шунда эдики, бу ишни ҳеч эплаёлмаётганди. Рақиби нақ иблиснинг ўзи, ҳар бир ҳаракатини кўздан кочирмай, ҳамлага шай турарди. Ола ит тажрибали эди. Қархисидаги навқирон вужуд курашда анча уқувсиз бўлса-да, эпчиллиқда ўзидан бир қадар устунлигини сезгани сайин секин-аста ташвишга туша бошлади. Нега деганда, хозир бўйин эгиб кетса, бу жойлардан насибаси бутунлай кесилишини идрок этганди. Боз устига, сой ўзани жаннати жой, хафсала билан изғисанг, ҳар куни қорин тўяди. Тарк этиб бўларканми бундай жойни! Шунда у қўшни итлар каватида бўлмаганидан ўқинди. Биргалашиб манову безбетни боплаб адабини бериб қўйишган бўларди. У ёнига кўз қирини ташлаб кўпди. Эҳ, анаву ярамас кўмакка келиш ўрнига жарохатини ялаб ўтирибди-я. Э, ғингшимай ўл!

У пайт пойлаб туриб, тўйкусдан Коравойнинг бўғзи-га чант солди. Воажаб, рақиби бамисоли кўланкадай ҹап берибгина қолмай, нақ яғринига тиш ботирса бўла-дими. У бу ҳамлага пухта хозирлик кўрган, шу пайтга-ча бу усул билан қанчадан-қанча итларнинг додини бермаганди. Энди эса... Устига-устак, яғрини энг но-зик жойи — эски яраси янгиланиб, Ола ит оғриқдан ангиллаб, кўрқувдан сийиб юборди. Қочмоқдан ўзга иложи йўқлигини англади. Аммо бунинг учун аввало мана бу зулукдай қоп-қора, зулукдай ёпишқоқ маҳлуқ-нинг чангалидан кутулмоқ лозим эди. Бахтига қарши, рақиби бўри эмас, ит. Ит эса тишлаган жойини қосон-ликча қўйиб юбормайди.

Коравой бўғзида тук аралаш қайноқ қонни туйган сайин баттар кутурар, рақибини бурдалаб ташлаш иштиёқида ёнарди. У шу иштиёқ оғушида бир лаҳзага тишларини бўшатди-да, янги куч, янги файрат билан қайта ҳамлага ўтди. Аммо даҳшатли жаги мўлжалга етмай, «шарқ» этиб ёпилди. Навбатдаги уриниши ҳам бесамар кетгач, у эс-хушини йиғиб, бундай қарасаки, рақиби жонҳолатда қочиб борар шериги унга соядай эргашган. Салдан сўнг қочоклар дўнглик ортида кўздан ғойиб бўлди.

Коравой чўнқайиб тантанавор ҳурди. Аммо хури-ши кўнглидаги қувончи ва ғалабасини тўла ифодалай олмаётганини сезиб, тумшуғини кўкка чўзганича ҳузур қилиб увлади. Увлаш руҳига ҳуш ёкиб, дилида тугил-ган ғолиблик хиссини тўлиқ акслантирди. Увлаш жар-дан акс-садо бўлиб қайтди. У яна ва яна увлади. Акс-садога кулоқ тутиб, тўхтаб-тўхтаб увлади...

Увлаш унинг кўксидан бежиз тошиб чиқмаганди. Бу унинг ёввойи ва ёвқурлигидан дарак берарди. Агар кузатган бўлсангиз, хонаки итларнинг тинимсиз акил-лаши жўн кишиларнинг беҳуда ғиди-бидисига ўхшайди. Худди акиллашдек, ғиди-бидида на маъно бор, на мантиқ. Зўр итлар эса акиллашни унчалик ҳуш кўрмайди. Тунлари кам-кам ҳуради, гоҳида чўзиб-чўзиб увлайди. Айни мана шу нидода қадимий аждодларининг кўхна қўшиғи мавжуд. Итлар куйлади. Лекин ҳамма-си ҳам эмас. Куйлаш учун унинг зуваласи бошқачароқ узилган бўлиши лозим.

Ўша куни Коравой увлашдан ташкари яна бир нарсани одат қилди. Қўй жасадининг қолган-қутганини сал нарига судраб обориб, кўмиб ташларкан, бу меники, тегсанг, соғ қўймайман, деган маънода сўлагини оқизиб белги қўйди. У буни қир бетида яшовчиmallа тулкидан ўрганганди. Неча бор у яшириб қўйган емишларни топиб еганди. Ҳозир бу одатни тулкидан қўргани учун эмас, кўп бор оч қолганлиги эвазига юзага келган тажриба асосида амалга оширган, тулкидан эса шунчаки улгу олганди. Шунга қарамай итлик хусусияти устун келиб, бир муддатдан сўнг, ўлжа кўмилган дўнглик четига сийиб қўйишни ҳам унутмади. Шундай килса, белгиси ишончлироқ бўладигандек туюлди.

Ўша куни у димоги чоғланиб, чанглзорга қайтди. Тунлари маза қилиб увлади. Аммо у узокда чироқлари милтиллаб кўринаётган Яккатут қишлоғида ўзига қарши куч жамланаётгани, жонига қасд этмоқ ниятида мудхиш режалар тузилаётганидан бехабар эди.

\* \* \*

Ола ит барча ҳамжинслари каби кекчи эди. Ўша куни у ховлига қайтиб, ялоқдаги ювундини шалоплатиб ичди-да, товуқ катаги устига чиқиб ётди. Яғринидаги жароҳати азоб бериб, нолакор ғингшиди. Унинг ғингшиши кўрада куйманиб юрган Шоди гарангни дикватини тортиди. Шоди гаранг итининг ярасини қўздан кечириб, ўчокдан бир ховуч кул олиб келиб сепди. Шу билан унинг жонига аро кирган бўлди.

Эгасининг муолажаси туфайли у тез ўзига келди. Шоди гаранг сигирларининг ярасига суртадиган қопқора, сассик дорисини ундан аямади. Дори жизиллатиб ачиштирганда, Ола ит Коравойни эслаб, кўп қаҳрланди. Кўнглида ададсиз интикомни туғиб, бир куни томорқа адоғига ўтиб хурди. Зўмда атрофида уч-тўрт қўшни ит пайдо бўлди. Кенгаш тумшук ҳидлаш билан бошланиб, шу созда якунланди.

Итларнинг бу хил холатини кўп кузатганимиз. Бизнинг назаримизда бу жараён ҳеч бир маъно касб этмайди. Аммо бу нарса бутун бошли бир гурунг,

битим ва яна алланималардир. Эътиборли нигоҳ ажигиб бир холни пайқаши мумкин: биринчи бўлиб етиб келган Қашқа тумшук ҳидларкан, жароҳатини кўриб байбайлаб юборади, яъни калта хуради: «Уҳ-ху, боплашибди-ку». Ола ит сукут қилади. Бошқа итлар етиб келишини кутади. Тўрткўз билан Чиноқ пайдо бўлгач, у охиста фингшийди. Тўрткўз уни искашда давом этиб, қаҳр билан ириллайди: «Нима гап, нима бўлди?» Ола ит унинг тумшуғини ялаб, мақсадга ўтади: «Тошлисойда бир сурбет пайдо бўлиби. Ёмон жангари экан, ярамас». Охирида етиб келган Чиноқ оғзини катта очиб эснайди: «Нима бўпти?» Бунга жавобан Ола ит шикоятомуз фингшийди: «Адабини бериш керак. Қара мени нима қилиб кўйди». Чиноқ бот эснаркан, наридаги сояни кўз остига олиб, райиҳсиз ингиллайди: «Шу иссикда зарил кептими». Қашқа жаҳлланиб, кескин хуради: «Сен жим ўтири кари маймок!» Бу Ола итга хуш ёқиб, воқеани бир бошдан сўзлаб беради. Орада Тошлисойда емиш дегани жуда сероб эканлигини хам кистириб ўтади. Бундан итларнинг сўлаги окади. Қашқа бесабр ириллайди: «Кетдик!» Чиноқ тилини бир карич осилтириб, яна иссиқдан шикоятланади. Тўрткўз уни кўкси билан суриб, даврадан четлади. Қашқа акиллаб сўқилади. «Аҳмок! Ярамас! Кўрқоқ! Йўқол, бу ердан!» Ола ит уни кувватлайди: «Йўқол!» Чиноқ кемтиқ ошиб, кўздан йўқолгач, бир битимга келинади, йўлга тушилади.

Орадан ўн дақиқалар ўтгач, итлар дала йўлида йўртиб боришарди. Қуёш таптидан кизиган юмшоқ тупроқ панжаларини куйдирар, узокда эса Тошлисой ўзани узра чўзилган жарлик корайиб турарди. Итлар ҳакиллаб, бир карич осилган тилларидан чак-чак сўлак оқизиб, ўша ерни кора тортишган эди. Қашқа мўл-кўл емиш умидида олдинроқда одимлайди. Ола ит яғринидаги яра изига иссиқ таъсир этаётганини сезиб фингшийди. Фақат Тўрткўзгина иккиланиброқ илгарилайди. Бундай иссиқда муздек ариқ ичидаги кўксини ерга бериб ётишга нима етсин. Улар эса худди пишириб қўйгандай, дала чангитиб юришибди-я. Бир хаёли изига қайтмокчиям бўлди-ю, лекин ички бир ожиз истакка бўйсаниб, йўртишда давом этарди.

Уларнинг йўлини сариқ илон кесиб ўтди. Итлар парво қилишмади. Бегам тошбака уларни кўриб, косаси ичига биқинади. Қашқа ўйинқароқ, унга қотинмай ўтолмайди. Дўнгликда қозикдай қотиб турган юмрон-қозик уларни дикқат билан кузатади. Кўкда тўргай вижирлайди. Сизилловиқларнинг овози оламни тутган, бу бир текис сас далага ўзига хос тароват бағишлайди. Итлар даштдан тезак териб қайтишаётган болаларни четлаб ўтишади.

Ола ит шерикларини лош талашган жойга эргаштириб келади. На лошдин, на Коравойдан дарак бор. Бундан Ола итнинг кони гупуради. Ҳид олиш сезгила-ри тийраклашиб, Коравойнинг изидан тушади. Из уни лош кўмилган жойга бошлаб келади. Аммо кўйнинг кўмилган жасади аллакачон тинчтилган бўлиб, из уларни сойнинг қуи ўзани томон етаклайди.

Коравой ўрта жарнинг тагида куйманиб юрган экан, уни биринчи бўлиб Қашқа кўради. Вовуллаб оламни бузади. Салдан сўнг уч ит Коравой сари елади.

Уларни кўриб, Коравой аввалига ажабланади, сўнг фазабдан кутуриб кетади. Ахир мулкида бегоналар юрса-ю, кутурмай бўладими. Фўрлигига бориб, кучлар нотенглигини хисобга олмайди. Ер тирнаб ириллайди: «Қани яхшиликча даф бўлинглар!» Қайда, ракиблари бу хил нозик имо-ишорани тушунмайди. Бало-қазодай унга ташланишади. Жар тупроғи кўкка ўрлаб, чанг-тўзон ичида ким-кимни талаяпти билиб бўлмай қолади.

Коравой холи танглигини тезда пайқади. Жонига чакалакзоргина ора кирадигандек, ўша томон интилади. Қув-қув бошланади. Коравой ракибларидан илдамрок югуради. Чакалакзорга етиб, бундай ортига карасаки, итлар изидан қолмай келаяпти. Шаштларига қараганда, чангалзорнинг тити-питисини чиқарадиган. У-у, йўқ, бунга асло чидаб бўлмайди! Чакалакзор ёлғиз уники! Чакалакзорга кирган жойида, шартта изига қайтиб, ҳал этувчи ҳамлага ҳозирланади.

Ит деганлари фавқулодда вазиятда жуда зийрак келади. Коравойнинг важоҳатидан не гаплигини фахм-лаган жониворларнинг оёқ олишлари тайсалланиб, анча нарида тўхтайдилар. Эндиғи жанг беомон бўлади. Коравойга биринчи бўлиб хужумга ўтган итнинг шўри

курийди. Бу ҳол унинг бутун вужудидан сезилиб турарди. Натижада, ҳамла қилишга итларнинг журъати етмай акиллашга тушдилар.

Қоравой бошини хиёл қуи эгиб, ириллаб тураверди. Қайсинг келсанг бурдалайман, деган маънода тишларини даҳшатли равишда шақирлатди. Тиш шақирлатиш бўриларга хос, ёввойи итларга хос. Хонаки итлар бундай қилолмайди. Улар кўпроқ овозга зўр беради.

Кархисида ўзи ўйлагандан кўра хавфлироқ ракиб турганлигини англаган Ола ит кўмак истаб шерикларига қаради. Шериклари эса унга. Бироқ биринчи бўлиб хужум қилмокқа бирортасининг юраги чопмади. Ким ҳам ўлмокни истайди дейсиз.

Биринчи бўлиб Тўрткўз ҳоврудан тушди. Чўнқайиб бир-икки ҳурдида, сўнг муздек соя-салқинда чўзилиб ётмокни маъкул топиб, аста қишлоқ томон бурилди. Бир оздан кейин Қашқа унга эргашди. У бир нарсани, яъни деярли мағлуб бўлган Коравойнинг бирдан ёмон важоҳатга мингани-ю, ўлимни бўйнига олган ҳолда уларга мардона бет бўлганини тушунолмади. Унинг маскан хақидаги тушунчаси ялоқ билан чекланар, ялоғига тегилмаса бас, бошқаси билан иши йўқ эди. Ҳовлида савлатли қўрикчи, аслида эса ўтқир туйғулардан йирок эди у. Ола итга емиш илинжида эргашганди. Емиш ўрнига аллақандай жангари итга рўпарў келиб ўтирибди. У билан пачакилашиб тургандан кўра, бориб ювиндисини ичгани маъкул.

Ёлғиз колган Ола ит гоҳ рақибига, гоҳ номард шериклари томон боқаркан, акли хонакилашган бўлишига қарамай, бегона худудга қадам қўйганини фаҳмлади. Якка қолиш жуда хавфли эканини пайкади. Аммо дум қисиб кетиш оғир эди. У йўлига пўписали ҳурди-ҳурди-да, сўнг шериклари изидан йўртди. Баданида яна бир жароҳат орттириб, дами ичиди кетди.

Бу ходисани кузатиб турган яккатутлик Толмас исмли бола жуда аклли иш қилди. У сойнинг нариги бетида янтоқ чопиб юрарди. Гизланган итларни кўрсада, бақиришдан ўзини тийди. Гар шўхлиги тутиб овоз берганида, қишлоқ итлари ундан пишанг олиб, шўрлик Қоравойни бурдалаб ташлаган бўларди. Сукут бу ерда ҳам, одатдагидек, аъло натижа берди.

Толмас дашт боласи, итларни яхши ажратади. Коравойнинг навқирон келбатидан унинг зўр итлигини дарров сезди. Бироқ кўпда эътибор бермади. Бўрор кишлоқдан дайдиб келиб қолган бегона ит деб ўйлади. Коравойнинг чангалзор ити эканлигини кейин билди у. Бунгача хали ўртада икки ойлар чамаси вақт ястаниб ётарди. Унгача Коравой неча-неча саргузаштларни бошидан кечирмади дейсиз.

\* \* \*

Коравойнинг товуқхонага юриши танидаги жароҳатлари битиб кетгандан сўнг бошланди. Итлар билан олишув унга осон кечмаганди. Ўша куни Ола итга жиддий жароҳат етказган бўлса-да, ўзи ҳам обдон таъзирини еган, биқини ва қўймичидан тузуккина яранганди. Лекин оёқлари соғ — ўша-ўша илдам ва бақувват эди. Бу нарса уни жароҳатларининг тузалиш жараёнида оч қолишдан асрари. Чангалзорда уни-буни тутиб еб турди.

У товуқхонага юришдан аввал Тошлисойнинг юқори ўзанида изғиб, топгани чалажон бир капитар бўлди. Қанотлари лат еган күш камарда ётган экан, икки чайнаб жигилдонига урди. Қайноқ ва хушхўр парранда этидан тани яйраб, тотли исдан димоги чоғланди. Ҳаётга иштиёки ортди. Кейин чангалзорга қайтиб, илиқ шабада олиб келаётган қоришиқ ҳидларга юз тутиб, ялангликда узок ўтирди. Ҳидлар орасидан олисдаги товуқхонанинг бадбўй, шунингдек, товукларнинг хаёт тафти уфуриб турган бўйини илғай олди. Негадир безовта фингшиб, тумшуғини ялади. Охири бўлмагач, кечки пешинда ўша томонга лўкиллаб йўл тортди.

Товуқхона Яккатут қишлоғининг кунботишдаги тақир даштда, чангалзорнинг шимолида, чамаси, уч чақиримча нарида жойлашганди. У томонга яланглик кесиб, тепалар оралаб бориларди. Коравой яқиндаги дўнгликка чикиб, янтоқлар орасидан товуқхонани анча кузатди. Нега деганда, туйқусдан у носинашта олам қаршисидан чикиб қолган, иккинчидан эса, ички бир сезгиси товуқхонада кандайдир хатар яширин эканидан огоҳ этиб турарди. Шу важдан у дўнгда қотган,

йвой жониворларга хос ҳушёрлик билан товукхона-  
нинг ипидан-игнасигача кўздан кечирмоқда эди. То-  
вукхона бикинидаги чоғрок кулба теварагида ўрала-  
шиб юрган эркак ва аёл, икки ёш бола, сояда чўзилиб  
йтган каттакон ит Бўйнок унинг назаридан четда қол-  
мади. Товукхона тевараги баланд симтўр девор билан  
уралган бўлса-да, йигирма чоғлиқ оппок товук симтўр-  
нинг бериги томонидаги янтоқзорда bemalol донлаб  
юради.

Коравой ҳар томонни чамалагандан сўнггина, ўлжа-  
си томон писиб жўнади. Энди у росмана ёввойи йирт-  
қич каби ҳаракатланар, ҳаракатидан ўта айёрлиги яққол  
якс этиб туради. Айёрликни унга мухит ўргатганди.  
**Янада аникроғи**, чангальзордаги ҳар бир жонивордан бу  
борада жиндек-жиндек улуш олганди. Малла мушук-  
дан, ҳатто оддийгина типратикондан, қўйингки, жўнгина  
чиғирткаларнинг хатти-ҳаракатларидан ҳам ҳайёт сабо-  
рини олган, бу ёруғ жаҳонда ҳеч бир тирик жон  
осонликча тутқич бермаслигини аллақачон англаб ет-  
ганди. Оч қолган кезлари у чиғирткалардан ҳам бурун  
жийирмаган, ҳатто ўшалар ҳам уни анча овора қилар-  
ди.

Яқинда у ўғирлаб келган нарсаларини чангальзорда  
яшириб юрадиган олаҳақкани итларга хос бўлмаган  
услубда ғоят усталик билан қўлга туширганди. Аслида  
Коравой унга қасд қилмаган, бу нарса ҳаёлида ҳам йўқ  
эди. Лекин баъзан овозига зўр беришидан ғаши келиб-  
роқ юради. Иттифоқо шундай кунларнинг бирида, у  
соясида чўзилиб ётган бута шохига ҳакка келиб қўна-  
ди. Ўрта жардаги таловдан сўнг хийла ўзига келиб  
қолган Коравойнинг кўнглига бирдан шумлик оралади.  
Кушга кўз қирини ташлаб кўяркан, бамисоли ўликдай  
тош котиб ётаверди. Ҳакка бошда унга эътибор берма-  
ди. Кейин итнинг қилт этмай ётишидан ажабланиб,  
пастга учиб тушди. Узун куйруғини ликиллатиб, у ён-  
бу ён ҳаккалаб нималарнидир чўқилаган бўлди. Орада  
унга бир-икки караб қўйди. Сўнг қизикувчанлиги ғолиб  
келиб, итнинг бош тарафига ўтди. Бошини бир ён  
қийшайтириб, Коравойни дикқат билан кузатди. Ке-  
йин оёқсарисига йўналди. Ботиниб-ботинмай, думини  
чўқиди. Бунинг ҳаммаси итга қизик эди. Унинг қилт

этмай ётиши эса күшга ундан-да қизик эди. Охири күш юрак ютиб, итнинг тумшуғига яқинлашди. Ҳар лахзада ура қочишига шайланиб, унинг тумшуғига тумшук урди. Ана шунда шўрлик ҳакканинг тақдирин хал бўлди қўйди. Коравой бир бурда этга осонгина эга бўлди.

Коравой тулкидайин писиб боришни, бўридайин соатлаб пистирмада туришни балодай эпларди-ю, лекин бу хийлани ҳеч қўллаб кўрмаганди. Ушбу хийла жойида бемалол иш беришини англаб, хотирасига маҳкам тугиб қўйди.

Коравой товуқхонага писиб яқинлашаркан, дўнгдан энганидан бери орадан гўё бир йил ўтгандай туюлди. Аммо сира ошиқмади. Лўкиллашдан ўзини тийиб, шарпадай илгарилашда давом этди. Оралиқ масофа яқин колгач, у ёғига ер бағирлаб ҳаракатланишга тушди. Аммо ўсиқ янтоқлар халал бериб, у кўп бетоқатланди. Шунга қарамай, бошини кўтартмади. Тусмоллаб, ҳавони хидлаб-хидлаб, олға жилаверди. Ҳиёлдан сўнг бошини кўтариб, хаяжондан бутун вужуди титраб кетди. Қай кўз билан кўрсинки, нак тумшуғи тагида бир тўда «емиш» бамайлихотир донлаб юрарди. У баттар ерга қапишиди. Иягини шу яқиндаги каттагина тезак устига қўйиб, титроғи босилишини кутди. Ўзини сездириб, паррандаларни учирив юборищдан ҳайикди. Товуқларнинг учолмаслигини у хали билмасди. Билмагани учун ҳам у сабр килди. Ва шу аснода пайқадики, қаршисидағи жониворлар ўзга паррандаларга нисбатан анча калтафахм экан, ён-верига аланглаш ўрнига, нуқул ер чўқилашади. Тўғри, симтўр ёнидаги улкан хўрозди уни аллақачон сезган, бирок бефаҳмлиги панд бериб, итни хатар деб билмади. Ҳадикли қизиқиши билан караб тураверди. Қачонки, Коравой кора шарпадай олға ташлангачгина, у хавфни англади. Аммо энди вакт ўтган, энг чеккадаги семиз товуқ итнинг чангалига тушиб бўлганди.

Коравой ўлжасини потирлатиб олиб қочаркан, ортидан товуқлар қақиллаб қолди. Ит хурди. Кимдир таъқиб этиб борди.

У ўлжасини чангалзорга олиб бориб юрмай, сойда

тинчиди. Умрида бу қадар тотли эт емаганидан кўзла-  
ри сузилиб-сузилиб кетди. Кейин тумшуқ ялай-ялай,  
аста йўртиб, чангалзорни айланиб ўтди-да, кир тепаси-  
га чикди. Бу ердан чор-атроф худди кафтдагидек яққол  
кўзга ташланиб турарди. Коравой тоғ томонга орқа  
ўгириб, бамайлихотир ерга чўнқайди-да, одатича, ат-  
рофни синчков кузатмоқка тушди. Унинг қаршисида  
кенг воҳа юз очганди: паст-баланд тепаликлардан на-  
рида Ёккатут қишлоғи, ундан нарида яна бир қишлоқ,  
кейин яна бири... Ундан нарёғи кўкиш ховур салтана-  
ти остидаги улкан чексизлик эди.

Кўз ўнгига ястаниб ётган бу худудни Коравой уму-  
ман билмасди. У фақат Тошлисойнинг юқори ўзани ва  
кир атрофларини кезган, қишлоқ томонга эса бирон  
марта оёқ босмаганди. Кейинги вақтда қишлоқ уни  
жуда қизиқтира бошлаганди. Сабаби, оқшомги шабада  
ўша ёқдан турли-туман тотли хидлар қатори аллақан-  
дай сирли шовурларни ҳам олиб келарди-да. Аммо  
итларнинг сероблиги туфайли у тарафга интилмасди.  
У фақат бир нарсага тушунмасди. Шунча ит бир мас-  
канда қандай қилиб умргузаронлик қилиши мумкин?  
Табиий, ўзини ўшалардан бири деб билмасди. Шу  
боис итлардан жирканар, уларга ўчакишган ҳолда ўз  
худудини секин-аста кенгайтиришга тиришарди.

Тоғ тарафдан ит овозини эшитиб, у ортига қайрил-  
ди. Токқа туташ кирларга, ундаги қора-кура сурувлар-  
га анчайин кўз ташлади. Ҳов бирда сурув итларига  
талангани боис, у томонга кўпда қизикавермасди. Бу  
сафар, корни тўқ, кайфи чоғ учунми, лоқайд нигоҳига  
бирдан қизикиш инди. Туйкусдан ўша ёқка боргиси  
келиб қолди. Кўп ўйлаб турмай ошиқмай йўлга тушди.  
Йўлда икки бор тулкига дуч келди. Лекин хонаки  
итлар каби уларни қувлаб ўтирмади. Табиатан бу хил  
ишларда жуда идрокли, аҳамиятсиз нарсаларга бекор-  
га ҳовлиқавермасди.

Коравой сурувлардан бирига яқинлашганда қорон-  
ги чўқкан эди. Сурув итлари уни дарров пайқашди.  
Галалашиб от қўйишиди. Коравой изига қайтиди. Лекин  
аввалгидек ўпкасини кўлтикламади. Илдамлигига ишон-  
ган тарзда, бир текисда қочища давом этаркан, бора-  
бора бу қилиғидан алами келди. Салдан кейин алами

орга айланди. Бироқ ўзини жиловлади. Зора қайтиб кетишса, деган андишада оралик масофани саклаб келаверди. Таъкибчилар орасидан ўзидек қоп-кора, жуссадор ит илгарила чиккач эса кўнглидаги орланиш қасосга ўхшаш қайнок туйғу билан алмашинди. Ўзида олишувга кучли иштиёк хис этди. Аммо кучлар тенгсизлиги сабабли, бу истак қандай тез пайдо бўлган бўлса, шу суръатда иззиз йўқолди. Негаки ўрта жардаги олишувдан у тегишли хулоса чиқара билган, тенгсиз жангдан ё майиб, ё бекорга нобуд бўлиши мумкинлигини англаб етганди. Олишувда куч эмас, кўпроқ вазият ҳал этувчи роль ўйнади. Қора ит жуда илгарила, вазият ўзининг фойдасига ўзгарганини сезган эсада, Коравой дастлаб хиссиётга бўй бермади. Аммо сўнгги дақикаларда кўнглида қасос ўти қайта алантанниб, ортидан соядай эргашиб келаётган қора безбетнинг боплаб адабини бергиси, юрагини аёвсиз ёндираётган ғалати оташни шу йўсинда туймоқ истади. Агар ортиқча тайсалласа, ич-ичидан кўзғалган ададсиз аланга жисми-жонини куйдириб юборадигандек, шафқатсиз майл кўйида югуришни хиёл сусайтирди. Қора итни кўз кирида кузатиб, ҳамлага ҳозирлана бошлади. Рақиби етай-етай деганда эса яшин тезлигига ёнига ўтирилиб, унинг томоғига оғиз солди. Қора аҳмоқ анча ортда узун-қисқа бўлиб келаётган шерикларига ишониб, хужумга тайёргарлик кўрмаган экан, бир ҳамладаёқ жон таслим қила қолди. Коравой рақибини мавҳэтмоқни хаёлига келтирмаган, кутилмаган бу зафаридан бир муддат гангиб турди-да, сўнг оёғини кўлига олди. Ўзга итларни чангда колдириб кетди.

Қора итни мавҳэтган бўлса-да, Коравой ўзини ғолиб хис этмади. Худди оч қоринга овқат ейишдек, кейинчалик буни одатий ҳол деб билди. Рақиби хужум қилди, у эса тинчитди, тамом-вассалом. Энг ёмони у ўзга бир туйғудан талвасада эди. Шу пайтгача қўй-кўзиларга емиш деб қарамаган Коравойда йиртқичлик хисси уйғонганди. Бошда сурув томонга шунчаки қизиқиши туфайли борган бўлса, эндиликда ўлжа умидида ташриф этмоқни ўйларди. Ёйилиб юрган қўй-кўзилар тайёр емиш эканини фавқулодда идрок этди. Худди товуклардек, уларни ҳам тутиб ейиш мумкинлигини

фаҳмлаб колди. Уни олдига солиб қувган сурув итларини гўшт-ёғдан мастиликкан гўрсўхталар деб гумон килди.

Қоравой тўсатдан турилган бу янги туйғу исканжасида эртаси кечгача безовталаниб юрди. Оқшом қоронфисида қирга чиқиб, яна сурув томонни кузатди. Қоронфида гулхан шуъласини кўрди, итларнинг хуришини эшилди. Қорни таталаб, аста йўртиб, йўлга тушди. Бироқ узок юриш керак бўлмади. Йўлда подаданми, сурувданми адашиб қолган уч совликдан бирини осонгина тинчитиб, бўкиб қолгунча гўшт еди. Қолганини одатдагидек, шудгор қилинган буғдойпоя чеккасига кўмиб чангалзорга қайтди.

\* \* \*

Товуқхона қоровулининг отган ўки Қоравойнинг ҳаётida кескин ўзгаришлар юз беришига сабаб бўлди. Уни инсонга қарам қилиб қўйди.

Қоравой ўкка кузнинг ўрталарида, яъни йиртқичлик фаолияти айни гуллаб-яшнаган бир пайтда дучор бўлди. Ўққа дуч келгунга қадар у дала-даштда адашиб қолган қўй-қўзилардан бир нечасини зимдан тинчитди. Шунингдек, ора-орада товуқхонани ҳам эсдан чиқармади. Вакти-вакти билан у ердан ҳам насибасини айириб еб юрди. Баданига жир битиб, чангалзордаги майда жониворлар билан умуман иши бўлмай қўйди. Қилган бирдан-бир иши — у ердан ёввойи малла мушукни ҳайдаш бўлди.

Аслида у мушукка анчадан буён кек сақлаб келарди. Нега деганда, мушук унинг кўз ўнгига майда жониворларни осонгина тутиб оларди-да. Қоравой емишни қизғанмади, ўзи учун хийла мушкул бўлган юмушни мушук томонидан жўнгина адо этилишидан қаҳри келди. Жанжалга эса чангалзор этагидаги сайҳонликда умргузаронлик қиласидиган бошқа бир юмронқозиклар оиласидаги бикка семиз ва басавлат қўрикчи юмронқозикнинг қўлга тушиши сабаб бўлди. Қоравой уни анчадан буён кўз остига олиб келарди-ю, лекин хеч тутолмасди. Бир куни уни мушукнинг чангалида қўриб, фазабдан тутакиб кетди. Мушукка қарши аёвсиз уруш

эълон килди. Бу уруш ёввойи жониворлар хаётида камдан-кам учрайдиган бир вазиятда ўтди. Бунда хар икки томон ҳам сабр-бардошнинг улкан синовини бошидан кечиришга тўғри келди.

Ўшанда мушук оғзидағи ўлжаси билан Қоравойдан осонгина қочиб қутулган, яъни лип этиб буталарнинг бири устига чиқиб олганди. Қоравой бошда обдан юқорига сапчиди. Ёввойиларча қутуриб, хонаки итлардай акиллаб сакради. Бора-бора акиллаши ириллашга, ириллаши сукутга алмашинди. Тишлари даҳшатли бир даражада шакирлаб кетди. Мушук, оғзида ўлжа, унинг бўғилишларига парвоям қилмади. Ёнида икки боласи, унинг устидан мушукларча кулди. Бироқ у жуда эрта қувонганди. Кутимганда Қоравой бута тагига чўзилиб ётиб олди. Ётган жойидан тепага қараш оғирлик қилди шекилли, бирор ўн дақиқадан сўнг ўрнидан қўзғалиб, чўнқайиб ўтириб олди. Газабдан чўғланган кўзларига айёрлик ифодаси қалқиди: «Қани қачонгача шоҳда ўтиаркансан!» Итнинг мақсадини англаган мушук, даставвал андак тахликага тушди. Сўнгра оғзидағи ўлжа билан таҳдидли бириллади. Қоравой парво қилмади, тумшуғини ялаш билан кифояланди. Бечора мушук оғир ахволда қолганди. Қанчалик бақувват бўлмасин, барибир секин-аста жаги тола бошлади. Аммо шунга қарамай, оғзидагини ташлашни хаёлига ҳам келтирмасди.

У шу кўйда оқшомгача ўтириди. Жаги толгандан-толиб, роса бўларича бўлди. Ўлжаси залворлигина, боз устига, уни шоҳда тутиб туриш жуда мушкул эди. Пастда эса жағлари темирдек рақиби чидам билан пойлаб турарди.

Мушук ўлжасини бир амаллаб оёқлари остига жойлаштиаркан, чуқур сўлиш олди. Айни шу паллада новда кимирлаб, панжаси тагидаги ўлжа тап этиб Қоравойнинг олдига тушди. Ит ғанимини алам ўтида қовуриб, ўлжани баҳузур тушириди. Шундан сўнг ҳам у бута тагидан кетмади. Тумшук ялаб, мушукка кўз тикиб ўтираверди.

Каттагина ўлжадан айрилиб, ҳам бутоқда ўтираверриб, тоқати тоқ бўлган мушук охири қаҳрини сочди. Юқори лабини жийириб, мўйловларини диккайтириб,

хўзлари ғазабу нафратга тўлиб, ўткир овозда бигиллади: «Ютадиганингни ютдинг, яна нима керак сенга, абрах?! Корангни ўчирмайсанми, ярамас!» Коравой эрмаклаб ҳурди: «Этингни бурдалайман, этингни!» Мушук баттар бигиллади: «Йўқол, ярамас! Текинхўр, суллоҳ!» Коравой калта ириллади: «Туш, этингни бурдалайман!» Мушукнинг бигиллашида энди ялинчоқ оҳанг бор эди: «Нима қилдим мен сенга? Ютадиганингни ютдинг, кетавермайсанми энди, тинчгина». Коравой бўғиздан ириллади: «Этингни нимталамасдан кетиш йўқ!» Мушук қисқа-қисқа бигиллаб, юқоридаги савонни такрорлайди: «Нима қилдим мен сенга?» Коравой чўзиқ ириллади: «Изгинангни қуритаман, бу ерга хўжайин мен!» Мушук ғазабкор бигиллади: «Бекорларни айтибсан! Сен шумшук, сурбет қанакасига бу ернинг хўжайини бўласан?! Утган йили қоранг ҳам йўқ эди... Мен эса бу ерда беш йилдан бери яшайман». Коравой чўзиброк ириллади: «Энди яшамайсан!»

Қисқаси, улар ўртасидаги даҳанаки жанг ярим тунгача давом этди. Дунёдаги жамики сўкиш ва ҳақоратлар қайта-қайта такрорланди. Охири иккиси ҳам сукутга толди. Зоҳиран шунақа эди. Аслида иккиси ҳам хушёр — бир-бирини пойлашарди. Шўрлик мушуклар тонг отгунча бутоқда қолиб кетишли.

Она мушук юрак ютиб ерга сакраганда, тонг оқарган эди. Туни билан мижжа қоқмай чиккан Коравой уни чакалакзор бўйлаб қува кетди. Мушук яна бир бута шохига тирмасиб, зўрға қутулиб қолди. Коравой бута тагига намойишкорона узала тушиб ётиб олди. Оғир ахволда қолган мушук, энди нима қилдим, деган оҳанга зорланиб-зорланиб миёвлади. Болалари у ёқдан озорланиб жавоб кайтарди. Мушук уларга, зинхор ерга туша кўрманглар, дея уқтириди-да, яна пастга сакради. Тағин қув-кув бошланди. Бу сафар ҳам мушук бута шохидаги халос топди.

Бу ҳол қуёш чикқунга қадар уч-тўрт бор такрорланди. Охир-оқибат, мушук чангалзорда ризқи қийилганини англаш етди. Аммо қаерга боради? Жой-ку топилар-а, лекин манову маҳлуқдан қандай қутулиш мумкин? Чангалзорнинг қайси бир бурчидаги қолган болалари зорланиб, юрагини баттар эзмокда эди. Шунда

унинг эсига ҳув олисдаги мозортепа тушди. Энди фактат ўша ердагина паноҳ топиш мумкин. Мушук у ерда жуда кўп бор бўлиб, ҳар сафар мўл-кўл ўлжа билан қайтганди. Эндиликда ҳамма гап манову сурбетни чалғитиб, қочиб кутулиш-да. Аммо калта оёқлари билан қаергача қочиб бориш мумкин. Даشتга чиқиши билан манову ярамас бирпасда етиб олади. Аммо бутокда ҳам бир умр қолиб бўлмайди-ку.

У сўнгти уринишни таваккал қилди. Бутоқдан ерга сакради-да, чанглазор оралаб даштга кочди. Мозортепани коралаб, ўзича гўё шамолдай елди. Даشتда Коравой унга бир зумда етди. Йўлида учраган тор ковак мушукнинг жонига ора кирди. У вактида ўзини ковакка урди. Коравой ковакка бошини тикиб, ириллаб, тишларини шакирлатиб, роса жонини олди. Ҳайтовур, шу пайт узоқдан эшакли йўловчи кўриниб, Коравой ноилож уни ҳоли колдирди. Барча ёввойи жониворлар каби Коравой ҳам одамлардан ўзини жуда узок олиб юради.

Фурсатдан фойдаланган мушук қочиб қолди. Коравойнинг даштга дайдиб кетганидан фойдаланиб, ўша оқшомдаёқ болаларини мозортепага эргаштириб кетди.

Мушукни хайдагандан сўнг, Коравойнинг майда жониворлар билан умуман иши бўлмай қолди. Товуқ ва кўй этига кўниkke нафси ўзга емишни тан олмай қўйди. Эндиликда у корнини хеч қийналмасдан тўйдирди. Товуқхона эгаси минг пойламасин, у ердан ўз насибасини ҳамиша айириб келарди. Оқибат, коровул бу ишга чек қўйди. Кеч оқшомлардан бирида йирик сочма ўқ билан унинг қўймичидан яралашга муваффак бўлди.

Ўша куни Коравой чанглазорга бир амаллаб етиб келди-да, чўзилиб қолди. Ичи ёниб, жароҳати шу кадар азоб бердики, эсини танигандан бери бу қадар азоб ва ташналикини илк бор тувиши эди. Тўртинчи куни очлик ва ташналиқдан силласи куриб, нафаси чиқмай қолди. Ноchor қолган барча жониворлар каби каттакон бошини оёқлари устига қўйиб, ўлимни кута бошлади. Кўзларидан нур кетиб, олам хира тус олган бир пайтда, бутазорда кимдир юрганини пайқади. Шунда

Вужудини тарк эта бошлаган тириклик қайта жонланди. Ўзи не ахволда-ю, ҳужумга шайланишга уринди. Аммо кучи факат ириллашга етди, холос. Ириллаши билан шарпа тинди. Бундан хиёл бўлса-да руҳланган Коравой юқори лунжини титратиб, яна кучлирок ириллади. Босиб келаётган балони шу йўл билан даф этадигандек, бу ишга бор кувватини сарфлади. Сўнг нафасини ростлаш учун бошини яна оёқлари устига қўйди. Худди шу аснода буталар орасидан кўлига болта тутган одам боласи чиқиб келди. Бу — итлар урушган куни нариги қирғоқда янтоқ чопиб юрган — Толмас деган йигитча эди. Бугун ўтин килгани боши оғиб чангальзорга келиб қолганди.

Болани кўргач, Коравойнинг вужудига қайта кувват инди. Унга ташланмоқ ўйида олға ҳаракатланмоқ истади. Бироқ қўймичидаги жароҳат бунга изн бермади. У ириллаш билан чекланаркан, ночорлиги кор қилиб, ингиллаб юборди. Ингилласа-да, кўзлари чўёдек ёнарди. Ўша чўғ оташида ёндиromoқчилик, болага чексиз адноват ила боқаркан, тинимсиз ириллар, ора-сира тишларини шакирлатиб, каршисидаги кимсанинг ҳар бир хатти-ҳаракатини зимдан кузатарди.

Толмас ёввойи итга дуч келганини дарров фахмланди. Ириллашидан унинг дардманд эканини пайқаб, бута шохлари орасидан секин мўралаган ва итнинг човут солмоққа холи келмаслигига ишонч ҳосил қилгачгина, сайхонликка чиққанди. Табиатан, жониворларга унинг меҳри баланд эди. Агар шу топда ит ўрнига бирон-бир тулкига рўпарў келганида ҳам унга мўйна сифатида карамаган бўларди. Сирасини айтганда, бундай болалар қишлоқда кам топилади. Қишлоқ болаларининг умри табиат қўйнида, турли жониворлар орасида ўтса-да, негадир улар ит ва мушукларни камроқ эъзозлашади, ёввойи жониворларга эса ўта шафқатсиз муносабатда бўлишади. Ит ва мушуклар қишлоқ ахли учун қадрсиз. Уларнинг бирга яшashi эса шунчаки хаёт такозоси, холос. Толмас бу каби хусусиятлардан холи, айникса, у итларни алоҳида меҳр билан яхши кўрарди. Табиий, Коравой буни билмас, қаршисидаги болага ғаним кўзи билан тикилиб, бетўхтов ириллар эди.

Йигитча ғойиб бўлгач, у тинчланиб, яна бошини оёклари устига қўйди. Нолакор фингшиб, қуймичини ялади. Еган емишлари кўз олдидан ўтиб, бир фингшиса, сувнинг шилдираб оқишлари кулоқлари остида сас бериб, икки бор нола тортарди.

Толмас яна қархисида пайдо бўлганида, унинг кўзларидан тагин нур сўна бошлаганди. Буни ўлимнинг дастлабки аломати деб эмас, ўлимга тайёргарликнинг илк кўринишлари десак, тўғрироқ бўлади. Ночор қолган ёввойи жонивор ўлимни мана шу хилда сокин ва мардонавор қаршилайди. Аввалига рухи чўкиб, кўзларидан нур кетади, сўнг бора-бора юраги уришдан охисат тўхтаб, йўқлик сари жимгина кетади. Жонивор учун ночорлик — ўлимдир.

Болани кўргач тагин жонланди. Тинчгина ўлишга қўймаётган бу икки оёкли «махлукка» ғазабкор бокаркан, сенга нима керак, деган оҳангда таҳдидли ириллади. Бунга жавобан Толмас кўйнидан яримта нон олдида, унинг олдига ташлади. Турган гап Коравой уни емиш деб билмади. Нонга киё ҳам бокмай, болага қараб ириллашда давом этди. Йигитча буталар ортига чекингачгина, тумшуғи тагида ётган нонни исқаб кўрди. Нондан узоқдаги сирли кишлоқ хиди — тутун ва яна алланималарнинг қоришиқ иси келарди. У нонни жафлари орасига истар-истамас олди. Нон дағал туюлиб, қайта ерга ташлади. Нотаниш емиш нотаниш хиди ва мазаси билан уни ҳуркитиб турарди. У сочилган ушоклардан бирини астагина илиб еди-да, сўнг нонни покпокиза туширди. Танасига бир оз қувват иниб, бошини адл тутиб, бола яширинган томонга адоватли тикилди. Ириллади. Йигитчанинг кетмаганини у сезиб турарди.

Коравоининг одамзод билан танишуви янада аникорфи, қарамлиги мана шу тарзда бошланди. Лекин у қарамликка осонликча бўй бермади.

\* \* \*

— Оббо, сен билан ҳеч гўжамиз пишмайдиганга ўхшайди-ку, а!

Бу гапни Толмас учинчи куни айтди. Бу пайтда Коравой кўзларини пес-лес қилганича, идишдаги сув-

ни шалоплатиб ичмокда эди. Идиш у томон узун калтак ёрдамида сурилганди.

Коравой сувни шалоплатиб ичиб бўлгач, емиш умидида унга тикилди. Толмас қўйнидан нон чикааркан, пўписали оҳангда деди:

— Ўқрайишни бас қиласанг, нон йўқ сенга.

Коравой тумшуқ ялаб, гоҳ унга, гоҳ қўлидаги нонга бокаркан, оҳиста ириллади. Овозида илгариги фазаб ва таҳдид йўқ эди. Нон ташланавермагач, ириллаши фингшишга айланди. Лунжини ялай-ялай фингшиди, олга интилиброқ фингшиди. Ириллаб фингшиди, фингшиб ириллади.

— Дуруст, — деди бола. — Шаштингдан тушаяпсан. Демак, ақлинг кирайпти. Ма, ол.

Улоқтирилган нонни у ҳаводаёк илиб олди. Бунинг учун олдинги тирсакларини сал кўтариш кифоя қилди. Орқа оёклари ҳануз ўзига бўйсунмас, аммо ахволи кундан-кунга яхшиланиб бораётганини сезиб турарди.

Коравой нонни ортиқча шовқинсиз эди. Бироқ бола сал яқинлашиши билан қозик тишлирини иржайтириб, тағин ирилламоқни бошлади.

— Туфи-ий, жуда бетамиз ҳайвон экансан-ку! — Толмаснинг жаҳли қўзиб, ерга тупурди.

Бунга жавобан Коравой қаттиқ вовуллаб берди. Кўзлари фазабдан чакнаб, ерни тирнаброқ хурди.

— Нафини билмайдиган тентак экансан! — деди бола ортига тисарилар экан чинакамига ўпкаланиб. — Яхшилик ёқмайдиган ҳайвон экансан! Агар шундай қилаверсанг, қайтиб қорамниям кўрсатмайман. Ўласан кейин очдан.

Ўша куни у Толмасни барибир яқинига йўлатмади. Бу ишга орадан икки кун ўтибгина хиёл ройишлик берди. Аммо бу алдамчи холат — у истаган пайтда йигитчага ташланиб қолиши мумкин эди. Факат боладан келаётган таниш хид — тутун, тер ва яна алланималарнинг омихта исигина уни тутиб турарди. Ит зоти хидни яхши ажратади ва аъло даражада қадрлайди. Кейинги вақтда димоғига ўтиришган мана шу хидлар туфайлигина у боладан ёмонлик кутмай қўйган эса-да, ёввойилиги боис, унинг яхшиликларини хеч танига сиғдиромас, назарида, йигитча, бирда бўлмаса бирда,

ўзига зиён етказадигандек туюлаверарди. Толмас эрталаб яғринини силаганда ирилламаса-да, тиішларині яширган лунжи бетиним титраб турди. Мана шу қобиллиги эвазига әртаси у шұрва хиди анқиб турған бир талай сүяклар билан сийланди. Яраланганидан бүён бу қадар тотли таом емаганидан сүяқ деганлари бақувват тиішлари орасыда хасдек майдаланиб кетди.

Кейинчалик у болага ирилламай күйди. Үнга күнникди, күнглида андак меҳр ҳам үйғонди. Силаб-сийпащлари хуш ёқиб, баҳузур индамай ётадиган бўлди. Шунга қарамай, Толмас унинг бўйнига арқон солишга боти-нолмасди. Ҳар сафар белидаги арқонни ўзи билан олиб кетарди. Билдики, бу индамас маҳлук осонликча бўй бермайди. Талашиб-тортишаман деб жароҳатига жиддий зиён етказиб кўйиш мумкин.

Бу орада Коравой оқсоқланиб юра бошлаганди. Узоқ ётган бемор ташқарига интилгандек, жароҳати битган сайин, у дала-даштни кўмсамокда эди. Кунлардан бирида у устидаги елим ёпинғични шилдиратиб даштга чиқди. Ёпинғични ёмғирда ивимасин дея Толмас ёпиб ингичка чизимча билан маҳкамлаб кўйганди. Даштга чиққач ёпинғичнинг шилдираши унинг ғашига тега бошлади. Кузги ёмғирдан намиққан ерни бир-бир босиб бораркан, аввалига бир-икки ириллаб кўйди. Сўнг тўсатдан ёнига қайрилди-да, ёпинғичга оғиз солиб, уни бурда-бурда килиб ташлади.

Ўша куни Толмас олиб келадиган одатдаги насибасини кутмай, жарда санғиб кетди. Жар ўта файзсиз, унда-бунда мунғайиб турған кўп каптарларни демаса, жон зотидан асар йўқ, ёз бўйи паррандаларга бошпана бўлган минглаб уялар энди бўйм-бўш эди. Табиий, бу хил файзсизликни киши илғайди, жонивор учун эса айни муддао, ортиқча чолғувсиз ҳаракатланади.

Коравой муюлишга етмай кишлоқ итлари томонидан хомталаш қилинган сигир лошига дуч келди. Очкўзликдан ичи-таши баравар қалтираб, ўлаксага ёпишиди. Азбаройи хузур қилганидан ириллаб, фингшиб, ингиллаб тўйиб гўшт еди. Бу энди тутун хидидан ҳоли ҳақиқий емиш эди. Буни жуда соғинган эди. Шу сабаб, ўзи йўқлигига бу ерда кўп ахмоқона ишлар юз берганини дастлаб пайқамади. Қачонки нафси ором олгачгина

жирканч қишлоқ итларининг исини сезди. Чамаси куни кечагина қишлоқ итлари бу жойда роса базми-жамшид қилишганди. У қаҳрли ириллаб, чор-атрофни бир сира кўздан кечириб чиқди-да, сўнг ўлакса устига тупрок сочиб, бир четига ўз белгисини қолдириди.

У тор сўкмокдан юқорига ўрлаб, кирга туташ баланд тепаликка чиқди. Чўнқайганча атрофни синчков ва узок кузатди. Қир бетидаги сурувларни кўрса-да, бу сафар кўнглига шумлик ораламади. Корни тўқ, бунинг устига, жарда икки кунга етарли озуқаси бор эди.

Бироқ изига кайтаётib, кайфи ёмон бузулди. Не кўз билан кўрсинки, сигир лоши кўмилган ерни икки нотаниш ит бемалол титкилаб туарди. У ириллаганча итлар сари отилди. Фазаби тошганидан ҳатто оқсоклигини хам унуди. Ҳар ёмоннинг бир яххиси бор дегандек, жонхолатда югуриш мобайнода тиришган пайлари ёзилиб, илгаригидек росмана чопа бошлади.

Оралиқ масофа уч юз одимча қолганида, итлар ўзлари томон қуюндеқ елиб келаётган «Қора ажал»ни пайқаб қолишиди. Итлар табиатан зийрак бўлишади. «Қора ажал»нинг неларга кодирлигини важоҳатиданоқ илғашди. Коғмаган номард дея, қишлоқ сари зинғиллашди. Коравой илдам эди, ярим йўлда нимжонроқ итни кувиб етди. Агар ит қайрилиб қаршилик кўрсатганда, ўртада беомон жанг бўлиши мукаррар эди. Бироқ у ожиз ва нотавонлигини ҳар бир хатти-харакатида ошкор этиб, шувоклар орасига уриб кетди-да, гўё бирор жонини суғуриб олаётгандек, бор овозда вангилашга тушди. Ёвқур табиатли жон заифдан хамиша жирканиб келгандек, тиши тегмай турибок «дод»лаб дунёни бошига кўтараётган маҳлукдан Коравой ирганди. Унга кўз қирини ташлаш билан кифояланиб, олдиндаги итнинг изидан қувишда давом этди.

Коравойни бу қадар қаҳрлантирган нарса аслида емиш эмас, балки ёввойи жондорлар орасида мавжуд азалий таомилга бўлган хиёнат эди. У ўлакса устига тупрок сочибгина қолмай, одатга биноан ўз белгисини хам муҳрлаганди. Аммо хонаки бефаросат итлар бу белгини англашмаган, менсишмаган эмас, шунчаки англашмаган. Гар белгини сезишган эса-да, унинг ўзига хос моҳиятини унчалик тушунишмаган. Сирасини

айтганда, кўз очиши билан инсонга муте бўлмиш хонаки итлар ёввойи жондорларнинг бу хилдаги нозик имо-ишораларини қаердан англашсин. Ўз навбатида, туткунлик туфайли шу кўйга тушишган итларнинг бу борада айтарли даражада айбдор эмаслигини Коравой қаердан билсин. Айни пайтда, у итларни менсимасликда айблаб, тиш қайраб бораради. Орта қолган итнинг ожизона ангиллашидан нафсонияти хийла қонган, ўзича унга мурувват қилганди. Эндиликда бутун қаҳру ғазаби олдиндаги итга қаратилган эди.

Аммо қочоқ жуда эпчил экан. Унга тутқич бермади. Коравой уни қишлоқкача таъқиб этиб борди. Ит қишлоқ кўчаларининг бирида кўздан ғойиб бўлгач, изига қайтди. Аста йўртиб, қишлоқ яқинидаги тепаликка кўтарилди. Тепалик устида чўнқайиб, нотаниш мухитни дикқат билан назаридан ўтказа бошлади.

Қишлоқка илк бор бақамти келиши эди. Ҳовлилар, кўчада одамлар, мол-хол ва итлар, онда-сонда ўтиб турган машиналар унга жуда қизик ва тушункисиз эди. Бу хил гавжум оламни у ҳали хеч кўрмаганди.

Қишлоқ ҳам, ундаги гавжумлик ҳам Коравойга ёқмади. Тепалик остидан гуриллааб ўтган занжирили тракторнинг овози юрагида вахима уйғотиб, у беихтиёр фингшиди. Ҳар лаҳзада қочишига шайланиб, оёққа қалкиди. Аммо кетишга ошиқмади. Трактор ўтиб кетгач, яна чўнқайди. Қишлоқ бўйида тўп тутган болалар пайдо бўлмагунча, у шу тарзда қотиб ўтириди. Сўнг ошиқмай изига бурилди-да, аста юриб кетди. У яқингинада нечоғлик азоб тортганлигини бутунлай унутган, кузги илиқ офтоб нурида чўимилиб бораради.

Коравой шу кетишда дала-даштда сангий-сангий кечга томон қўналрасига қайтди. Қаерда юрмасин, қаерда тентирамасин тунда у албатта чангалзорга қайтарди. Чангалзор у учун ватан эди. Хонаки итлар ўзи ўрганган хонадонни нечоғли севса, у ҳам чакалакзорга шу даражада меҳр кўйганди.

Қайтиб камар яқинида нон ва суяк бўлакларини кўрди. Толмас ҳатто идишниям сувга тўлдириб кетганди. Нон ва суяклардан ўша таниш қишлоқ ҳиди анқирди. Бу сафар қорни тўқ учун на нонга қаради, на сувга. Шунингдек, боланинг бу қилиғига айрича аҳамият

бериб ўтирмади. У ҳаётни қай йўсинда кўрса, шу тарзда қабул қилас ва турган гап, йигитчанинг бу ғамхўрлигини табиий бир ҳол сифатида биларди.

Бу ғамхўрликларнинг туб сабаби эса эртаси куни аён бўлди.

\* \* \*

Эртаси эрталаб Толмас чангалзорда пайдо бўлганида, Қоравой тунги дайдишдан қайтиб, камар ёнида чўзилиб ётарди. Буталар орасидан чиқиб келган йигитчани кўраркан, думини сезилар-сезилмас қимирлатиб, охиста ириллади. Бола ҳадикланиб тўхтади. Итнинг ириллаши нозик тортиб, эркалангандома оҳанг касб этгач, у юрак ютиб олға юрди. Олға юраркан, кўйнидан яримта нон чиқарди. Чўнтағидан қофозга ўроғлик товук суюкларини олди. Кўлидаги емішларни хушомадгўёна тарзда итнинг тумшуғи тагига кўяркан, ўзи ҳам қаватига чўкди.

Қоравой суюкларни иштаха билан, нонни эса истаристамас еди. Тунда у бекорга изғимаган, тун окқанда кечаги сигир лошига бориб, нафсини қондириб қайтганди. Шунинг-чун, болага миннатдорчиликка ўхаш ортиқча хатти-характлар қилмади. Улкан ва беўхшоворқ бошини оёқлари устига кўйиб, аста пинакка кетди. Ана шунда у яғиринида ёқимли сийпалашни хис этди. Силаш унга хуш ёқиб, чўзиб фингшиди. Боланинг илиқ кафти бўйни ва қулоқлари томон ўтгач, у шу қадар роҳат қилдики, таранг вужуди ўз-ўзидан бўшашиб, бутун инон-ихтиёрини йигитчага топшириди кўйди. Боланинг кўли томоқлари тагини пайпаслай бошлагач, бошини сал кўтариб, кўзлари эса ўша-ўша юмиқ, унинг bemalol харакатланишига имкон берди. Толмаснинг бармоқлари боши ва тумшуғи бўйлаб сирпана бошлагач, дабдурустдан онасининг ялаб-юлқашлари эсига тушиб, чўзиқ ва нолакор оҳангда инграб юборди. Бунга сари бола уни силаб-сийпашда давом этди. Инграр экан, бир неча лаҳзалик фафлат уйқусига кетганини сезмай қолди. Унинг тутқунлигига ушбу сониялар етарли бўлди. Эсини танигандан бери кунлари меҳнатда ўтаётган, кўлидан ҳар иш келадиган бола ўзи олдин-

дан тайёрлаб қўйган тумшуқбандни итнинг тумшуғига сездирмай кийдира олди. Бу иш жараёнида иккинчи кафт сийпащдан бўшамади.

Коравой ўзига келиб, тумшугини банди холда кўрди. Нималигини тушунмай бир зум донг котиб турди. Сўнг Раши келиб, каттиқ пишқирди. Ириллади. Бощини силкиб, банддан осонгина халос топмоқчи бўлди. Қайдам, банд каттиқ сириб тураверди. У баттар ажабланиб, панжаларини ишга солди. Ўзича тумшуқбандни тилка-пора қилиб ташламоқчи бўлди. Афсус, у айик эмас, бор-йўғи бир ит — чарм тасмани узишга йўл бўлсин унга. Ириллай туриб, кутуриб хурмоқ истади. Буни қарангки, жағи бир энлиқдан нари очилмади. Бу холдан у қаттиқ талвасага тушди. Оёқка қалқиб, панжалари билан тумшуқбандни таталаганча, даҳшат билан ириллади. Бу вактда пишиқ аркон бўйнига тушиб бўлганди. Йигитча бу қилигини овоз чиқариб қўйида-гича изохлади:

— Нега тўполон қиласан, тентак. Бу юришингда эрта бир кун ўққа учиб ўласан-ку. Мен эса сени ўзимга ит қилиб оламан. Бирга юриб, бирга тўрамиз.

Арқондан эси чиқиб кетган Коравой баттар тўпалин кўтарди. Болага куч бермай, уни кўкси билан уриб йикитди. Аммо Толмас чакки эмасди. Тоғанинг калтагини еб, меҳнатда обдан пишган эмасми, арқонни кўйиб юбормади. Итни чакалакзордан сургаб чиқарди. Тортиша-тортиша чангалзор четига қантариғли кулбет эшак ёнига келишди. Бола арқоннинг иккинчи учини эшакнинг бўйнига боғлади. Коравой ҳам бўш келмади. Ҳар томонга юлқинавериб, шўрлик эшакни каловлатиб ташлади. Толмас эшакка миниб, кишлокқа юзланди. Коравой бўғилишига қарамай, тўрут оёғини ерга тиради. Намиқкан янтоқ ва шувокларни босиб-янчиб, ерга узун из колдириб кета бошлади. Кўп ўтмай эшак жонивор гарқ терга ботди. Қараса иш чатоқ, Коравой олдинга сапчиди, тепага сапчиди, гоҳ эшакка, гоҳ томогини бўғиб қўйган арқонга човут солди. Аммо банди жағи ўзи истаганчалик очилмай, бу холдан баттар кутурди. Дала йўлига чикқач эса, умуман, оёқ тираб олди. Қишлокқа ҳам шу холда кириб борди. Ўткинчиларга майна бўлиб, эшик олди.

даги итларни ҳурдириб, катакон яшил дарвозага рўпарў бўлди. Ичкарига кираётиб, кетига кучли тепки еди. Сургалиб бораётган жойида ёнига кўз қирини ташлаб, йўғон, бадқовоқ, қоп-қора бир кимсани кўрди. Бу банда боланинг тоғаси Узункул қора эди.

Коравой ховли сахнида узун из қолдириб, бурчакдаги чоғроққина бостирма тагига судралиб борди. Толмас тоғаси кўмагида итнинг бўйнига бакувват занжир солди. Сўнг ўлгудек ҳолдан тойган эшакни қўрага ҳайдаб, итнинг қаршисида фўддайиб турган тоғасининг ёнига келди.

— Айтган итинг шуми? — деб сўради тоға жиякли-ри қизарган кўзларини Коравойга қаттиқ тикиб.

— Щу.

— Ёмонга ўхшамайди, — деди тоға итга янада синчков бокиб. — Томоғига қаралса, хўқиздай ит бўладиган сиёхи бор. Лекин жуда кайсар экан.

— Қайсар, жуда қайсар.

— Тумшуғидагини олиб ташласанг хам бўлар.

— Хавфли. Ёввойи-да.

— Ҳечқиси йўқ, кўп тиршанглайверса, мулла минганд эшакдай қип қўямиз.

— Фақат... урманг.

— Нега, гапга кирмаса хеч аяш йўқ.

— Баттар ғашиғади-да.

— Бу гапинг тўғри, — Тоға итга яқин борди. Коравой ириллаганча, яна кетига тисарилди: — Вахший-ку бунинг. У-у, зоти тоза бунинг. Бир қарашда билдим. Бунақаси кам топилади. Лекин итвозлар кўрса, ўлиб қолишади.

Бу гапдан боланинг руҳи тушиб, тоғасига норози бокди.

— Улар учун судраб келмадим-ку буни мен, — деди сўнг ботинолмайроқ.

Тоға унинг эътирозига зифирча аҳамият бермади. Сигарет ёндириб, кўзи итда, тепага тутун пуллади. Ўзича минғирлаб нималардир деди. Бόла эса ерга маъюс термилиб қолди. Азалдан итларга меҳри баланд бўлгани учун Коравойни сургаб келишдан тап тортмаганди. Унинг бирдан-бир орзуси окшом кўйларини ёйгани чикқанида, ёнида итини эргаштириб юриш эди. Ёш

бўлишига қарамай, у ит танлашни биларди. Бунгача кўлига яхши бир ит тушганди. Кўшни қишлоқдан кучукваччалигида олиб келиб, тарбиялаб вояга етказган жойида, тоғаси уни сариқ «Жигули»да келган шаҳарлик бир итбозга сотиб юборганди. Яхши ит ниҳоятда юкори баҳоланишини ўшандада билганди. Энди айни шу савдо Қоравойнинг бошига тушиб турар, ит савдосининг ҳадисини олган тоға унга бамисоли бир хазинага боққандай муносабатда бўлиб, ичида тушадиган тушимни ҳалитдан хомчўт қилмоқда эди.

Толмас унинг минғир-минғирига бир муддат кулок тутиб тургач, яна деди:

— Яхши ит кўйга ҳам керак-ку, тоға.

Тоға тағин индамади. Сигаретини лаби четига қистириб, аста бориб итнинг тумшуғига тепиб кўрмоқчи бўлди. Қаерга тушиб қолдим, дея теваракка жонсарак аланглаб турган Қоравой унинг узатилган оёғига яшин тезлигида ташланди. Заптига қараганда, агар тумшуғи исканжада бўлмаганида, тоғанинг оёғини узиб қўлига берарди. Тоға унинг бу қилиғидан асло ранжимади, қайтамга тунд башарасига кулги ёйилиб, хирқироқ овозда хе-хелаб қўйди. Чамаси, хомчўтни якунлаб, юзага келган рақамдан ўзида йўқ шод эди. Ҳақиқатдан, бир оздан кейин ичидағи юзага тепчиди.

— Итинг канча туришини биласанми? — деди афтидан кулги аримай. — Биз учун бунинг шунчаки бир ит. Қадрсиз, ҳаром жонивор. Аммо итвозлар учун накд хазинанинг ўзи...

Ўзи не умидда сургаб келган итнинг эрта бир кун кўлидан кетишидан хавфландими, ё тоғанинг булатли кунда «йилт» этган күёш нуридай сийрак табассумидан ботирландими, боланинг жавоби зардали чиқди.

— Бермайман ҳеч кимга!

Шундагина тоға ким билан фикрлашаётганини пай-каб, сергакланди. Ҳиссиётга берилганидан ичидағи рижиди. Боланинг гали оғир ботиб, ғазаби қўзиди.

— Буни сендан сўраб ўтирумаймиз! — деди ўшқириб. — Бор, кўрани тозала! Йўғасам, ит-питинг билан ерга қовуштириб қўяман!

Қоравой тўсатдан ўдағайлашга тушган тунд юзли бу одамни ёмон кўриб қолди. Болага-ку адовати чек-

сиз эди. Аммо ночор ахволдалиги сабабли ғазаб ва нафратини ҳаракатда изҳор этмади. Сўнгра унинг қаҳри бўйнидаги залворли занжирга кўчди. Банди қилинган тумшуғини кулгили равишда тўлғаб, ердачувалиб ётган занжирни тишламоққа уринди. Бу қилиғи билан тоғанинг заҳарханда кулгисига сабаб бўлди.

У бехуда ҳаракатлардан ҳориб, оғилхона томи узра кўзга ташланиб турган киру тоғларга ҳасрат билан тикиларкан, ич-ичидан қалкиб, силкиб чиқаётган ириллашдан тийилиб, озодликнинг қадр-қимматини фавқулодда англаб етди. Бўйини чирмаган занжирда аллақандай яширин куч мужассамдай туюлди. Қандай куч экан бу? Ўша сирнинг тагига етмок ўйида бир зумга тинчланаркан, шалдираб ғашига тегаётган занжирга ва унинг нариги учи маҳкамланган Темир қозикка диккатла разм солди. Темир иси хотирасига ўрнашиб, ундан эҳтиёт бўлмоқ лозимлигини кўнглига маҳкам туғди.

Қоравой халос топмоқдан умидини узмаган кўйи, тўсатдан тинчланиб, қизиқсиниб ҳовлини кўздан кечирмоққа киришди. Боя пайқамаган экан, ҳовли юзида бир гала товук ивирсиб юрарди. Бироқ у товукларга киё боқмади. Ҳозир кўнглига емиш сиғмасди. Супа четида ўзига оро беряётган тарғил мушук ҳам диккатини жалб этолмади. Қўрадан гўнг юкланган замбилғалтакни сургаб чиқкан Толмасга кўзи тушгач эса, тағин қарашлари вахшиёна тус олиб, таҳдидли ириллади. Боланинг қўлидан еган хўракларини тамомила унутиб, унга ғаним кўзи билан тикиларкан, бақувват панжаларини ерга ботириб, беихтиёр олға интилди. Қани энди, имкон бўлса-ю, борасолиб болани тилка-пора қилиб ташласа. Уйдан сигарет тутатиб чиқкан тоға, унинг фикрини уққандай, болани нимадир деб қаттиқ тергади.

Шу пайт дарвозада икки бола ва бир аёл пайдо бўлди. Итни кўрган болалар унга томон югуришганди, тоға ўдағайлаб, уларни изига қайтарди. Сўнгра Қоравойга ишора қилиб, аёлга нимадир деди. Аёлнинг чехрасига ташвиш қўниб, итга қўрқибгина караб кўйди.

Бу орада қўрадан сигир мўъради, эчки ингичка овозда унга жўр бўлди. Қўшни ҳовлида ит ҳурди. Кўчадан машина гуриллаб ўтди. Девор устидаги хўроз

алланимадан чўчиб, бор овозда қақиллади. Буларнинг ҳаммаси Коравойнинг нафратини баттар оширди. Туткинликка чидаёлмай яна қозик атрофида чарх ура бошлади. Ўзига еттиёт бегона бу мухитдан жирканиб, дарғазаб талпинаркан, охири, иложисизлик кор қилиб, ангиллаб юборди. Сўнг кўзларидан нур кетиб, гумтурс этиб олди.

Коравой туткинликка кўниколмагандек, одамларга хам меҳр қўёлмади. Кейинчалик эса Толмасдан бўлак кимсага рўйхушлик бермади. Бошда йигитчага қаттиқ кек сақлаб юрди-да, юз берган бир-икки воқеадан сўнг унга кўнгли илиб, маҳкам боғланиб қолди. Аммо хали унгача анча вақт бор эди.

\* \* \*

Банди килинган куннинг эртаси эрксизликдан Коравойнинг руҳи шу қадар тушкин эдики, корни нихоят оч бўлишига қарамай ялоқдаги ювиндига қиё бокмади. Шунингдек бирон кимсани якинига йўлатмади. Толмас унинг тумшуғидан бандни ечиб олаётганида, кутуриб, ташланиб қолди. Аммо занжир тортилиб, у чалканча ағдарилиб тушди. Шундан сўнг Коравой жонжади билан занжирга оғиз солди. Уни бехуда узок ғажиди. Ғажийверганидан занг босган темир ялтиллаб кетди. Қачонки, харакатлари зое эканлигини сезгачгина, тинчланди. Боқишлиари локайдлашди.

Толмас ҳар гал ялоқдаги ювундини алмаштирапкан, унга яқин келмай, овқат егин, дея аврашга уринар, эркалар, баъзан эса беозоргина пўписа қиласди. Аммо Коравой миқ этмас, лоақал ириллаб кўйишни ўзига эп кўрмасди. Бола унинг нигоҳини ўзига қартиш ниятида ер тепинар, бироқ бир нуктада қотган сўнік кўзларни жалб этиш осон эмасди. Унинг сассиз исёнидан уйдагилар хабардор эди. Охири бу хол тоғанинг жонига тегди. Учинчи куни у кўчадан ичиб келди. Аста чайқалиб, итнинг бошида ғўдайди.

— Емаялтими? — деди тишлари орасидан гўшт парчаларини туфлаб.

— Еб колар, — деди Толмас тоғасининг важоҳатидан ҳадикланиб.

— Емайди, — тоға итга бошдан-оёғ кўз югуртириди.— Нима бало, бўридан тарқаганми бу. Феъли жуда чарс. Боши бошга ўхшамайди, феъли феълга. Хоҳласанг, ипакдай майн қип бераман.

Бола, керакмас, деб бош чайқади.

— Индамасанг, одам бўмайди бунинг, — тоға үлкан корнини қашлаб, чукур нафас олди. — Қара, одам келдими, ит келдими, эътибор берай демайди. Ўхшатиб тумшуғига тепсанг.

— Тепсангиз баттар бўлади.

— Ўлиб кетмайдими, — тоға оғирлигини у оёғидан бу оёғига солди. — Бўйинсинмаса уриш керак. Калтакдан зўр даво йўқ бунга. Кўзини қара, тиккалай ейман дейди-я. Тепсанг айлантириб.

Тоға изига қайриларкан, кутилмаганда феъли айниди. Ўзини мудраганга солиб ётган итнинг тумшуғига тепмасдан кетолмади. Бу хил қиликларидан жуда хузур киларди у. Аммо бу сафарги кўнгилхушлиги анча қимматга тушди. Чала ўлиқдай бўлиб ётган ит, у оёқ силташи билан бирдан жонланиб, туфлисининг учидан тишлаб олди. Занжир калталик қилиб, Коравойнинг оғзи етгани шу бўлди. Шунда ўртада ажабтовур торт-торт бошланди. Ит ириллаб туфлини ўзига тортар, ранги қув ўчган тоға эса «ҳай-ҳай»лаганча гавдасини ортга ташлар, аммо ит зўр — халос топмоқ мушкул эди. Агар бола кўмакка келмаганида, бу ишнинг окибати ёмон эди. Ҳайтовур, Толмас вактида қимирлаб, тоғанинг йўғон сонидан тутди. Икковлашиб тортдилар. Оёғи исканжадан чиқиб, тоға кети билан ерга ўтириб қолди. Коравойнинг даҳшатли важоҳатини жуда яқиндан кўрди. Ажал тимсолига айланиб, ер тирнаганча олға интилаётган ит, занжир узилиб кетгудек бўлса бурдалаб ташлашини хис этаркан, беихтиёр кети билан ортига силжиди. Бирор беш-олти одимни шу созда босиб ўтди. Ва шундан сўнггина оёғи эсига тушди. Ўнг оёғи панжаларини йўқ гумон қилиб, ошиғич оёғи учига кўл юборди. Йўқ, панжалари омон, туфлисининг титилиб кетган учига тикиларкан, шундан бўлак пояфзали йўқлиги, куни энди этикка қолганини ўйлаб, ичи туз сепгандай ачишиб кетди. Теваракка кўз қирини югуртириб, калтак кидирди. Кейин

бошига келиб, итни қарғамоққа тушган аёлини жер-киб ташлаб, аста ўрнидан қўзғалди. Бирор кўрмади-микан деган ҳадикда қўшни девор томонга қараб қўйди.

Тоға девор тагида ётган калтак сари, кетини қока-коқа, туфлиси учига қарай-қарай, борди. Калтакни қўлига олиб, изига қайтаркан, йўлда қўзлари ёшга тўла жиянига рўпарў бўлди.

— Ҳа? — деди ажабланиб.

— Урманг, тоға, — деди бола илтижо тўла оҳангда.

— Нима?

— Итни урманг. Йиғиб қўйган пулим бор. Бераман шуни сизга. Ўзингизга туфли оласиз. Факат итни урманг.

— Қоч!

— Урманг, тогажон.

— Қоч деяпман!

— Жо-он тоға, урманг.

Бола тарсаки зарбидан ерга учиб тушди. Салдан сўнг Қоравой ҳам калтак остида қолди. Ит тап тортмай олға ташланар, тоға урап, ёвузиликда иккиси ҳам бир-биридан қолишмасди.

Тоға калтак синиб кетмагунча тинчимади. Қўлида-ги таёқ бўлагини четга улоқтириб, янгисини кидирап-кан, аёли орага тушиб, уни нари олиб кетди.

Қоравой калтакдан вужуди зирқираб оғриса-да, финг-шимади. Ириллаб, қўзларини аёли етовида сўкинганча узоклашиб бораётган тоғадан узмай, бирпас турди. Сўнг бурилиб, қозикқа яқин ерга бориб чўзилди. Кал-так еган бикинларини ялаб-юлқимоққа тушди. Бу юмуш-ни ҳам ириллаб бажарди.

Очлик курсин, эртаси у барибир ялoққа тумшук урди. Ўта бемаза ювиндини шалоплатиб иди. Бунинг эвазига бола томонидан яримта нон билан сийланди. Бу сийловдан миннатдор бўлиш ўрнига, қўзларини ола-кула килиб, нонни бирпасда тинчиди. Нафси ором олгач, бир муддат узокдаги қирларга термулиб турди-да, кейин яна занжирни оғзига олди. Бу сафар ўта ҳафсала билан узок чайнади. Охири бир иш чиқарол-маслигига кўзи етгач, оғзидағини ташлаб, бостирма тўрига ўтиб ётди. Тунда даштни қўмсаб, бехосдан увлаб юборди. Нидо кўнглига хуш ёқиб, салқин тунла-

ри увламоқни одат қилди. Бирок унинг бу қилифи тоғага ёқмади. Кўзи илинмаган кезлари деразани шараклатиб очар, бақирап, сўкинар, ўлдираман, деб бўкирарди. Шундан сўнг Қоравой маълум фурсат овозини ўчирап, тун ярмидан оққандада эса яна увламоққа тушарди.

Бир тун тоға оқ иштон ва оқ кўйлақда, мисоли арвоҳдай қархисида пайдо бўлди. Қизик, Қоравой бу гал у билан пачакилашиб ўтирумади. Бостирма тўрига биқиниб, жимгина ётди. Тоға кўлидаги калтагини кўз кўркитарга силкиб-силкиб, изига қайрилиб кетди.

Қоравойни қўрқди деб бўлмасди. Одатдагидек, тоғадан зифирча чўчимади. Гап шунда эдики, занжирбанд холда калтак тутган одам билан олишмоқдан маъни йўклигини идрок этишга улгурганди. Ўша кунги калтак унга яхшигина сабоқ бўлганди. Аммо юрагида тоғага нисбатан ададсиз адоват сақланиб қолди.

Орадан кунлар ўтиши билан Толмасда ғалати жонсаракликни пайқади. Йигитча ялоғини ювундига очикойдин тўлдирап эди-ю, лекин нонни бекитиқча берарди. Боланинг бу иши бекага ёқмаслигини Қоравой сезди. Бирок шунга қарамай, у болага эл бўлмади. Унинг эркалашларига энди ирилламаса-да, аввалгидек беэътибор муносабатда эди.

Агар хўроз воқеаси юз бермаганида, унинг болага элакиши қийин бўларди. Воқеа мутлоқа кутилмагандан содир бўлди.

Бир куни мудраб ётиб, Қоравой димогида таниш хидни туйди. Кўзларини аста очиб, бошида ғўддайиб турган хўрозни кўрди. Ит кўзини очгач, хўроз «кўк» деб кўйди-да, намойишкорона одимлар билан ялоқ томон юрди. Парранда хиди эркинлик даврларини эсига тушириб, Қоравой енгил титраб кетди. Бу орада хўроз ялоқ атрофидаги чиқиндиларни чўқиб, товукларни чақирмок ўйида кўкрак кериб, бошини ортга ташлади. Аммо овоз чиқаришга улгурмади. Кўз очиб юмгунча итнинг чангалида ҳаром котди.

Бу иш уйдагиларнинг кўз ўнгига рўй берди. Уй бекаси қарғаб чопди. Тоға ошиқмай қўлга калтакни олди. Толмас кўра тозалаб юрарди, девор ошиб тоғага бет бўлди. Тоға ўнг кўлидаги калтакни чап қўлига

олиб, боланинг юзига шапалоқ тортди. Сўнг ерпарчин бўлиб ётган боланинг оёклари устидан ҳатлаб ўтиб, калтакни ўнгай тутганча, итга пешвоз юрди.

Қоравой, ўнг панжаси ўлжаси устида, тоғани, ириллаб каршилади. Бека отган чўпни ҳаводаёқ илиб олди. Бунгача бола ўрнидан турди. Илгариги калтаклаш вақтидагидек бир четда қўрқиб турмай, қаловланиб яна орага тушди. Бу сафар тоғадан мушт еб, ўмбалоқ ошиб кетди.

Ва у то эс-хушини йифиб олгунча, ит калтак остида қолди..Бу даъфа Қоравой, ўлжаси оёғи остида бўлгани учунми, чекинишни хаёлига келтирмади. Бўйнидаги занжирни узгудек даражада таранг тортиб, тоғага интиларкан, зарбаларга чап беришниям унутмади. Йигитча келиб тоғанинг қўлига ёпишмагунча ҳар уч зарбдан бири яғринига гурсиллаб тушиб турди. Тоға тагин Толмас билан андармон бўлди. Бу гал уни силтаб отди. Бола ялоқ олдига бориб тушди. Тоға бот қўлига калтакни олди. У урди, хотини қарғаб турди.

Бу воқеа устига тоғанинг қадрдони, кишлоқ дўхтири Ориф тирриқ келиб қолмаганида, қўзи қонга тўлган тоға итни майиб қилиб қўйиши тайин эди. Ҳайтовур, Ориф тирриқ вақтида келди. Келасолиб, тоғанинг қўлидан калтакни тортиб олди. Тоға оғзидан кўпик сачратиб бўкирди:

— Қоч, ўлдираман бу ярамасни!

— Ули-ей, кап-катта одам ит билан тенг бўп ётибсанми хали, — Ориф тирриқ тоғани итариб ташлади.— Уялмайсанми, э!

— Ҳўрозни еди, ҳўрозни, — тоға баттар диконглади.

— Шу битта ҳўроз бўлса, ана бизга товин, — деди Ориф тирриқ уни яна итариб. — Ана катакдан истаганингча танлаб олавер.

— Вей, нега итрасан, а! — Тоға энди унга ҳезланди. — Нима, ит билан ялоғинг биттами, туртасан одамни!

— Ўзингни бос, э, — Ориф тирриқ унинг нозик томирини сийпалади. — Юр, яримтам бор, майдалаймиз. Қанча кучинг бўлса, бутилкага кўрсат. Нима қйласан, ит билан ит бўлиб. Э-э, ўл, одам бўмай.

«Яримта» сўзини эшитиб, тоға сал пастга тушди.

— Хўрозни бошига етди-да, Орифбой, — деди нолакор оҳангда. — Вишший сурт хўроз эди.

— Бош-кўзингдан садака, — Ориф тирриқ унинг билагидан тутди. — Юр. Щўрваем совиб қолди. Сизам юринг, келин.

Тоға йўлига тайсаллади.

— Шошма, Ориф, буни бир ёқлик қилай. Эмасам, кўнглим тинчимайди.

— Ит бўма, юр, — Ориф тирриқ уни сургади. — Келин сизам ҳаялламанг. Ҳовлида ит билан бола ёлғиз қолди. Бири ириллаб фингшиди. Бири йиғлади. Ит еган калтагидан эмас, эрксизликдан, nocturnalismdan fingga shidi. Бола эса етимлигидан кўз ёши қилди. Алами устига алами қўшилиб йиғлади. Шунча иш қиламан, бирор билмайди деб, бу йил қишиняна пальтоси, тоғасининг эски пахталигида ўтказишни ўйлаб йиғлади. Итнинг занжири етадиган масофада ўтирганини сезмай, ўксисиб-ўксисиб йиғлади. Катта-кичик алами сероб эди, — бари бирдан хуруж қилиб, эзилиб-эзилиб йиғлади.

Бола йиғлайтуриб бирдан ҳушёр тортди. Гўнг юки ориқ билагида илиқ нафас туйиб, бошини кўтарди. Ёш тўла кўзлари ҳайратдан катта очилди. Негаки, шудамгача ҳеч рўйхушлик бермай келаётган Қоравой унинг билагини яламоқда эди. Бундан боланинг баттар хўрлиги келди. Елкаси титраб-титраб, овози бўғилиб-бўғилиб йиғлади.

Улар мана шу тарзда дўстлашди. Қоравой воқеани фаҳмлади. Бу ҳовлида ёлғиз болагина унга қайшишини охир-оқибат англаб етди. Унинг ўксисиб йиғлашларини ўзининг мунгли увлашларига менгзади. Ўзи сезиб-сезмай болага меҳр қўйди.

\* \* \*

Киш олди Толмас итни занжирдан бўшатди.

Бу пайтга келиб, Қоравой бутунлай тинчиб, ортиқ тўполон қилмай қўйганди. Аслида у зохиран шундай эди, ботинан эса, унинг ичида куюн яшарди. Қуюн ҳаракатга келган кезлари у эркинликни қўмсаб, гоҳ

сассиз, гоҳ баралла нола килар, яъни фингширди. Фингшиб туриб, кўп ҳолларда, одатдагидек, занжирга оғиз солар, аввалгидек жон-жаҳди билан эмас, балки бир қадар эҳтиёткорлик билан чайнар, бир кун келиб уни уза олишга инонгандек, комил ишонч билан ғажирди. Занжирни ғажиётганида кўзи узоқдаги қирларда бўларди. Озодликнинг шамоли бошқача бўлади деганларидек, дашт томондан эсадиган муздек ел унга ўзгача таъсир этар, диморида намиқкан шувоқ ва янтоқларнинг намхуш хидини сезиб, кўксидан инграшга ўхшаш нидо юзага қалқиб чиқарди.

Шунга қарамай, сўнгги вактда унда икки қарама-қарши туйфу кураша бошлаганди. Биринчиси ёввойилик. Тутқунлик ундаги бу рухни тўла синдира олмаган бўлса-да, гоҳида у иккинчи туйфу — хонакиликка билиб-бilmай бўйсунар, ялоққа ювунди тўкилганда думини ликиллатишдан ўзини тиёлмай қоларди. Ҳатто баъсан тоғага рўйхушлик бергандай, гўё ундан калтак емагандай, яқиндагина жонини оғритиб, қулок ва думини кесганини унутгандай бўларди. Аммо хонакилик туйфуси унда узоққа чўзилмас, такдирга тан бергандай кўринган ит бирдан жонланиб, қозик айланар, ғажийверганидан ялтироқ тус олган занжирни хидлаб, охиста, лекин ваҳшиёна оҳангда ириллар, сўнг чўнқайган кўйи дашт томонга узоқ тикилиб қоларди. Бу хил кезларда у косада овқат кўтариб келган кимсага қайрилиб ҳам қарамасди. Диққат қилган одам унинг ичидагу түғён ўйнаётганини, ночорлиги туфайлигина ўзини босиб турганлигини пайқаши қийин эмасди.

Бу икки хил ҳолат итда зимдан кечётгани учун уйдагилар унинг рухидаги ғалаённи сезишимас, уларнинг назарида ит аллақачон тутқунликка кўнниккан эди. Ёнидаги кимсанинг кўнглида не кечётганини фаҳмлай олмайдиган одамзод қандайдир бир итнинг руҳий изтиробларини қаердан ҳам пайқарди дейсиз. Инсон учун у шунчаки бир жонивор. Аммо у шунчаки жонивор эмасди, балки кўриш, хис этиш, қувониш ва қайғу чекиш каби хусусиятлардан холи бўлмаган, ўзига хос оламига эга тирик вужуд эди. У озодлик истарди, эркинлик шамоли билан басма-бас югурмоқни кўмсарди. Шувоқзорда думалаб, ерни таталашни орзу

қиларди. Чангалзорни бошдан-оёқ титкилаб, ундаги жонзотларнинг юрагига кутқу солмоқни хоҳларди. Қисқаси, эрксизлик ундаги ёввойи ва ёвқур рухни енга олмаган, кўринишдангина у хонакига ўхшарди, холос. Толмас айни ўшанга алданди. Аслидаям итга ёлғиз у қаарарди. Тора эса кўкламда қишлоқ оралаши лозим бўлган сариқ «Жигули» эгасини сабрсизлик билан кутарди. У Коравойдай ит мингдан битта бўлишини яхши билгани учун ҳам унга худди бокувдаги хўқизга карагандай хирс билан бокарди. Ўзига қолса-ку, «Жигули» эгасини аллақачон қидириб топган, мўмайгина пулни нақд санаб олган бўларди-ю, аммо ҳамма бало шундаки, унинг манзилини билмасди. Билмагани туфайли ҳам сабр этмоқдан ўзга иложи йўқ эди. Айникона, катта қайраочлик чўпон оғайниси келиб кетганидан бери тоғанинг итга нисбатан муносабати янада ўзгарган. Чўпон оғайниси Коравойни кўрибок «их»лаб юборганди. Бир кўй бераман, итни менга бер, деганди. Тора уни аҳмок санаб кулган. «Жигули» эгасидан ундирадиган пулга у айтган кўйлардан нечтаси келишини ўзича хомчўт қилиб, иршанглаб-иршанглаб кулган. Чўпон оғайниси кўйлар сонини учтага чиқарганда ҳам эрмаклаб кулишни кўймаган ва ошинасининг аразлаб кетишидан тариқча ташвишланмаган эди. Оғайниси кетгач, итнинг қошига келиб тиржайган, бурун торта-торта, томок кира-кира мастона илжайган: «зап хайвон-да бу ўзи, — деган сўнг. — Боқсанг-боқмасанг, семиртирсанг-семиртирмасанг нархи осмонда. Харидор неча кило юк киларкан, деб турмайди. Сен эса емиш ғамини емайсан. Туриши билан хазина бу. Ҳуувв, чақчайган кўзларингдан сени. Тумшүнгидан ўпай... туфи-ий, ўргилай». Ит нохушланиб, ириллайди. Бунга сари тоға ҳузур қиласди. Сўнг жиянига, бунинг томоғига яхшилаб кара, дейди. Лекин энди ниятини худабехуда ошкор этмайди. Зимдан кулимсираб, қара итга, дейди. Толмас унинг айтганини қиласман деб, янгасидан гап эшигади. Ҳуллас, чўпон оғайниси келиб кетгандан кейин, тоғанинг феъли ўзгариб, итга ортиқ тирғалмай кўйди. Ҳўроз воқеасида, жаҳл устида итни уриб ўлдириб қўймаганидан энди қувонади. Ориф тирриққа, сенга яримта қарздорман, дейди. Ориф тир-

риқ ажабланади: «Нега?» Тоға сирли ишшаяди: «Ўзим биламан». «Қачон қўясан?» дейди оғайниси. Тоға янада жумбоқли жавоб қиласди: «Кўкламда». Ориф тирриқ хеч балони тушунмагани сайин тоға ичидаги маза киласди: «Барибир яримта қўяман сенга». Бу орада икки жўра неча-неча «яримта»ни бошига етишди-ю, лекин тоға ўша гапини хеч канда қилмайди: «Сенга яримта қарздорман, жўра».

Толмас бу гаплардан бехабар, итнинг тезроқ эл бўлишини кутади. Оқшом кўйларини ёйгани даштга хайдаб чикқанида, каватида ити юришини истайди. Қачонки, ит ўзига меҳр кўйганига тўла ишонч хосил килгачгина, у Коравойни занжирдан бўшатди.

Коравой ўзининг халос бўлганига дастлаб инонмади. Бўйнида ўзи кўнинкан залворни хис этмагач, аввалига бор бўйи билан керишди. Кейин ерда чуваланиб ётган занжирга кўз кирини ташлаб, ишониб-ишонмай икки-уч одим олға босди. Ўгирилиб яна занжирга қарди. Қайтиб уни исқаб кўришдан ҳам эринмади. Ута зорикиб кутган озодликка бу қадар жўнгина эришганидан у гангиб қолганди. Аммо бу хол узок давом этмади. У тагин бир керишди-да, каттиқ силкинди. Пишқирди. Кейин кутилмаганда забт ила девор ошиб, кўздан ғойиб бўлди. Йигитча бай-байлаганча қолаверди.

Коравой биринчи деворга тирмашиб, иккинчи ва учинчи девордан учиб ўтди. Ва зумда ўзини даштда кўрди. Даштга чиққач, чангалзорни коралаб шундай тез юурдики, ҳаётида бу қадар елмаганди.

У чангалзорни бир қур айлангач, гайрати ичига сифмай, даштга интилди. Ўша куни жар қолмади, кир колмади, қадами етганча ҳамма ерни бирма-бир тентиб чиқди. Чангалзорга ярим тунда қайтиб, боланинг келиб кетганини сезди. Бунга парво қилмади. Кундузи ошиққани сабабли эндиликда хеч шошилмай, ҳар бир бута тагини эринмай исқаб чиқди. Ўзи йўклигига кўплаб нотаниш жониворлар қадам ранжида қилганини пайқади. Сўнг ўша ўзига ғоят қадрдан камар бўйига узала тушиб ётди. Орадан озгина вакт ўтмай тўсатдан юрагини фусса қоплади. Дастьлаб, нелигини англаёлмай бехуда фингшиди. Кейин болани қўмсаётганини фахм-

лаб колиб, қишлоқ сари елди. Қишлоқ итларининг ўтакасини ёриб, деворлардан бамисоли шарпадай учиб ўтди. Ҳовлига енгил сакраб тушганида, деразадан нур сўнган, борлик зимиштон тун пардасига чулғанганд эди. У борасолиб ялоққа ёпишди. Ялоқдаги ювундини икки ҳаплашда ютиб, катор деразалар тагига келди. Ичкаридан тараалаётган хидни бир-бир исказб, бола ётган уй деразасини топди. Бола хидини тўйиб-тўйиб исказа, дераза тагига чўнқайди. Сўнг ички бир истакка бўйсишиб, чўзилиб ётиб олди. Тонгда болани бир қувонтириб, яна даштни қора тортди. Илгаригидек деворлардан учиб ўтди, итларнинг юрагини ёриб ўтди.

Қоравойни кўрган боланинг дили шодликка тўлиб, кеча тоғасидан еган калтакларини ҳам унуди. Тоғанинг ҳам кўнгли хотиржам тортиб, боғлаб кўй, бошка бўшатма, деб амир қилди. Бирок Қоравой уларга тутқич бермади. Кейинги сафарлар ҳам инсон истагига бўйсинганди. Шу тариқа, кундузлари дала-даштда санғиб, тунлари бирровгина ҳовлига келиб-кетишни одат қилди.

Ўзига садоқатли йўлдош орзу қилиб, ярим ёввойи итга эга бўлган бола тунлари ухламай бўлса-да, Қоравойни қайта банди этишга харакат қилиб кўрди. Аммо барча харакатлари зое кетди. Ит алдовга учмади. Охири тоға бу ишга жазм этди. Шунда Қоравой унга нисбатан адватини ошкор қилиб, думбасидан бир чакса эт узиб, ўзига баттол бир ғаним орттириди. Тоға унинг бу қилмишини кечирмади. Фазаби тошганидан ит эвазига келадиган мўмай фойдани ҳам унуди. Аслида, унинг феъли шу — кўз ўнгидагини қадрлайди, у нарса қўлидан кетдими, тамом — ҳатто ачиниб ҳам ўтирумайди. Энди унинг бирдан-бир мақсади итнинг жонини олмок эди. Бир куни у итни отиб енгил яралашга муваффак бўлди. Шундан сўнг Қоравой бошка қорасини кўрсатмади.

У яна ёввойиларча яшай бошлади. Бир оқшом таниш хиддан унинг димоги яйради. Минглаб ўзга хидлар орасидан ўша қадрдон исни дархол илгади. Бу пайтда у корнини обдан тўйғазиб, чангальзорда думалаб ётарди. Хиёл эринчоқлик билан ташқарига йўналди. Чангальзор яқинидаги қўйларни, ўзи томон ошиқ-

май келаётган Толмасни кўрди. Беихтиёр ириллади. Кейин кўнгли ийиб, дум силкиб, болага пешвоз юрди. Тумшуғини ялаб, пишқириб, эркаланиб боланинг атрофини бир айланиб чиқди. Сўнг чўзиқ фингшиб, унинг кўлини ялади. Йигитча бошига кўл чўзганди, у бирдан сергак тортди. Ёввойлик нуқси тўла мужассамлашган кўзлари оловланиб, боланинг кўлига ҳадикли назар солди. Кўлида арқонга ўхшаш шубҳали нарса кўрмагач, силаб-сийпашига қўйиб берди. Лекин энди думини ликиллатмади. Сийпаш қанчалик ёқимли бўлмасин, бу сафар хушёрликни бир лаҳза унутмади.

Ўша оқшом боланинг кўнглини қувончга тўлдириб, унга ҳамроҳ бўлди. Бирга-бирга қўй боқдилар. Энг қизиги, Коравой унинг кўйларига ўлжа сифатида қарамади. Бўлмаса, икки кун бурун даштда бир қўйни имижимида тинчитган. Бугун эса ўша кўйнинг қолган-кутганини пақкос тушириб, чангалзорда «корин қашлаб» ётганди.

Боланинг севинчи узоққа чўзилмади. Қайтар маҳалда Коравой уни қишлоқ яқинидаги дўнгликкача кузатиб келди-да, у ёғига жилмай туриб олди. Толмас ялиниб кўрди, ёлвориб кўрди. Коравой эргашмади. Йўл ўртасида чўнқайганча қолди. Йигитча белидан камарини ечишга ботинмади. Шунингдек, ечмоқдан маъни йўқ, хирсадай итни сургашга барибир кучи етмасди. Иккинчидан, ҳозиргина дум силкиб турган ит сал бежо ҳаракат сезса, дарҳол тишларининг оқини кўрсатар, бутун важоҳатидан, ҳаддингдан ошма, йўқса, чатоқ қиласман, деган огоҳлантириш барадла акс этиб турарди.

Шу тариқа, улар ҳар оқшом даштда учрашадиган бўлдилар. Толмас бир кун келиб уни уйга олиб кетишига ишонган ҳолда, итни уйдан яширинча олиб чиқкан емишлар билан сийларди. Ўз навбатида Коравой ҳам уни эркалар, гоҳ кўкси билан болани уриб йиқитиб, устидан ирғишлиб ўйнар, гоҳо бўйнидан қучоклаган йигитчани сургаб кетар, гоҳо эса тумшуғини унинг пинжига суқиб, ғалати қилиқлар қиласарди. Аммо ўткир ва қаттиқ кўзлари бир зумга бўлса-да хушёрликни эсдан чиқармасди.

Бир сафар қизиқ бўлди. Толмас у билан олишар-

жан, сездирмай белидаги арқонни еча бошлади. Шунда беармон шўхлик қилаётган Қоравойнинг важоҳати кескин ўзгариб, кутириб хуришга тушди. Сўнг хуришдан тўхтаб, бошини бир ён кийшайтирганча даҳшатли тарзда ирилламокни бошлади. Бу ҳол бола қўлини белидан олмагунча давом этди. Кейин у аразлаб нари бориб ётди. Толмас яхши гапириб, силаб-сийпаб уни зўрға ўзига ийдирди.

Қоравой болага факат оқшомини бағишларди. Қолган пайт дашт қолмай, жар қолмай, уч қирнинг нари берисида дайдирди. Кишлок итларини даштга доритмай қўйди. Унинг бахтига даштда емиш дегани мўл эди. Аммо Қоравой у билан чекланмай ора-сира қўйларга ҳам хужум килиб турарди. У бу юмушни шу қадар усталик билан адo этардики, бирон кимса ундан гумон қилолмасди. Товуқхонага қилган юришлари ва ҳовлидаги хўroz сабаб чиккан мажоролар унинг ақлини янада пешлаган, тирик жонга нисбатан очик хужумнинг оқибати дилхиралиқ, ҳаттоқи ўлим хавфи билан якунланишини энди у яхши биларди. Билгани учун ҳам бу ишларни ими-жимида бажааради. Бундан ташқари, Қоравой ўлжасини очикда қолдирмасди. Ейдиеиди-да, қолганини одатдагидек ўзга бир ерга судраб бориб, кўмиб ташлайди. Аслида бу ҳолни кўпчилик хонаки итларда ҳам кузатиш мумкин. Қоравойда эса бу хусусият ёввойилик билан қоришиб, у кўмилган ўлжаси устига белгисини қолдириб кетарди.

У қанчалик изримаёнин, ўз худудини қанчалик кенгайтирасин, ётар жойи барибир чангалзор эди. Бу жиҳатдан у хонаки итларга тортган, бўлмаса, барча оғир қисматга чангалзорга яқин жойларда рўпарў келган. Шунга қарамай, бехавотирроқ ер қидиришни, яъни инини ўзгартиришни хаёлига келтирмасди.

Қоравой чангалзорга қаттиқ меҳр қўйганди. Айрим кунларни истисно қилмаганда, ҳар оқшом бола билан учрашиб туришни канда этмасди.

\* \* \*

У даштдан семиз қуён тутиб еган куни оқшом бола келмади. Қоравой чангалзор ёқасига чиқиб, уни узок

пойлаб ўтирди. Тунда эса кўнгли ўз-ўзидан буссага тўлиб, кўп безовталанди. Қишлоқни қоралаб икки бор йўлга тушди. Милтикни эслаб, хар сафар дўнгдан қайтди.

Эртаси ҳам бола қорасини кўрсатмагач, у ортиқ чидаёлмай ярим тунда қишлоқка энди. Одатдагидек, деворлар устидан шарпадек сирғалиб ўтди. Ҳовлига тушиб, у ерда ғалати бесарамжонликни пайқади. Кўнглидаги хавотир яна-да кучайиб, бола ётадиган хона деразаси ёнига келди. Ичкарига мўралаб, ғалати манзарани кўрди. Бола ўртадаги тўшакда алаҳсираб ётар, оппоқ ҳалатли бир аёл чўккалаганча унинг очиқ қорнини пайпаслар, четроқда қишлоқ дўхтири Ориф тирриқ, ёнида тоға, серрайиб туришарди. Бурчакда уй бекаси тош қотганди.

Қоравой бошда воқеани нотўғри англааб, дераза тирнаб ирилламоқчи бўлди. Қарасаки, ҳеч ким болага зуғум қилмаяпти. Лекин ёввойи кўнгли йигитчанинг аҳволи чатоқлигини дарров пайқади. Фингшиб, деразага бақамти келди. Ана оқ ҳалатли аёл қаддини ростлаб, Ориф тирриққа зарда билан нимадир деди. Бу сафар тирриқ баттар кунишиб, алланималар деб тўнфиллади. Жонсарак аёл унга кўл силтаб, тоғага нимадир деб буюрди. Тоға ёш боладай итоаткорлик билан ташқарига йўргалади.

Аслида воқеа бундай бўлган эди. Умрида касал нималигини билмаган бола тушга яқин бирдан ичимлаб қолди. Ўйдагилар аввалига ўзларича муолажа қилишиб, сўнг Ориф тириққа хабар беришди. У беморни у ён-бу ён кўриб, қорни оғриган кезлари ўзига қўллаб келадиган усул билан даволашга киришади, яъни арокқа туз қўшиб ичиради. У, синалган усул, деб оғиз кўпиртирса-да, боланинг аҳволи яхшиланмайди. Шу созда у яна бир кун ётади. Қачонки, аҳволи жуда чатоқлигини сезгачгина, Ориф тирриқ туман марказидан «тез ёрдам» чақиради. Мехрибонлиги тутиб ўзи боланинг бошида ўтиради. «Тез ёрдам» дўхтири bemordagi белгиларга караб, кўричагининг ёрилиб кетганини тахмин қиладиди, Ориф тиррикни «бефаҳм хўтиқ» деб сўкишдан ўзини тиёлмайди.

Қоравой айни шу воқеа устига келиб қолганди.

Болани замбилга олишгач, манзаранинг жуда хунуклигидан юраги зирқираб, ангиллаб юборди. Ҳаётида илк бор хадикланмай, уларга эргашиб кўчага чикди. Замбилда оташ бўлиб ётган боланинг қўлинин ялади. Боланинг кўз очиб, бошини силашини кутиб, тумшуғини суйкади. Ориф тирриқ уни боладан четлатди. Тоға унга эътибор ҳам бермади. Қоравой аввалига бир զ гангид турди, аммо бола ичкарига олингач, у бор овозда вовуллаб машина эшигига ёпишди. Тирноклари билан тирмаланиб тирмашди.

Машина қишлоқ кўчаларидан гизиллаб жўнади. Қоравой унга эргашди. Текис йўлга чикиб олгач, машина тезлигини оширди. Ит қанчалик илдам юурмасин бора-бора ортда қола бошлади. Катта йўлга чикаверишдаги муюлишда у машина корасини бутунлай йўқотди. Машина деганлари катта йўлда жуда сероб экан, тун бағрини тилкалаб ҳали у ёққа гизиллаб ўтади, ҳали бу ёққа.

Қоравой муюлишда гарангсиб туриб қолди. Асфальт йўлда искаланиб, бехуда тентиди. Изни йўқотганига тўла ишонгач, йўл бўйида чўнқайди. Ҳар ўтган машинага умидвор тикилиб тонгни оттирди. Тонгда йўлда ҳаракат кучайганда ҳам ўрнидан жилмади. Қишлоқ тарафдан эшак мингандан чол қўрингачгина ўтган-кайтганларнинг ғашига тегмасликка қарор қилгандай, сал наридаги ариқ ичига тушиб ётди.

Қуёш терак бўйи кўтарилганда, йўлда ўша таниш машина қўринди. Қоравой сапчиб ўрнидан турди-да, қишлоқ томонга бурилган машина кетидан елдек учди. Шўхчан акиллаб юурди, ирғишлаб-ирғишлаб юурди. Ҳовлига машина билан изма-из етиб келди. Кела солиб машина эшигига тирмашди, дум силкиб акиллади.

Машнина эшиги аста очилиб, ғамга ботган тоға қўринди: У ёқдан барзанги ҳайдовчи тушиб келди. Икковлашиб замбилни машинадан олишди. Бола жасади оппок чойшабга ўралган эса-да, Қоравой замбилда бола ётганини хидиданоқ билди. Чойшаб четини тумшуғи билан нуқиб бор овозда ангиллади. Ўнг панжаси билан чойшабни тортмоқчи бўлди. Кейин замбилга эргашиб ҳовлига кирди. Эшикка етгач, у ёғига ботинмай бўсағада туриб қолди. Фингшиб болани чақирди. Ичкаридан

аёл кишининг ўткир йиги овози отилиб чиққач, кўркиб, у ўзини четга олди. Эшикдан узоқлашмаса бирор корҳол юз берадигандек, бостирма тагига бориб турди. Куруқ ялоққа қиё боқмай, ховлидаги ҳаракатни жимгина кузата бошлади. У боланинг кўриниш бермаётганидан ҳайратда эса-да, қандайдир ёмон, жуда ёмон воқеа юз берганини фаҳмлаб турарди. Буни ховлини тутган йиги-сифидан, одамларнинг жонсарак ҳаракатидан идрок этмоқда эди.

Тобут лопиллаб ховлидан чиққанда, у одамларга эргашди. Боланинг тобутдалигини у исиданоқ билган, унинг ҳид билиш сезгиси теваракдаги барча ҳидларни бир-биридан ажратади.

Мозортепадаги барча таомилларни у четдан туриб кузатди. Орада ўзи чангалзордан ҳайдаган малла мушукка кўзи тушса-да, дикқатини чалғитмади. Одамларнинг сирли ҳаракатларини жимгина кузатиб тураверди.

У одамлар кетишгандан сўнггина қабр тепасига борди. Қабрни гир айланиб, искаланди. Боланинг қўл етиши қийин бўлган ер тагида қолганини сезгачгина, кўкка боқиб увлаб юборди. Чўзик, мунгли овоздан одамлар сергакланиб, йўлда кетиб боришаётган жойларида ортларга ўгирилишди. Қабр бошида ҳайбатли қора итни кўришиб, ҳайрон туриб қолишиди. Шунда кимдир пиқиллаб йиғлаб юборди. Бу — Ориф тиррик эди. Шўрлик озгин елкалари титраб-титраб йиғларди. Эркак йигисидан худо асрасин экан, одамлар жуда эзгин ҳолда йўлда давом этишди. Итнинг мунгли овози уларни қишлоққача таъқиб этиб турди.

Ўша куни Қоравой туни билан увлаб чиқди. Юрагида илк бор меҳр уйғотган, унга мухаббат қўйиб, силаб-сийлаб эркалаган яккаю-ягона кишисига мана шу тарзда аза очди.

Бу хол ҳар тун такрорланавергач, унинг қилифи одамларнинг дикқатини тортди. Қишлоқда ит ҳақида, унинг садокати хусусида гурунглар авж ола бошлади. Шу орада уни қўлга туширмоқчи бўлганлар ҳам топилиб қолди. Лекин у алдовларга учмади. Қўйилган тузокларни осонгина айланиб ўтди. Аввалгидек ёввойиларча яшай бошлади. Орада бир неча қўйга қирон

келтирди. Одамлар бу унинг иши эканлигини билишмади. Қишлоғасида тоғдан тушиб қелган бўрилардан кўришди.

Коравойнинг мислсиз садоқати эса бир неча афсоналарнинг юзага келишига сабаб бўлди. Унинг кўркам келбати кимларнингдир ичини куйдирди, кимларни дир хавасини келтирди.

Тоғанинг бошига айни шу гап-сўзлар етди.

\* \* \*

Коравой қочиб кетгач, тоға бир неча вақт унга қасдланиб юрган бўлса-да, уни қайта қўлга киритмоқ ниятидан осонгина воз кечганди. Аникроғи, уни унубиҳ ҳам юборганди. Коравой энди етиб бўлмас бир қўйрук, унга етишмоққа тоғада на тоқат, на ҳафсала бор эди. Бирок даврадаги гурунглардан тагин унинг ичи қизий бошлади. Айниқса, кўча бошидати Салом сариқнинг, «ўзиям ҳангидай ит экан, қўлга туширмасам армонда кетаман», деган гапидан сўнг пайтавасига курт тушиб қолди. Бир оқшом унинг уйига ўтишдан эринмади.

— Итга тегманг, ака, — деди бир оз чайналгандан сўнг, мақсадга кўчиб. — У бизга товин. Неча вақт ҳовлимда яшади. Жияним бечора мола судрагандай, аллақайси гўрдан судраб келганди. Обкелганда чивиндай жони бор эди, бокиб каттартирган биз бўламиз, ака.

Салом сариқ ажабланди.

— Ҳозир эркинликда юрибди-ку.

— Қочиб кетди-да, ярамас.

— Унда тезроқ эгалик қил.

— Шуни харакатидаман, ака.

— Мамадиёрнинг болалари тутмоққа уннаб юришган эмиш. Хабаринг борми?

— Улар билан ўзим гаплашиб қўяман, — тоғанинг ранги гезариб, бармокларини мушт қилди. — Ит жияннинг қабридан нари кетмаяптими, демак, у меники. Бирорнинг ҳакқи йўқ унда.

— Гапинг тўғри, — деди Салом сариқ. — Лекин беш қўл баравар эмас. Инсофи йўқ бирор одам отиб-

потиб кўйишидан қўрқаман. Ташвишим шундан, иним.

— Нега отаркан?

— Эгасиз ит бевош бўлади. Бирорга зиён етказса, садоқатли эди деб турмайди. Бунинг устига, унинг ҳаммани ҳавасини келтириб юрибди...

— Тутиб, боғлаб қўяман.

— Шундай қил.

— Шундай қиламан.

— Тўғриси, кўнглингга олма-ю, сенга унчалик ишонмайман. Узунқўл. Жуда камхафала одамсан, то кимирлагунингча... Яхиси, ўзим бир уннаб кўрай. Жонивор сабил кетмасин. А, нима дединг?

— Овора бўлманг.

— Чўзсанг, қараб турмайман.

— Чўзмайман.

Тоға Салом сариқнинг бир сўзлигини билади. Шунинг-чун, боши қотиб тадбир қидирмокқа тушди. Аммо тадбирсиз одамдан қандай тадбир чиқарди. Ўйлай-ўйлай топгани Ориф тирриқни авраш бўлди. Жўраси эса эшитишниям истамади.

— Итга, билсанг, хурматим жуда баланд, — деди негадир мижжалари намланиб. — Унинг садоқатини кўриб, тўғриси, ўзимниям ит бўғим кеп-кетаяпти. Кўй, тегма, ўз майлида юраверсин.

— Сен унга ит деб қарама, жўра, — тоға секин сирни оча бошлади. — У ит эмас, хазина. Бундай итга итвозлар қанча беришини биласанми?

Бу гапдан Ориф тирриқнинг ранги гезариб, унга олайиб қаради.

— Пул деб ҳали жиянингнинг қабрини бўзлатмоқчимисан!?

— Барибир бирор илиб кетади дейман-да.

— Азадор жониворга ким ҳам тега олиши мумкин?

Кар эмасдир, кўр эмасдир, тунлари не деб нола қилаётганини билишар ахир.

— Вактинча бу, бир қун келиб, юрагининг тапти босилар.

— Юрагининг тапти босилган куни тутарсан. Ҳозир эса тегма.

— Унгача илиб кетишлари мумкин деялман-ку.

— Ким илса, пес бўлсин!

— Кўп ўрланма, жўра, — шундай деяркан, това бирдан ҳайрон бўлди: — Ия, йиғлаяпсанми? Нима бўлди?

— Сен ит дейсан, — деди Ориф тирриқ кўз ёшини яширмай. — Бу ёқда менинг итим чикиб турибди.

— Нима гап?

— Опанг раҳматли тинч қўймаяпти мени, — Ориф тирриқ бурнини хунук тортиди. — Ҳар тун тушимга кириб, обориб-опкелаяпти... Ўзи шу дўхтириликка ўқиб бекор қилган эканман. Муаллимлик-пуаллимликка ўқисам дуруст бўларканми.

— Жиянни сен ўлдирмадинг-ку, ахир.

Ориф тирриқ бош эгиб, жим қолди: «Йўқ, мен ўлдирмадим», деёлмади. Кафтининг сирти билан кўзларини суртиб, чуқур хўрсинди.

— Куни битган экан-да, жўра, — това уни юпатмокқа тушди. — Кўй, кўп куйинаверма.

— Буни опанг... тушунмаяпти-да.

— Нима деяпти?

— Оппоқ либосда келиб... — Ориф тирриқнинг овози титраб, бир зум сукутга чўмди-да, сўнг шивирлагандай деди: — Бўғаяпти...

— А?!

— Ҳа, бўғаяпти.

— Лекин мёнга индамаяпти-ку? — Това беихтиёр ён-верига аланглаб олди.

— Сени жигарим деган чикар, лекин мени ёмон қийнаяпти. Тун чўқди дегунча этим жунжикаверади. Кеча туни билан ўтириб чиқдим. У ёқда итинг увлайди, бу ёқда... Эҳ-ҳ, овози бирам фамгин. Одамни йиғлагиси келади.

— Кўй, аёлга ўхшаб кўп кўз ёши қилаверма.

— Бўлганим шу.

— Буниси ҳали ҳолва, ёрдам бермасанг, бундан баттар бўлади.

— Нима деганинг бу? — Ориф тирриқ кўркиб кетди.

— Итни тутишга ёрдам беришдан бош тортганингни айтаяпман.

— Ахир сен пул учун... — Ориф тирриқ унга жавдираб қаради.

Тоға ёлғонлади:

- Алдадим. Синамоқчи эдим сени.
  - Бўзлаб турган жонни қандай қилиб тутамиз, а?
  - Бирор илиб кетса майлими? — Тоға баттар хужумга ўтди. — Итини асрой олмадинглар деб, опам икковимизният бўғиб кетмасин. Арвохини айтаяпман.
  - Нафасингни иссиқ қил.
  - Гапнинг бориям шу.
  - Йўқ, сен уни пул учун тутмокчисан, — Ориф тирриқ унга шубҳаланиб тикилди. — Кўзларинг айтиб турибди.
  - Пул учун эмас, — тоға кўзларини лўқ қилиб тагин ёлғонлади. — Жиянимнинг руҳи ҳакқи-хурмати уни ховлида кўз қорачигимдай асрамоқчиман. Тунлари эса бўш қўяман. Мозорга бориб тўйганича йиғлаб келаверсин. Бирор илиб кетса, арвохлар олдида балога қолмайлик дейман-да, жўражон.
  - Агар гапинг чин бўлса, ёрдам берганим бўлсин. Аммо-лекин арвохлардан жуда юрак олдириб кўйдим.
  - Бирор ноинсоф илиб кетмасин дейман-да.
  - Илиб кетса, ўлдираман!
  - Мамадиёр чўлокнинг уллари кўзларини олайтириб юрганимиш.
  - Эшитдим, — деди Ориф тирриқ бепарво. — Уйига бориб, кўрмиссанлар, азадор итният тутасанларми, деб жанжаллашиб келдим.
  - Айтмадинг-ку менга.
  - Айтадиган гап эмас-да.
  - Сен ўзи азалдан эсли одамсан...
  - Йўқ, мен эси йўқ эшакман...
- Иккиси бир неча дақиқа жим қолдилар. Тоға дўстининг бир бурда бўлиб қолган юзига шафқат хисси билан қарамоқ истади. Лекин ўша хисни тополмай, яна мақсадга кўчди.
- Хўш, қандай кип тутамиз?
  - Йўлини ўзинг топ, — Ориф тирриқ елка қисди. — Мен қайдан билай.
  - Билсам, сенга кеп ўтирармидим, — деди тоға нордонланиб ва дўстининг ковори осилиб бораётганини кўриб, дарров хаспўшлашга тушди: — Каллали

одамсан-да сен. Лекин итни тутсам, жиянимнинг руҳи учун кишмиш бериб боқаман.

— Ит кишмиш емайди.

— Келари гап-да энди бу, жўра.

Ориф тирриқ ўйга тушди. Лаблари беўхшов қимир-лаб, ўзича нималардир — деб фўлдиради. Сўнг деди:

— Тунар жойини биласанми?

— Дайди итнинг тунар жойи даштда, — деди тоға. — Қайси даштдан қидираман мен уни. Асли жияним нобуд бўлган куни тутсам бўларкан, оёқ остида ўралашиб юрувди.

— У пайтда юракка ит сифармиди. — Ориф тирриқнинг энсаси қотди. — Жиянинг қандай қилиб тутганди?

— Шунисини сўрамабман-да, — тоға афсусланди. — Мола судрагандай судраб келганини биламан, холос.

— Ҳа, у топқир ва меҳнаткаш бола эди.

Тоға бошини эгиб, хўрсинган бўлди.

— Топдим, — дедим Ориф тирриқ бир оздан сўнг андак рухланиб. — Арқон билан тутамиз. Сиртмоқ қилиб. Киноларда отларни сиртмоқ билан тутишганини кўрганман.

— Ит от эмас-ку.

— Фарки нима, — Ориф тирриқ ўзиникини мъ-куллашга тушди. — Отда бўлган бош итдаям бор. Мозор бошида осмонга караб увлаётганда, пойлаб туриб сиртмоқ ташлаймиз. Бўйнига арқон тушгач, ўзи кўзичокдай эргашиб келаверади. — У синик кулди. — Жуда бўлмаса, яна думбангдан озгина улуш берарсан... Таваккал-да. Лекин аввал бир-икки машқ қилиб кўриш керак.

Тоға омбортомдан узун арқон олиб чиқди. Бир учини сиртмоқ қилиб тугди. Бошда сиртмоқни ховли ўртасидаги ҳичча бошига ташлаб кўрди. Хийла уринишлардан сўнг натижа ёмон бўлмади. Кейин кўра бурчида тинчгина кавш қайтариб ётган сигир шоҳига ташлаб кўрди. Сиртмоқ тез ва соз тушди. Сузангич кора така ховли юзига ҳайдалиб сиртмоқ билан осонгина тутиб олинди.

— Шундай талантингни хор қип юрибсан-а, —

деди Ориф тирриқ бу эрмакдан кутилмаганда кайфијати жуда чоғланиб. — Сенга хўқиз ҳам чўт эмас.

— Менда укув зўру, ҳафсала йўқ-да, — деди тоға мақтовдан рухланиб. — Ҳафсала қисам министирам бўп кетардим.

— Ҳалиям кўчамизнинг министирисан.

Тоға гоҳ қўлидаги сиртмокқа, гоҳ ҳаччага қараб турди-да, сўнг қўлини сирмади. Сиртмоқчувалиб бориб, ҳаччага ўнғайгина тушди. Ориф тирриқ чапак чалиб юборди.

— Зўр!

— Буни ювиш керак, — деб қолди бунга жавобан тоға, жиддий.

— Менга-ку мумкин-а, лекин сенга... — Ориф тирриқ ўнғайсизланди. — Жиянни қирқи чиқмай... Бу гапни оғзингга олма, э-э!

— Шомурод сирри энасининг қирқи чиқмаёқ магазинди ёнбошида думалаб колувди, — деди тоға тўнғиллаб. — Бир марта гина мумкинтир ахир. Бу ёқда кўнгилам сал айниб турибди. Босармикан девдим-да.

— Нокулай-да.

— Бирор билиб ўтирибдими, агар сен айтмасанг.

— Айтиб менга нима зарил, — деди Ориф тирриқ бўшашиб. — Лекин одамга ўхшамай қолаяпмиз-да...

— Бир марта одам бўлмасак бўлмабмиз-да.

Тоға ичкаридан қўйнида шиша кўтариб чиқди. Омбортомдаги хумчани титкилаб, гўшт олди. Кейин узунқисқа бўлишиб сомонхонага ўтишди. Шишадагини ошиқмай майдалашди. Ба оқибатда, итни тутгани буғунок мозорtepага боришга келишиб олишди.

\* \* \*

Улар мозорtepага Қоравойдан илгарироқ етиб келишди. Кундузи билинмас экан, тунда мозор жуда вахимали бўларкан. Улфатлар ичларида билганларича калима келтириб, Толмаснинг қабридан ўн қадамча нарига пистирма қўйишидди. Кимнингдир қабри биқинига панараб бўтишди.

Кўройдин бўлишига қарамай, теваракни bemalol

кўз илгарди. Кўп ўтмай, муздек шамол эсаётган сой тарафдан кора кўринди.

— Келаяпти, — деди Ориф тирриқ овози қалтираб.

— Кўраяпман, — деди тоға ундан кам ҳаяжонланмай.

Кора кўланка мозортепадан наридаги энишда кўздан йўқолгач, Ориф тирриқ яна дийдиё килди.

— Сезиб қолиб, келмаса-я ҳали.

— Буйтиб бидиллайверсанг, сезиши аник, — деди тоға сўкиниб. — Бирпас жим ўтири!

— Уйдаги спиртни оливосам бўларкан, — Ориф тирриқ у томон сурулди. — Негадир кўркиб кетаяпман.

— Бориб ичамиз, — тоға уни тирсаги билан туртди. — Ҳозир эса сасингни чикарма!

Бир оздан сўнг мозортепа этагида ит кўриниш берди. Ориф тирриқ шу дамгача аҳамият бермаган эканми, итнинг келбатини кўриб, бехосдан «у-у» деб юборди. Ҳакиқатда, Қоравой нихоятда гўзал эди. Кўкраклари кенг, боши тик, сёклари узун ва бақувват, бел томони хипчароқ.

— Худди шерга ўхшаркан, — деди Ориф тирриқ ҳаяжонини босолмай. — Фақат ёли йўқ, ёли бўлса нақ шернинг ўзи...

— Жим ёти-ий, оқбодироқ! — Тоға шипшиб жеркинди. — Намунча сергап бўлмасанг.

— Карагин, жудаям чиройли-да, — деди Ориф тирриқ шивирлаб. — Бунинг олдида бизнинг итлар сигирнинг тезагига ўхшайди.

— Уф-ф!

Бу орада Қоравой қабрлар оралаб ошиқмай кела-верди. Пистирма шамолга карши томонда бўлганлиги учун ит уларни сезмади. Албатта, бу пистирмадаги-ларнинг топқирлиги эмас, тасодиф эди. Вазият ит пойловчиларнинг фойдасига ишламоқда эди. Улар бошлирини эгиб, чурқ этмай ётишаркан, тоға ўнг кўлидаги арқонни ўнғайлаб, ҳамлага шайланади.

Қоравойнинг қадам олишлари адл бўлса-да, ҳолатида ғамгинлик зохир эди. Боши тобора осилинкираб, қабр бошига етиб келаркан, бошда қабр қаватидаги

бузилган тобут ёғочларини искади, сўнг бир оз нари-  
бери тёнтиб, қабр пойига ўтиб чўнқайди. Бу манзара-  
ни жимгина кузатиб ётган Ориф тирриқ, худди ўрга-  
тилгандай, ё тавба, деб юборишига сал қолди. У ортиқ  
ун чиқаришдан қўрқиб, кафтини оғзига олиб боргунча  
бўлмай, тун бағрини тилкалаб хазин ва чўзиқ увлаш  
янгради. Бу сасдан Ориф тирриқ титраб кетди. Фифон  
этмоқка тушган итни тутмоқка кўнгли бўлмай, тоғани  
бу йўлдан қайтармоқ истади. Аммо вакт ўтган, тоға  
чапдастлик билан улоқтирган сиртмоқ қўкка боқиб  
нола қилаётган итнинг бўйнига тушиб бўлганди.

Коравой бўйнига келиб тушган сиртмоқдан дастлаб  
шошиб қолди. Сўнг чўчиб ўзини четга отди. Сиртмоқ  
сикилиб томогини бўғди. Бошини бир ён буриб, ар-  
конга оғиз соларкан, кўзи ўрнидан рўйи рост турган-  
ча, арконни тортмоққа бошлаган тоғага тушди. У тоға-  
ни дарҳол таниди. Ундан еган калтакларини эслади.  
Натижада, қўрқуви ғазабга, ғазаби нафратга айланди.  
Даҳшатли ириллаганча, тўғри тоға томон сапчиди.

Улфатлар буни сира кутмаган эдилар. Ҳужумдан  
довдираб қолишиди. Тоға шўрликнинг умри ушбу дов-  
дираш оғушида поёнига етди. Коравой яшин тезлигига  
елиб келиб, ўткир тишлари билан унинг бўғзини айи-  
риб ташлади. Буни қўрган Ориф тирриқ «эна»лаб  
кочди. Йикилиб-суруниб, иштонини булғаб, дала-дашт-  
ни қўрқинчли фарёдга тўлдириб қочди.

Коравой уни қувламади. Лоақал қайрилиб қарама-  
ди. Бўйнидаги сиртмоқни осонгина бурдалаб ташлаб,  
секин даштга чиқиб кетди.

Ориф тирриқ уйига етиб-етмай, оёқлари харакат-  
дан, тили гапдан қолди. Назарида, ит ҳануз уни таъ-  
киб этаётгандай, қўлларини ғалати харакатлантириб,  
гоҳ чор тарафга силкир, тўлғар, гоҳ томогини пайпас-  
лар, қўзлари эса олайганча қотиб қолганди.

\* \* \*

Қишлоқ аҳли тоғанинг қотилини Ориф тирриқнинг  
кўмагисиз ҳам тезда аниқладилар. Қабрдан тоғанинг  
жасади томон чўзилган чукур из, ғажилган аркон,  
жароҳатдан қотилнинг кимлиги маълум эди.

Тоғанинг маъракасидан сўнг Нортўхта участковой бошлиқ уч отлик Қоравойнинг изидан тушдилар. Аммо унинг чангини ҳам тополмадилар. Ит қумга синггандай фойиб бўлганди.

Орадан ой ўтиб, чўпонлар уни бўрилар тўдасида юрганини айтишди. Уларнинг таҳминига кўра, Қоравой чоғроқкина бўрилар тўдасини бошқаркан. Шунга қарамай, қишлоқ ахли баъзи тунлари мозортепа тарафдан чўзиқ ва ҳазин увлашни эшитиб қолишарди.

## ҚОЯЛАР ҲАМ ЙИҒЛАЙДИ

### *Кисса*

Тонг аzonда ҳовлидан тўрт ит билан чикиб кетган Эрназар полvon кечки пешинга якин Кўктойнинг ча-лаўлик жасадини отга ўнгариб кайтди.

У пешвоз чиқсан ўғилларига хўмрайиб боқаркан, итга биринчи бўлиб кўл чўзган иккинчи ўғли — Кўчарга дағал оҳангда, ҳазр бўл, деди-да, бошқа бирига, дори-халтани опчиқ, деган маънода им коқди. Сўнг отдан тушиб, ҳашаклар устига ётқизиб кўйилган Кўктойнинг тепасига борди. Буқланган камчи кети билан лунжини қашлаб, бир зум ўйга толди. Кейин енгларини химариб, қўлларини олдинга чўзди. Кимдир об-тобага юурди. Эрназар полvon, итдан кўз узмай, қўлларини юви, яхшилаб артди. Итнинг бош томонидаги дорихалтани ёнига тортиб, чўккалади. Орада ҳеч сабабсиз атрофдагиларга норози қараб қўйди. Сўнгра итнинг корни ва бели аралаш танғилган кон юки чорсини оҳиста ечиб, жароҳатни кўздан кечирмоққа тушди. Айкнинг ўткир тирноклари итнинг баданига хийла чуқур ботган, қўшкафт кенглигидаги тери шалвираб осилиб тушганди. У тери бўлагини авайлаб тутиб, кон силкиб турган жароҳатга пешонаси тиришиб боқаркан, танглайнини таққиллатди-да, тутинглар, деган маънода томок қирди. Кўктойнинг боши ва сёклари бақувват қўллар исканжасида колди. Дастрекки муолажада ит ғинг демади-ю, аммо қорамтири ва қўланса малҳам суртилаётганда, азобга чидаёлмай, ангиллаганча сийиб юборди.

Сийдик кўлларига сачраган Кўчар ирганиб афтини буриштириди. Аммо ота бир қараб қўйгач, чехраси сокин тортса-да, ички захрини ўғлига сочишдан ўзини тиёлмади: «Нари тур, соя тушираяпсан!» Бироқ бола пинак бузмади. Бобосиникига ўхшаб кетадиган жиддий ва тўнг қиёфасига қайсарлик ифодаси қалқиб, килт этмай тураверди.

— Беккул, сенга айтаяпман! — Кўчар полвон овонини сал баландлатди. — Нари тур!

Бола кимир этмади. Бобосининг алоҳида эътиборига сазовор бу бола ўз дарди оғушида ёнарди. Бобоси аzonда эргаштириб кетган Зийрак отли итининг тақдирдан хавотирда эди у. Сирасини айтганда, колган итларнинг тақдирни бошқаларни ҳам қизиқтирумокда эди. Аммо буни отадан сўраб-суриштиришга ҳеч қайсиси ботинмас, ўзи оғиз очишини пойлашарди.

Эрназар полвон муолажани тугатиб, қаддини ростлагач, теваракдагилар унинг афтига жонсарак бокишиди. Отанинг кайфи тирриқлиги юзидағи ҳар бир мўйдан акс этиб турарди. Бундай пайтда унинг чурқ этмоғи кийин. Яхшиси, ҳозир сўз қотмаган маъқул. Гап очган одам барака топмайди, бекорга дили сиёҳ бўлгани қолади. Буни билган ўғиллари аста тарқалиша бошлаганида, тўсатдан ҳовлини отанинг гулдирак овози тутди.

— Эй-й, онаси байталлар, каёқка?!

Ўғиллар жой-жойида тош қотиб, у томон ўгирилишди. Ота Кўктой чўзилиб ётган ердан берироқда нимтажанг қиёфада фўддайиб турарди.

— Анову қизбет қаерда? — деб сўради бир оздан сўнг ўртанчи ўғли Ўсарнинг ҳовлиси томонга ишора қилиб.

Отанинг овозида укасига нисбатан ададсиз разабни хис этган катта ўғил — Сардорнинг юраги увишди.

— Ишда эди, кеп қолар, — деди нафаси ичига тушиб.

— Кўй сўйдиларингми?

Эрталаб бунака гап бўлмаганди. Бундан чиқди отанинг кайфияти жудаям чатоқ. Феъли айниб турганда, у албатта қўй сўйдиради. Бундай пайтда қозон тўлиб гўшт қайнашини, ўғилларининг бир жойда жам бўли-

шини, кир тумшуғидаги деворсиз ҳайхотдек ҳовлиси невараларининг шовқинига тўлишини хуш кўради. Аммо гўшт пишмагунча ўзи даврага яқин келмайди. Ҳовли этаги ҳисобланмиш кир тумшуғига қоя янглиғ чўкиб, узок-узокларга жимгина тикилиб ўтиради. Нимадан кайфи бузилгани кўпинча сир бўлиб қолаверади. Шунга қарамай, ҳар сафар дастурхон бошига очик юз билан келади. Бир лаган этни пакъос тушириб, сўнг кекира-кекира, невараларини олиштиради. Шунчаки кўнгилхушлик учун эмас, росмана кураштиради. Йиқитганларни алқайди, йиқилганларнинг отасини сиқувга олади: «Кимга тортган бунинг? — дейди хўмраийб. — Эрназар полвоннинг томирига ўхшамайди-ку. Илиги пуч, ҳар куни куйруқ билан бокиш керак. Эмасам, эрта бир кун одамнинг юзини ерга қаратиб қўяди. Емаса, ўзимга айт, қамчининг остига оламан». Бола учун думба ейишдан ортиқ азоб йўқ. Билади, бобоси гапини ҳавога совурмайди. Ўша кундан эътиборан йиқилган шўрлик унинг назоратига тушади. Гоҳ эрта пешинда, гоҳ тушга яқин бобонинг овози гумбурлаб қолади. Эрназар полвоннинг таъбири билан айтганда, пурриқ<sup>1</sup> невара бўйин эгиб, унинг қошига боради. Бобо, кўлида буқланган қамчи, кўзи билан олдидағи лаганга ишора қиласди. Бола бечора думба емайди, азоб ейди. Аммо бу билан бобонинг иши йўқ. Ўғил бола полвон бўлиши керак, тамом-вассалом. Шунингдек, хушрўй болаларни ҳам жини севмайди: «Ул деганлари харсанг тошдай дағал бўлсаякан, қизбетдан полвон чиқармиди», деб ўйлайди. Шу боис, ўртанчи ўғли Ўсарни унча хуш кўрмайди. Бечоранинг бирдан-бир айби — хушсуратлиги ва давра айланмаслиги. Беш ўғлидан фактат угина бел тутмайди. Лекин келбати акалариникидан сира қолишмайди. Полвонқомат. Бир оз димоғдорлигини демаса, ёмон йигит эмас.

Уч ой бурун Эрназар полвон унинг уйини тушириб берган. Эндиликда ўртанчи ўғил қирнинг этагидаги чоғроққина ҳовлида кўхликкина қайлиғи билан алоҳида туради. Колган ўғилларининг ҳовлилари ундан берироқда — кир бағирлаб тушган. Ўғилларининг ҳовли-

<sup>1</sup> Пурриқ — кучсиз

сида неки сир-синоат бор, бариси ота ҳовлисига яққол кўриниб туради. Табиий, ота бу ишни атай қилмаган, қишлоқнинг жойланиши шунақа. Пастдаги Тошлисой бўйидан қир бағирлаб юқорига ўрлаган. Қишлоқ хақида куйидаги ривоят мавжуд: эмишки, бошда тоғларни яратган Аллоҳ, тоғлардан сўнг ҳосилдор ерларни бунёд этмоққа киришибди. Ўша иш жараёнида унинг улкан кетмонидан бир сиким соз тупроқ мана шу тоғу тошлар орасига тушиб қолган экан. Қишлоқ ахли тилида «кир» деб аталувчи бу маскандада одамнинг жонидан бўлак ҳамма нарса битади. Мўъжаз бу қишлоқ ташки дунё билан тоғлар оралаб ўтувчи торгина тошйўл билан боғланади. Қишлоққа ким кириб келаяпти, ким чиқиб кетаяпти — барадла кўзга ташланиб туради.

Эрназар полвон, одати бўйича, йўлга тикилган кўйи аста ерга чўкаркан, жойлашиб ўтиргач, ўғилларининг ҳовлисига бир-бир кўз ташлаб чиқди. Аммо ҳар доим-гидек кўнглида ички бир ғурур хис этмади. Бехос ҳаром нарса чайнаб қўйган одамдек, дилгир бир кайфиятда Ўсарнинг ҳовлисига тикилиб қолди. Тевараги пастак қалама тошdevор билан ўралган ҳовли юзида дуркунгина келинчак ғимирлаб юрар, ўғлининг улови — мотоцикли кўринмасди. Ўсарнинг ҳовлисига тикилган отанинг кўзларида бу сафар адватга ўхшаш совук ифода учқунламокда эди. Кураш тушмас, бу хушсурат ўғлига нисбатан отанинг кўнглида аввалдан англарсиз шубҳа яшаб келарди. Бугун тасодифан ўша нарса ойдинлашгандай бўлди. Эски рақиби Сами чўлоч жирканч бир нимага шаъма қилдики, Эрназар полвоннинг бугунги кайфиятсизлиги мана шундан эди.

Эрназар полвон унга уйга қайтаётib муюлишда дуч келди. Адоватлари ички, муомалалари хўжакўрсинга эди.

Сами чўлоч эшагини «хих»лаб, йўлдан четланаркан, бароқ қошлари остидан эгар қошидаги ярадор итга истехзоли бокди.

— Ҳа, Эрназарвой, насл тозалаяпсизми? — деди ошкора киноя билан.

Эрназар полвон унинг анчагина дадил тортиб қолганидан ажабланса-да, энсаси қотганини билдирамасликка тиришиб, «хим-м» дея ноаниқ жавоб қайтарди.

Кейин тезрок ўтиб кетмок максадида отини қичамокчи бўлди-ю, итни ўйлаб бу шаштидан қайти. От лўкиллаган сайн ит инграшиб, каттиқ азоб тортмоқда эди. У от бошини сал четга бураркан, Сами чўлопкнинг савол аломати билан тикилиб турганини сезиб, одоб юзасидан яна «ҳим-м» деб қўйди.

— Бу ишингиз дуруст, Эрназарвой, — деди Сами чўлоп жойидан жилишни хаёлига келтирмай. — Эмасам, дунёни хашакилар босиб кетади. Янаги йил шу итдан урчиган бирорта кучукваччани бизга берасиз-да, а, Эрназарвой.

Эрназар полвон ёнламасига унга назар соларкан, Сами чўлопкнинг тиржайиб турганини кўриб, кўнглига шубҳа оралади: «Намунча иршанглаб қолди, бу чўлоп?»

— Уша кун келаверсин-чи, — деди сўнг, нега тиржаясан, деган маънода унга жиддий тикилиб.

— Кеча бозоржойда Ўсарни кўрувдим, — деди Сами чўлоп қўлидаги халачўпнинг михли учини тўқим бошига нукиб. — Боласи тушмагур, шайтонгина, Эрназар полвоннинг уругини кўпайтирмок илинжида юрганга ўхшайди.

Эрназар полвоннинг ранги бир тус окариб, унга каттиқ тикилди.

— Акилламай очикроқ гапиринг! — деди сўнг. — Хўл ўтиндай писилламанг кўп!

— Кўрганимни айтаяман-да, Эрназарвой, — Сами чўлоп унинг юзидағи ўзгаришни дикқат-ла кузатаркан, бот илжайди. — Сомсаҳонадаги жувонлардан бирини улингизга иккинчи хотин қип ижабламасангиз, деб кўрқаман. Ўсарвойнинг қадам олишлари чатокрок. Лекин шаҳарди кизларидан сал хазр бўнг, енгингиздан кириб, ёқандиздан чиқади-я.

— Бу гапга жавоб берарингиз бор! — Эрназар полвон беихтиёр қамчисини ўнғай тутди. — Тағин эртага тухматнинг шалтоғига тийғаниб юрманг! Аямаслигимни биласиз-а?

— Худога шукр, етти томиримдан тухматчи чиқмаган, — Сами чўлоп унинг шаъмасидан зигирча чўчи-май, кўзларига рўйи-рост тикилди. Орада халачўп кети билан сийрак тукли иягини қашлаб қўйди. — Ҳақ гап бўлса, отангни аяма деганлар. Ахир биз эски қадрдон-

лармиз-ку. Кўзга қаранг, деб оғиз чарчатиб тургани-  
миз бу. Наслингиз айнимасин, деймиз-да. Буни сиз  
ёмон кўрасиз-ку. Биз-ку майли, уллар гапимизни сон-  
ламайди. Сизнинг йўриғингиз эса бўлак... — Сами  
чўлоқ кейинги гапларини ошкора истеҳзо билан илова  
килди: — Тағин Ўсарвойни уриб-нетиб юрманг-а. Ёш-  
да, кони қизиклигига боради. Сизнинг ёшиңгизга бор-  
са, куйилиб қолар. Э, буйтиб ачувланманг, Эрназар-  
вой. Ачувингиздан ҳатто эшагим кўркиб кетаяпти.  
Энди отни четга олинг, йўлдан қомайлик. Хих, жони-  
вор!

Сами чўлоқ эшагини қичаркан, эгар қошидаги итга  
маъноли қараб кўйди. Хунук афти илжайишдан янада  
буришиб-тиришиб кетди.

Йўл ўртасида кўнгли шубҳа-ю, гумонга тўлганча  
туриб колган Эрназар полвон ортиқча сўз қотиб, ижи-  
килашиб ўтиришни ўзига эп кўрмади. Эски рақиби  
тирноқча алдамаётгани кундай равшан эди. Негаки, бу  
хил рақиблар ёлғонламайди. Ҳақиқатни ошкор этиб,  
хузур қилишни яхши кўрадилар.

Эндиликда Эрназар полвон ич-ичини тўхтовсиз ке-  
мираётган шубҳа-гумондан дилгир тортиб ўтиаркан,  
ховлидаги харакатни сезиб, аста ортига ўгирилди. Ўғил-  
лари жонлик сўймок кўйида куйманишар, ховли саҳ-  
нида неваралари чопқиллашиб юрарди.

У норғул-норғул ўғилларининг харакатини зимдан  
кузатаркан, кўнглида ожиз илинж туғилганлигини сез-  
ди: «Балки гумондир. Сами чўлоққа шундай кўринган-  
дир. Бирон ножӯя қилигини сезишиша, акалари жим  
турармиди. Ҳаммасининг танглайнин ҳалол лукма би-  
лан кўтарганман, кўзимга чўп суқишимас». Аммо шубҳа  
илинждан кучли эди. У бор кучи билан отанинг елка-  
сидан боса бошлиди: «Сами чўлоқнинг буйтиблар ир-  
шайишига караганда, бари чинга ўхшайди. Эмасам,  
оғиз ботирлик қилишдан ҳайиқарди. Тухматдан кўркар-  
ди. Азалдан итдай симанглаб, йўқ ердаги нарсалар-  
нинг исини олиб юради у. Кечга томон уйига бостириб  
борсаммикан? Йўқ, кети билан кулади кейин. Яхшиси,  
улди кутайин. Бетма-бет гаплашай. Чин бўса...» Эрна-  
зар полвон у ёрини ўйлагиси келмай, тағин Ўсарнинг  
кулбаси томон тикилди. Ўғидан ҳануз дарак йўқ,

юқори ховлидаги харакатни сезган келини ёлғизоёқ сўқмокдан шу тарафга ўрламоқда эди.

Эрназар полвон ундан кўз узиб, яна тошйўлга тикилиб қолди.

\* \* \*

Невараси Беккул бақамти келганида, Эрназар полвон ҳануз тошйўлга бокиб ўтиради. Боланинг ташрифи ёқмаса-да, аммо унинг катталардек жиддий, бироз викорли караб туриши беихтиёр кўнглини илитди. Жилмаймоқка уринди-ю, бироқ уддасидан чиколмади. Юзига тиржайишга ўхшаш бемаъни кулгу тепчиди. Буни ўзи ҳам сезиб, яна тош йўлга юз ўгирди. Ўсарнинг қораси кўриниши билан юрагидаги шубха тумандек тарқалиб кетадигандек, йўлга илҳақ термилди. Асли эса ўзига тортган неварасини азбаройи яхши кўрганидан, ҳар қандай кишини тош котириб қўядиган ўткир нигоҳидан болани авайлаган эди. Ҳакиқатда, унинг қараши жуда оғир, жиддий тикилса, унча-бунча одамнинг бардош бермоғи қийин эди.

У неварасини ҳануз ортида серрайиб турганини сезиб, нима дейсан, деган оҳангда томоқ қирди. Худди шуни кутиб тургандек, бола тилга кира қолди.

— Итим қани, бово?

Эрназар полвон жавобдан қочиб, оғир тебранди. Бошқа пайт неварасининг саволи малол келмаган, тўрт оғизгина гапини ундан дариг тутмаган бўларди. Бироқ ҳозир юрагига қил сифмас, бутун фикри-зикри ўғлида эди. Тезроқ Ўсар келса-ю, масаланинг тагига ета қолса. Шу тобда шундан ўзгасини истамасди.

Бола бетоқатланди шекилли, оёқлари остидаги тошлар шиқирлади. Эрназар полвон аста ўша томонга кўз солди. Беккул ялангоёқ ҳолда чағир тошларни босиб турарди. У бир зумга таажжубланди: «Оёқлари оғримаганини буни». Салдан сўнг таажжуб, қизикиш билан алмашинди. Унинг оғир нигоҳи пастдан юқорига силжиди. Боланинг ўнг тиззасидаги кўндаланг чандик ҳам назаридан четда қолмади. У неварасининг пишик ва бўлиқ жуссасига бошдан-оёқ разм соларкан, нигоҳи

яна чандикда қотди. Хотираси тубидан ўша кунги воеа секин қалқиб чиқди.

Аслида у хузурланиб эслайдиган воеа эди. Ўшанда Эрназар полвон отини сойдан сувлатиб қайтаётган эди. Юкорилаётib, бетда иккита кўшни итга таланаётган Зийракка кўзи тушди. Шўрлик ўзини идора этолмай, итлар оёғи остида вангиллаб ётарди. Эрназар полвон, хай, деганча бўлмай, сўкмоқ бошида Бекқул пайдо бўлди-да, қўлидаги калтагина калтак билан итларга ташланди. Итлар урушига одам боласи аралашса қизиқ манзара ҳосил бўларкан. Чанг-тўзонда итлар юмалашган, юмдалашган, бола ўнги-сўлига карамай, уларни савалаган, итларнинг акиллашлари-ю, боланинг бақириб-сўкинишлари оламни тутган эди. Катталар журъат этиши қийин бўлган ишни бола туппатузук эпларди. Бўралаб сўкинишлари ҳам катталарникидан сира қолишмасди. Эрназар полвон неварасининг тап тортмаслигидан ҳам кувониб, ҳам ташвишланиб турганида, тўполон пайтида аллақаерда улоқиб юрган бошқа итлари пайдо бўлиб қолди. Оқибатда, икки бегона ит базўр жон саклаб, қочишга зўрға улгурдилар. Голиблар уларни эшиккача таъкиб этиб бордилар. Бир оздан сўнг Эрназар полвон неварасини энишдан чиқаверишда кўрди. Ўнг тиззаси қонга беланган бола итлари олдида мағур қадам босиб келарди...

Ўша ходисани эсласа, Эрназар полвон ҳануз масрурланади. Неварасини қучиб эркалатгиси келади. Бироқ бу хил хусусиятлар табиатига зид бўлгани боис, ҳар сафар ўзини тияди. Болани йигит санаб, шунга яраша муомала кильмоқчи бўлади-ю, аммо неварасининг бола феъли бунга ҳам изн бермайди. Мана ҳозир ҳам бобосининг дилгир кайфияти билан зифирча иши йўқ, болаларга хос қайсарлик билан итини сўроқломокда эди. Бир жиҳатдан бунга хаққиям бор, негаки Зийракни жуда яхши кўрарди-да у.

Ўтган воееани эслаш мабойнида хийла майин тортган Эрназар полвоннинг жавобиям шунга яраша бўлди.

— Иting товда қолди, болам.

— Нимага қолади? — Бу гал боланинг овози зардага тўла эди.

— Шу... жондорлар билан бир майдон ўйнашиб кайтади-да.

— Ўтирик<sup>1</sup>, — Боланинг қалин лаблари чўччайди.

— Унда қолганлари кани?

— Улар хам қолди, — Эрназар полвон куруқ ерга ёнбошламоқ хаёлида улкан гавдасини бир ён ташлаган жойида, негадир, тағин фикридан қайтиб, каддини ростлади. Кейинги гапини янада осойишта оҳангда айтди: — Кўктой шўхлик қиласман, деб йиқилиб тушганди, опқайтдим.

— Алдаманг!

Эрназар полвон боланинг овозида ўзгариш сезиб, ялт этиб унга қаради. Неваранинг мижжалари хиёл намланиб туарди. Бундан бобонинг қаҳри келди.

— Отиб ташладим, — деди ростиға кўчиб. — Агар кўзингни сийдигини оқизсанг, сениям аяб ўтирмайман!

— Яхши эди-ку, — деди бола ич-ичидан хуруж қилиб келаётган жудолик аламини базур ютиб. — Яхши кучук эди у.

— Қилиғи яхши эди, — Эрназар полвон тағин йўлга кўз тикди. — Зоти паст жоноворнинг қилиғи ҳамиша ярашимли бўлади. Қишида тевадаӣ жондорлар энсин эди, кўрардинг ўшанда итингни қилигини. Кўра бир ён қолиб, момонгни қўйнига уриб кетарди унинг. Бундай итни тирик қолдириб бўмайди. Иссиғида йўқотган тузук.

Бола итни момосининг қучоғида тасаввур этолмагандек, яшашга нолойиқлигини ҳам идрок этолмади. Кўзига бобоси ёмон кўриниб, кўнглида унга нисбатан адоват хисси уйғонди. Аламидан оёғи остидаги чағир тошларни тепкилаб ташлагиси келди. Аммо бобосидан ҳайиқди. Итни қўмсаб, чуқур хўрсинди. Чинданам, Зийрак эсли ва ўйноқи ит эди. Бола у билан ҳеч зерикмасди. Итига жўраларининг хаваси келарди. Мана энди, шундай яхши итни бобоси отиб ўлдирибди.

— Зоти зўр дегандингиз-ку, — деди у алами зўрлигидан, тап тортмай. — Ўзингиз мақтаб, ўзингиз отибсиз. Нега отдингиз?

<sup>1</sup> Ўтирик — ёлғон.

Боланинг дадиллиги Эрназар полвонга хуш ёқиб, унга зимдан қараб кўйди: «Ўзимга тортган, ҳеч балодан қайтмайди бу, — деб ўйлади. — Тоза палакнинг тоза меваси-да...» У неварасига ичидаги туфлаб, уни сухбатга лойик топди.

— Агар кўзингни ёшлаганингда, қамчиннинг тагига олардим лекин, — деди салобатли оҳангда. — Йиғламай, димоғимни чоғладинг. Тўғри, итингни зоти ёмон эмасди. Лекин конида қўркув бор экан. Ўша қўркув етди бошига. Эмасам, уни отиб менга зарилмиди.

— Ҳовлида юрарди ўйнаб, эслигина ит эди-да.

— Унинг факат ҳовлида ўйнаб қолмайди-да, — деди Эрназар полвон тенгига гапиргандай салмоқлаб. — Эрта бир кун иликиши бор, зурриёт қолдириши бор. Бемаза қовуннинг уруғи сероб дегандай, ёмон ит тез кўпаяди. Кейин юрасан қўрангни кўриқлашга тузукрор ит тополмай. Шунинг учун бундай итларни аяб ўтирмаслик керак. Жонлими, жонсизми — хар нарсаниям асили яхши...

Табий, бола бобонинг фалсафасини идрок этолмади. Шу боис, баттар чучанглади.

— Бошқалар ундай қилмайди-ку, ана, итлари бемалол юрибди.

— Бошқалар билан не ишинг бор, болам, — Эрназар полвон йўлга ғамнок тикилди. — Хар ким ўзича яшайди. Бироннинг улапаси<sup>1</sup> енгингга ямоқ бўлармиди.

— Кўктойингиз дурустмиди? — Боланинг қовоғи янада осилди. — Ана ётибди-ку, конига беланиб. Керак бўлса, у Зийракдан чўчириди.

— Чўчимасди, — Эрназар полвон Кўктой ётган томонга кўз кирини ташлаб кўйди. — Андиша қиларди. Зўр ҳамиша андишли келади. Итинг ўзи сал ўпкароқ эди. Сендан пишанг оларди-да. Яхиси, сен Кўктойнинг томоғига қарашиб. Тузалса, сенга бераман. Юрасан бирга-бирга қўйларни бокиб.

— Керакмас унингиз.

— Нимага?

— Ўлгудек бадқавоқ.

<sup>1</sup> Улапа — йиртиш.

- Зўр шундай бўлади-да.
  - Овозиям хунук.
  - Кучига яраша-да. Нима пишакдай миёвласинми сенга.
  - Барибир ёмон кўраман уни.
  - Айувга якка ўзи от кўйди.
  - Қолганлари-чи? — Боланинг кўзларида кизи-киш аломати ёлқинланди.
  - Қолганлари айувни кўриши билан чотини хўллаб кўйди. Зийрагинг эса бутимнинг орасига уриб кетди. Кейин мен унинг манглайидан отиб ташладим.
  - Анову иккиси-чи?
  - Уларниям отдим.
  - Айикни-чи?
  - Тегмадим унга. Ахир мен айув овига чикмадим-ку.
  - Қўрқдингиэми?
- Эрназар полвон кулимсираб, йўқ, деган маънода бош чайқади.
- Мен эса айикни отардим! — деди бола кўнглида суюкли итингига сабабчи бўлган айикқа фазаб хис этиб. — Катта бўлай, кўради у мендан!
- Эрназар полвон тошйўлдаги корани кўриб, хушёр тортди.
- Анову келаётган Ўсар амакингми?
  - Йўқ.
  - Ким?
  - Салим пучтачи.
  - Ўсар амакинг худди итингга ўхшайди, серкилик,— Бу гап Эрназар полвоннинг оғзидан бехос чи-киб кетди. — Агар ит бўганида униям отардим!
  - Нима, амаким ҳам кўрқоқми?
  - Ундан баттари!
- Эрназар полвоннинг тиззалари устида ётган кўлла-ри енгил титраб, этдор афти қорамтири тус олди-да, йўлга фазаб билан тикилиб колди.
- Амаким яхши-ку, бово, — деди бола норози охангда. — Керак бўлса, у отамданам зўр.
- Ўртанча ўғлининг Кўчар полвондан зўрлиги Эрна-зар полвоннинг нафсониятига тегди. Неварасига шуб-халаниб қаради.

— Нима, олишдими улар?

— Йўқ.

— Нега унда отангдан зўр бўларкин у?

— Ачувим қўзиса ҳаммангдан зўр бўп кетаман дейди-ку доим.

— Айтаверади-да, — Эрназар полвон истеҳзоли кулимсиради. — Қизбетдан хечам зўр чиқмаган.

— Амаким зўр, — Бола унга ошкора норозилик билан боқди. — Ҳаммадан зўр у..

— Бобонгданамми?

Бола бобосининг улкан келбатини бошдан-оёқ кузатаркан, бобом ҳаммадан зўр, деган қарорга келди. Кейин фикрини харакатда ифодалаб, аста ўнг ёнига чўккалади-да, бош бармоғини секин сиқиб қўйди.

Эрназар полвон аламли жилмайди. Неварасини суймок, эркалатмоқ истади. Аммо бунга иштиёқ сезмай, беихтиёр тиззасидан узилган ўнг қўли яна жойига шилқ этиб тушди. Бола унга суйкалиброқ ўтирди. Эрназар полвон ўнг бикинида қайнок вужуд тафтини хис этаркан, бошини секин буриб, искаланди. Димогида тер хиди аралаш гўдак исини туйиб, хиёл сархушланди. Шунга қарамай, болани эркалатишдан ўзини тийди. Талтайтириб нимага керак, деб ўйлади. Бир оздан сўнг, кетақол, деган маънода гувраниб, томоқ қирди. Бироқ бола ити ўлимининг тафсилотини ҳали тўла эшитмаган, қўзғалмокни хаёлига ҳам келтирмади. Бобо уни аяб, гапни сал бошқача йўсинда олди.

— Бу Каримбойди улидан йиқилибсан деб эшитдим.

У неварасининг жizzакиланиб, ўзини оклашини кутди. Ўшанда, бор жўна, деб ҳайдаб солиш осонроқ кўчарди. Қайдам, бола ҳатто пинак бузмади. Худди бобосидек нописанд кулимсираб қўя қолди. Эрназар полвон унинг бу қилиғида ўзини кўраркан, кетимдан тушган бу ўзи, деб ичидан суюнди. Лекин шунда ҳам унинг қолишига ўзида ройиш сезмади. Энди у негадир «ҳасрат» истарди. Бирдан-бир яқин сирдоши Файбулло чолдан эса дарак йўқ, пастдаги кичкина ҳовли кимсасиз эди.

— Файбулла бовонг кўринмайди?

— Кетди, — Бола қўли билан кунчиқишига ишора

килди. — Ҳалисароқ эшагини миниб анову ёкка кетди.

— Бориб, эркакларга қарашибайсанми?

Бола чап тирсагини бобонинг сонига тираб, ортига ярим ўгирилди.

— Эркаклар қиласидиган иш қолмабди-ю, — деди катталардек жиддий бир тарзда. — Бу ёгини энди хотинлар эплашади.

— Кўктой қалай?

— Ётибди ўликдай чўзилиб.

— Бошини кўтартмадими?

— Йўқ.

— Эртан туриб кетади.

— Зийрак бояёқ ўйноклаб туриб кетган бўларди. — Боланинг кўзларига адоватли мунг инди. — Қандай қилиб ўлди у?

— Айтдим-ку.

— Айтмадингиз, отиб ташладим дедингиз, халос. — Бола аразлаб, сал сурилиб ўтириди. — Мен ҳар йили ит асрайман, сиз эса ўлдирганингиз-ўлдирган. Ўша айфингизни кўрай... нима қилишимни ўзим биламан!

Эрназар полвон бугунги воқеани кўз ўнгига гавдалантириб, мийигида совук илжайди. Аммо ҳодиса тафсилотини неварасига сўзлаб беришни хаёлига ҳам келтирмади.

У Маймок лақабли айикни беш йилдан бери биларди. Беш йилдан бери итларини ўшанда синаб келарди. Бугун уни паст сўқмокда кутганди. Аммо Маймок кутилмаганда юкоридан келди. Унинг шарпасини биринчи бўлиб Кўктой сезди. Инграшга ўхшаш овоз чиқарди-ю, лекин ҳурмади. Безовталаниб эгасига қараб-қараб кўйди. Айик оғир лапанглаб, ялангликка чиқ-чиқчигина қолган итлар жонсаракланди. Тонгдан бўён шу фурсатни илҳақ кутаётган Эрназар полвон, олкиш, дея итларни Маймоққа қарши гиж-гижлади.

Буталар орасидан биринчи бўлиб Кўктой отилиб чиқди. Зийрак унга эргашди. Қолган иккиси ноишонч харакатланди. Итларни кўрган Маймоқ каддини тиклаб, ғазабкор ўкирди ва кўксига сапчиган Кўктойни бир уриб учиралиб юборди. Кўктой майда буталар ораси-

га думалаб тушгач, у бошқа итларга ҳезланди. Ҳужумдан кўра куткуни афзал билишиб, акиллашга зўр бераётган итлар, Маймок олға ташланиши билан изларига бурилиб, ура қочдилар. Зийрак азбаройи кўркқанидан эгасининг чотлари орасига уриб кетди. Бу орада Кўктой ўзини ўнглаб, яна айикқа ташланди. Маймок бу сафар уни тижимлаб отди.

Синов ҳал бўлган, сал ҳаялласа Кўктойдан ажраб қолишини фахмлаган Эрназар полвон сайҳонликка отилиб чиқди. Осмонга кетма-кет ўқ бўшатиб, ҳайхувлади. Ботирланган итлар тагин ҳужумга ўтишди. Овозига зўр беришди-ю, лекин ташланишга ботинишомлади.

Туйқусдан қархисида пайдо бўлган одамзодни кўрган Маймок аввалига бир оз шошиб қолди. Сўнг кетига тислана-тислана, бирдан шатолоқ отиб қочмоққа тушди. Итлар уни хўжакўрсинга чангалзоргача таъкиб этиб борди. Сўнг зўр бир ишни тиндиришгандай, йўртиб изларига қайтаркан, эгасининг ўқига учраб, бирин-кетин ер тишлиб қолишиди.

Эрназар полвон биринчи галда Зийракни, кейин қолган иккисини отиб ташлади. Кўктойни эса авайлаб ердан қўтариб олди.

— Айтмадингиз, бово?

Боланинг бот тирғалишидан хаёли бўлинган Эрназар полвоннинг жаҳли чиқди. Унинг калта иштони тўсатдан кўзига хунук кўриниб ҳайдаб солмоққа зўр баҳона бўлди.

— Хўқиздай бўп, буйтиб юришинг нимаси? — деди зардаси қайнаб. — Бор, шалворингни кийиб ол!

Бола кетди. Эрназар полвон эса йўлга термилганча қолди.

\* \* \*

Тошйўлда Ўсарнинг қораси кўринганда, қуёш уфққа ёнбошлаган, ҳовлини қовурдок ҳиди тутганди. Таомилга биноан, кўй сўйилганда, аввалига оз-оздан қовурдок тортилади. Эт ва шўрва кейин келади. Аммо Эрназар полвон бундай кезларда қовурдокни унча хушламайди. Шунингчун, лаган тўла қовурдок кўтариб кел-

ган катта келинини имо билан изига қайтариб, йўлдан нигоҳини олмай ўтираверди.

У Ўсарни бурилишда таниди. Ўғли сой устига ташланган қилкўприкдан мотоциклини ғоят эпчиллик билан елдириб ўтаркан, йўл-йўлакай ота ҳовлиси томонга кўз ташлади. У ердаги гавжумликдан жонлик сўйилганини пайқади. Бундан беҳад димоги чоғланиб, беихтиёр равишда тезликни оширди. Ҳар маҳал айланиб ўтадиган дўнгликка бу сафар мотоциклини тиккалай солди.

— Уловни еди! — Эрназар полвон ўзи сезмаган холда «иҳ»лаб юборди.

Ҳайтовур, йигит ерга юмшоқ тушди. Ўша суръатда ҳовлисига учиб кирди-да, бекиёс чапдастлик билан уловни чир айлантириб, ҳовли ўртасида тўхтатди. Сўнг кўркам келбатини тиклаб, юкорига қаради. Ҳаракатини кузатиб турган акаларига кўл силкиб кўйди.

Эрназар полвон унинг «ўпка»лигидан фижинган эсада, чапдастлигидан мамнун бўлди. Ўғли худди кўпкаридан улок айиргандай, унга хушҳол бокди. Бу хил қалтис ҳаракатлар пайтида ота уни яхши кўриб кетарди. Бирок бу хол ҳеч вакт узок давом этмас, ўғлининг кураш ва улокдан четдалигини Эрназар полвон сира ҳазм киломасди. Айни шу нарса ота бола муносабатига ҳамиша соя солиб келарди. Бу борада улар ўртасида тез-тез «чакин» чақнаб туради. Айниқса, ўтган куздагиси кўп ёмон бўлганди. Эрназар полвон юзини сидириб, даврага тушишга ўзини мажбур этганди.

Ўшандачувилдоқлик Нарман ковчин йикқан-терганини сарфлаб катта тўй берганди. Тўйга ҳар дарадан полвонлар ташриф этиб, хўп ажиб кураш бўлганди. Хуллас, «Туркман полвон» лақабли бир полвон бу даҳанинг энг номдор полвонларини йикитиб, биринчи товоққа эга чиқади. Йикилган полвонлар орасида Эрназар полвоннинг икки ўғли ҳам бор эди. Ишонгани Кўчар полвон, баҳтга қарши, ўша куни йўқ эди.

Аламдан Эрназар полвон оташ бўлиб ёнди. Шу оташ оғушида томошибинлар орасида илжайиб турган Ўсарга рўпарў бўлди.

— Ер бўлдик-ку, туш даврага! — деди.

Ўсар талабгар кутиб, давра бўйлаб бамайлихотир

айланаётган Туркман полвоннинг хайбатли гавдасига боқаркан, йўқ, деди.

— Йигитдай бўп сенам бир бел тутгин! — деди Эрназар полвон ялиниб, ўз навбатида, орномусдан килт-қилт титраб. — Одамни буйтиблар ер кима энди!

Ўсар бош чайқаб, ўзини ортга олди-да, одамлар орасида кўздан ғойиб бўлди.

Эрназар полвоннинг миёсига қон тепиб, тўнини ечиб ташлади-да, маҳсичан ўзи даврага тушди. Туркман полвон кўккисдан каршисида пайдо бўлган талабгорни кўриб, оғзи ланг очилиб қолди. Кейин, бу нимаси, деган маънода ўртакашга қаради. Аммо у шўрликнинг хайрати унивидан кам эмасди. Туркман полвон гарангсиб, Эрназар полвонга юзланаркан, келбатидан полвон ўтганлиги сезилиб турган бу одамнинг номус йўриғида даврага тушганлигини фаҳмлади. Бундан Туркман полвоннинг меҳри ийди. Шунинг баробарида, бўйин товлаш фойдасизлигини англаб етди-да, нима қиларини билмай боши қотди.

Эрназар полвон орага тушмоқчи бўлған ўртакашни четлатиб, рақибининг белбогидан тутди. Бир силтаб кўксига тортди. Анг турган Туркман полвоннинг оёғи осмондан келишига бир баҳя қолди. У Эрназар полвоннинг кучини ҳис этди. Буни атрофдагилар ҳам сезди. Бобойни ўртадан олинглар, деб томоқ йиртаёт-ганларнинг уни ўчиб, даврага бир зумлик оғир сукунат чўкди. Туркман полвоннинг ранги сал оқарди, сўнг жилмайди. У Эрназар полвоннинг кучига тан берган эса-да, иззатини қилиб туради. Бир хаёли унинг белидан даст кўтариб, эҳтиром ила давра четига чиқариб қўймоқчи бўлди-ю, бирок рақибининг изтироб тўла нигохига кўзи тушиб, бу фикридан қайтди. Агар шундай қилса, Эрназар полвон аламдан ўлиб қоладигандек туюлди. У рақибининг елкаси оша чоллар ўтирган томонга боқаркан, хурматсизлик қилса, обрў топмаслигини билди. Шунда полвон полвонни сужди — Туркман полвон ички чилдан йиқилиб тушган бўлди. Давра бир «гурр» этди. Ўртакаш ҳалол деб топди. Аммо Эрназар полвон кўнмади: «Килик кимай, тузук олиш, отангни жилигига...» деб сўқди. Туркман полвон чинакамига бел тутган бўлди. Ияги Эрназар пол-

воннинг елкасида, оёкларини кериб, бир маромда гувранаркан, димоfigа отасининг таниш ҳиди чалингандай туюлди. Ҳид олиб, маза қилаётган жойида, бехосдан гурсиллаб йикилиб тушди. Эрназар полвон унинг ён босганини барибир сезди. Тантилигига тан берди-ю, лекин алами сира босилмади. Ўша куни қўлига зўрлаб тутқазилган совринни сойга улоктириб, ховлиси тепасидаги арчазорга бикиниб, йиғлаб олди.

Кечга яқин арчазордан йўғон сўйил кўтариб тушди. Аста келиб, ховли юзида куйманиб юрган Ўсарнинг яфринига боплаб бир туширди. Ўсар эпчил йигит эмасми, калтакка чап бера-бера, ҳозиргина отаси чикиб келган арчазордан паноҳ топди. Калтак еган ерларини силаб-сийпалаб, ичида отасини «Мияси ачиған чол», деб сўқди. Полвон халкини, аҳмок, деб янди. Сўнг юрак ёзгани ўртоқларидан бирининг уйига жўнади: «Йикилдинг нима-ю, йикитдинг нима, тентаклар!»

Ўша куни курашда қатнашмай, ўз юмуши билан кетган Кўчар полвон ҳам калтакдан бенасиб қолмади. Кутимаганда елкасига калтак келиб тушганда, у эндиғина уйига қайтиб, айвонда чой ичиб ўтиради. Калтак зарбидан оғзидағи лукмаси отилиб, отасига ҳайрон бокди.

— Йикитиб берасан! — деди Эрназар полвон бўрилиб. — Шундай кунда қаерда санқиб юрибсан, а? Йикитасан, йикитиб берасан!

Кўчар полвон йўлдаёқ барча воқеадан хабар топган эмасми, хўп, деб кутулмоқчи бўлди. Аммо Эрназар полвон тинчий қолмади.

— Йикитмасанг, энангни талоқ қиласман! — деди яна калтак тушириб. — Эрназар полвонни ер қип кетди у! Мени ёш бола қип кетди у! Йикитиб берасан!

Болалари олдида калтак ейишдан орланган Кўчар полвон ўрнидан иргиб туриб, уйга қочди. Эшикни ичкаридан тортиб, «хўп дедим-ку, дея хайқирди. Йикитмаган номард», дея бакирди.

Бу гапдан отанинг ҳовури босилиб, ташқарилади. Туркман полвондан йикилган ўғилларига ғазабкор бокди. Лекин индамади. Худди синовдан ўтолмаган итларга қарагандай, уларга бир-бир назар соларкан, қўли-

даги калтакни бошлари оша сирмаб отмоқ истади. Аммо сўнг бу қилиғиниям уларга эп кўрмай, калтакни сомонхона томи четига қистириб кўйди.

Орадан хафта ўтиб, Кўчар полвон отанинг аламини олиб берди. Учқўтондаги бир тўйда икки кур айланишдаёқ Туркман полвоннинг оёгини осмондан келтириб урди.

Ота миниб келган отини унга ўнгарди.

— Мин, болам! — деди овози товланиб.

Ўғил итоаткорлик билан отга минди-да, юганга қўл юборди. Бироқ Эрназар полвон юганни бермади. Отни етаклаб, яёв йўл тортди. Кўчар полвон отанинг муддоасини англаб, ерга сакради.

— Кўйинг-гий, ота, — деди қизариб-бўзариб. — Нима қилганингиз бу?!

— Мин, улим! — Ота бот қистади.

Кўчар полвон ёш боладай қизариниб, ўзини йигитлар тўпига урди. Ота ортиқ зўрламади. Отининг бўйнига енгил шапатилаб, тоғларга мароқ билан бокди. Назарида, тоғлар жилмайгандай бўлди. Ҳатто ёмғир ташлай-ташлай деб турган қоп-кора булутлар ҳам нурга йўғрилгандай туюлди. Кейин нигохи билан Туркман полвонни қидириб топди. Уни анча эзгин ҳолда кўрди. Полвон зотининг қисмати курсин, дея ич-ичидан ачинди. Сўнг аста у томон юрди. Бориб уни бағрига босмокни ўлади. Аммо ийманди...

Эрназар полвон чуқур хаёлга толган эса-да, кўзи Ўсарда эди. Ўғил отанинг не мақсадда пойлаб турганини гўё сезгандай, юқорига ошиқмас, ҳовли юзида бемақсад тимирскиланиб юради. Отага қолса-ку, уни аллакачон ёнига чақириб олган бўларди-ю, аммо ўғлига кўзи тушиши ҳамоноқ дилида тўсатдан туғилган бир андишадан гарангсиб турарди. У гапни нимадан бошлишни билмасди. Бошда бариси осондек эди. Шахарда не балчиқ босиб юрибсан, дея ўғлини хадаҳа қасди-бастига олмоқчи эди. Бироқ унга кўзи тушгач, бу мавзуда сўз очмоқ ғоят мушкуллигини англади. Ота-бала ўртасида мавжуд андиша пардаси кўтарилиб, жирканч бир ҳолни кўрадигандек, эти жинжикмокда эди. Ўғлининг мотоциклда намойиш этган қилиғи туфайли бу оғир исканжасидан бир зумга халос топган

эса-да, сўнг тағин ўша ўй гирдобида колган, назарида, Ўсар унинг тасаввур доирасига сифмайдиган шундай бир гуноҳи азимга йўл қўйгандиким, факат масала-нинг мавхумлигигина ҳануз кўнглига озрок илинж бериб турар, йигитнинг ҳаракатларидан бор ҳақиқатни тўлароқ уқмоқчидай, нигоҳига зўр бермоқда эди. Ўғил эса безиён ва бегуноҳ бир холатда ҳовлисида тинчгина фимирсиб юрарди. Шунда отанинг дилига беихтиёр шубҳа оралади: «Сами чўлок қўпиртирган бўлса-я? Кўнгли кирга оқ нарсаям қора кўринади-ку. Хай, аввал суриштирай-чи, кейин бир гап бўлар. Балки ҳеч гап йўқдир». Бу ўйдан Эрназар полвон хийла енгил тортиди. Қовурдоқ ҳиди димофига хуш ёқиб, корни очиқканни сезди. Нигоҳи юмшаб, тунд чехраси мулойим-лашди. Борлик одатдагидек сокинлик касб этди. У теваракка хушхол бокаркан, сой ёқалаб ўтган йўлдан эшагини диконглатиб келаётган Сами чўлоққа назари тушиб, тағин кўнглида гумон кўзғалди: «Бу пес, ёлғонламас-ов, — деб ўйлади ичидан киринди ўтиб. — Минг йиллик алами бор одам ўтирик айтармиди? Айтмайди. Эси бор, ёлғоннинг оқибати ёмон бўлишини яхши билади-ку ахир». Отанинг афти яна тундлашиб, конталаш кўзларини аста юқорига ўрлай бошлаган ўғлига ўқдек кадади. Ўзича ундан шармсизлик аломатларини кидирди. Йўқ, Ўсар гуноҳсиз бир қиёфада бир-бир босиб келарди. Қарашлари беғубор, лаблари бурчига шўх кулги яширинган. Ота буни кўрмаса-да, ўғлиниг одатий феълидан хис этиб турарди. У зўрлаб ўзига тасалли берди: «Менинг зурриётим-ку, ҳаром ишга қотинмас. Агар қотинган бўлса, заха еган шохими шартта кесиб ташлайман-да...»

Заха еган шохни кесиб ташламоқ ўта қийинлигини у ҳали билмасди. Бу хил мушкулот ҳали бошига тушмагани боис, давраларда кариллаб, кўкрак кериб юрарди. Фарзандларидан ниҳоятда кўнгли тўқ эди. Бирор-тасининг ножӯя иш қила олиши мумкинлигини ҳатто хаёлига келтирмасди: «Худога шукр, наслимиз булоқ сувидай тоза, аждодларимиз ҳаромдан ҳоли ўтишган», дея ич-ичидан ғуурланиб кўярди.

Ҳаётда у ўз ақидасига эга бўлиб, жониворларнинг энг ўқтами, одам боласининг энг ҳалолигина худо

берган умрни яшаб ўтмоққа лойиқ, деб хисобларди. Ховлисида жўн ит асрамагандек, номи қора бандасини умуман остонасига яқин йўлатмасди.

Шундай одам мана энди бир шохи заха еганини сезиб турибди. Албатта, бу ҳозирча гумон. Аммо гумони тасдиқланса-чи? Кейин у ёғи нима бўлади? Заха еган шохимни шартта кесиб ташлайман, дея катта кетаётган эса-да, аслида бу жараён қай тарзда кечишини у хали билмасди. Хаёлини турли нарсалар билан чалғитиб ўтиарди.

Кишлоқда ёлғиз угина ўзини дарахтга, фарзандларини эса шохларга қиёсларди. Шохлар деганда, ўғилларини назарда тутар, қизларини эса лоакал новдага арзитмасди. Болаларига туғилғанлик ҳақидаги гувоҳнома олишидаги ҳангома ҳозиргача қишлоқ аҳли хотирасида. Эслаб, кулиб юришади. Катта ўғли туғилгач, Эрназар полвон ўзини ҳақиқий ота санаб, от устида кеккайиб, Чувилдоқдаги қишлоқ жамоаси идорасига етиб боради. Котиб ўзга ерлик йигит эди, гоҳ унга, гоҳ кайд дафтариға бокиб, нима, биринчи фарзандингизми, деб сўрайди. Эрназар полвон, эгнида қимматбаҳо чакмон, ха, дея бош иргаркан, сўнг арзитмаган оҳангда кўшиб кўяди: «Уйдаям уч киз бордай эди». Йигит баттар ажабланади: «Сизданми?» Эрназар полвон бу саволдан йигитдан зиёд хайратланади: «Ховлимда бўлгач, мендан-да». Йигит елка қисади: «Унда нега уларга гувоҳнома олмагансиз?» Эрназар полвон унга таажжуб кўзи билан қарайди: «Э, қизгаям қофоз олинидими?» «Нима, киз бола одам эмасми? — Йигит конун одами сифатида уни пича тергаб, қофоз тўлдирмоққа киришади: — қани, айтинг бир бошдан, исмлари нима ва қачон туғилишган?» О-о, ўшандада Эрназар полвоннинг терлашини бир кўрсангиз. «Қизим» деган биргина сўзга жамланган қизларининг исмини бир амаллаб топиб айтди-ю, туғилган йилларини буткул чалкаштириб юборади.

Шунга қарамай, у қизларини тузук жойларга узатган. Куёв бўлмишларнинг етти пуштини сўраб-суриштиргачкина ризолик берган. Тўй-маъракаларни демаса, шу дамгача қизларини сўроқлаб борган банда эмас. Шунингдек, киз томондаги невараларини кўпда ўзига

яқин олавермайди. Уларни ўзга дараҳт бутоқлари, деб ҳисоблади.

Бу киёсни Эрназар полвон дарров топмаган. Сами чўлоқ чўлдан қайтиб келган кезлари, саратоннинг қайнок кунларидан бирида сой бўйидаги ёнғоқ тагида ёнбошлаб ётаркан, тўсатдан қашф қилган бу иборани. Қошида гап бериб ўтирган Файбулла чол гўё у ёмби топгандай, унга ҳавасланиб қараган.

— Гапни ўхшатишга жуда устасизда, а, Эрназарвой, — деган танглайини тақиллатиб. — Гапнинг полвонини факат сиздан эшитамиз. Қойил лекин. Чинданам сиз сербутоқ азим дараҳтсиз. Ана боринг, чинорсиз. Биз эса кундамиз. Ёниб битган, қорайиб кетган тўнкамиз. Шохлашимиз қийин энди, Эрназарвой... Ий-й, сизга ҳавасим келади. Гапингиз ҳам полвон, ўзингиз ҳам. Биз энди...

Эрназар полвон мактovдан сархушланса-да, гапнинг, нишаби қай томонга кетаётганини пайкаб, уни тинчитмокка уринган.

— Биздан фарзанд, сиздан бўса, эл, қишлоқ қолаяти, Файбуллавой, — деган. — Бекорга оғизни таҳир қиманг. Бандаси билмасаям, худо билади-ку хизматларингизни.

— Хизматимиз — қайсаrlигимиз-да, Эрназарвой. Бундан бўлак нима каромат кўрсатибмиз. Оғир кунда қаватингизда «ҳа» деб турганимни демаса, бошқа нима иш қипмиз?

— Эл писганда, сиз жим турмадингиз, шунинг ўзи хизмат-да, Файбуллавой. Эмасам, ҳозир юрадик, юртдан йирокда, чўлди паашасига таланиб.

— И-и, нима қиласиз одамни овутиб, Эрназарвой, — Файбулла чол лойقا инган нигохини узокларга қадайди. — Аммо қўлим Сами чўлокнинг ёқасида кетади. Қамоққа тиқтирмаганда, у ерда ўлимич бўй калтак емаганимда, фарзанд кўрардим мен ҳам. Қовуғимга тепишган-да, қовуғимга... Шу-у, Сами чўлокни кечириб бекор қилдингиз-да. Энди кўрсан, этим қақшайвөради. Элдан чиққанни элга қўшмаслик керак эди.

— Кўзининг сийдигини оқизиб келди-да, Файбуллавой.

— Ёмонни яхшилаб бўлмайди, хали кўрасиз, бетга

чиққан сўгальдай, кўп ғашга тегади у. Ҳозирча писиб юрибди. У троқлашсин, тилини бир қарич қимаса, ёлғиз бошимни шартта кесиб ташлайман.

Эрназар полвон ошнасининг гапини ҳазилга бурмоқчи бўлади.

— Бошингиз бизга керак, Файбуллавой. Учраган нокасни деб гаровга қўяверманг уни.

Файбулла чол унинг ҳазилини эътиборсиз қолдирб, аста ёнбошларкан, ёнғоқ шохларига жиддий разм солади.

— Чинданам сиз дарахтсиз, — дейди ғудраниб. — Гапни боллаб топиб айтдингиз. Лекин менинг қўлим Сами чўлоқнинг ёқасида кетади. Гўримдаям тинч қўймайман мен уни!

Бу гапни эсларкан, Эрназар полвон кўзлари билан Сами чўлоқни кидириб топди. У йўл ёқасида Узунқул подачи билан гаплашиб турарди. Ҳув наридан эса эшагини қичаб, Файбулла чол келарди. Бояёқ уларни кўрган Файбулла чол бир оз тайсаллаган бўлса-да, аммо ўзга йўл йўклиги боис, тағин ноилож илгарила-ганди.

Эрназар полвон секин-аста юқорилаётган ўғлини пақкос унутиб, ички бир қизиқиш ва ачиниш билан уларни кузатмоққа тушди. Қани, нима қилишаркин? Нимага деганда, Файбулла чол Сами чўлоқ билан ҳалихануз тузук-қуруқ сўрашмасди. Рўпарў келиб колишиганда, азбаройи қишлоқчилик туфайли бош ирғаб қўйишмаса, қолган пайт кўрмаганга, сезмаганга олишади. Бирок ҳозир орада Узунқул подачи ҳам бор эди. Файбулла чол у билан жуда иноқ — кўришганда сўрашмасдан ўтломайди. Қизиқ, Узунқул подачига чўзган кўлини Сами чўлоққа узатармикан?

Бу орада кўча ўртасидан келаётган Файбулла чол эшагини йўл ёқалатди. Боши сой томонга ўғирилган — гўё уни томоша қиласяпти. Бирок бу зайлда ўтиб кетиб бўлмасди. Ахир йўлда тош эмас, одам боласи турардида. Оралиқ масофа хийла қисқарганда, Файбулла чол беихтиёр улар томон юзланди.

Эрназар полвон узокдан аниқ кўрмаётган эса-да, дўстининг афтига хижолатомуз бемаъни табассум қалкиганини ва бу ҳол зумда изсиз йўқолиб, унинг ўрни-

ни гезарик бир ифода эгаллаганини сезиб турарди. Нимасини айтасиз, Файбулла чол мушкул ахволда колганди: сўрашмай ўтай деса — Узунқул подачи бор, сўрашай деса, Сами, чўлоққа ҳам кўл узатиш керак...

Ҳайтовур, Узунқул подачи фаросатли иш қилди. Узун калтагини судраб, Файбулла чолга пешвоз юрди. У билан кўшкўллаб кўришди. Улар сўрашаётганда, Сами чўлоқ юзини тоғларга бурди. Пинакка хозирланаётган қуёшнинг сўнгги нурларидан фусункор тус олган қояларни томоша қилаётган бўлди. Аммо Файбулла чол илгарилаётганда, ҳар иккиси ҳам бир-бирларига ялт этиб қарашди. Бошлар, ўлганини кунидан, аста иргалди. Елкалар эса ёмон тиришди, томоқлар хунук кирилди.

Бу холатнинг нечоғли оғир эканини Эрназар полвон кўриб, билиб турарди. Файбулла чолга раҳми келди. Сами чўлоққа эса адоватли тикилди. Шунда унинг бугун йўлдаги шаъмаси эсига тушиб, сачраб ўғли келаётган томонга қаради. Бироқ Ўсар аллақачон ёнидан ўтиб кетган, Эрназар полвон унинг на шарпасини сезган, на саломини эшиганди.

У бир ўйи ховли юзида кур тикиб ўтирган акаукалари ёнига етган Ўсарни ёнига чакирмоқчи бўлди-ю, аммо пастдаги ҳолат туфайли хаёлида кўзғалган ноҳуш хотиралар бир зумга ўғлининг дардидан залворлироқ чиқиб қолди-да, ўзи сезмаган ҳолда ўша хотиралар гирдобига шўнғиди.

\* \* \*

— Эй-й, жилғаликлар! Мухлат икки кун, йиғиштирик кўчинингни! Чўлга кўчамиз.

Бу совук хабар кимнингдир юрагига наштардай ботди, кимнидир каловлатди, кимнингдир ғазаб селини қирғокдан тоширди. Фала-ғовур, бакир-чакир терак бўйи кўпкон эса-да, охир-оқибат, у пайтларда Сами раис деб аталмиш йўғон, бадқовок, қаҳри қаттиқ кимсага фақат икки киши — Эрназар полвон билан Файбулла мергангина бет бўлди.

— Кўчмаймиз хеч қаёққа! — деди Эрназар полвон гапини нуқталаган оҳангда. — Бекорга оғзингни чарчатиб юрма!

— Тошингни тер, ахмок! — деди Файбулла мерган ошнасидан қолишмасликка тиришиб. — Кўчсанг, ўзинг кўчавер, лекин халққа тегма.

— Ўрлик килманглар! — деди Сами раис от устидан викорли боқиб. — Партия-хукумат қарори бу! Тағин икковингни ҳам чиққан ерларингга тиқиб юбормайин! Ҳамкишлогим деб сийлаганим сайин... Акс ҳолда... — У бармокларини панжара қилиб кўрсатди.— Уқдиларингми?

Эрназар полвон унинг шаъмасини тушунсаям, мояхитини тўла идрок этолмади. Бу ахир қандай гап? Тинчгина яшаб турган ерингдан бирдан кўч деб колса, эшигингга кулф уриб, кўчингни орқала деса. Ахир ҳар бир сўқмоғи таниш ва қадрдон манову тоғу тошларни қандай қилиб ташлаб кетиб бўлади? Сой ёқалаб кетган бое-роғларни-чи? Ёнбағриликка тирмашган узумзорларнинг аҳволи нима кечади? Арчазор бикинидаги ялангликда ёйилиб юрган минглаб кўй-кўзиларни қаерга бориб тикиширади? Тепаликдаги мозор нима бўлади? У ерда ота-боболарининг ҳоки ётибди-ку. Айтишларига қараганда, такрон чўлга чиқиб пахта экишлари керак эмиш. Гўзани умрида кўрмаган тоғ ҳалқи бу юмушни эплармикан? Ва яна, шунча ишчи кучи бекорга ётибди, деганларига ўласанми. Эсини танибдики, меҳнатдан кўллари бўшамайди. Ҳар йили тоғ-тоғ мева-чева-ю, этни ким бераяпти дейдиган одам йўқ. Умуман олганда, кишини ўрганганд турмуш тарзидан бўлак этиб, нотаниш манзилга сафарбар этишга кимнинг хақи бор? Наҳотки, хукумат буларни билмаса?

Эрназар полвоннинг назарида, хукумат қўл етмас олисликдаги сирли ва улуғвор сиймо эди. Бу ердаги машмашалардан унинг хабари йўқдек эди. Ўзини хон, кўланкасийни майдон санаган Сами раис ўз билганича иш туваётгандек эди. У бу гумроҳлик қаршисида сукут килолмади. Ўзини ҳак билиб, ўзича курашга отланди.

Унинг бу харакати ортидан қамоқхона эшигининг шараклаб ёпилиши билан якунланди. У энди жуда эзгин эди. Нотаниш муҳит қаршисида, бу дунёда ҳақиқат қолмабди, уйига ўт кетибди унинг, деган изтиробда эшик ёнида шалвираб туарди.

Кўзи нимқоронғиликка кўниккач, деворга тақалган

қўшқаватли тахта ўринларни, тўрдаги стол атрофида кур тиккан бир тўп одамларни илғади. Уларни ўзи каби ноҳақлик қурбони деб билди. Уларни ўзига жуда яқин деб билди. Кўнгли ҳасрат истаб, ўпкаси тўлди. Давра марказида ястанган барзангини ўзидек мард полвон деб ўйлади. У билан ҳасратлашмоқ хаёлида, теваракдаги синчков нигоҳлар кузатувида у томон юрди. Изидан Файбулла мерган эргашди. Хумкалланинг ишораси билан икки киши ўринларидан туриб, уларга жой берди. Хумкалла гап сўрамади. Эрназар полвон гап бошлай қолмади. Чукур хўрсаниш билан дардини ифода этган бўлди. Файбулла мерган содда эди, дарров дард халтасини оча қолди. «Ака», деди ва шу «ака»лаганча бўлиб ўтган воқеаларни юраги тошиб гапирмокка тушди. Хумкалла чурк этмай эшитди. Эрназар полвоннинг русса тўла кўзлари пастда, ора-сира бош иргаб, ошинасининг гапларини маъкуллаб турди. Юз берган воқеага инсон боласининг бардош бермоғи кийинdek эди. Сами раис ютидан бадарға қилмоқчи бўлса-ю, уни туман каттаридан тортиб, милициягача ёқласа. Кўзларини бақрайтириб инсон шаънини топташса. Бунака экан, бу олчоқ дунёда яшаб нима қилди энди.

Тингловчиларнинг жимлигидан Эрназар полвон, уларнинг юраги сел бўлиб оқаяпти, деб ўйлади. Бирок бир оз муддатдан сўнг нигохини аста кўтариб қааркан, таажжубдан донг қотди. Атрофдагиларнинг қарашибари локайд, ҳатто баъзиларининг кўзида истехзо ва эрмак аломатлари учқунлай бошлаганди.

Эрназар полвон дўлвор жўрасининг бикинига бир туртди.

— Деворга гапирманг!

Файбулла мерган хушёр тортибди. Аввал хумкаллага, сўнг унинг ўнг бикинида ўтирган сўхтаси совуқ йигитга жавдираб каради. Сўхтаси совукнинг тиржайиши унга жуда малол келди.

— Мен дардимни айтсан, сен нега иршаясан, энагар! — деди.

Сўхтаси совукнинг кўзлари сичкон кўрган мушукникидай бежо йилтираса-да, тиржайиб ўтираверди.

Хумкалла бамисоли шер янглиғ оғир нафас оларкан, сўзлари ўша нафас тўфонига коришиб чиқди.

— Каерда ящашинг нима фарки бор, галварс.

Эрназар полвон кизиқ аҳволга тушиб қолганди. Шу дамгача унинг одамлар билан мулокоти тўйлардаги курашли давралару оқшомлари сой бўйидаги гурунглардангина иборат эди. Бариси уни танирди, у хам қолса, полвонларга хос салобат билан жеркиб ташлайверарди. Ҳеч ким ундан хафа бўлмас, у хам бирордан ранжимасди. Бу мулокотларда ишонч, бағрикенглик, эркалик ва соддалик мужассам эди. Ёмонлик олти тоғ наридаги мавхум бир тушунча эди. Ёмонлик Сами<sup>ранс</sup> тимсолида юз кўрсатгач эса, Эрназар полвон эртаклардаги паҳловонлардек унга карши кўкрак кериб чиқди. Аммо ҳаёт эртак эмас, конун кучи билан химояланған Сами<sup>ранс</sup>нинг бир оғиз гапи билан мана энди бутунлай ўзга тоифадаги одамлар орасига тушиб ўтириби. Бу масканда унинг ҳурматини килиб уғиришмади. Андиша конуннинг темир исканжасида майдалашиб, уничувак юзли, ёқимсиз капитанга муте килиб қўйди. Юрт, ватан ҳакидаги жўшқин хитоблари терговчининг жиддий, лоқайд нигоҳида бирор маъно акс этмагач, у совук саволлар тизимидан иборат тергов қаршисида изғириндан жунжиккан гўдак янглиғ чорасиз қолди. «Нега урдинг?» «Рахбар шахсга кўл кўтаришга нечук журъат этдинг?» Бу хил саволлар замира га жамланган конуннинг кўринмас, аммо залворли кучи олдида у хўрлик хиссини туди. Бундан кўнгли синиб, хор хорни тушунар, деган умидда камерадагиларга юрагини ёзмок истаганди. Аммо...

У ўтирганларга бирма-бир бокаркан, Файбулла мерганинг ҳайрат тўла нигоҳига дуч келди.

— Буларинг ҳеч одамга ўҳшамайди-ку, а, жўра? — деди шўрлик кўзларини пирпиратиб. — Кесакни ўзи-ку, а?

Бу гапдан сўнг Эрназар полвон хумкаллаға ғазаб ва иддао билан тикилди.

— Сени одам десам, дардсиз эшак экансан-ку, ошна,— деди ачитиб.

Шундан кейинги воқеалар тўсатдан юз берди. Файбулла мерганинг ўзи тирғалдими, ё сўхтаси совукнинг ўзи биринчи бўлиб ёпишдими, хуллас, салдан

сўнг у Файбулла мерганни ерда чўзилиб ётган ҳолда кўрди. Унинг тепасида икки суллоҳ мисоли калхатдай чарх уради. Дастлаб у довдираб қолди. Кейин бир ҳайқирди-да, Файбулла мерганни беармон тепкилаётган сўхтаси совукни тўлғаб отди. Иккинчисига қулочкашлаб мушт туширди. Ё дариф, одам шаклидаги бу қотма маҳлук нақ иблиснинг ўзи экан, зарбга осонгина чап берди. Иккинчи бор интилишида, оёғи остида инқиллаб ётган оғайнисига қоқилиб, Эрназар полвон бор бўйича гурсиллаб йиқилиб тушди. Камера ичи кулгига тўлди. Кулги овози одамники, лекин эрмакталаб ёвузлашган башаралар инсон боласиники эмасди.

Эрназар полвон сакраб туриб, яна от қўйди. Аммо қотма ўзига яқин йўлатмади. Мушти билан бирон иш чикаришга кўзи етмагач, Эрназар полвон уни девор томонга сиқиб бора бошлади. Бирон дақиқалардан сўнг у рақибини эзib ташлаши турган гап эди. Бироқ шериклари бунга йўл қўймадилар. Тўрт-беш киши бир бўлиб, полвонни ерга чалпак қилиб босдилар.

Эрназар полвон ерда чўзилиб ётаркан, одамзоднинг бу қадар ёвузлаша олишидан жуда хайратланди. Кейин эшик олдидаги бўш ўринга бориб чўкаркан, гўё ҳеч бир воеа содир бўлмагандек, қайтавошдан ўз эрмакларига тутинган тўдага ҳайрон-ҳайрон бокди. Бежалган башарасини силаб-сийпаб, бу афт билан халқ-ка қандай кўринаман, деб ўйлади. Қаватида инқиллаб ётган Файбулла мерганга заҳрини сочди.

— Гапга кирганингизда бу равро йўқ эди бошингизда, — деди. — Ҳалиям бўса «хўп» денг.

— Энам эркак қип түққан мени, жўра, — деди Файбулла чол инграшиб. — Дўстни кулфатда ёлрез қолдиришни русм қилмаганман.

— Раисни урган мен, сизнинг эш бўп юришингиз нимаси?

— Менам бир тепганман, — деди ошнаси кўзларини холсиз очиб-юмиб. — Энди буёғига нима бўса, бирга қўраверамиз.

— Улинг бу кунингиздан!

— Мен ўлмайман, Эрназар. Ҳали буларни битта қўймай кираман. Милтифимни товга яшириб келганман.

— Кўп минфирилмай, қайтинг гапингиздан.

Файбулла мерган, йўқ, деган маънода бош чайқади. Эрназар полвон унинг ёстигини беўхшов ҳаракат-ла тўғрилаб, сукутга толди.

Эртаси уларнинг бежалган афти терговчининг кулгисини қистатди. Бахтга карши, Сами раис ҳам шу ерда экан. Башарасига тепчиған табассумини яширомай, томоқ қирди-да, дераза томонга ўгирилиб олди.

Эрназар полвон унинг семиз елкаларига, тоза қиртишланган гарданига нафрат билан бокаркан, семиз кетига боплаб бир тепишини истади. Ўшанда биратўла семиз бўйинни қайриб ташламаганидан ўкинди. Агар Файбулла мерган сўнгги дақиқада орага тушмаганида, шундай қиласарди ҳам. Ўшанда Файбулла мерган қизиқ иш қилганди. Муштлашувни ўзи бошлаб, сўнг ўртага ўзи тушганди.

— Қалай, тавбаларинга таяндиларингми? — деди терговчи ўшшайиб. — Лекин омадларинг бор экан, мана, раисларинг аризасини қайтариб олмоқчи. Энди эса, у киши айтган жойга зингиллаб жўнаб қолинглар. Фойдали иш билан машғул бўлинглар.

Сами раис деразадан ярим ўгирилиб, писанда қилди.

— Қишлоқчилик-да қишлоқчилик, эмасам, эналарингни учқўрғондан кўрсатардим.

Эрназар полвон ундан нигоҳини узмай, юзини сий-палади. Кейин Файбулла мерганнинг шишган, кўкарган юзига разм солди. Бу алфозда киши кўзига кўриниш накадар оғирлигини ўйлади. Энди бир умр Сами раиснинг олдиди тили қисиқ бўлиб қолишидан ҳадикланиб, сиз нима дейсиз, деган маънода Файбулла мерган билан кўз уриштирумокқа интилди. Дўстининг кўзларида ёдадсиз адоваратни кўргач, озодликни Сами раис садақа қилаётганини пайқади. Бундан унинг жини қуришди. Бу-ку майли-я, садақа эвазига у қишлоғидан воз кечмоғи, умрида кўрмаган ўзга манзилда умргузаронлик қилмоғи лозим эди. Садақа уларга жуда кимматга тушмокда эди.

— Биз барибир ҳеч қаёққа кўчмаймиз, — деди у Сами раисга еб қўйгудек тикилиб. — Ҳали бу қамоқ экан, этимни нимталасанг-да, қишлоғимдан бир одим нари чиқмайман.

Ундан миннатдорчилик кутган терговчи бу гапдан анқайиб қолди. Сами раиснинг эса юзидан кон қочиб, семиз лунжи асабий титради. Кўмак истагандай, капитанга қаради.

— Ёқам қўлингда, Сами, — деди Гайбулла мерган хирқираган овозда. — Чиқарман шу қамоғингдан, сен бир кун отдан тушарсан, ана ўшанда гаплашаман сен билан! Билиб кўй, яроғим қонсираган, сенинг қонинг билан юваман уни! Ҳозирча ёқамни йиртавер! Давринг кепти бурдалайвер ёқамни! Қани, қачонгача йиртаркансан.

Оғайниларнинг бу қадар ўқтамлигини кутмаган Сами раис тамомила довдираб қолди. У бу ерга қишлоқ оқсоқолларининг илтимоси билан келганди. «Банди»-ларни қишлоққа олиб кетмоқчи эди. Бозор бикинидаги ошхонада коринларини тўйғизиб, қишлоққа намо-йишкорона олиб кирмоқчи эди. Ошналарнинг шишган башараларини айни муддао билиб, безалган афтларини кўз-кўз килиш билан бошқаларнинг ҳам попугини пасайтириб кўймокчи эди. Аммо у энди каршисида ҳавфли ракибларни кўриб турарди. Унинг ҳадиги кўпроқ Файбулла мергандан эди. Мерган тентак феълли одам, бирор ерда шартта отиб ташлашдан хеч тоймайди.

— Силарни кўчираётган мен эмас, оғайнилар, — деди у ялинчоқ охангда. — Тепанинг буйруғи бу. Райком бово тоққа милиса ташлаган. Мен раис сифатида олдиндан силарни огохлантиргандим, холос. Силар эса гапга кирмай, ўз бошларингга ўзларинг бало орттириб ўтирибсизлар. Мендан ўпка-гина қилманглар. Мен кимман, ижрочи бир одамман-да. Тела нима деса, шуни бажараман. Эмасам, менга зарилми, қайнок чўлда тупроқ кечиб. Айб менда эмас, жўражонлар.

— Сен кайвонисан, йўқ, дейишинг керак эди, — деди Эрназар полвон.

— Бошим иккита эмас, полвон, — деди Сами раис. — Партия билетингни столга кўй деса, нима деган одам бўламан.

— Эл учун бошинг кетса кетибди-да.

— Айтишга осон. Ўрнимда бўлганларингда, кўрардим холларингни.

— Ўрнинг ўзинга сийлов, — Эрназар полвон кўпол

сўкинди. — Ҳамма кўчсаям, биз кўчмаймиз. Буни ўша тепадагиларга айтиб қўй!

— Мен сизларга яхшилик қилмоқчиман, кўрнамаклар!

— Яхшилигингни пишириб е!

— Етар! — терговчи столга муштлаб, Сами раисга юзланди. — Сиз кечирсангиз ҳам қонун кечирмайди. Иккиси ҳам тегишли жазосини олади.

— Мен-ку майли, — деди Эрназар полвон унга ўгирилиб. — Лекин ошнамни нима деб жазолайсилар? Ахир у раисга қўлиниям тегизгани йўқ-ку. Урган мен, у эмас.

— Нега ундаи дейсиз, жўра? — Файбулла мерган чучанглаб кетди. — Тепганман, семиз қўймичига ўхшатиб тепганман. Ишонмасаларинг, шалворини ечиб қаранглар, ҳалиям ўрни кўкариб турибди. Керак бўлса, яна тепаман!

— Бас! — ғазабдан терговчининг юзи гезариб кетди.

— Бақирма-ий, энағар! — Файбулла мерган энди унга ўдағайлаб кетди. — Нега бақирасан? Нима, ошириб кўйганмисан, бунча кекирдагингни чўзасан!

Кейинчалик Эрназар полвон жўрасини кўп сўкиб юрди: «Аҳмоқсиз! Қип-кизил аҳмоқсиз! Қора булат менинг бошимда эди. Сиз нега энди ўртага сукилиб юрибсиз. Вой, аҳмоғи-ий!» Файбулла мерганнинг эса парвойи фалак эди: «Қарасам, сизни қамашадиган. Ёлғиз ташлаб кетмай дедим-да, жўражон. Икки киши зерикмай юрамиз. Шундай пайтда қайишмасам, қай пайтда қайишаман, а?

У пайтларда Файбулла мерганнинг ҳозирги хархашаси йўқ эди. Қамоқхонанинг ёврон шўрвасини ичиб, ўзича гердайиб юради. Хархашаси кейин, озодликка чиқиб, уйлангандан сўнг бошланди: «Қовуғимга тепишганда, жўражон, қовуғимга. Шунинг учун мендан зурриёт бўлмаяпти...» Эрназар полвон, бу даъвонгиз нотўғри, асли белингиз бўш, деялмайди. Нафси ламрини айтганда, бу гапга ўзи ҳам озми-кўпми ишонади. Дўстига ичи ачиди. Топганини у билан баҳам кўрмокقا тиришади. Бир гал бўшлик қилиб, дўстини ночор ахволга солиб кўйганидан ҳозиргача ўзини кечирол-

майди. Ўшанда нима жин урди уни? Ё Сами раиснинг бош уриб келганидан масурурландими? Хар холда ни-мадир бўлди-ю, у бўшашибди. Ошнасига рақибини кўндаланг килиб қўйди. Файбулла мерганнинг бу қадар кек саклашини туш кўрибдими. Орадан шунча йиллар ўтди, ғазаби бўшашгандир, деб ўйлаганди. Йўқ, эртаси дўсти ўпка-гина килиб келди: «Ўнгирда кулча бўп ётган илон эдим, — деди. — Ёмон кўрган ўтимни иним оғзига қўнқайтирибсиз-да, оғайнни. Файбулла кунда кўриб ўлсин дебсиз-да. Сизга нима ёмонлик кип эдик, бу жазони бизга раво кўрибсиз, а? Энди уни кўриб кунда бир уладиган бўпман-да. Раҳмат, жўра!»

Ўша оқшом Эрназар полвон Сами раиснинг олдига учиб борган. Эртагаёқ қишлоқдан корангни ўчир, демоқчи бўлган. Аммо Сами раисни кечагидан баттар абгор қиёфада кўрган. Энди унинг қархисида бурунги мағрур Сами раис эмас, афт-ангорини тук босган, озгин ва маймок бир кимса — Сами чўлоч титраб туради. Андава тутган лой юки қўли титраб, лаб-лунжи бетиним учарди. Эрназар полвон уни бақадан ожиз билди. Бир хаёли босиб, янчиб ташлагиси келди. Унинг мақсадини сезгандай, Сами чўлоч дарров тилга кира колди: «Гуноҳимни соғлигим эвазига ювганман,— деди овози қалтираб. — Мендан бекорга домангир бўляяпсиз. Сизларни мен эмас, ўша ўжар терговчи каматган. Баланддан келишаяпти, энасини кўзларига бир кўрсатай буларни, деб қаматди. Ўрлик қилган ўзингиз, озроқ пастга тушганларингизда, финг демасди у. Мен бир майиб одамман. Истасангиз, бўғзимга пичок тортинг, тепкилаб кўмиб ташланг. Лекин қишлоқдан хайдаманг. Тўрт кунлигим борми-йўкми, шу ерда умримни поёнига етказай. Билмайсиз, ичим касал менинг. Бир вақтлар гавдамни от тортолмасди. Энди оррик бир хўтикка юк бўларли ҳолим йўқ. «Сен»га ўрганган бандасининг тили «сиз»га бораяптими, демак, унинг мусулмон бўлгани шу. Бу ёғига энди шафкатни сиздан, умрни эса худодан сўраймиз...»

Ўшанда Эрназар полвон ранг кўриб, чинданам куни битганга ўхшайди, деб ўйлаган. Кўнглига раҳм хисси инган. Бироқ орадан мана неча йиллар ўтибдики, ҳануз у тирик. Тириккина эмас, қишлоқда томир отиб, тили

чикирлайдиган бўлиб қолган. Бошқалар унинг қилмишини аллақачон унутиб юборган. Факат дўстларгина хозиргача рўйхушлик бермай келишади. Дўстлар борерда Сами чўлоқнинг сира дами чикмайди.

Кутилмаганда унинг тили бугун чиқди. Минг йиллик қадрдондай, тили бийрон тортиб, йўлига кўндаланг бўлмоққа, ҳатто пичинг отмоққа журъат этди.

Агар Сами чўлоқнинг гапи рост чиқса, Файбулла ҳавас қилган азим дарахтни худо урибди. Бир шохи заха еб, жарохатидан қора қон силқибди. Одатда, бундай шох кесиб ташланади...

Эрназар полвон оғир хўрсинди. Бошини бир ён буриб, ҳовли юзида кур тиккан ўғиллари томон разм солди. Кўзи даврада очилиб-сочилиб ўтирган Ўсарнигина кўрди. Табиатдан босиқ бўлгани боис, ўғлини хозирча тинч кўйишни маъкул топди. Ота ҳеч бир ишда ошикмас, разаб ва аламдан юраги тўкилар дара-жасига етса-да, кўпда ҳовликавермасди. Боз устига, бугунги масала ўта нозик эди. Дастреб ўғлини йўлдаёқ тутиб, кўнглидаги шубхани бир ёклик қилмоқчи эди. Бахтига Ўсарни ўтиб кетганини сезмай қолди. Акс ҳолда бу машмашага бошқа ўғилларининг ҳам дикқати тортилган бўларди. Унинг назарида, жуда жирканч бўлмиш бу муоммани факат яккама-якка ҳолдагина ҳал этмоқ лозим эди. Худонинг куни фақат бугун эмаску, деган ўйда ўзини босиб ўтираверди.

Ўсар бу ҳолдан бутунлай бехабар, гурунгни қизитиб ўтиаркан, яккаш отанинг кўзини шамфалат қилиб, ҳовлисига тушиб чиқишни ўйларди. Томони тақиллаб кўп безовталанмоқда эди. Билади, ота уйида ароқ ичилмайди. Тўкин зиёфат ҳамиша ичкиликсиз ўтади. Бунақа пайтларда у ҳамиша уйидан ичиб чиқади. Боя бу ёкка келаётуб, пиёлани тўлдириб отиб олган эсада, козон тўла этни кўриб, нафси тағин ҳакалак отмоқда эди. Қани энди, манову чоли тушмагур бошқаларнинг отасидек хокисоргина бўлса. Йўқ, бу кишининг ўз қонунлари бор. У ҳовлисини ватан, ўзини эса ўша ватаннинг йўриқчиси деб билади. Бу «ватан»да «шайтон суви» ичилмайди. Отанинг гапига қараганда, ичкилик инсон конида мудрок ётмиш ҳайвоний жазавани ўйғотармиш. Окибатда, бу жазава бутун танага тара-

либ, кишини одамгарчиликдан чиқаармиш. У қамоқхонада кўрган-кечирганларини бунга мисол қилиб келтиради. Ашаддий жиноятчиларни ҳайвоний жазава, яъни шайтоннинг қули деб билади. Энг ёмони бу хил одамлардан дуруст зурриёт туғилмасмиш. Шунингчун, бу дунёда яхшилар қатори ёмонлар ҳам кўп эмиш. Бунга конда уйғотилган ҳайвоний жазава айбормиши. Нафсини тия билмаган бандаси ушбу жазаванинг қулига айланармиш. Қул эса инсон деган номга нолойик эмиш.

Ўғилларидан факат Ўсаргина унинг бу фикрига гоҳида ботиниб-ботинмай қарши чиқади: «Хозир ҳамма ичаяпти-ку, ота». Ичса, жазосини тортаяпти-ку,— дейди ота афсусли оҳангда. — Биттаси, ана, Эрали банги. Тавба қилдим, ўғиллари фирт чиллашир. Қаттикроқ шамол турса, барини осмонда кўрасан. Буниси бу дунёдаги жазо, қолганини у дунёда кўради ҳали. Ўғилларингдан бирорта полвон чикмагач, худонинг ургани шу-да». Ўсар бўш келмасликка тиришади: «Ота, сиз ҳаётга кенгроқ қараашни билмайсиз. Ҳаёт дегани төвлар орасидаги телпакдай қишлоғингиз эмас, жуда кенгу. Хозир замон бутунлай бошқача. Удумларингиз эскирган. Одамлар қўлидан келганча маза қилиб яшаша-япти. Сиз эса бизни ўз ақидангиз қулига айлантириб олгансиз. Бу энди, кечирасизу, инсофдан эмас-да, ота». Эрназар полвон уни ахмок санаб, мийигида жилмаяди. Доимо белбоғига қистириғилик турадиган қамчисига қўл юбориб, маънодор томоқ қиради. Бу ҳаракати билан, тилинг узун тортиб, қамчисираф колибсанми, демокчи бўлади. Бу унинг баҳсадан кочганини билдирмайди. Ўсарнинг фикри унинг учун бир чақага қиммат. Кўзи илғаган масофадан наридаги ҳаёт сурони отага бегона, у ердаги турмуш тарзи мутлақо қизиктирмайди уни. Шу боис, Ўсарнинг ўзини ҳам, гапини ҳам ўзига тенгситмайди. Салга овозини ўчиришта мажбур этади.

Ўсар отаси томонга иddaоли бокаркан, акаларининг ичмаслигини билса-да, чикмаган жондан умид дея, катта акаси Сардорга юзланди.

— Кайф берадиган бирон нарса топинг, ака, — деди. — Қараб кўринг, сандик-пандикнинг қаватидан у-бу нарса топилиб колар.

Ака кулимсираб, унинг олдидаги сигарет қутисига имо қилди.

— Кайф берадиган нарса, ана, олдингда турибди-ку.

— Бундан ортиғига бобойнинг қамчисига товон тўлашинг керак, — Кўчар полвон яйраб кулади. — Бобой келса, олислаб ўтиргин, оғзингдан хиди гуппиллаб турибди. Тағин гўшт ейман деб, калтак еб қолма.

Ўсар акаларининг соғлом чехраларига тумтайиб боқаркан, яшашни билмайсизлар, дейди. Акалари ундан бу гапни кўп эшишишган, парвоям қилишмайди. У лўлаболишини биқинига тортиб, отаси томонга имо қилади.

— Бобой нега тўнглаб ўтирибди?

— Итларига аза очган бўлса керак, — деди кимдир кулиб.

— Бобой оригинал, — Ўсар тўнғиллаб, Кўчар полвонга ялинганнамо қарайди. — Бобойни гапга алаҳситиб туринг, ака. Мен секин ховлига тушиб чиқай. Негадир томоқ тақиллаб кетаяпти. Шунча газак... ароксиз увол-да, ака.

— Ҳаддингдан ошма кўп! — Кўчар полвоннинг юзи тундлашди. — Боя негадир сени сўроқлади. Фазабига учраб, тағин арчазорда улоқиб юрма.

— Уйим бўлак, рўзғорим бўлак, мендан яна нима истайди бу одам? — Ўсарнинг зардаси қайнаб кетди. — Кишига сал эрк бериш ҳам керак-да. Нима, этаги ортига тугилган боламидик биз.

— Бу даъвонгни бориб отамга айт.

— Гапириб бўларканми.

Ўсар отасига ўшшайиб тикилади. Эрназар полвон ўша-ўша хаёлга ботиб ўтирас, ботаётган қуёш нурида у яна-да ҳайбатли тус олганди.

\* \* \*

Эрназар полвоннинг югурик нигоҳи қишлоқ узра кўним топмай, яна сой бўйига қайтди. Бу вақтда Узункул подачи узун калтагини судраб, лўкиллаб кетиб борар, Сами чўлоч әшагини диконглатиб, адокдаги тор кўчага қайрилмокда эди. Файбулла чол аллақачон кул-

басига етган, эшагини йўл бўйидаги ёнғоқка қантариб, ховли юзида фимирсиб юради. Ана у ўчоқ бошидан айланиб ўтаётиб, кир тумшуғига кўз солди. Унинг қарашини кутиб ўтирган Эрназар полвон, бу ёқقا келинг, деган йўсинда қўлини сирмади. Ошнаси чакирикни англаб, хўп, дея бош ирради. Кейин қозон осиш ташвишидан кутулганига суюниб, кундалик юмушига тутинди. Эшагига ўт ташлаб, кўрага ўтди.

Ошнасининг ярим соатларсиз қорасини кўрсатмаслигини билган Эрназар полвон кўпда бетоқатланмади. Аслида ошириб нима қилди? Ўсар билан гаплашмокнинг барибир иложи йўқ. Кўрадаги юмушлар невараларидан ортмайди. Бугунча Файбулла чол билан ҳангомалашиб тура турсин-чи, эрта бир гап бўлар.

Эрназар полвон, фавқулодда ходисаларни хисобга олмаганда, ховлисида фавро кўтаришни жини севмайди. Ҳар қандай чигал масалани ими-жимида ҳал этишга одатланган. Кўнгли нимадандир ториққан кезлари ошнасининг гурунгини қўмсайди. Гоҳида унинг жигига тегишини ёқтиради. Қишлоқдаги бирор кампирни назарда тутиб, дейди:

— Файбуллавой, эртан Машир кампирникига совчиликига борсаммикан, а?

Содда оғайнисининг капалаги учади.

— Йўғ-ай-йўғ-ай.

— Ёлғиз юраверасизми энди? — Файбулла чол қовоқ осган бўлади.

— Шу юришимиз дуруст, Эрназарвой, — дейди Файбулла чол баттар жонсаракланиб, кўксига шапатилар экан. — Бовrimни алдайверишиларидан чарчадим. Унингиз бугун бовримни тўлдиради-да, эртан ҳувиллатиб ташлаб кетади. Кейин кунимиз яна болиш кучоклашга қолади. Кўникканман, шу юришим дуруст. Бундан сўғин одамнинг кўнглига буйтиб ғулгула солаверманг, Эрназарвой. Кичикилигинги бўса-да, мен сизни жўрам деганман. Бари сирдан огоҳсиз, киши устидан кулгандай бўманг.

— Устингиздан кулиб ўлибманми, Файбуллавой, — Эрназар полвон ўзи сезмаган ҳолда жиддий тортади. — Ёлғизсиз, ичим ачиди-да. Бирор сўккабош кампир тешиб чикмасди дейман-да.

— Сиз борсизки, мен ўзимни ёлғиз сезмайман, Эрназарвой, — Файбулла чол унга ихлос билан термилди. — Мана шу кирди бошида керилиб ўтирганингизни кўрсам, ўзимни якка сезмайман. Турмасини кўриб келдик, ёлғизлик нима бўлти бизга. Ундан кўра, Сами чўлоқни икковлашиб бир урсак, турмайдиган қип калтакласак яхши иш бўларди-да.

— Бир черткилик ҳоли бор, — Эрназар полвон кулади. — Нимасини урасиз уни?

— Икков яна бирга бўлардик-да, — дейди Файбулла чол жиддий. — Эсингиздами, турмада маза қиганмиз, бирга ётиб, бирга туриб... Ёмон бўлмаган лекин...

— Нафасни иссиқ қилинг-ге, — Эрназар полвоннинг пешонаси тиришади. — Ёш бир жойгá етганда, турмангиз нимаси.

— Лекин мен Сами чўлоқни барибир ураман, — дейди Файбулла чол унинг эътирозларига эътибор бермай. — Аччувимни чикарган куни соламан. Ҳозирча баҳона йўқ, кўзимга тик қараёлмайди, номард. Бирор пастқам ерда отиб-потиб кўяди, деб қўркса керак. Аввалги кариллаши бўғанида стардимам. Энди нимасини отаман уни. Лекин би-ир калтаклашим бор. Шунда сиз қаватимда туриңг, Эрназарвой. Катта турмасига яна бирга бориб келармиз. А, нима дедингиз?

Эрназар полвон индамайди. Ошнасига ичи ачиб, бағри ўртанади. Унинг бу ҳолатини ўзича англаған Файбулла чол чинакамига ўпкаланади.

— Вактида мен қаватингизда бўғанман, нега энди сиз йўқ дейсиз, а, Эрназарвой? — деди. — Яхши эмас бу ишингиз.

Эрназар полвоннинг чехрасига тўсатдан табассум қалқиыйди.

— Ўзиям ғирт афанди одамсиз-да, Файбуллавой, — дейди кулиб. — Йўқ айбни бўйнингизга олиб, қамалиб ўтирибсиз-а. Эсимга тушса ҳозир ҳам куламан.

— Менам бир тепганман, Эрназарвой, тепганман, — Файбулла чол эътиroz билдиради. — Сиз уриб йикитдингиз, мен эса тепдим. Тепиб яхши иш қиган эканман, эмасам, турмада ёлғиз ўзингиз зерикиб қолардингиз. Ошна дегани шу пайтда қайишмаса, қай пайтда қайишади? Қадимгилар, дўстинг учун заҳар ют, деб

бекорга айтмаганлар. Агар ҳов бирда айувнинг чангалидан мени кутқазмаганингизда, Файбулла чол юрармиди ҳозир. Ётарди совук ернинг боврида суяклари чириб. Ўзи биз шундан сўғин ошна тутиндик-да, а?

Эрназар полвон олис хотиралар уммонига чўкиб, ха, дея бош иргайди. Файбулла чол яна гапда давом этади.

— Агар мени ошнам дейдиган бўсангиз, — дейди хиёл ўпкаланган тарзда, — қайтиб хотинлар ҳакида гап очманг. Аввалги топганингиз ҳам кўйнимда олти кун ётди-ётмадими, бор пулимни ўмариб қочиворди.

— Палаги тоза дейишувди-да, — Эрназар полвон хижолат тортади, — бунақалигини қайдан билибман. Топай, ернинг кўзига ёпай десам, кўймадингиз-ку ўзингиз...

Уларнинг гурунги мана шу тарзда гоҳ ҳуд, гоҳ беҳуд давом этади. Энг мұхими, бу хил гурунгдан иккиси ҳам ҳузур қиласди. Бунақа пайтда Эрназар полвон дастурхонни бўлак ёздиради. Ошнасининг дўлвор гурунгини бошқалардан кизғангандек, даврага ўзга жонни яқин йўлатмайди.

У ҳозир ошнасининг гурунгини кўмсаб, оқшом пардасига чўлғана бошлаган қишлоқнинг фусункор кўринишини томоша қиласкан, кўзи тўсатдан сойнинг ўртасидаги дўнгликда кўнқайиб турган чолдеворга тушиб қолди. Таглиги чоғроқ ҳарсанглардан, деворлари тошдан кўтарилиган ғарип кулба мана неча ўн йилдирки, давр тўфонларини писанд этмай ғўддайиб турарди. Илгари сой анча наридан ўтарди. Кейинчалик оқим бу томонга ташлаб, кулба «орол» ўртасида қолиб кетган ва айни шу нарса уни чолдеворларда тентишини яхши кўрадиган болаларнинг тажавузидан асраб келарди.

Кулба ўша «чўлга кўчириш» давридан қолган ягона ёдгорлик эди. Бошка чолдеворлардан аллақачон номнишон қолмаган. Кейинчалик улар ўрнига янги иморатлар тушганди.

Кулба Эрназар полвоннинг илк иморати эди. Хали уйланмаган йигит отасининг маслаҳати ва кўнгил орзуларининг етови билан ушбу кулбани тиклаганди. У шунчаки кулба бўлмай, шу заминда палак отмок ўйида тунлари болиш қучоқлаб, кундузлари қизларга зимдан

кўз солиб юрган ошиқ бир йигитнинг бўлғуси орзула-  
рини ўзида жамлаган қутлуг бир маскан эди. Кулба  
остонасидан биринчи бўлиб келин хатламоги лозим  
эди. Аммо, минг афсус, бўсағада милицианинг тум-  
шуги қирилган хром этиги пайдо бўлди. Бу вақтда  
Эрназар полвон тахмон қиррасини чиқариш билан  
банд эди. Қўлидаги андавани девор юзига сургай-сур-  
гай, келганларга ярим ўгирилар экан, уларнинг важо-  
хатидан ўзини баттол жиноятчи деб билишाटганини  
уқди. Миясида минг бир хаёл чарх урди. Биринчи  
бўлиб остона хатлаган бурундор милиционер унинг  
забардаст келбатидан ҳам кўра, қўлидаги андавадан  
ҳадикланди. Белидаги наганга кўл юборган киши бўлиб,  
кўрс охангда буюрди:

— Андавани ташла!

Эрназар полвон андавани лой тўла челякка ташлар-  
кан, улар томон тўла юзланди. Милиционерларнинг  
жиддий нигоҳларида акс этган қонун кучига бўйсин-  
мок лозимлигини англади. Лекин ўзини айбдор сезма-  
ди. Худди кураш олдидан нафас ростлаётгандек, ўзини  
бамайлихотир тутди.

— Ортиқча ҳаракатни хаёлингга келтирма! — деди  
милиционернинг ёшроғи шеригининг елкасидан мўра-  
лаб.

Эрназар полвон улар етовида ташқарига чиқаркан,  
ўзини хўрланган ҳис этди. Юраги сикилиб, узоқдаги  
қорли чўққиларга бокди. Қанот қоқиб ўша томонларга  
учиб кеткиси, кўкдаги бургутдек тазийклардан холи  
бўлгиси келди. Бироқ салдан сўнг теваракка алаҳси-  
раркан, қишлоғи-ю тоғу тошларни ташлаб кетолмас-  
лигини фаҳмлади. Гўё бу шўришларнинг ҳаммасига  
улар айбдордай, милиционерларга хўмрайиб қаради.

— Бандасини туғилган ютидан бадарға килиш  
мусулмончиликнинг қайси ақидасига тўғри келаркан,  
а? — деди куни кеча отасидан эшитган гапни сўзма-  
сўз такорлаб. — Диёнатнинг хеч қайси йўриғига  
тўғри келмайди-ку бу ишларинг.

— Раҳбар шахсни калтаклашга ким хукуқ берди  
сенга? — деди милиционернинг ёшроғи тўсатдан тута-  
киб. — Тоғда қутуриб кетгансан ҳамманг! Нечова,  
тезда попугингни пасайтириб қўямиз!

Эрназар полвон унинг турқига, сўнг негадир этиги-га разм солди. Бир томони ейилган пошналариям назаридан четда қолмади. «Качал экан, — деб ўйлади. — Шу качал оёғи билан осто намни булғади-я, ярамас!» Шунга қарамай, милиционерларга зиён етказмасликини дилига тугди. Ҳадиги одамлардан эди. Назарида, кишлокқа ахли уни кутқарामан деб, уларга ташланадигандек эди. У шу ташвишда теваракқа зеҳн соларкан, секинаста тўпланишаётган қўни-қўшниларининг чехраларидага кўркув кўрди. Шўрликлар милиционерларга даҳшат билан қараб туришарди. Қишлоққа илк бор милиция оралаб, кишини банди қилиб кетаётган эди-да. У қаватида турган милиционерларга ҳайрон бокди: «Буларнинг нимасидан бунча кўркишади, а?»

Унинг хаёлини сал нарида ғўддайиб турган Самираиснинг овози бўлди.

— Ана яна биттаси ўз оёғи билан келмоқда.

Эрназар полвон у имо қилган томонга ўгирилиб, Файбулла мерганни кўрди. Ошнаси тошлар устидан ҳаккалаб, югуриб келмоқда эди. Ана у сойга келиб қўйиладиган кенггина арикни кечиб ўтаётуб, ошиққанидан шалоплаб сувга йиқилиб тушди. Ўрнидан туратура бор овозда бақирди:

— Эрназар, кўркманг, қаватингизда мен борман!

«Кўркманг» сўзи Эрназар полвоннинг нафсониятига қаттиқ тегиб, кўксини баландлатди, оёқларини керди. Атрофга мағрур бокди. Қўлидан тутмокчи бўлган бурундор милиционерни жеркиб берди.

— Тортинг кўлингизни!

Милиционер иккиланиброк қўлини олди.

Бу орада бошдан-оёқ шалоббо бўлган Файбулла мерган харсиллаб етиб келди.

— Нима гап? — деди. — Нега булар сизни тевараклаб туришибди? Раисни урган битта сиз эмас-ку. Мана бизам урганмиз. Семиз думбасига ўхшатиб тегган мен бўламан. Истасам, яна тепаман!

— Гражданин фамилиянгиз? — деди ёшрок милиционер ўта расмий оҳангда.

— Фамилиямди нима қиласан? — дея шанғиллади Файбулла мерган. — Эсон қўщчининг ули Файбулла мерган бўламан. Эщитганмисан? Эллик одим наридаги

чумчукнинг кўзидан ураман. Хўш, менга айт-чи, нимага ошнамни буйтиб тевараклаб турибсанлар? Буни эмас, анову турқинг қурғир раисни қўлга олинглар. Уйинг куйгир бу кўса, бизни қишлоқдан ҳайдамоқчи. Жазира-ма чўлда ҳаммамизни ўлдирмоқчи. Ҳукуматнинг одами-силар, у билан гаплашиб кўйинглар. Ошнамда эса гунох йўқ. Фашига тексанг, ит ҳам қопади-да, э!

— Эсониб, келиб яхши иш килдингиз, — деди ўша милиционер мамнун қиёфада. — Кидириб юрмайдиган бўлдик. Қани, машинага чиқинг!

— Нега чиқарканман? — Файбулла мерган харсанг-га тумшуқ тираб турган наридаги машинага бир қараб қўйди. — Қаёққа обормоқчисан?

— Тегишли жойга.

— Тегишли жойингга ўзинг боравер.

— Ўжарлик қилманг, оқибати яхши бўлмайди.

— Кўрқитма кўп, нима қипманки, бунча осмондан келасан.

— Сиз ва оғайнингиз шахс, қолаверса, раҳбар одамнинг жонига қасд қилишда айбланасиз.

— Ў-ў! — Файбулла мерган ажабланди. — Раис деганнинг нархи жуда баланд экан-ку, а? — У тумта-йиб турган Сами раисга бошдан-оёқ кўз ташларкан, сўнг милиционерга юзланиб деди: — Э, оғайни, сенга бир гап айтиб кўяй, яхши одам эмас бу. Раислигига ишонма буни. Отаси Бозор кўсаям бузунчи одам эди. Ёмонлигидан бурноғи йили кўчки тагида қолиб ўлди. Ули эса отасидан баттар юртбузар чиқди. Сен эса шунинг ёнини об ўтирибсан. Одаммас бу.

— Бунинг бизга аҳамияти йўқ, — деди ёшрок милиционер энсаси қотиб. — Қани, машинага! Йўқса... — У камарида осиғлик наган филофини пай-паслаган бўлди. — Машинага деяпман!

— Ҳали отмокчимисан? — Файбулла мерган олов-ланиб, кўксини очди. — Оти-ий, энағарди чирқинди-си! Ўзи откич кидириб юрибман! От! Қани, кўрай-чи, қанака отаркансан!

Шу пайт узоқдан чўзиқ нола эшистилди.

— Ули-им!

Эрназар полвон жийдаси барларини ҳилпиратиб, киялиқдан энаётган отасини кўрди. Чол қокилиб-суки-

либ келарди. Ялинади, деб ўйлади Эрназар полвон юраги сирқираб, оппок соколи билан мана шуларга ялинади. Отани ялинганини кўргандан кўра, ўлгани яхши эмасми! У ошиғич бир ҳолатда бурундор милиционернинг енгидан илкис тортди: — Э, обор оборадиган жойингга!

Чол киялик этагига етиб улгурмай, улар машинага чикдилар.

Йўлда Файбулла мерган кулди.

— Машинада бизни қамоққа опкетсин, деб йўлни кенгайтирган эканмиз-да, а, жўра!

Ўшанда Эрназар полвон икки кунга қолмай уйга қайтамиз, деб ўйлаганди. Қишлоқ аҳли қаттиқ туради, чўлга кўчмайди, деб умид килганди.

Аммо орадан беш ўйлаб, қишлоққа қайтаркан, бутунлай ўзга манзара устидан чиқди. Қишлоқ дегандан асар йўқ, ўрнида қуруқ чолдеворлар қолган. Сой ёқалаб кетган боғ-роғлар хароб бўлган, ёнбағирликдаги токзорлар ҳам шу ахволда. Қияликдаги ёнғоқзорнинг ярмини сел олиб кетган, ўрикзор эса чакалакзорга айланганди. Теракзор кесилиб, ўрнидан унган ёш новдалар қуюқ ўрмон тусини олган бўлиб, жамики нарсага ёввойилик нуқси уриб қолганди. Кўрган кишининг юраги сикиларди.

Эрназар полвон қишлоқнинг кўчирилганлиги ҳакидаги хабарни қамоқдаёқ эшигтан бўлса-да, бу қадар мискин манзарага дуч келаман деб ўйламаганди. Муюлишдан ўта-ўта, тиззалиридан дармон кетиб, тош устига ўтириб қолди. Файбулла мерган унинг қаватига чўқди. Бу нимаси, деган маънода мисоли вафодор итдай, унинг кўзлариға мўлтираб бокди.

Эрназар полвоннинг ранги гезариб, кесак тусини олди. Аламдан елкалари титраб, бўғзига ёнғоқдек нарса келиб тақалди. Ҳайтовур, кўз ёшларини тийишга ўзида куч топди.

— Файбулла, — деди энди тўшакдан турган оғир бемордек, хаста овозда. — Қишлоқни нима қип қўйишибди, қаранг!

Файбулла мерган омонат чўкишдан чордана қуришга ўтиб, жойлашиб ўтириб олди-да, Сами раиснинг етти пуштини қолдирмай сўкишга тутинди. Бу юмуш-

ни ўта хафсала билан адо этиб, бисотидаги бор сўкишу ҳақоратларни ишлатиб бўлгач, ҳолсизланиб, яна жўрасига бокди. Ундан навбатдаги пишангни кутди. Эрназар полвондан садо чиқавермагач, фоят бегона ва қўркинчли оҳангда деди:

— Жўра, сиз нима десангиз денг-гу, мен Сами раисни ўлдираман!

Эрназар полвон тезда жавоб бера қолмади. Фусса тўла кўзларини бир нуктадан узмай, сукутда ўтираверди.

— Сув бошдан лойқаланган, — деди сўнг хиркираган овозда. — Сами раиснинг айби — амалидан қўрқани. Халқнинг юзига оёқ қўйгани...

— Шунинг учун ўлдираман-да!

— У энди узокда, — деди Эрназар полвон хаёлчан. — Бу ёғига энди қандай яшаймиз? Мана шундан гапиринг.

— Сиз нима десангиз шу-да, жўра.

Эрназар полвоннинг энсаси котди.

— Мен жардан ташласам, сиз ҳам ўзингизни ташлайсизми?

— Ташлаб келаяпман-ку, жўра.

Эрназар повлон қизаринди. Йирик кафтини манглайига ишқаб, хижолатомуз йўталди. Сўнг ўқлоқдек бармоқлари орасидан дўстига ўғринча қараб, унинг афтида ўзи кутган иддаони кўрмагач, кўнгли жойига тушди. Дўстдан ёлчиганман, деб ўйлади.

— Унда биз шу қишлоқда қайтадан томир отамиз! — деди қатъий йўсинга.

— Балли, — деди Гайбулла мерган ўша бепарво оҳангда. — Сиз кайда, биз шу ерда. Дўстни ора йўлда ташлаб кетадиган номард йўқ. Лекин айтиб қўяй. • Энди ким, кўч, деб келса, шартта пешонасидан отиб ташлайман! Қамогини кўрдим, Сибириданам қўркмайман мен.

Эрназар полвон ўзи курган кулбага қайтиб кирмади. Теварагини айланиб, метиндеқ мустаҳкам деворларига ғамгин-ғамгин термилди. Остонаси булғанган, бу уй энди менга ҳаром, деб ўйлади. Гайбулла мерган эса, ирим-сирим қилиб ўтирмай, эски кулбасини наридан-бери тузатиб, ичига кириб олди.

Эрназар полвон ўша йили кир тумшуғида янги

иморат бошлади. Кейин қишлоқдошлари ўрнашган чўлга бориб, ота-онасини кўчириб келди. Куз ўртаси уни кутиб, қари қизга айланган қайлигини тушириб олди.

Замон ўзгарганми, ё дўстларнинг омади чоптими, ҳар ҳолда уларнинг бу ишига эътибор берувчи бўлмади. Жўралар қишлоқка чукур томир ота бордилар. Орадан йиллар ўтиб эса, чўлдаги бошқа одамлар ҳам бирин-кетин кўчиб кела бошладилар. Чолдеворлар тескисланиб, улар ўрнига янги иморатлар тушди. Ёлғиз унинг чолдеворигина сўппайиб қолаверди. Ёмон кундан хотира деб, Эрназар полвон уни буздирмади. Кејинчалик сой иккига бўлиниб, чолдевор орол ўртасида қолиб кетди.

Қишлоқнинг деярли ярим ахолиси қайтиб, қишлоқ қайтадан обод масканга айлангач, кунлардан бирида тўсатдан Сами раис пайдо бўлди. Аввалги викорли савлатидан асар йўқ, ит мужиган суюкдай, ночор бир киёфада Эрназар полвоннинг пойига тиз чўкди.

— Кечиринг, — деди нигохини ердан узмай. — Факат, йўқ, деманг. Юртга қайтишга изн беринг.

Қишлоққа қайта асос соглани учунми ё полвонлик обрўйи туфайлими, ўзи билмаган ҳолда юрт кайвонисига айланиб қолган Эрназар полвон ичидаги қаттиқ фижинса-да, Сами раисни ғазабига эп кўрмади. Шунингдек, кечиришни ҳам хаёлига келтирмади. Фалати меҳмонга ҳайрон тикилиб турган болаларини бир имо билан нари ҳайдаб, ғанимiga юқоридан бокди. Аммо гап қотишга улгурмади. Супа четида кекса суюкларини куёшга тоблаб ўтирган энаси ўғли қаршисида эгилиб турган сояни кўриб ажабланаркан, хира кўзларини пирпиратиб сўраб колди.

— Турган ким, болам?

— Ҳеч ким, эна.

— Пойингда бирор тургандай-ку, улим.

Сами раис йўрғалаб бориб, эна билан сўрашди.

— Бу менман, Самиман, момо, — деди.

— Сами деганинг ким?

— Эски раис.

Кампир шўрликнинг ранги ўчиб, титраб кетди.

— Вой, шўрим, яна чўлга ҳайдамоқчимисан?

— Йўқ, ўзим қишлоққа қайтмоқчиман.

— Қайт-қайт, болам, — деди кампир кўчмаслиги-дан ўзида йўқ суюниб. — Қайтгинг кептими, қайтавер. Ўзга юртда бош бўлгинча, ўз юртингда тош бўгин, деган машойиғларимиз. Шунча улоқиб юрганларинг етар, қайтинглар энди.

— Улингиз, хўп, деса бўлди, қайтамиз, момо, — Сами раис ялтоқланиб, кампирнинг кўлидан тутди. — Полвоннинг кечириши қийин бўлаяпти-да, момо.

— Қаматгансан-да, шунга қовоғи уюқ бунинг.

— Мен қаматмаганман, — дея Сами раис қалтираб, ўзини оқлай бошлади. Орада ким ва нималарни дир сўкиб, кўзини ёшлади. Қаматган мен эмас, дея қасам устига қасам ича бошлагач, кампир чидаб туролмади.

— Ўтган ишга саловат, болам, — деди кексаларга хос хокисорлик билан. — Бари худодан. Гина кўзғаб, кўйнинга тош соманглар. Худонинг қаҳри келади. Буйтиб юрмай, бола-чакантни кўчириб кел, улим.

— Эна, сиз аралашманг! — дея гапга аралашди Эрназар полвон, Раши келиб. — Тек ўтиринг сиз! Нима киласиз, эркакларни ишига аралашиб.

— Аралашманг деганинг нимаси? — Кампирнинг зардаси қайнаб, хассасига қўл чўзди. — Таёқ егинг келаяпти-ёв сен баччани! Отангни кўзи очиклигига бундай демасдинг, энди энани писанд қимайсан-да, а? Эна туфмаган сени, осмондан оёғингни шолпиллатиб ўзинг тушгансанда, а?

Эрназар полвон энанинг жаврашларига ортиқ эътибор бермай, Сами раисга зимдан кўз солди. Унинг бу кадар ўзгариб кетганидан ажабланди. Тош қотган юрагининг бир чети сал юмшаб, кўнглида шафқат ҳисси уйғонғандай бўлди. Унинг ўзига тенгситмай, келавермайсанми, дея қўл силтаб юборганини билмай қолди.

— Рахмат, биродар! — Сами раис унга интилган жойида, тағин кампирга юзланди. — Улингиз кечирди, момо.

Эрназар полвон кампир билан гурунгга киришган Сами раиснинг абгор киёфасига ғижиниб бокаркан, йўлига, нима бўлди, деб сўраб қўйди. Аммо Сами раис худди шуни кутиб турган экан, дарров шикоятга туша қолди: «Соғлиқни бой берганимиз, полвон, — деди

ўпкаси тўлиб. — Нафас сикади. Қориндаям нимадир бор. Дўхтирлар төр ҳавоси шифо бўлади дейишганди. Шу боис... Чўл бизга тўғри келмади. Ўрта ерда оёкни майиб қип олдик. Ўзимизни аямай меҳнат қилсак-да, зигирча қадр топмадик. Раисликдан туширишгач, оддий бригадирликкяям қўйишмади. Кунимиз кетмонга қолди. Мехнат ишдан чикарди мени, меҳнат...»

Уларнинг охири тузук-куруқ сухбати шу бўлган. Шундан кейин Эрназар полвон, айрим ходисаларни назарга олмагандан, уни яқинига йўлатмаган. Саломаликдан ортигини раво кўрмаган. Оқибатда, Сами чўлоқнинг кўнглида алам димланиб, Эрназар полвонга мудом кек сақлаб келди.

Бугун эса у илк бор тантана қилди. Эрназар полвоннинг нозик жойидан чанглаб, иршанглаб-иршанглаб кулди. Сур афтига қон тепчиб, кўзлари ўлжа кўрган мов мушукнинг кўзларидек чақнади. Хўш, энди ҳолинг қалай, деган йўсинда унинг кўзларига суллоҳланиб-суллоҳланиб бокди.

Эрназар полвоннинг бемақсад тентиётган нигоҳи уни кўрмок истади. Сами чўлоқни ҳовлиси юзидан топди. У энгашганча қозик йўниб ўтиради.

— Бу алдамайди, — деди Эрназар полвон ўзича сўзланиб. — Юрагида кеки бор одамнинг ўтирик сўзлаши кийин. Бунақалар чинини айтиб, ҳузур қиласди. Ўлсанг, кўзларини тупуклаб ўтирамайди бу...

Унинг кўзлари алам ва ғуссага тўлиб, улкан боши беихтиёр кўксига осилиб тушди.

\* \* \*

Борай, суякларини майдалайман, деган одам мана энди ўғли қархисида гўё ўзи гуноҳкордай, ўйга чўмиб ўтирибди. Гапни нимадан ва қай йўсинда бошлишни билмай, ўқтин-ўқтин гувранмокда.

Эрназар полвон бу учрашувга пухта ҳозирлик кўрганди. Ўғлини атай ҳовлиси юкорисидаги арчазорга бошлаб чикқанди. Ўртадаги гап-сўзлардан бошқаларнинг воқиб бўлишини истамаганди. Унинг ҳазарида, ўғли шу қадар шармандали, шу қадар гуноҳ ишга кўл ургандики, уятдан кўёш корайиб, арчазор ёниб кул бўлиши

лозим эди. Тоғлар эса қалдираб, тошлар қулаши керак-дек эди. Аммо буни қарангки, ҳеч нарса юз бермади— на қүёш корайди, на арчазор ёнди. Тоғлар ўша-ўша сукутда, сарин ел юзни сийпалайди, худди қалака қилаётгандек, хув пастлиқда қушлар тиним билмай чукурлашади. Ора-сира узоқдан какликнинг овози эши-тилиб қолади. Кўкдаги ўлаксахўр қалхатниңг сояси арчазор бўйлаб сиргалади. Негадир у кетай демас, ғашга тегиб айлангани-айланган эди.

Эрназар полвон ҳар қараганда, юзида синик табас-сум қотган Ўсар ичидан зил кетиб ўтиради. Отасини бу ҳолатда биринчи бор кўраётган эди. Одатда, ота-нинг гапи пичок дамидай ўткир — ўйидагини шартта айтарди-кўярди. Ортиқча эзмалик, паришонхотирлик унга бутунлай ёт эди. Айни пайтда қошлари чимирил-ган, юзидан қон қочган эса-да, нимадандир қаттиқ истиҳолада эди. Отанинг хаёлидан кечаетган ўйдан Ўсар боҳабар эса-да, бу тахлид ҳоли сухбатга чорла-шидан қаттиқ безовта эди. Нега деганда, ота ўғиллари-ни камдан-кам ҳоллардагина бу хилда сухбатга чорлар ва бунинг оқибати ҳеч қачон яхши бўлмасди.

Ота сукутга чўмгани сайин, Ўсарнинг жини куриш-мокда эди. Отасига ер тагидан ўшшайиб бокаркан, шу дамгача юрагига қўркув солиб келган бўйсиниш хисси шунчаки фарзандлик ҳурмати эканини, кўпинча бу икки туйфу — ҳурмат ва бўйсиниш юракда омухта яшашлигини фавқулодда сезиб қолди. У отага дадил бокмоқ ўйида қаддини ростларкан, негадир дикқатини унинг бақувват билаклари, томирлари бўртиб чикқан каттакон панжалари тортида-да, эсига яқинда отаси-нинг қўлида типирчилаб жон берган қора бука тушди. Ота ўшанда жониворни осонгина йикитиб, бўғзига пичоқ тортиб юборган эди. Шундан сўнг агар отаси истаса, уни мудом қўркув чангалида тутиб туришга кодирлигини қайта идрок этаркан, ноҷорлиги алам қилиб, қовоғи тўрвадай осилиб кетди. Гапиринг, нима дейсиз, деган маънода зардали қарашиб килди.

Бирок сўзлаш Эрназар полвон учун осон эмасди. Гап, охир-оқибат, аёвсиз камчиланиш билан якунла-нишини сезгани сари юраги сирқираб, ўзини беҳузур хис этмоқда эди. Ақл чиғириғи айлангани сайин, ўғли-

ни оқлашга кодир бирон-бир илинж йўқлиги тобора равшанлашиб, ғазаб ва нафратдан афти корайиб, уни-киб бормоқда эди. Боз устига, жувоннинг жонсарак бокишларини кўз ўнгидан қуволмай, баттар хуноби ошмоқда эди. У хаёлини чалғитиш учун ўғлининг елкаси оша қаршига, арчазорга, сўнг каттакон харсанг-тошга термилди. Жувоннинг гуноҳкорона сиймоси харсанг катидан силкиб чиққандай туюлди. Кўзларини чирт юмиб, бошини ўнгга бурди. Кўз очиб, тик қояни кўрди. Қоя бети инсон чехрасига ўхшаб кетишини энди пайқаётгандек, унга дикқат билан тикилди. Қоя юзида нам кўрди. Тунда кўнгган қалин шудринг қуёш тигида эриб, қоя бети бўйлаб пастга сизмоқда эди.

Эрназар полвон бу хил ҳолатни тоғда кўп кузатган бўлса-да, бу сафар айрича эътибор берди. Шу тобда қаршисида ўғли эмас, Файбулла чол ўтирганда, тўсатдан миясига келган фикрни яширмаган, қаранг, қоя йиғляяпти, деган бўларди. Шу биргина иборада унинг айни пайтдаги руҳий ахволи тўла акс этиб турарди. Аммо бу кечинмани ҳар кимга ҳам эътироф этиб бўлмас, бунинг учун синалган дўст — Файбулла чол керак эди. Файбулла чол дўстини тез тушунибгина қолмай, шунга яраша жавоб ҳам топа билади.

У қояга хаёлчан термилиб тураркан, салдан сўнг унинг тархида жувоннинг ғамнок қиёфасини кўрди. Бу мунис сиймо нафратдан кўра, шафкатга кўпроқ мухтождек эди. Эрназар полвон ижирғаниб, юзини тескари ўғирди. Бирок таъқибдан қочиб қутулмоқ қийин эди. У фикрини ташки ўйдан мухобаза этмоқчидай, кенг пешонасини чангллади. Лекин хаёл деганлари тизгинсиз — на андишани билади, на тўсиқни. Истамаганинг сайин ёпирилиб келаверади.

Кеча у Сами чўлоқнинг гапига ишониб-ишонмай, масаланинг тагига тўла-тўқис етмоқ ўйида туман марказига тушганди. Бозор бикинидаги емакхона остонасига қадам қўйганида, кун қиёмга яқинлашганди. Емакхонада одам сийрак, у чекка бир жойни танлаб ўтирида, чой чақирди. Чой баҳона секин кузатмокка тушди.

Эрназар полвон бу ерда ёлғиз бир жувонни учратаман, деб ўйлаганди. Емакхонада икки йигитдан бўлак уч аёл ҳам хизматда эди. Унинг тажрибакор нигоҳи

очиқ айвон бурчагида идиш-тавоқ юваётган аёлни тезда хисобдан чиқарди. Билади, ўғли бундай аёлга қиё бокмайди. Аммо столларни тозалаб юрган дуркун жувон билан ичкарида хамир чўзаётган оқсариқдан келган аёлдан қайси бири ўғлининг дидига ўтиришганини билолмай боши қотди. Ҳар иккисида хам эркак кишининг дикқатини тортишга қодир нимадир бор эди.

У емакхонага кўп кирган бўлса-да, аёлларга сира эътибор бермаганди. Ори келиб Сами чўлоқдан ҳам тузук сўраб-суриштиргаган, ўғлига эса бу ҳакда чурқ этмаган. Барини ўзи секин билиб олиб, сўнг шунга қараб иш тутмокчи эди.

У аёлларни зимдан кузатишда давом этиб, бир чойнак чойни бўшшатаркан, охири бу ўтиришда бир иш чиқаролмаслигига қўзи етгач, таваккал қилиб, стол устини тозалаб юрган жувонни ёнига имлади.

Жувон ошиқмай келаркан, стол устига тезгина кўз югуртириб, тозалигига қаноат ҳосил этгач, нима дейсиз, деган йўсинда унга бокди.

— Ўтири, қизим, — деди полвон.

Жувон ажабсиниб, курсилардан бирига омонатгина чўкаркан, хўш, дегандай қаради. Эрназар полвон унга чой қуйиб узатди. Аёл бош чайқади.

— Шеф уришади, — деди сўнг ошхона томонга тезгина қараб олиб.

— Кизим, — деди Эрназар полвон унинг тиқмачоқдек билакларига киши билмас кўз солиб. — Ўсарвойни қидириб юрибман. Танимайсанми уни?

Жувон унга савол аломати билан қааркан, елка кисди.

— Нима, танимайсанми? — Эрназар полвоннинг кўзлари айёrona қисилди. — Баланд бўйли, чиройли йигит. Мўйлавиям бор. Юзи оқовадан кеган.

Жувоннинг пуштиранг чехраси бирдан ёришди.

— И-ха, Аликни айтаяпсизми?

— Қанака Алик? — Эрназар полвоннинг энсаси қотди. — Ўсарни сўраяпман мен.

— Биз уни Алик деймиз, — жувон ўрнидан турмокка чорланди. — Мавжуни таниши у. Каердалигини факат у билади. Сўраб келайми?

Эрназар полвон, ўтири, дея имо қиларкан:

— Мавжуинг ким? — деб сўради.

Жувон хамир чўзаётган аёлга ишора қиларкан, турмок, кетмоқ илинжида чойнакка кўл чўзди.

— Чой дамлаб келайми?

Эрназар полвон йўғон бармоклари билан чойнак бурнидан тутаркан, кенг деразадан барала кўриниб турган оқсарик жувонга зимдан тикилди.

— Уларнинг ўрталарида не гап бор?

— Кимнинг?

— Ановуларнинг. Отини нима дединг? Ха, Алик билан манову аёлнинг?

— Юришади шекилли, — жувон истамайгина жавоб кайтарди.

— Ўйнаш тутган де! — Эрназар полвоннинг овози қалтираб кетди. — Тушунарли.

Жувон унга ҳадикланиб бокаркан, чакирайми, деди аста.

— Чакир!

Эрназар полвон ичкаридаги жувонга ер остидан бокаркан, ўғлини янди: «Ярамас, отиниям ўзгартириб опти. Бирор танимасин деган-да».

Мавжу дегани сал фурсат оралатиб, унга рўпару бўлди.

— Чакиртиргингизми, амаки?

Эрназар полвон унга бошдан-оёқ разм соларкан, беихтиёр унга курси сурди. Лекин жувон ўтирумади. Отага қизиксиниб қараб тураверди. У кўхликкина, бокишлари анча дадил эди. Ундаги бу дадиллик озгина ҳаё билан коришик бўлиб, жилмайгандаги кишини мафтун этувчи жозиба касб этарди. Полвон буни дарров билди ва баттар зардаси қайнади.

— Ўсарни танийсанми? — деб сўради дабдурустдан.

Мавжу бош ирғади-да, қизиксиниб тикилиб тураверди.

— Нима эди? — деди сўнг.

— Ораларингда нима гап бор?

— Тушунмадим? — жувон ажабланди.

— Сенга ким бўлади у ўзи?

— Ҳеч ким.

— Нега унда атрофингда ўралашиб юрибди?

— Буни у кишидан сўранг, — Мавжунинг чехраси оқаринкиради. — Кечирасиз, ўзингиз ким бўласиз?

— Ўша ярамас боланинг отаси бўламан.

— Нима истайсиз мендан?

— Ораларингда нима гап бор, шуни билмоқчиман.

Мавжу кўзларини пастга олди. Ёноклари аввал кизариб, сўнг окарди. Кейин кўз қирида зардали қараш қилиб, нима ишингиз бор, деган маънода бошини бир ён бурди. Чукур хўрсинди. Хўрсинганда бўлиқ кўксига бир кўтарилиб тушди. Сўнг кетмок ўйида ортига ўғириларкан, отанинг важоҳатидан чўчиб, бу аҳдидан қайтди. Кўзларига жонсараклик иниб, кийнаманг мени, дегандай отага илтижоли бокди.

Аёлнинг ҳаракати-ю ҳолатидан ўзи кўркиб кутган ҳодиса юз берганини англаб етган Эрназар полвоннинг жони халқумига келди. Демак, ўғли аллақачон бузуқлик кўчасига киришга улгурибди. Бу ўй миясига урилиши билан ўнг кўли беихтиёр белбоғига қистириғли қамчисига чўзилди. Лекин кимни уради? Манову ожизаними? Нимасини уради бунинг?

Эрназар полвон ҳаромдан моховдан ҳазар қилгандай жирканарди. Эркак ва аёл ўртасидаги муносабатни факат никоҳ орқалигина кўрарди. Шу боис, эндиги гапи шу йўсинда бўлди.

— Кўнгилларинг бир-бирингга суст кетган экан, ҳалоллаб қимайсанларми шу ишни. Итга ўхшаб или-киб юришларинг нимаси?

Жувон синик кулимсиаркан, жуда содда экансизку, амаки, деган маънода кўз қирида бир қараб кўйидида, сўнг, мен борай, дея секин изига бурилиб кетди.

Эрназар полвон ортиқ сўз қотишга ботинмади. Ва-холанки, бунга ҳожат ҳам қолмаган, бор ҳақикатни билиб олган эди у.

У шу дамгача стол ортини тўлдириб, одатига хос, керилйб ўтиради. Жувон кетгач, бирдан шалвираб тушди. Кўксини столга ташлаб, аста теваракка кўз қолди. Хаёлида, ҳамма уни кузатиб ўтиргандек эди. Йўқ, хўрнадалар ўzlари билан овора, у билан бироннинг иши йўқ эди. Шунга қарамай, бу ёрда ортиқ қолишдан истихола қилди. Емакхонадан мағлуб бўлган полвондек, елкалари чўкиб чиқди. Бозор майдонини

хам шу холатда босиб ўтди. Оёклари чалишиб, оти ёнига ошикди. Шахарни тарк этсагина бу шармандаликдан қочиб кутуладигандек, отини қичаб ҳайдади. Шахар кўчаларидан одамларни ҳуркитиб, юракларига ваҳима солиб ўтди.

\* \* \*

— Нима демоқчи эдингиз, ота?

Бу гапдан Эрназар полвон бир қалкиб тушди. Панжалари орасидан ўғлига ўқрайиб бокаркан, унинг юзида тажанглик ифодасини кўриб, қаҳри жунбишга келди: «Тавба, хам ғарлик, хам пешгирилик экан-да!» Бу ўй отанинг кўнглидаги ададсиз андишани қувди. Кафтини юзидан ола-ола, кеча емакхонада жувонга гапиргандек, бамайлихотир деди:

— Шахарда нима балчик босиб юрибсан?

Бу савол оғзидан осонгина сирғалиб чиккан эса-да, мавзунинг жирканчлиги барибир Эрназар полвоннинг тишини камаштириб юборди. Шу ёшида тилга ўта дағал туюлмиш масалада гап суришмоқликни оғир кисматдек билиб, шу кунга ичиди лаънатлар ўқиди. У ўз фарзандидан қаттиқ ирганмоқда эди. Азбаройи ирганганидан оғир гавдасини сал ортга ташлаганини хам сезмади. Аммо бу ҳол юкоридаги саволни кайталашга халақит бермади. Бунга жавобан ўғли елка кисди.

— Нимани назарда тутаяпсиз, тушунмаяпман, ота?

— Кимга илакишиб юрибсан деялман? — Ота бу гапни оғзига бехос тушиб қолган ножоиз нарсани туфлагандай килиб айтди.

Ўсар меровсираётган эса-да, отанинг емакхонага қилган ташрифидан кечәёқ хабар топган, жувон борвоеани унга айтиб берганди. Шунга қарамай, у талмовсирашда давом этди.

— Кўзимга қара, бола! — Эрназар полвон қўлидаги қамчини ўнгай тутиб, ўғлига қаттиқ тикилди. — Етти десам ўтирик бўлар, лекин олти пуштимни яхши била-ман. Аждодимиздан хеч ҳаромхўр чикмаган. Бари диёнатни маҳкам тутишган. Сен қаердан бунака кони бузук чиқиб қолдинг? Бундай чикин нарса йўқ эди-ку бизда. Қайси шайтон йўлдан урди сени? Айт, ўша

шайтоннинг киндигига пичок тиқиб, бўғзигача айриб ташлай!

У қалтироғини босиш учун бир зумга гапдан тўхтади. Терчиган манглайнини кафти билан сидириб, ғоят таассуф билан яна гап бошлади.

— Энг ёмони, қонинг бузук сени! Энди сендан қандай зурриёт туғилади, буни факат худо билади. Ўзинг бўса, туғилмаганинг минг марта афзал эди...

Ўсар бош эгиб ўтирган бўлса-да, ўзини мутлоқа беайиб сезарди. Шу боис, қон тўғрисидаги гапдан энсаси котди. Томок қириб, ўзининг норозилигини билдирган бўлди. Ўзининг қилмишига у бутунлай ўзга муносабатда эди. Бу килигини кўнгил хошиши, янада аникроғи, йигитчилик деб биларди. Отасининг тутақишидан кулгиси кистади. Азалдан у отасини эскиган-тускиган, хаётдан нихоятда оркада колиб кетган одам хисобларди. Шунингдек, у акалари хақида ҳам шу фикрда эди. Акалари ҳам оталари каби жуда покдамон эдилар. Лекин хаётда диёнату покликдан ташқари «лаззат» деб аталмиш тушунчалар ҳам бор-ку. Бу борада акалари билан кўп тортишар ва ҳар сафар уларга нисбатан кучли ачиниш хиссини туряди.

У ҳозир ҳам отасига ичи ачишиб каради. Ота ўғил билган ишқий лаззатлардан бебахра яшаб келди. Кураш дея, улоғ дея, бола-чақа ташвишида умр ўтказди. Яхшиям, отаси факат бирини билади, агар бошқа ишқий саргузаштларидан боҳабар бўлса борми, хеч ўйлаб турмай тиккалай сўярди.

Ўсар шуларни хаёлидан кечираркан, беихтиёр юзиға табассум қалқиди. Бундан отанинг ғазаби янада тошди.

— Нимага иршаясан?!

Ўсар ковун туширганини пайқаб, ерга бокди.

— Ув-в, қизбет, сендан сўрайлман?

«Қизбет» деган сўздан Ўсарнинг ҳамиша елкаси тиришарди. Ҳозир эса бирдан тутақиб кетди.

— Етар! — деди кўзлари чакчайиб. — Индамаган саин...

• Оббо, отага жеркилди. Оиладаги азалий таомил яксон этилиб, падарга гап қайтарили. Бундан Эрназар полвон бир муддат довдираб қолди. Сўнг илкис

олга эгилиб, ўғлининг елкасига аччиқ қамчи тортиди.

Ўсар сакраб ўрнидан турди. Елкасини сийпалаб, отага ғазабкор тикилди. Кўркам юзи сурланиб, кўзла-рига қон қўйилди.

— Нимаси бу, ёш боламидим мен сизга!

— Ўтири! — Эрназар полвон қамчи учи билан жой кўрсатди. — Ўтири деяпман!

Ўсар яғрини сийпалай-сийпалай, ноилож чўкди. Отасининг яна тушириб қолишидан ҳайиқиб, бу гал сал олислаб ўтириди.

— Мен сенга ҳалол луқма бериб бокканман, ярамас! — Эрназар полвон ички бир ёзгириш билан койинишга тушди. — Қайси гўрдан бу қадар ҳаромхўр чиқдинг?! Ё итмисан? Ҳатто ит ҳам дуч келган нарсани оғзига олавермайди. Нима, итдан ҳам ҳаробмисан, аҳмок!

У тутакиб сўкинаркан, бирдан хушёр тортиди. Бу қилири билан шаллақи хотинларга ўхшаб кётаётганини сезди. Ахир у ўғли йўл қўйган гуноҳ учунгина эмас, «бузук қон» туфайли азоб чекмоқда-ку. Энди йигитни хоҳ ур, хоҳ сўк — ҳеч нарсани ўзгартириб бўлмайди. Отани бу гуноҳга ундан сабаб қизиктирмоқда эди.

Боя бу ёкка келаётиб, кампиридан, анову қизбетнинг жавзасида гумона борми-йўқми, деб сўрашдан ўзини тиёлмаганди. Бу сўров ўзи учун қанчалик нокулай саналмасин, тилини чўғдай куйдирган бу жумлани туфлашга мажбур бўлганди. Кампири бошда анқайиб, йўқ, деган, сўнг эса шоша-пиша изоҳ берган: «Ҳали ёш, улгuriшар...» Буни қарангки, бу гапдан Эрназар полвон ихтиёrsиз равишда севинган: «Ҳайрият, ҳаром қон ҳали урчишга улгурмабди». Кейин у ўғлининг ит эмаслигидан ўкинган. Ит бўлганидами...

Эрназар полвон жаврашдан тийилиб, сукутга ботаркан, оёғини қисган қопқон билан олишавериб, ҳолдан тойган йиртқичдай ночор жавдираб ўтирган ўғлига зидан бокқан жойида, бирдан кўнглида илинж пайдо бўлди: «Буниям ўз билгани бордир. Балки аёлни чинданам суяр бу? Унга яхши ниятда ёндошиб, мазлумага қора бўлмоқни истагандир. Ана Аҳмад полвон,

ожизанинг эзилишига чидаёлмайман деб, Махмуд бангининг кизини ўз никохига олди-ку. Хотиним нима деркин деб турмади. Бу болаям ўзича жувонмардликни хоҳлагандир. Ахир мардлик одамнинг ташида эмас, ичидан бўлади-ку, Қани, ичини бир суриштирай-чи буни. Анову жувоннинг ҳам ройиши ёмон эмасдай эди бунга».

Эрназар полвон шу умидда Ўсарни бошдан-оёқ синчков кузатаркан, энди ўртадан нозик бир парда кўтарилиши лозимлигини англади. Бундан бадани титраб, кўзларини бир зумга пастга олди.

У не чорли қаҳри қаттиқ ва сўзи ўткир бўлмасин, ўғиллари билан аёллар ҳакида гаплашмоқни жини севмасди. Бу борада жуда қаттиқ истиҳола қиласарди. Яна бир феъли, аёл зотини менсимаса-да, муносабатда уларни улуғларди. Аёл номини булғаб сўзлайдиганларнигина эмас, фосик нигоҳ эгаларини ҳам ёмон кўрарди. Йўлда бирор аёлга дуч келиб қолса, у хоҳ таниш, хоҳ нотаниш бўлсин, кўз солмас, саломига аликни бошини терс ўғирган холда оларди.

Кўклам ўртаси кунботишдан тентак шамол кўзгролган кезлари, айниқса, у ноқулай ахволга тушиб қоларди. Бу шамол ўз номи билан тентак-хотинларнинг либосини тортқилаб, баданига чиппа ёпиширарди-да, коматини бор ҳолича кўз-кўз этмоққа тушарди. Бундай вақтда Эрназар полвон ховли юзида туролмас — ё меҳмонхонага биқинар, ё отланиб токка чиқиб кетарди. Бир гап билан айтганда, кўз зинокор, кўнгил эса ундан баттар — гуноҳдан аллоҳнинг ўзи асрасин, дейдиган кишилар тоифасидан эди у. Шунингчун ҳам емакхонада учратган жувон ҳакида ҳануз ёмон ҳаёлга бормасликка тиришар, миясига келган нохуш ўйларни имкони етганча нари қувларкан, бу ишда яккаш ўғлини айбламоқда эди. Унинг зинога мойиллиги ғазабини кўзитмоқда эди. Фунажин кўзини сузмаса, бука ипини узармиди, деган ақидага қарама-карши, фунажиннинг кўзини сузмоққа мажбур этган кони бузук «буқа»дан нафратланмоқда эди. Бу ишда ҳамиша биринчи навбатда эркакларни айбларди: «Мана менга ҳеч ким кўзини сузмайди-ку, — деб ўйларди ўз-ўзидан мамнун бўлиб. — Сузган тақдирдаям худо берган диёнатни

маҳкам тутиб кам бўлмадик. Қизарган этакка кўз солаверсак, одам бўлиб қаерга борардик. Итдан нима фарқимиз қоларди?..» Албатта, бу масаланинг биринчи томони, иккинчи томони ундан кўра даҳшатлироқ эди. Эрназар полвоннинг фикрича, қони бузук эркакнинг насли айниб, ёмон зурриёт юзага келармиш. Насл айнидими, тамом — эркаклардан иймон, аёллардан ҳаё қочармиш. Ва оқибатда, дунё телбаланиб, ер силкинармиш, дарё тошиб, тоғу тошни сув босармиш. Бу хил қарашиб унга отаси Омон полвондан юққан бўлиб, эътиқод даражасига айланганди. Омон полвон оппроқ соқолини силаб, бу дунёning ёлғончилиги-ю, у дунёning хақлиги хусусида кўп сўзларкан, бу дунёси бир синов, баҳонгни у ёқда оласан, дерди. Мана шу боис, Эрназар полвон иймонини бут сақлашга уриниб, харом туюлган нарсанни остонасига яқин йўлатмай келди. Аммо аяган кўзга чўп тушар деганлардек, мана ўғилларидан бири фосик чиқиб турибди. Агар ростанам шундай бўлса, бу ёғини худо урибди.

У қарама-қарши ўйларини базўр жиловлаб аста бошини кўтарди. Ота-бала ўртаси мавжуд нозик пардани бир ён суриб, ўғлига илинж билан тикилди. Умиди сароб бўлиб чиқишидан ҳайиқиб, ботинмайроқ деди:

— Ўша аёлда кўнглинг бор экан, буйтиб яшириб юрмай, Аҳмад полвондай эл-юрга билдириб, ҳалоллаб олмайсанми. Агар келин томондан хавотиринг бўса, мана мен бор. Гаплашаман, тушунтираман. Хўш, нега индамайсан, ҳалоллаш ниятинг борми ўзи?

Бахтга қарши, Ўсар, ўйқ, деб бош чайқади.

Эрназар полвон оғир гувранди. Миясида кўзголган оғриқ титроққа айланиб, кўллари томон силжиди. У бир амаллаб ўзини босаркан, иккиси ўртасига адватнинг залворли харсанги гурсиллаб тушганини хис этди. Бу энди яхшиликдан дарак бермас, «харсанг» зарби билан кўтарилиган «чанг» ғазаб ва нафрат зарраларидан ташкил топган бўлиб, отанинг шуурини фалажлаб, идрок этишга изн бермас, қамчинга қаноатэтмай, кўли беихтиёр ёнида ётган калладай тош томонга чўзиларкан, аммо минг қилсаям фарзанд, сўнгги дақиқада у силкиниб яна ўзига келди. Ўғлини ўзининг

тийиксиз ғазабидан күтқармоққа тиришди. Ич-ичидан туғилған қатъий ҳұмкға нисбатан айтіладиган жавобдан ўғлининг тақдирі ҳал бўладигандек, ҳалоллайсан энди, деди.

Ўсар, қизикмисиз, ота, деган йўсинда ўшшайди.

— Кимлардир исказ кетганни-я, — деди кейин.

Қизик, ота бу гапдан шалвираб тушди. Ўзи кутганча кутириб кетмади. Демак, ўғли бўғзигача балчикка ботибди. Зоти бетайин итдай, нажасдан ҳазар қилмайдиган бўлибди. Ит-ку майли, лекин буни нима қилиш керак? Қамчилашдан энди фойда йўқ. Калтак баданигина эзади, рух эса ўзгаришсиз қолаверади. Уни ўзгартира олишга бандасидан ўзганинг қудрати етмайди. Қачонки, имони бут бўлсагина. Қаршисида бош эгиб ўтирган манову маълунда бу нарсадан асар ҳам сезилмаяпти.

Эрназар полвон ўзини ожиз хис қилди. Минг бир йил дард чеккан одамдай қуйидаги сўзларни базур фулдирай олди.

— Кимлардир исказ кетганга нега сен оғиз солиб юрибсан, ҳаромхўр!

Ўсар тош асидан қолган асори-атиқага тикилгандай, отани зимдан кузатаркан, унинг бу қадар изтироб чекишидан бошда таажжубланди, сўнг кулгиси қистади. Ҳартугил, башарасига қалқиган эрмакловчи табасумни ўз вактида тийишга улгурди. Ҳозир ҳар қандай важ ортиқча, бу борада отасига ҳеч нарсани англашиб бўлмайди. Қилмиши ўзи учун арзимас нарса эса-да, ота учун нак фожианинг ўзи эди. Энди қандай қилиб бўлса-да, вазиятни юмшатмоқ лозим эди.

— Ота, — деди у қилмишидан бағоят азоб чекаётгандек, бир охангда. — Бир адашдик-да, энди бу ҳол ҳеч қачон такрорланмайди. Сўз бераман сизга.

Эрназар полвон бу гапга зигирча ишонмади. У шармсизликни тузалмас дард деб билар ва бунга бир неча бор гувоҳ бўлганди. Ўшандай воқеаларнинг бири ни битон заводида бошидан кечирганди. Оғайнилар бу ёрда маҳбуслик муддатининг сўнгги йилларини ўташётган эдилар. Завод жамоасининг ярмини маҳбус дардан ташкари, фуқаролар ташкил этарди. Улар ора-  
нда малла сочли кўхликкина кранчи жувон ҳам бор

эди. Шўрлик аёл крандан пастга тушди дегунча иккича суллоҳ ва шилқим эркаклар оғушида қоларди. Айниқса, Толя деган давангӣ бир йигит жуда тегажок эди. Жувонни чирқиатиб, эзғилашдан хузур киларди.

Эрназар полвон бу ҳолга тоқат қилолмай, кўлидан келганча аёлни ҳимоя қилишга уринарди. Ана шундай уринишлардан бирида Толя билан гапи чап тушиб қолди. Толя унинг эътиорозларини ишшайиб тингларкан, темирчининг босқонидай кенг кўксини тўлдириб нафас олди-да, кўз сузилади, қўл чўзилади, дея қисқа жавоб қилди. Шу гапдан сўнг Эрназар полвон, қаватида ҳамишагидек, Файбулла мерган, ўзича аёлни «суд» килмоқчи бўлди. Аёл унинг аччик-тизиқ гапларини кулимсираб тингларкан, ачинаяпсанми, деди. Эрназар полвон бош иргади. Файбулла мерган эса одатига хос гапнинг лўндини айтди кўйди: «Фунажиндай кўринган букага кўз сузавермай, биттасини танлади-е, энагар. Ҳамма ерни наҳс бостириб юбординг-ку!» Жувон унга лоақал эътибор беришни лозим кўрмай, Эрназар полвонга ғамзали боқиб деди: «Унда ҳимоя қил. Нега турибсан оғзингни очиб».

Эрназар полвон аёлни ҳимоя қилди. Эртаси уни Толянинг чангалидан юлиб оларкан, йигитни боллаб суробини тўғрилаб кўйди. Аммо Толя деганлари гавда жиҳатдан зўр бўлса-да, амалда пўк экан жуда, бошлиқларга шикоят қилди. Оқибатда, Эрназар полвоннинг муддатига яна муддат кўшилди. Муштлашув пайтида ёнида темир тутиб, ҳар эҳтимолга қарши, ҳамлага шайланиб турган Файбулла мерган ҳам бу насибадан бебахра қолмади.

Эрназар полвон маҳбуслик муддати яна бир оз чўзилганидан кўпда куйинмади. Бир заифанинг шаънини ҳимоя қила олганидан ўзича сархуш эди. Аммо бу сархушлик орадан уч кун ўтмай нафрат билан алмашинди. Тунги сменада у аёлни Толянинг оғушида кўрди. Битон тахламлари орасида уларни жуда хунук иш билан андарман ҳолатда учратди. Бошда у шамдай қотди. Сўнг беихтиёр қўлига темир бўлагини олди-да, изтироб оғушида қаққайганча туриб қолди. Бу орада Толя унга пешвоз юрди. Пешона терларини камзули этаклари билан сурта-сурта мамнун ва масрур бир

киёфада ёнидан илжайиб ўтиб кетди. Кўлидаги темир бўллаги ерга жаранглаб тушгандан кейингина Эрназар полвон ўзига келди. Энгил бошини шоша-пиша тузатётган аёлга аста яқинлашди: «Агар яна корангни кўрсам, ўлдирман!» Аёл кўркув тўла кўзларини унга тикаркан, хазиллашмайтганини англади.

Орадан икки йил ўтиб, улар тағин учрашдилар. Озодликка чиқкан куни икки оғайни кўчадан баҳтиёр кетиб борардилар. Бир вақт Файбулла мерган, и, қара, деб қолди. У бошини кўтариб, қаршисида аёлни кўрди. Жувон қаватида икки боласи, рангпар эри билан кўлтиклишиб келарди. Уни кўриб, аёлнинг ранги сал оқарсада, ўзини сезмаганга олди. Курмағур гўзал эди, фарангги атири хидини буркситиб ёnlаридан ўтди-кетди.

Эрназар полвон уни кўз кирида кузатиб қоларкан, юраги ториғиб, мусаффо осмонга бокди. Осмон тиник ва фусункор эди. Нигохини қуийга олди. Одамлар, турли киёфалар, шаҳар шовқини... У яна кўкка тикилди. Шу тикилганча нидо қилди: «Кетдик, ошна! Тоғу тошларга кетдик!»

Ўшанда кўнгил оройишини тоғлардан истаб, қишлоғига ошиққанди. Тоғлар зада юрагини овутйбигина қолмай, гавжум хаётнинг гавжум кусурларидан форуглаган, ўтган кунлар ёди эса бамисоли суваракдай хотирасининг чекка-чекка кавакларига яширинганди. У энди тинч эди, гўё хаётида ноҳуш йиллар ва кунлар бўлиб ўтмагандек, ўта осойишта эди. Кўхна ўйлар ортиқ уни безовта этмас, одамзодга хос иллатлар теварагини куршаган мана шу тоғу тошларга хеч қачон доримайдигандек жуда хотиржам эди. Аммо, мана, фавқулодда билдики, ўша иллатлардан бири тоғ ҳавосини бузмоққа киришибди. Бу нарса ўзининг пушти камаридан бўлган фарзанди тимсолида нақ қошида манаман деб турибди.

Эрназар полвон зилдай оғир нигохини теваракка солди. Назарида, тоғлар ўзининг кўнглидек ғариб ва мискин эди. Тўғрига бокди. Қаршисида бош эгиб ўтирган ўғли кўзига чиркин, ўта чиркин кўриниб, нафаси бўғилди. У ўзидан дарак бериб, аста санчимоққа тушган юраги устини сийпаламоқ бўлиб, яланг тўшига кўл юбораркан, ўнг ёнида шарпа илғади. Аста ўша томонга

ўгирилди. «Йиғлоқи» қоя бикинидан күйига энган сўқмоқ бошида Қўктойни кўрди. Қўктой дардманд жониворларга хос сусткашлик билан харакатланар экан, уларни кўриб чўнқайди. Салдан сўнг итнинг қаватида Сардор пайдо бўлди. Бола бобоси билан амакисини овлокда кўриб ажабланиб турмади. Қайтамга қувониб, сўқмоқдан пастга эна бошлади. Ит унга эргашди.

Ўсар жияннинг ташрифи жонига ора киргани ва шунга қарамай, ҳали гап тугамаганини сезди. У, мен борай, деган маънода ўрнидан ярим қўзғалиб, отасига қаради. Ота индамагач, оёққа қалқиди-да, қоя томон юрди.

Ота ўйга чўмганча қолаверди.

\* \* \*

Қоя бошига кўнган офтоб қўйига юмалаб, қишлоқ узра шом пардаси ёйилганда, Эрназар полвон Файбулла чолни қора тортиб, ёлғизоёқ сўқмоқдан пастга эна бошлаганди. Юрагини аёвсиз кемираётган муаммо юзасидан дўстидан бирор жўяли маслаҳат чиқишига унчалик ишонмаса-да, одам тафтини одам босади дея унинг ҳузурига ошиқмоқда эди. Ўз навбатида, айни шу нарсанинг ўзидан дили хуфтон тортиб борарди: «Йўрғалашибни қара! Бу туришимда борасолиб кўзёши қилсан ҳам керак! Ҳа-ҳа, қарибсан, Эрназарвой, қарибсан! Эмасам, дамингни чикармасдинг! Даминг чикаяптими, демак, қарибсан!..»

Аслида, Файбулла чолга дил ёрмок фикри кундузиёқ ҳаёлига келганди. Нимаям қилсин, ҳақиқат тўла ойдинлашиб, ўғли айбини тан олгач, шўрлик ёмон ахволга тушиб қолганди-да. Азбаройи, гарангсиганидан, Ўсарнинг қачон ва қай вазиятда олдидан туриб кетганини ҳам пайкамади. Қачонки, ит қаттиқ аксиргандан сўнггина хуши ўзига келиб, бундай ён-верига аланглаб карасаки, ўнг ёнига невараси чўккан, оёқсарисида ит чўзилган, Ўсар эса аллақачон жуфтакни ростлаб қолганди. Уларнинг келишини ёқтирмай, у тоҳ болага, тоҳ итга боқаркан, кўзи жониворнинг жароҳатига тушиб, юрагига ўшандай оғир жароҳат инганини сезди. Томирлари бўйлаб қуюқ, ёпишқоқ кон

силқиб оқаётгандек, ўзини жуда лохас хис этди. Ке-йин туйкусдан ич-ичидан қўзролган аччиқ аламга чи-даёлмай, боя кўз остига олиб қўйган калладай тошни чанглабор кучи билан пастга улоктириди. Тош пакана арча танасига бориб урилиб, қасир-қусирлаганча қўйига юмалаб кетди.

Унинг бу харакатидан ит хуркиб, бола ҳайрон бўлди. Сўнг бобосига таклид килиб, у ҳам қўлига тош олди. Аммо бобосининг авзойидан ҳозир қўнгилхушликнинг вакти эмаслигини ўз вактида пайқаб, бу ишдан ўзини тийди. Бобосидек юзига жиддий тус бериб, индамай ўтираверди.

Эрназар полвон бола олдида «аза» тутиб ўтиришдан ийманиб, ниҳоят, ўзини қўлга олди. Этик қаддини тиклади. Бир хаёли, Гайбулла чолнинг олдига бориб, юрагини бўшатгиси келди. Бироқ дайди ошнасининг кундузлари уйидан топиш мушкуллигини ўйлаб, бу фикридан қайтди. Сўнг қўнглига тору тошлар оро кирадигандек, сайр этмоқни ихтиёр қилди-да, невара-сига буюрди: «Бор, отангга айт, отни эгарласин!» Кейин қўшиб қўйди: «Итни занжирла, эргашиб гаранг қилади».

Аммо тоғу тошлар юрагига таскин беролмади. Кечга яқин курашда бой берган полвондек, сайдан жуда эзгин қайтди: Одатдагидек, югуриб чиқкан неваралярини эркалашга ҳам ҳафсаласи келмай, кир тумшуғи томон юрди. Йўл-йўлакай Ўсарнинг ховлисига кўз кири ни ташлади. Ўғлининг улови кўринмас, келини супада ёлғиз юнг титиб ўтиради. Келинига унинг раҳми келди. Билади, кёлини ўғлини жонидан ортиқ кўради. Буни у жувоннинг кўз қарашларидан пайқаган. Унинг ўткир сезгиси яна шуни фахмлаганки, бу ёш аёл эрига қатор ўғиллар туғиб бериш орзуси билан яшайди. Барча тоғ аёллари каби бу нарсани улуғ баҳт деб хисоблади. Аммо бўлғуси фарзандларининг отаси аслида кимлигини у билармикан? Ағесуски, билмайди. Дунёда унинг эридан кўркам, мард, ҳалол одам йўқ. Эрининг биргина кулиб карашига жонини беришга тайёр. Эркалашларидан эса тани яйраб, дили кувнайранг олади. Тоғу тошлар ажабтовур кичрайиб, эри

тоғлардан ҳам юксак, тоғлардан ҳам күдратли бир сиймога айланади. Шу билан биргаликда, келинчак ўзининг гўзаллигини яхши билади. Билгани боис, эрининг ўзига хиёнат кила олишини хаёлига келтирмайди. Келтирадигина эмас, дунёда шундай жирканч иллат борлигини ҳатто тасаввурига сиғдиролмайди. Сойга келиб қуйиладиган анову булок сувидай қалбиям, фикриям тоза. Оламни қандай кўрса, шу холда идрок этади.

Агар худо унга шу тобда қайнотасининг қалбига мўралай олиш имконини берганида эди, у суюкли кишисини бутунлай тескари тасаввурда кўрган бўларди. Тоғлардан юксак кўринган эри аслида чуволчангдан майда ва ҳароб, мардона кўринмиш нигоҳи қаърига фахш ин курган, бақувват қўллари ўзга аёл баданидан жирканмаганидек, қатъий қимтилган лаблари бегона дудоклардан ҳазарланмайди. Энг даҳшатлиси, кўзни алдовчи кўркам вужудида ҳаром қон гупуради. Бу қон эса эрта бир кун дунёга келадиган фарзандлари томираша ҳам кўпиради. Ох, қандай даҳшат бу!

Аммо ҳамма бахт шундаки, ўзга қалбга мўраламоқнинг асло имкони йўқ. Бу хусусиятдан одамзод маҳрум. Акс ҳолда... Бунинг устига, дунё ва шахсга нисбатан ҳар ким ўз нуктаи назари юзасидан ёндошади. Кимгадир қора кўринган нарса бошка бирорга опполк туюлади. Балки мана шунинг учун бу олам чигалликлари давомли, чиркин ишлари яшовчандир. Боз устига, тоза қалб ҳамиша риёдан холидир. У ёмонликка тезда иона қолмайди, яхшидир, деган илинж унда доимо устувор бўлади. Агар ҳозир бирор келинчакка, эрининг хиёнаткор, деса, унинг ишониши қийин кўчади. Кўнглида бамисоли илондек ғимирлашга тушган ноҳуш ўйлар суюкли эрининг биргина кулиб қарашиданоқ изсиз йўқолади. Чунки унинг кўзи ёмонни кўрмаган, дунёда ёмонлар, фақат ёмонлик учунгина туғилганлар борлигини билмайди, ҳатто буни тасаввурига ҳам сиғдиролмайди.

Эрназар полвон эса ёмонларни кўп кўрган. Қамоқхонада ва кейинчалик хаётда уларнинг хили-хили билан учрашган. Бундайларга эзгулик — бегона, одамийлик — ўгай, улар на ватани билади, на қадриятни.

Барча ҳаракатлари замирида нафс ётади ва тириклик деганда, ўшанигина тушунишади. Эрназар полвон уларга ўзича ташхис қўйган: «Қони бузук!» Ёмонлар хеч қачон тузалмайди, деб ўйлади. Мавҳ этиш билангина ер юзини улардан тозалаш мумкин, дея фикр килади. Аммо бу борада унинг кучи фақат итларига етади. Дунё дегани ёлғиз қўрғонидан иборатдек, бу юмушни ўта ҳафсала билан адо этади. Қишлоқ тўла ҳашаки итлару, у эса зўр бериб итларининг наслини яхшилашга уринади. Начора, ҳаётда унинг ўз мезони, ўз ўлчови бор.

Эрназар полвон келинидан кўзини уза-уза, мушкул ўйлар қуршовида қир тумшуғига аста чўкаркан, нигоҳи билан Файбулла чолни қидириб топди. Ошнаси ҳовлиси юзида ғимирсиб юрарди. У, шуни истаса-да, дўсти қошига ошиқмади, шунингдек, қўл сирмаб ҷақирмади ҳам. Кейинроқ тушарман, деган ўйда қишлоққа разм соларкан, бирдан юрагига шубҳа оралади: «Нега қишлоқ жим?» Биладики, қишлоқда гап ётмайди. Сами чўлқ билган сирдан бошқаларнинг воқиф бўлмаслиги асло мумкин эмас. Қишлоқ кайвониси сифатида уни ё авайлашмоқда, ё бу ишни ортиқ айб санамай қўйишган. Қишлоқнинг сукутдалигидан шубҳаси ортиб бораркан, қалбини ўқинч ва алам кемира бошлади. Одамлар жимми, демак, уларнинг ори ва андишасига путур етиби. Яхши-ёмонни фарқламай қўйишибди. Йўқса, мана неча кундирки, ўз ёғида ўзи қоврилиб юрибди. Бирор киши, ҳолинг қалай, анову эркатойинг ипини узиб юрган эмиш, нима килдик энди, дея келмади. Сигири емлаб қолса, югуриб кела-диган одамлар мана энди қорасиниям кўрсатишмаяпти. Ё ўғлинг шу экан, ўзинг гўр бўлармидинг дейишаляпти-микан? Умуман, нималар бўлаяпти ўзи?

Бу ўйдан Эрназар полвон гангиб қолди. Аслида гангиши воқеа ойдинлашган куниёқ бошланган, бунинг оқибатида, у азалий одатларини ҳам унута бошлаганди. Илгари юраги бирон нарсадан ториқса, ҳадаҳа қўй сўйидирав, тўкин дастурхон устида, бола-чакалари даврасида оғир ўйдан форуғ топарди. Эндиниси шунчаки ториқиши эмас, унинг назариди, нак кулфатнинг ўзи эди. Бу кулфатни қўрадаги бутун қўйларни сўйидириб,

болалари куршовида ойлаб ётиб еса-да, дилидан ари-тиб бўлмасди. Бир сўз билан айтганда, у ночор ахволда қолган, ночорлигини сезгани сайин юраги ҳасратга тўлиб-тошиб бормоқда эди.

У, агар юрагини бўшатмаса, бўғилиб ўладигандек, Файбулла чолни қора тортганди. Иккиланишларини қадам-бақадам енгиб, ошнасининг кулбасига яқинлашар экан, изидан сассиз эргашиб келаётган шарпани пайқади. Ортига ўгирилиб, ўн одимча нарида ҳадикона дум силкиб турган Кўктойни кўрди.

— Кайт!

Кўктой чўнқайди. Кетишни хаёлига келтирмади. Эгаси эса ортиқ қистаб турмади.

Улар ҳовлига олдинма-кейин кириб боришганда, Файбулла чол ўчоқ бошида куйманиб юрган экан, дўстининг ташрифидан жуда кувониб кетди.

— И-и, келинг-ай, дўстим! — деди ҳар галгидек хушхоллик билан. — Сизни чақирай деб энди овоз ростлаб турувдим. Ризқингиз бутун-да, ўз оёғингиз билан кириб келдингиз.

Эрназар полвон, одатича, бош иргаб алик оларкан, кўз кирида ўтириш бол жой қидирди. Нигохи берирокдаги сандалга тушгач, оғайнисининг «сайраш»и остида ўша томонга юрди.

— Бугун юкори газадан тўрттагина каклик тутиб олдим, тузок билан, — дея чақак уради Файбулла чол. — Шуни қозонга босувдим... Сиз ичкарилаверинг, мен ҳозир...

Эрназар полвон, ичкарида нима бор, деган иддаоли ва хорғин киёфада сандалга чўкаркан, кутилмаганда сандал синиб, у оёғи осмондан бўлиб, йиқилиб тушди.

— Ҳай, эгаси ўлди-я эгаси ўлди-я, — Файбулла чол унинг тепасига югуриб келиб, кўлидан тутди. — Сандални едингиз-а, қишда нима қиласман энди, дўстим?

Эрназар полвон зил-замбил гавдасини базўр ўнглаб ўрнидан тураркан, чирик тахта бўлакларини сепкилаб, ўдағайлаб берди.

— Бунақа зормандани бир четга кўяди-да, э! И-и, ивирсимай ўлинг сиз!

— Четда-ку, жўра, четда.

— Нимаси чет? — Эрназар полвон оғриган думба-

сиини киши билмас сийпалаб, жийдаси этакларини қокқан бўлди. — Кўқиган хотиндан баттарсиз. Ҳамма нарсангиз омонат!

— Бу... ўзимам омонатман-да, дўстим.

— Эрта-индин ўләётганингиз йўқ-ку, сал у ёқ-бу ёқка караб кўйсангиз бўмайдими!

У тутоқкан сайин Файбулла чол кулар, кулиб-кулиб ошнасини узиб-узиб оларди.

— Ўлишим осон бўсин дейман-да, жўра. Шунингчун зебга унча ҳушим йўқ. Лекин сизга қийин, шунча жой, шунча давлатни қандай ташлаб кетасиз-а? Кўзингиз оркангизда кетса керак ўзиям.

— Караган сари айнияпсиз, — Эрназар полвон унинг гапларига парво қилмайди. — Асли илгариям гўр эмасдингиз.

— Мени сандалсиз колдирдингиз лекин.

— Ана, меникини оптушинг.

— Сандалингиз ўзингизга буюрсин, — Файбулла чол унинг елкасига қоқиб, яна кулади. — Қани, уйга киринг.

— Ичкарида пишириб кўйибдими. Тўшамча опчикинг, ташқарида ўтирамиз.

— Анову қора булутдан куркувим бор, ёғиб қомаса дейман-да.

— Опчиқаверинг.

Файбулла чол супага жой килиб, ўчоқ бошига шошилди. Эрназар полвон жойлашиб ўтиаркан, ошнасими гап билан ўйиб олмоқ пайида унга зимдан тикилди. Бу вақтда Файбулла чол лабларини ёш боладай чўччайтириб, ёғоч чўмичда овқатнинг тузини кўрмокда эди. Унинг хокисар қиёфаси Эрназар полвоннинг меҳрини ийдирди. Дўстисиз бу ҳаёт деганлари жуда зерикарли бўлишини яна бир карра чукур ҳис қилди. Олди-орти тўла бола-бакра-ю, лекин бу дўстининг ўрни ўта бўлакча эди. Дўлворгина жўраси ҳаётига ўзига хос нур бағишлаб туради. Ҳозир ҳам кўнгли хийла таскин топиб, тўгун тортган асаблари анча бўшашди. Аммо муомала-да буни билдирамади.

— Қани, берманг қенг-чи! — деди қўрсроқ оҳангда.

Файбулла чол қўлидаги чўмични қозон четига суюб, ажабсинган кўйи унга яқинлашди.

— Нимага дамингиз чиқмай юрибди? — деб сўради Эрназар полвон.

Файбулла чол хеч нарсага тушунмай қошларини керди ва шундагина дўстининг тузи дард чекаётган одамниридай ўзгачарок эканини пайқади. Бунақа кезларда жўраси алланечук қаримсиқ тортиб қоларди.

Файбулла чолнинг ажабсимишини, атай қиласяпти, деб англаган Эрназар полвоннинг жаҳли қўзиди.

— Анову қизбет улнинг қилигини айтаяпман, — деди. — Нима, чинданам хабарингиз йўкми?

— Худо шоҳид, ўлимдан бошқасидан сира хабарим йўқ, — Файбулла чол супа четига омонат чўкди. — Тинчликми, дўсим?

— Сами чўлок билган нарсадан сизнинг хабарингиз бўмай қолдими?

Сами чўлокнинг номини эшишиб, Файбулла чолнинг пешонаси тиришди.

— Гапни чувотманг кўп! — деди овози кескин оҳанг касб этиб. — Нимани биларкан у?

Эрназар полвон унинг алдамаётганини сезиб, бошини куйи солди. Кейинги гапни шу алфозда айтди.

— Ул... хотинларга элакишиб қопти.

— Энди эшишиб турибман.

Эрназар полвоннинг кўнглида тагин шубҳа ғимирлаб, бошини кўтарди.

— Ўтирик айтманг.

Файбулла чол, алдасам худо урсин, деган маънода имо-ишоралар қиларкан, деди:

— Қасддандир балки?

— Қасддан эмас, ўзим бориб суриштириб келдим.

— Чатоқ бўпти.

— Сами чўлок билибдики, қишлоқ хабар топган чиқар деб ўйловдим.

— Туллак одам у! — Файбулла чол подачилардек шалоқ сўкинди. — Ярамас, гапни майдалаб юрмай, пичоқни тўғри кўксингизга санчиб қўя қолади. Кейин четдан туриб томоша қилади. Билади, ҳаром-ҳолишиш ишларга тоқатингиз йўқ. Энди юргандир ишанглаб?

Эрназар полвоннинг боши солиниб тушди. Дўсти хақ эди. Чиндан ҳам Сами чўлок жўн одамлардан эмас. Тифни санчиб қўйиб, жонталвасада тўлғанишингни

томуша қилишни хуш кўрадиган кишилар тоифасидан эди. Бугун йўлда учратиб, юзида шунга ўхшаш ифодани аник ўқиди. У ўтган сафаргидек иршангламаса-да, салом бера-бера, кўз остидан унга синчков разм солган, полвоннинг униккан чехраси, хийла чўккан елка-ларидан зарби хато кетмаганини сезгач, кулгисини муртлари орасига яширганди. Ҳа, у зимдан тантана қилишни яхши билади.

— Ҳа, Сами чўлоқнинг куни түғди, — деди Эрназар полвон кўзини бир нуктадан узмай. — У-ку, майли, отасининг қорнига, хиринглаб уч-тўрт кун димори ни чоғлаб юрап. Лекин улди нима қилдик? Мана шунисига гарангман.

— Сами чўлоқни дейдиган бўсангиз, ҳеч нарса қиманг.

— Сами чўлоқнинг нима дахли бор бу ишга? — Эрназар полвон илкис бош кўтарди. — Қилғиликни у эмас, ул қилган-ку.

— Нима қилардингиз, бармоғингизни тишлайсиз энди.

— Бармоқ тишлаш билан иш битса майли эди; — Эрназар полвон чуқур хўрсинди. — Ҳамма бармоқларимни тишлаб узиб олишга ҳам рози эдим. Оқибати ўйлатади мени! Шоҳим, эшитаяпсизми, бир шоҳим ириб-чирибди менинг!..

— Шоҳ деб кесиб ташламассиз энди?

— Таги билан кесиб ташлагим келаяпти! — Эрназар полвон титраб кетди. — Лекин қандай қилиб?

— Оғир бўлинг, йигитчиликда бўп туради.

— Йигитчилик итлик дегани эмас-ку!

— Бошқа не иложингиз бор?

— Караб турсам, ҳаромдан ҳазар қимайдиган бўп қопсиз сизам!

— Ё тавба, бу тухматингиз нимаси?

— Агар билсангиз, Эрназар полвоннинг қони бузилибди! — Эрназар полвон гуваладек мушти билан тиззаси кўзига туширди. — Қоним айнибди менинг! Бунинг касри энди зурриётларимга уради! Заха еган шоҳимдан заха мева битади! Ахир ёмонлару шармсизлар осмондан тушмайди-ку. Улимга ўхшаган нокаслардан пайдо бўлади-да. Кимсан Эрназар полвоннинг не-

варалари... Сиз эса йигитчилик дейсиз. Э, уйига ўт тушсин бундай йигитчиликнинг! Кеча отам тушимга кирибди. Қовоғи осилган, бошини чайқай-чайқай, индамай кетди. Узатилган қўлимни олмади. Жирканди мендан. Сиз йигитчилик-да дейсиз! Йигитчилик эмас бу...

Эрназар полвоннинг бу қадар ёниб ёзғиришларига нима деб жавоб қайтаришни билмай, Файбулла чолнинг боши қотди. Дўстига ичи ачиб қаради. Юпатишдан фойда йўқ. Нега деганда, дўсти идрокли одам, унинг пойинтар-сойинтар гапларини бирпасда пучакка чиқариб ташлайди. Шунда унинг эсиға Ашур мулланинг бир гапи тушиб қолди-да, шу гапдан дўсти таскин топадигандай, мулладек қироат билан гап бошлиди.

— Қайғурманг, дўстим. Бу дунёдаги ҳеч бир ёмонлик жазосиз қолмағай. Худойим яхшиларга жаннатни, ёмонларга эса дўзохни очиб қўйибди. Улингиз ёшлик кип гуноҳга йўл қўйибдими, жавобини охиратда беради.

Эрназар полвон дўстига таажжубланиб бокди. Гўё кархисида ошнаси эмас, ўзга бир одам ўтиргандек, уни бир сира бошдан-оёқ кўздан кечирди. Бошқа пайт, бундай гапирманг, ўзингизга ўхшамай қолаяпсиз, деган бўларди-ю, лекин ҳозир юраги ғаш бўлгани боис, бу гапни ўзига эп кўрмади. Аммо дўстининг гапи анчадан бери миясида ўралашиб юрган бир ўйни қитиклаб юборганди.

— Худонинг ишигаям унча қойил эмасман, — деди хиёл хирқираган овозда. — Худо жаннату дўзохни яратиб бекор қимаганмикан, деб ўйлаб қоламан бальзан. Нимагаки, бандаси аввал қуфр ишларни хўп қила-ди-қиласди-да, кейин бирдан дўзохни эслаб қолади. Жаннатга тушиш умидида худога топинади. Ундан кўркади. Кўркқанидан ўтган ишларига тавба қила бошлиди. Кеча бўридай ириллаб юрган одам бирдан қўйдай ювош тортиб қолади. Менимча, худодан кўрқиб эмас, уни севиб яшаш керак. Худони суйган банда қуфр ишлардан йирок юради. Аммо мен бу ишни худога ташлаб қўёлмайман. Ўзим нимадир қилишим керак. Гапнинг очигини айтсан, ўша ярамас улдан невара

кўрішни истамайман! Кани энди, ахта кип ташласам у безбет ҳангини!

— Ундаи деманг, э, фарзандингиз ахир, — Файбулла чолнинг ранги оқариб кетди. — Ундан баттарлар ҳам юрибди-ку. Ҳамма қатори ғамга чидамли бўлинг энди.

— Мен ҳамма эмасман! — Эрназар полвон ғайри-табиий овозда бақириб юборди. — Конимни булгашга йўл қўймайман мен! Нимадир қиласман мен уни!

— Йўғ-ай, ўз фарзандингизни ўзингиз...

Эрназар полвон эзгин ва ночор бир қиёфада ерга тикилиб қолди. Файбулла чол сал олға силжиб, унинг елкасига кўл чўзмок истади-ю, лекин ботинмади. Қултүрк ютиниб ўтираверди.

— Ўзи билан гаплашдингизми? — деди охири чидаёлмай.

Эрназар полвон эгик бошини ирғади.

— Нима дейди?

Эрназар полвон чукур хўрсиши билан кифояланди.

— Сиз уни уринг! — деди Файбулла чол ошнасини бу ахволга солиб қўйган Ўсадан беҳад ғазабланиб. — Бирор дараҳт-параҳтга боғлангда, тавба қилмагунча таёқланг. Лекин бу ишни уйда киманг, товга опчиқинг. Бақирганини бирор эшитмайди, айирувчиям бўмайди. Ичга кирган жин калтак билан ҳайдалади. Жин таёқдан кўрқади-да. Тана улингизники бўлгани билан, сиз аслида жинни, йигитнинг ичига кириб олган жинни калтаклаган бўласиз. Калтаклаганда авайламанг, раҳмсиз бўлинг. Оғридан улингиз бақиради. Билингки, бу улингизники эмас, балки жиннинг додвойидир. Калтакдан улингиз жисмидан жин қочиб, тани ва рухи ундан покланади. Ҳаром қон — жиндан.

Эрназар полвон бошини кўтарди. Фусса тўла кўзларида умид учқунланди.

— Йўғ-ай? — деди ишонқирамай.

— Нима, ишонмаяпсизми?

— Мен... ҳеч эшитмаганман-да.

— Мен эса бошимдан кечирганман.

— Эшитмаганман.

— Энди бу... айтадиган гап эмасди-да, дўстим, —  
Файбулла чол хижолатомуз чекка кашлади. — Шунинг-чун гурунгдан йирок тутганмиз.

— Ҳай, айтинг унда.

— Хабарингиз бор, илгари биз Бешқўтонда турганмиз. Бу томонга муртим бўртганда келганман. Сиз унда ўсмир йигит эдингиз. Отам отангиз билан ошна, икковмиз Яйдоктепада олишиб кунни кеч қиласардик. Сиззи ҳеч йикитолмаганман лекин. Зўр эдингиз-да...

— Эсимда, — Эрназар полвон бетоқатланди. —  
Мақсаддан келинг!

— Шу... — Файбулла чол муштумига йўталиб, четга бир караб олди. — Кўзим қизариб, Бешқўтонда бир келинчакка ҳазиллашиб кўйганман. Отам теракка боғлаб, роса урган. Мана шундан бери бегона аёлга кўз сомайман. Отам калтак билан ичимдаги жинни ҳайдаб, қонимни тозалаган.

— Шайтонни денг, — Эрназар полвон тўнғиллади.

— Ҳай, нима фарқи бор, иккиси ҳам бир гўр-да, —  
Файбулла чол сал оғринди. — Шу десангиз, келинчакнинг аймоқлари барибир кечиришмади. Бу томонларга ўша жанжал туфайли кеп колганмиз, жўра.

— Калтак этни ўлдиради, — Эрназар полвон шундай деркан, катта ўғлидан эшишган гапни илова қилди: — Рӯхга таъсир этмаса керак.

— Эй-й, калтакнинг олдида рухингиз сичқоннинг инини минг танга санаб қолади. Ўзимдан киёс, танишганимиздан бери бирор бегона аёлга кўз қиримни ташлаганимни кўрганмисиз?

— Кўрмаганман.

— Ана! — Файбулла чол очилиб кулди. — Агар раҳматли отам ўз вактида калтак остига олмаганида, улингиздан кам иргишламасдик. Нима, биз эркак эмасми? Худога шукр, бирордан кам жойимиз йўқ. Ашур мулла айтгандай, зинога майллигимиз калтак билан сўндирилган.

— Аммо ичимга чирок ёққандай бўлдингиз, дўстим, — Эрназар полвоннинг елкалари тикланиб, чехраси хиёл ёришди. — Агар гапларингиз чин бўса, у бола мендан кўрадиганини кўради энди! Нима қисам экан, деб ўзимам тоза эзилиб юрган эдим. У ҳангини

шундай бир боплайки, бегона аёлни кўрганда, бети тескари бўп кетсин.

— Кейин ис чиқариб юборинг.

— Буниси нега?

— Тоамили шунаقا. Тандан шайтон қувилгач, ис чиқарилади.

— И-и, хўкиз сўяман! Керак бўса, бор мол-холимни сўйиб бўса-да, ис чиқараман!

— Хўрозам бўлади. Кон чиқса амал-да. Лекин отам тўкли сўйган.

— Йўқ, мен хўкиз сўяман! — Эрназар полвон кутилмаганда жуда рухланиб кетди. — Аммо кўнглимга чирок ёқдингиз. Ошна ошна экан-да. Бегона буйтиблар йўл топиб беролмасди. Кўргилик-да деб қўя коларди. Сиз эса... Э-э, яшанг, дўстим!

— Бошдан ўтганда, жўра, бошдан ўтган.

— Овқатингиз пишдими?

— Пишган-пишган.

Эрназар полвоннинг ҳаяжондан қизиган манглайига йирик ёмғир томчиси чарсиллаб тушди. Кейин яна ва яна...

— Ичкарига кирмасак бўмайди, — деди Файбулла чол. — Айтдим-ку ёмғир келади деб.

Эрназар полвон тўшамчани юмалоқлаб, кулба сари йўналди. Изидан қозонни кўтариб Файбулла чол йўргалиди.

\* \* \*

Улар суurvни Ҳайдарбулоқ томонга хайдаб чиқишганда, кун ёйилган, муздек ҳавода кеча тунда ёғиб ўтган ёмғирнинг ғамхуш ҳиди анқирди. Атроф тантарларли даражада фусункор, дара тубидаги жўшқин сойнинг шараклаб окиши асрий сокинликка сирли тароват бағишилар, киши ўзини кундалик ташвишлардан холи сезиб, сирли ва сеҳрли бу манзаранинг қатига сингиб кетгиси келарди.

Бирок ота-бала бу гўзалликни пайқашмас, ҳар қайси ўз ҳаёлида суurv ортидан имиллаб боришарди. Айниқса, Ўсарга малол келмоқда эди бу юриш. Тонгда уйғонаркан, бугун якшанба бўлгани боис, энди иккин-

чи ёнига ағдарилиб, кўзларини хузурланиб юмган хам эдики, ташқаридан муздек салқин ҳавони этакларига эргаштириб кирган аёли отаси чакираётганини айтди. Оҳ-х, минг зўр йигит бўлма, бундай отанинг боласи эмоқдан худонинг ўзи асрасин экан, отасини эшитибок у ўрнидан иргиб турганини билмай қолди. Ошикканидан ҳатто бўсафага ташлаб қўйилган пўстак парчасига кокилиб кетди. Ташқарига чиқиб, у отасини кир тумшуғида кўрди. Эрназар полвон бамисоли бургутдек пастга қадалиб туарди. У қўл-бетини йўл-йўлакай ювиб, ёлғизоёқ сўқмоқдан отаси ҳузурига шошилди.

Ота уни ўткир нигоҳ билан қаршилади.

— Йиғин, товни бир айланиб келамиз.

— Бир-икки ишлар бордай эди... — Ўсар тайсаллади.

Ота гапни қисқа қилди.

— Иш-пишингни йиғиштири!

Хўп демоқдан ўзга чораси йўклигини сезган Ўсар ноилож изига қайриларкан, ёндош ҳовлида ўзича минфирлаб юрган Мингиш чолга кўзи тушиб, унинг ўғилларига ҳаваси келди. Болалари чолнинг сўзини унча тинглашмайди. Шўрлик ўзича койиниб, ўзича куйиниб юраверади. Эрназар полвоннинг йўриғи эса бўлак — биргина қовоқ читишининг ўзиёқ юракни ларзага солади.

Болалигига шундай отаси борлигидан Ўсар кўп фахрланарди. Қачонки, вояга етиб, кўнгли тийиксиз эркинликларни қўмсай бошлагандан сўнггина отасининг залворли кудрати малол келадиган бўлиб қолди. Кейинчалик ушбу кудратнинг кўринмас тизгинини бўйнида хис этгани сайин ота салтанатига қарши юрагида исёнга ўхшаш қайсарлик туғила борди. Қайсарлик, ора-сира учқунланишини демаса, худди вулқондай қалбининг туб-тубида димиқиб ётарди.

Ўсар Мингиш чолга ҳавасланиб қараб ўтаркан, захрини аёлига сочди: «Чойингни тайёрла тезрок!» Бу унинг охирги нонуштаси эканини у ҳали билмасди. Шунингдек, отасининг йўқловидан мақсадни англаб турса-да, балки бошка бир нияти бордир, ҳар галгидек бирор бемаза юмушни топширас, деган умид хам йўқ эмасди.

Ота-бала отда қишлоқ юкорисидаги сурувга яқинлашгач, Ўсарнинг жини баттар куриши: «бир камим қўй бокиш қолувди энди!» Ҳақиқатан, сурувга эргашиш ёшидан аллақачон ўтган, сурувга асосан жиянлари қаарди. Фақат тонғдагина катта акаси ёки отаси нинг ўзи қўйларни ёйгани чиқар, қолган пайт бу юмуш йигитчалардан ортмасди. Бутун катта акаси чиқкан экан, уларни қўргач, таёғини белига кўндаланг қўйганча, аста пастга эниб кетди.

Эрназар полвон сурувга бежиз яқинлашмаганди. Йўлда Ўсар билан гаплашмоқдан қочиб, бу ишга тутинганди.

Ҳайдарбулук қишлоқдан хийла олисдаги овлок гўша эди. У ерга аввалига дара ёқалаб, сўнг Чўнгтепадан ошиб бориларди. Чўнгтепадан ўтилгач, ўнг томонда тоғ бағрига суқилиб кирган калта дара кўзга ташланади. Дара тўридаги булокдан бир тегирмон сув пишқириб чикади. Даранинг кунчикиш тарафи девордек тик бўлиб, қарши томони эса салгина ётиқ — ёғин-сочин кунлари тез-тез кўчки кўчиб турадиган қиялик эди. Қияликнинг айрим ерларидан тошлар озгина турткиданоқ пастга сувдек оқарди. Шу боисми, бу томонларга кадам босувчилар кам эди. Дара тубидаги сийрак арчали сайхонлиқдан қишгача ўт-ўлан аrimас, чўпонлар тили билан айтганда, қўй бокишга боп жой эди.

Йўл бўйи бир оғиз гаплашмаган ота-бала, сурув боши булок томонга бурилгач, танаси нима сабабдан-дир куйган тик ва баланд арча ёнида отдан тушдилар. Ота отини наридаги пастак бутага қантариб, устидан хуржунни олди. Эгар қошига осиғлиқ қўшофиз милтиқ жойида қолаверди. Отанинг одати шу — тоққа яроқсиз чикмайди. Хуржуни тубида ҳамиша арқон олиб юради. У бунга азалдан одатланган ва ҳар иккиси ҳам ҳайтида кўп бор иш берган.

Эрназар полвон хуржунни майса устига ташлаб, чоғроқ харсанг пойига чўқди. Ўсар миниб келган тўриққа хушсиз бокди. Синчков нигоҳи отнинг анча картайганини, бундан кейин уни оғир тоғ йўлларида миниш инсофдан эмаслигини пайқади. Назари ўз отига тушганда эса қалби беихтиёр ифтихор хиссига тўлди. Жониворнинг насли олмосдек соғ эди. Қайтармадаги

бир тўйда туркман оғайниси тортиқ қилганди уни. Ўша тўйда Эрназар полвон курашни бутунлай тарк этганди. Мағлуб бўлиб эмас, ракибининг ёшлиги таъсир этиб, бундан кейин бел тутиб юрмок ёшига унча тўғри келмаслигини тўсатдан фаҳмлаб қолиб, даврани тантанавор бир йўсинда тарк этганди. Ўшанда эл маҳзун тортиб, оғайниси эсадликка мана шу отни совфа қилганди. У пайтда бу гижинглаган тойчок эди.

Ўсар қошига келиб ўтирганда, отанинг нигоҳи куйган арчага кўчганди. Унинг майиб рафторидан ўзига ўхшашилк қидириб турганида, ўғли келиб хаёlinи бўлди. Лекин у йигитга алаҳсимади. Арчани диққат-ла кузатишда давом этди. Ўнг тиззаси устида ётган қамчи тутган қўли асабий тарзда енгил титради.

Ўсар бир отасига, бир унинг кўлидаги қамчига ўшшайиб бокаркан, ҳар эҳтимолга қарши ортга сурилиб ўтирди. У отанинг ниятини Чўнгтепага етмаёқ англаган, шу сабаб, ўлар хўкиз болтадан қайтмас қабилида унинг қархисига келиб чўқканди. Отасининг тергашу сўкишларини тезрок эшитса-ю, ҳаялламай кишлоққа қайта қолса.

Эрназар полвон энди унга ер тагидан жиддий тикиларкан, кеча жуда осондек туюлган юмушни адо этмоқ мушкуллигини фавқулодда идрок этди. Бўйи бўйингдан баланд, кучи кучингдан ортиқ барваста йигитни дабдурустдан арқонга чирмаш енгил эмасди. Бунинг учун қонни қиздирадиган бетизгин каҳр лозим эди. Ҳали бу бўй берадими-йўқми? У шундан ҳадикка тушди. Бўй бермаслигидан эмас, қаршилик кўрсатиш натижаси ўлароқ юзага келадиган ўз ғазабидан чўчий бошлади. Билади, разаблангудек бўлса, икки дунё бирнима қилиб қўйганини ўзиям сезмай колади.

У ўғлининг кўркам келбатини зимдан кузатаркан, юрагида ўша таниш жирканч хисни туйди: «Бу бегона уруғ қайси гўрдан менинг боғимга тушиб қолди, а?» Миясига туйқусдан келган бу ташбеҳдан яна унинг вужуди ёна бошлади. Бу не кўргулики, ёшинг бир жойга етганда, фарзандингни арчага чирмаб, Файбулла чол айтмишли, ичига кирган жинни кувлаб ўтиранг! Бундай боланинг боридан йўғи яхши эмасми?!

Табиий, у бу ёзғиришларни юзага чиқармади. Би-

пор қарорга келса, ортиқча ади-бади килишни жини севмасди. Дилидагини зуддорлик билан амалга оши-рарди-күярди. Ота шу ниятда олдидағи хуржунга қўл чўзиб, ундан арқонни олди. Негадир арқоннинг бир учини сиртмоқ килиб тугди. Тугунни текшира-текшири, ўғлига ўқрайиб қаради. Кўзларининг оқи қонталашиб, юзи қорамтири тус олди. Бу унинг ғазабга минаёт-ганидан дарак берарди.

Отанинг феълини билган йўсар унга ҳайиқиб қарди.

— Нима килаяпсиз, ота?

— Елкангдаги шайтонни хайдамоқчиман!

— Шайтон нима қилади менда, — йўсар елкасини кулгили тарзда учирди. — Ҳеч қанақа шайтон йўқ менда.

— Бор! — Эрназар полвон тишлари орасидан пиш-кирди. — Шайтон қонингда! Конингни оқизаман сен болани! Эмасам, авлодимга ўлат келтирасан! Ҳаром конингни силкитаман мен сени!

— Нима, мени осмокчимисиз?

— Қани эди! — Эрназар полвон, ғазаби кўпшиб, хансираркан, арқон тутган кўллари тиззаларига устига бир зумга шалвираб тушди-ю, тағин қайта жонланди. Ўнг қўли бармоклари арқон тугунини бемақсад тортилашга тушди: — Қани, энди, ит бўсанг-гу, шартта пешонангдан отиб ташласам!

Йўсар ота қўлидаги арқонга оғриниб бокаркан, юраги тубидаги исён жунбушга кела бошлаганини сезди. Тилига келган аччик-тизик гапларни ҳар сафаргидек ичига ютаркан, шу тобда ўзини сайхонликда ёйилиб юрган қўйлардан кўра ожиз ва баҳтсизроқ хис қилди. Бир оздан сўнг эса кўнглидан кечган бу ўйдан истихола килиб, оёқлари остига тикилди. Бирок бу алфозда ўтириш хавфли, отаси қўлига тушган нарса билан тўсатдан уриб колиши мумкин. У ҳушёр тортиб, тезгина бошини кўтарди. Кўзи яна отасининг ғазабкор афтиға тушиб, беихтиёр унга раҳми келди. Арзимаган нарсага бу қадар куйинишнинг нима кераги бор экан, а? Ахир одамлар не бир ишларни килиб, ҳеч нарса билмагандай, тинчгина юришибди-ку. Бу киши хаётида тўғриликдан бошқа ниманиям кўрибди. Шу келбат,

шу кўркамлик билан не бир ишлар килиши мумкин эди. Йўқ, бу кишига «лаззат» ёқмайди, хазар қиладилар. Э-э, кўнглимнинг кўчасидан! Айтишларига қараганда, шу қишлоқни деб бир пайтлар қамалиб хам чиккан экан. Тентак бўлмаса, шу ишни қиласмиди. Тўғри, қишлоқда обрўйи зўр, одамлар соясига салом беради. Лекин қуруқ обрўйдан нима фойда? Шахсан мен бундай обрўга тупурман! Бирор гўзалнинг бир кечалик оғушига тенгситмайман. Боз устига, обрўйим хам чакки эмас, шаҳарда бирор кимса йўлимни кесиб ўтолмайди. Истаган жононни бағримга тортишга курбим етади.

Ўсар бу куфр ўйларни отасига нисбатаң аччиқ ва кесатик тарзда хаёлидан ўтказмокда эди. Ўзи кўниккан ва йигит кишининг энг асосий фазилатларидан бири деб билган хушторликка отасининг бу қадар фожиали тус бериши тобора ғазабини тоширмоқда эди. Бу етмагандек, кўйиб берса, ота арконга боғлаб урадиган. Айни шу нарса йигитни зимдан қутуртиromoқда эди. Унинг назарида, ўзидек бир йигитга бу даражада муносабатда бўлиш бориб турган гумрохлик эди. У ўз қадр-қимматини жуда яхши биларди. Туман марказида кимсан — Алик шер бўлиб танилган обрўталаб бу йигитнинг мушугини бирор «пишт» деган мас. Обрўни акаларига ўхшаб кураш тушиб эмас, муштлашиб орттирган. Шаҳарнинг собиқ шефи Нортожи қизилни бир курдаёқ ер тишлатгандан сўнг, унинг таъбири билан айтганда, шаҳар қўлига ўтган.

Турган гап, бу ишлардан отанинг хабари йўқ. Унинг учун Ўсар этаги тугилган бола, кураш тушмаган йигитни йигит ҳисобламайди. Ўсар учун энг алам қиларлиси шунда эдики, ўзи унчалик назарига илмайдиган жувон билан номи бўлғаниб ўтирибди. Йигит аёлнинг бўйини хидлаб тўйган, энди сўлиган гулдек бир четга иткитмоқчи эди. Аммо иткитишга улгурмай, мана бу гап чиқиб турибди. Қизиқ, ким сотди экан? Ахир бу хил ишларни ими-жимида бажаарди-ку. Табиий, ким сотганини отаси ҳеч қачон айтмайди. Аслида энди бунга ҳожат йўқ. Эндиликда отанинг ғазабидан қутулмоқни ўйламоқ керак. Чоли тушмагур ҳаливери ховуридан тушадиганга ўхшамайди.

— Ота, кеча барини гаплашдик, — деди ботинмайроқ. — Яна нима истайсиз мендан?

— Кеча ҳеч нимани гаплашмадик.

— Гаплашдик-ку, ота, — Ўсар ҳокисорона жилмайишга уринди.

Ота сўз котмади. Кўз кирида унга ғазабли тикилганча, қўлидаги арқонни ўнглай бошлади.

— Гаплашгани шундан шунга бошлаб чиқиши шартмиди, ота, — Ўсар иддао қилган бўлиб, ёнидаги бута новдасини узуб олди.

— Нима, қизбетингни томоша қилгани опчиқишим керакмиди?!

Бу гапдан Ўсарнинг миясига қон тепти. «Қизбет» сўзи «хезалак» деган маънода қаттиқ таъсир этарди унга. Оқибатда, кўнгли тубида димиқиб ётган ғалаён тағин бош кўтара бошлади.

— Одамни ёш бола килманг, э! — деди чирсиллаб. — Истаганча тергайсиз, хақорат киласиз, нимаси бу!

— Собий номини булғама, харомхўр!

— Ота, сиз гуноҳ деб билган нарсани одамлар аллақачон гуноҳ деб билмай кўйган, — деди Ўсар юзини сидириб ташлаб. — Кавакда ётавериб, дунёдан бехабар колгансиз. Ўзингиздек, фикрларингиз ҳам эс-кирган. Ҳар нарсадан фожиа ясамай, бундай теваракка қаранг, одамлар қандай яшаяпти.

— Одамларни қўй, ўзингдан гапир, — Ота унинг тили чиқиб қолганидан таажжубда эса-да, ўзини босди. — Агар бола бўганингда, буйтиблар обрўйингни сақлаб ўтирасдим. Ҳовлидаёқ иштонингни тушириб, қамчининг остига олардим.

— Халиям катта ўринида кўраётганингиз йўқ, — деди Ўсар. — Салга калтакка ёпишасиз. Ахир биз сизнингча яшолмаймиз-ку. Ҳаммада ҳам орзу-ҳавас деган нарса бор.

— Зино — орзу эмас, гуноҳ!

— Сизнингча шундай, лекин одамлар бундан баттарини қилиб юришибди...

— Сен ўзингдан гапир, куйдирги! — Ота оғир бўлишга тиришди. — Нега одамларнинг ортига бекинасан! Ҳар ким ўзи учун жавоб беради! Эрта бир кун

бировнинг гўрига бориб ётмайсан-ку! Ўз гўрингга эга бўл! Тағин чикирлаб тилингни бермайсан!

— Чикирлаб нима деяпман, ота, — Ўсар бошини эгди. — Бўлари гапни айтдим, холос.

— Бўлар гап шу, гуноҳ қилдингми, бошингни тутиб бер! — Эрназар полвон ўзи сезмаган ҳолда сал олға силжиди. — Сен туфайли эртан бир гала кони бузук Ҷевараларга бово бўлишни истамайман! Яхшиси, мева берадиган ўша шохимни ё кесиб ташлайман, ё одам сонига кўшаман сени! Аммо тилинг анча бийронлашиб копти.

— Боссангиз курбақаям «воқ» дейди, — Ўсар яна исёнга бўйсиниб, тилига эрк бера бошлади. — Шу қишлоқдан кўчиб-кетсан, кутуламанми сиздан?

— Йўқ, конингни тозаламай туриб, хеч каерга қочиб кутулолмайсан!

— Уф-ф, яна «кон», — Ўсарнинг жини баттар куришди. — Ота, сизга нима бўлган ўзи, а? «Кон» деб на итларга кун берасиз, на одамга раҳм қиласиз. Биргина сизнинг ҳаракатингиз билан тирик жон тузалиб колмайди-ку ахир.

— Лекин сени тузатаман! — Эрназар полвон ички бир ҳезланиш билан унга тик қаради. — Шунинг ўзи бас менга.

— Отамсиз, иззатингизни қиласан, — Ўсарнинг кўркам чехраси важоҳатли тус олди. — Аммо эркимга чанг солишингизга, кечирасизу, йўл қўялмайман. Мустақил одамман мен. Акаларимга ўхшаб чизган чизингиздан юролмайман. Очик гапдан хафа бўлманг, ота. Бу гап анчадан бери дилимда эди-ю, хеч айттолмасдим. Мана бугун мавриди келди... айтаяпман.

— Ҳам фарлик, ҳам пешгирилк дегин?

— Нима деб тушунсангиз тушунаверинг.

Ота жим қолди. Бироқ бу яхшиликдан дарак бермасди. Қаҳрнинг навбатдаги хуружи олдидан юзага келадиган бир сониялик сокинлик-гангиш эди, холос. Иккинчидан, унинг назарида, бу нарса бориб турган гумроҳлик — ўғли на қилмишидан изза чекарди, на насл тозалиги ҳакида қайfurарди. Ўзи бўғзигача ботган ботқоққа боши билан шўнғимоқчи эди.

Кўнглидагини очик айтиб, отани довдиратдим, деб

ўйлаган ўғилнинг бошида бошқа фикр кечарди: «Қа-  
чонгача тизгинда яшаймиз? Ҳар нарсаниям чеки-чега-  
раси бор. Етар энди. Бобой кўхнарган одам, фикриям,  
яашаш тарзиям эскирган. У кишига ўхшаб аҳмоқона  
эътиқоднинг этагини тутиб яшаёлмайман. Ахир дунё-  
да кўнгил хохиши деган нарсалар бор...» У шу каби  
қайсарона ўйларни хаёлидан ўтказаркан, эртанги бир  
учрашув дафъатан эсига тушиб, юраги ҳаприқди. Юзига  
тепчиган табассумни иягини сийпалаш билан яширган  
бўлди. Бу хил ишқий лаҳзалар унинг учун шунчаки  
лаззатгина эмас, балки тириклик манбаи эди. Бунақа  
кезларда у, том маънода, яшар ва яшнар, шунчаки  
умргузоронлик қилиш унинг табиатига ёт эди. Ишқий  
саргузаштларсиз ҳаёт тўхтаб қолгандек туюларди. Бун-  
дай пайтда, киши нима учун яшайди ўзи, дея чукур  
сукутга ботар, нигоҳига ланжлик иниб; кўли ишга  
бормай қоларди. Ана шунда у завқни аёллардан топар-  
ди. Кўркам келбати-ю, бежирим қиёфаси аёлларга  
ёқишини билиб, табиатнинг бу инъомидан унумли  
фойдаланар, оғизда мухаббатдан лоф урса-да, юрагида  
бу туйғудан заррача йўқ эди. Лекин у буни қусур  
санамасди. Ҳаёт зайлига караб тирикчилик қиласидан  
кишилар тоифасидан бўлиб, фарқи -- мақсадсиз умри-  
ни ишқий воқеалар билан безай биларди.

— Елкангга шайтоннинг зўри миниб олибди, —  
деди унинг юзидағи табассумни илғаб қолган Эрназар  
полвон, ортиқча қаҳрга эрк бермай. — Бикинингдан  
шайтон китиқлаб турганидан кейин отанинг гапини  
корлармидинг.

Отанинг гап оҳангини, паст тушиш, деб англаған  
Ўсар гуноҳкорона бош эгган бўлди.

— Сўз бераман, бошқа бўлмайди, ота!

Эрназар полвон индамай ўрнидан кўзғалди. Арқон-  
ни ўнг кўлига тутиб, ўғлининг тепасига борди.

Ўсар сакраб турди.

— Нима қилмоқчисиз, ота?

— Этингни бурдалайман! — деди Эрназар полвон  
бўғиқ товушда. — Ичингдаги шайтонни ҳайдайман!

— Нима, мен сизга отмидим, бўйнимга сиртмок  
соласиз, — Ўсар кетига тисарилди. — Ўзингизни  
босинг, ота!

— Одам-ку одам, — деди ота бамайлихотир, — ҳатто от ҳам бузукликни кечиролмайди. Миниб келган мана шу отинг бошқа уюрга илакишиб қайтган байтални тепкилаб ташлаганини биласанми? Агар аралашмасам, байтални ўлдиради. Барибир корнидаги боласини тушурмай қўймади. Эсингдами шу?

— У бир хайвон-да, ота.

— Ҳайвонки чидаёлмабди, мен қандай токат килай, а?! — Эрназар полвон унинг бўйнига сиртмоқ ташлади. — Етти суягимни қакшатдинг-ку, ярамас!

— Етар, э! — Ўсар бўйнидаги сиртмоқни осонгина иткитиб ташлади. — Индамаган сайин... нимаси бу?

— Ўрлик қилма, бола! — ғазабдан отанинг кўзлари олайиб, бурун катаклари кенгайиб кетди. — Ёмон иш қип қўяман хозир!

Ўсар қайта ташланган арқонга енгилгина чап бераркан, юраги тубидаги исён тўла бош кўтарганини сезди. Ўзини босишга қурби етмай, сандалдай тошдан сакраб ўтди-да, еб қўйгудек бир важоҳатда отасига ўкрайди.

— Бас қилинг деяпман!

— Ҳали отангга гап қайтараяпсанми! — Эрназар полвон тошни айланиб ўтиб, учинчи бор сиртмоқ ташлади. — Мен сенга пешгириликни кўрсатиб қўяман! Агар уялмасанг қоч! Ахир сен қочишга устасан-ку! Чотига сўна ёпишган танадай шаталоқ отмайсанми? Қоч!

Ўсар қочмади. Кўзлари конга тўлганча, елкаси араш тушган сиртмоқ тугунидан маҳкам тутиб, отанинг яқинлашувига изн берди. Салдан сўнг улар бир-бирларининг кўллариidan тутганча юзма-юз туриб қолишиди. Иккиси ҳам бир-бирларининг кучини ўз вужудларида хис этаркан, ўғил отанинг хийла кексарганини, ота эса ўзи унчалик ёқтирилмайдиган ўғлиниң кучи ўзи ўйлагандан кўра бисёрлигини англади. Бироқ бу ғарса отани тарикча қувонтирмади. Қайтага баттар қаҳрини кўзитди.

— Отага қаршилик қиласяпман дегин?! — деди ҳансираф, ўз навбати-да, этни жунжиктирадиган даражада хотиржамлик билан. — Ҳаром кучинг ошиб қопти, сен болани!

- Ўзингиз мажбурлайпсиз, ота! — Ўсар уни ўрнидан қўзғотмай кўйди. — Етар шунча хўрганингиз!
- Кўлни кўйвор!
- Йўк!
- Кўйвор деяпман!
- Шаштингиздан тушсангиз.

Ўсар гапини тугатишга ултурмай, ота берган чилдан гурсиллаб йикилиб тушки. Куч амал қархисида ожиз колганди. Аммо барибир ёшлиқ эпчиллик қилди. У сиртмокдан халос бўлиш билан биргаликда, бир юмалаб яна оёққа қалқиди. Ота сирмаган аркон бутага илашиб қолди.

Ўсар кетига чекина бораркан, кўллари беихтиёр мушт бўлиб туғилди.

— Соламан лекин, ота! — дея ҳайкирди. — Яқинлаша кўрманг! Яқинлашманг деяпман!

Эрназар полвон қархисида важохати ўта хунук, ўта даҳшатли кимсани кўрди. У ғазабдан қалтираб, ейман, деб турарди. Ота, шу менинг улимми, дея бир зум хайратланди ва шу хайрат оғушида ўғлиниг лабларидан учган сўзни илғашга улгурди.

— Нима?! — деди кўлидаги арконни бир четга улоқтириб. — Соламан дедингми? Ҳали сен отага қўл кўтармоқчимисан? Қани, бу ёққа ўт!

Ота ёшига номуносиб бир чапдастлик билан ўғлига ташланди-да, ёқасидан маҳкам тутиб, шуурига михланган максад измига бўйсинганча, уни куйган арча сари сургай бошлади.

Ўсар бу гал ота қўлига ёпишмади-ю, лекин мушт туширишдан ўзини базур тийиб, оёқ тираб туриб олди. Унга чори келмаслигини сезган Эрназар полвон қараб ўтирмади, тиззасига бир тепиб йикитди-да, судрай кетди. Ўсар аркончувалиб ётган жойгача итоат этиб келди-да, сўнг бир юлқуниб иргиб ўрнидан турди. Отанинг тер босган афтига чексиз ғазаб ва нафрят билан тикилиб, нимадир деб бакирди. Кейин бот ташланган Эрназар полвонни итариб ташлади. Урадиган-дек ҳавода мушт ўйнатди. Йигит бу ишларни ёввойи бир истак оғушида адо этаркан, мушт туширмоқдан аранг тийилмокда эди. Аламидан нафаси бўғилиб, кўйинг, кўйинг деяпман, дея овозига зўр бермоқда эди.

Овозига зўр бергани сайин ниманидир уриб, парчалаб ташлагиси келарди. Ҳаётда бу қадар жиддий қаршиликка дуч келмаган Эрназар полвон ундан баттар кутурмокда эди. Ўғлини арчага чирмамаса, гёй бу дунёга ўт тушадигандек, яккаш ушбу мақсад йўналишида уринар, бунга сари Ўсар бўкирар, аммо ота унинг овозини эшитмас, фазабдан бурушган башараси-нигина қўрарди, холос.

У ўғлини силтаб тортаркан, кутилмагандан лунжига келиб тушган зарбдан кўз олди коронгилашиб, гандираклаб кетди. Ё алхазар, фарзанд отага қўл кўтармокда! У ўзига келиб, Ўсарни гарангсиган ҳолда қўрди.

— Ота, кечиринг! — дерди у. — Урмокчи эмасдим. Қўлим кетиб қолди. Ўзингиз мажбур қилдингиз шунга. Кечиринг!

Бирок ота унинг ёзғиришларини эшитмади. Эшитадиган ахволда эмасди у. Унинг учун тириклик маъносини йўқотиб, дунё ёниб кул бўлиб бўлганди. Эрназар полвон ғайришуурый бир ҳолатда Ўсарнинг устига бостириб бора бошлади. Йигит гоҳ унинг қонга белланган лаби-лунжига, гоҳ ваҳшат тўла кўзларига боқаркан, аввал ўлмасам ҳам, энди ўлдим, деб ўйлади. Бояги кутуришларидан асар ҳам қолмай, жони кўзига ширин қўриниб кетди. Қачонки, киши қўрқса, унинг шуури шиддат билан ишлай бошлайди. Ҳозир ҳам шундай бўлди. Ўсар беихтиёр қочаркан, сайхонликда отаси отда бирпасда қувиб етишини англаб, йўлни бетга солди. Йирик-ирик харсанглар оралаб, юқорига ўрлай бошлади. У давон ошибб, қишлоққа олиб борадиган сўқмокқа тушиб олмокчи эди.

— Тўхта!

Шу хитоб мобайнода Эрназар полвоннинг қулоқлари очилди. Күшларнинг сайрашини, отларнинг куртиллаб ўт чайнашини, сувнинг шалдираб оқишини, кўй-кўзиларнинг сасини, Ўсарнинг қадам товушларини эшитди.

— Тўхта деяпман!

Ўсар тўхтамади. Бу нарса хаёлида ҳам йўқ эди. Ота буни сезиб, от сари илдамлади. Эгар қошидан милтикни олиб, уни тезгина ўқлади. Тўхта, дея осмонга бир

ўк бўшатди. Ўсар ялт этиб бир қаради-да, юқорига тирмашишда давом этди.

— Тўхта, окладар! Йўқса, отаман!

Эрназар полвон милтиқ милини қочокқа тўғрилади. Милтиқ мили устидан ўғлиниг яғрини ва думбасини аниқ кўрди. Бармоғи тепкини босаркан, сўнгги лахзада милтиқ милини четга буриб юборди. Ўқ чийиллаб, чапдаги қизғиш харсанг биқини чангигб кетди. Ўсар бир лахза ерга калишиб, сўнг яна қоча бошлади.

Эрназар полвон милтиқни қайта ўқларкан, ғалати гулдиракни эшитиб, бошини кўтарди. Ўғлиниг тепасида ҳўмрайиб турган баланд қоя пойидаги харсангтошлар уюми қўзғолиб, йигитнинг устига бостириб келмоқда эди. Кўчки милтиқ овозидан қўзғолганди. Ота даҳшатдан бир зум қотиб қолди-да, сўнг бор овозда бақирди.

— Чапга ўт, чапга!

Кўчкини Ўсар сал кечроқ пайқади. Пайқаши баробар у ҳам бирпастга ўзини йўқотиб кўйди. Кейин вахима оғушида аввал ўнгга, сўнг чапга ҳаракатланди. Орада бир қокилиб ҳам тушди. Кўчки эса дара ичини шовқинга тўлдириб, тобора қуяига интилар, шу шиддати билан жамики нарсани ер юзидан супуриб ташлайдигандек эди.

Эрназар полвон энг олдинда мисоли коптоқдай сакраб келаётган калладай-калладай тошлардан бири ўғлини уриб йиқитганини аниқ кўрди. Ундан кейинги чорроқ харсанг белидан босиб, янчиб ўтганини ҳам илғади. Салдан сўнг Ўсар тошлар оқими орасида бутунлай кўздан йўқолди. Ота жонҳолатда бўкириб юборди.

— Ули-им!

Кўчки Эрназар полвон томон селдай эниб келарди. Аммо ота ажал даҳшатини ҳис этмади. Милтирини қия тутганча ўлимга тик қараб тураверди. У билан ёнбағирлик орасида анчагина сайхонлик ястанган. Кўчкининг кучи сайхонликнинг ярмисигача етди. Отанинг ёнига яккам-дўйкам тошларгина етиб келди. Отнинг калласидек беўхшов бир тош ҳатто унинг ўнг оёғини сийлаб ўтди. Шунда ҳам у чекинмади. Бақираиб тураверди.

У кўчки шовқини тингачгина ўзига келди. Қўлида-

ти милтиқни ерга ташлаб, олға чопди. Тошлар оралаб ўрмаларкан, нафаси бўғзига тикилиб, ўғлини йўқларди.

— Улим! Улим!

Ўсар хеч қаерда кўринмас, кўчки уни ўз бағрига маҳкам яширганди. Эрназар полвон дуч келган тошга ёпишиб, бирини четга итқитиб, бирини юмалатиб, бекорга қидиринишда давом этаркан, нукул «улим»ларди.

У кучоққа сифмас харсангга човут солиб, унга чоги етмаслигини сезгачкина хаёли жойига келди. Ҳаракати фойдасизлигини англади. Тақдирига тан бергандек бир алфозда тошлар уюмига маъюс термилиб қолди: «Одамларга хабар бериш керак», дея гудранди. Гёё тезрок хабар етказса, ўғли тирилиб қоладигандай пастга ошиқди. Отга сакраб миниб, улов бошини қишлоқ томон бурган жойидагина, эс-хушини бутунлай жиловлай олди. Отини секинлата-секинлата, ўгирилиб кўчкига, шовқиндан чўчиб, арчазорда ғуж бўлиб турган сурувга, қозиги атрофида айланётган кекса отга, бағри куйган арчага бир-бир боқиб, аста йўлга тушди.

\* \* \*

У ярим йўлда Сами чўлоққа дуч келди. Сами чўлок Чўнгтепа этагига зигир эккан, ҳар куни ўша ерга катнарди. Эрназар полвоннинг туркини кўриб, у жуда кўркиб кетди. Овози қалтираб, шоша-пиша салом берди. Аммо саломи аликсиз қолди. Ўғлининг ўлимига у сабабчидай, Эрназар полвон унга адоваратли тикилиб турарди. Ҳакиқатан, у шу ўйда эди. Аммо майдаликдан холи эмасми, бу даъвоси тентаклик эканини тезда фаҳмлаб, хезланишдан ўзини тийди. Йўл торлиги туфайли отини сал четлатаркан, тағин бирдан ажинаси отланди: «Ахир буям яшашга нолойик-ку!..» Шу ўй бошига келиши билан Сами чўлоқнинг устига от кўйди. Уни улокдай илиб олиб, отини нуқиди. Улокка ўрганган отнинг қони жўшди. Сами чўлоқни улок гумон килиб, зафт ила олға интилди. Факат «улөғ»и тушмагур анча залворли, боз устига, жуда бакирок экан, додлаб оламни бузмокда эди. Умри бино бўлиб бу хил

бейшов «улок»ни кўрмаган отнинг қаҳри кўзиди. Уни тишлаб, тепкилаб ташлагиси келди. Аммо изми эгасида — унинг иродасига бўйсингмоқдан ўзга иложи йўқ эди.

Бу дунёни ғаламислардан тозалашга катъий аҳд қилгандек, юзини шамолга тутиб, от устида адл елиб бораётган Эрназар полвон бирор муддатдан сўнггина «улок»ка кўз қирини ташлади. Уни ўта аянчли бир ҳолатда кўрди. Ҳали шуни ғаним санаб, ўзимга тенгситдимми, дея ичида ғижинди. Шу ғижиниша «улок»ни ташлаб юборди. Сами чўлоч йўл бўйида думалаганча қолаверди.

Эрназар полвон шу кетишида, дўнгга етгандагина тизгинни тортди. Куйида ястанган қишлоғига агадсиз бир ғам билан разм солди. Ўткир нигоҳини ховли юзида урчук йигираётган аёлига, эндиғина қурила бошлиған ўрмак атрофида ўймалашаётган келинларига, бетда эшаккўпкари ўйнашаётган невараларига, Ўсардан кейинги ўғлига атаб солинган иморат томини ёпаётган ўғиллари ва қўшни йигитларга бир-бир тикаркан, оғир хўрсинди. Кейин унинг кўзлари келинлари орасидан Ўсарнинг аёлинни қидириб топди-да, жувонга узоқ гуноҳкор ҳис этди. Ҳозир бориши билан ховлида не қиёмат қўпишини ўйлаб, юрагида чексиз оғриқ сезди. Ушбу дакиқани ортга суриш илинжида, ғайришуурӣ бир ҳолат оғушида отдан тушди. Бориб тошга қоя янглиғ чўкди. Ҳовлисига қарамасликка уринди. Аммо боши ўз-ўзидан кўтарилиб, яна келинини қидириб топди. Нега энди айнан унга ачинмокда? Ахир Ўсар уларнинг хеч қайсига бегона эмас-ку. Шунда у бошига тушган мусибатнинг залворини яна-да теранроқ ҳис этди. Томоғига нимадир келиб тақалди. Нафас олиши тобора оғирлашиб тикилма бўғзига томон силжий бошлиди. Бу ҳолат кўзларида ёш пайдо бўлмагунча давом этди. Тикилма бўшашиб, кўзёшлари мўйловига сизиб, ундан кўксига тома бошлади.

У ўғлига ичида аза очаркан, яккаш, нима қип қўйдим, деб куйинарди. Энди кўз ўнгига ўғли бегуноҳ бир киёфа касб этган. Ҳовли юзида сал бодиланиб юришлари, бошини бир ён буриб, қишига эрмакловчи табас-

сум билан бокишлари, жаҳлланганда кўркам чехраси-  
нинг важоҳатли бир тусда оқаришлари, салга хоҳолаб  
кулишлари кўзига жуда азиз кўриниб, юрагини ўрта-  
мокда эди. Ўн-үн беш дақиқа бурун у шундай кулмоғи,  
лаблари четини киноямуз қимтиб, табассум қилмоғи  
мумкин эди. Энди эса у йўқ. Энди у хеч қачон кулмай-  
ди, ота кўзини шамғалат қилиб, бирор шумликка кўл  
хам урмайди. Отанинг кўзига хокисор, ўз навбатида,  
рида мәфъелини ўзида зоҳир этмиш лаблари буржидаги  
тагин ўғлассумини яшириб боколмайди.

рини фирчани ўйларкан, отанинг бағри ўпирилиб туш-  
арди. Гўданди. Юраги сиркираб, кўз олдини қоплай-  
килаб ўйнагақиши туман орасидан Ўсарнинг гўдак қиёфа-  
тумоқларкиб чиқди. Бола касалванд эди. Курама  
тўшакда чўзилиб ётганича жажжи кўлчаларини унга  
чўзарди. Отаси қўлига олиб, бағрига босиши билан  
жисмини қийнаётган дарддан фориғ топадигандек, со-  
финчли ва илтижоли бир гувраниш билан отага талпи-  
нарди. Ўшанда ота уни бағрига олиб, тишга чиқкан.  
Тоғларга жавдираб, худодан мадад сўраган. Бу Эрна-  
зар полвоннинг илк ёзириши эди. Измидан ташқари-  
да юз берган ташвиш каршисида бутунлай довдираб  
қолганди. Бунгача у ўзини бир коядай хис этарди.  
Ундаги бу ишонч ўғилларининг сони ортган сайин  
кучайиб борарди. Гап шундаки, биринчи ўғли туғил-  
ганда, ўзини девдай хис килганди. Иккинчиси пайдо  
бўлгани-да, ўзини тоғлардан юксак сезган. Ўсар дунё-  
га келганда эса, бу дунёга сифмай қолганди. Кетма-кет  
уч ўғил. Ҳазил гап эмас! Эндиликда Эрназар полвон-  
нинг насли дунё тургунча давом этади. Бағридаги мур-  
рак гўдак ўша таянч, ўша умидлардан бири эди. Мана  
энди, у ота пинжидан паноҳ қидирмокда...

Ўшанда Эрназар полвон йиғламаганди. Ёзириб ил-  
тижо килгану, лекин мижжаларини ўшламаганди. Энди  
эса, ўша ҳолатни тасаввурида қайта жонлантириб, кўз  
ёшини тиёлмай гаранг эди. Ҳар ҳолда у пайтда умид  
бор эди. Эндиликда у йўқ -- ўғли унинг кўз ўнгидаги  
ҳалок бўлди. Ҳатто у кичқиришгаям улгуролмади.

Ота, боши қуий эгилган, хик-хик йиғларкан, улкан  
қўллари худди гўдакни қучмоқчидай беихтиёр хара-  
катланарди-да, яна тиззалари устига шилқ этиб тушар-

ди. Бу харакат дам-бадам тақрорланиб туради. Охири у тиззаларига таяниб йиглай бошлади. Илиқ кўкламда тепадаги қор эриб, коя бетини ювгандай, кўз ёшлари юзидан шошқатор оқиб, кўллари, тиззалари устига тўкилмокда эди.

У ич-ичидан эзилиб бўзлагани сайин, хотиралар гирдобига тобора шўнғиб борар, яъники, ўзи сезмаган холда ушбу гирдабнинг чир айланмиш уюрмаси ўтасида жилоланиб турган гўдакнинг масъум нигоҳи мон интилмокда эди. Аммо кўп ўтмай даҳшулок»— уюрма гўдак сиймосини бутунлай ютиб ҳамалаган юзага келган қоп-кора бўшлиқ ўрнида ёък гитнинг ваҳший қиёфаси пайдо бўлди. Оғандагина кучли оғриқ сезгандай, бир сесканиб тўй ададсиз қаддини ростлади. Қалбида авайлаб-асраб келаётган чўнг эътиқодига нисбатан иккиланиш пайдо бўлди: «Тўғри яшадимми мен? Нимани талаб қилдим мен улимдан? Ундан баттарлар ҳам яшаб юрибди-ку». Шу ўй бошига келиши билан унинг кўз ўнгидан ўзи умри давомида учратган турли хил башаралар жиртак отиб, сизиб ўтаверди. Бунга сари отанинг мияси карахтлашиб, кенг майдонда ўзини — Эрназар полвонни танҳо кўрди. Чор-атроф бўшлиқ. Қархисидаги тепаликда ўзининг ёлғиз кулбаси. Кулбаси ғалати ерда — тик жарликнинг лабида жойлашган. Пастлик одамсимон илону чаёнларга тўла-эди. Кўпи таниш. Қизик, уларни каерда кўрган экан? Э, ха, ановусини қамокда учратган, мановуси қайнисинглисига кўз олайтирган Эшна чала-ку...вой-бўй, кўпчилик экан-ку булар. Махлуклар жар тубида фужрон ўйнаб, юқорига — кулбаси томонга интиларди. Кулбадан нариси ям-яшил яйлов— осойишталик маскани эди. Кулбаси ўша томонга оғиброқ туради. Сал химоядан яйлов ўртасигача тўкилмай-сочилмай борадигандек эди. Аммо тепага чиқмоқ ва уни нарига жилдирмоқ учун юқорига ўрлаган оғир сўқмоқни босиб ўтмоғи лозим эди. Чамаси, бу умр йўли эди. Эрназар полвон ўзини сўқмоқ ўртасида, салдан сўнг янада юқорироқда кўрди. Бу ердан кулбаси-ю, махлуклар фужрон ўйнаётган жар туби барала кўзга ташланиб туради. Бир маҳал кулбадан ўша махлукларга жуда ўхшаш яна бир жонзод соядай сир-

Галиб чикди-да, хеч тап тортмай қуйига сакради. Охирги дақиқада унинг қиёфаси Ўсарга ўхшашлигини илғаб, ота «их»лаб юборди. Чакирмокчи бўлди. Кейин кўрдики, Ўсар жар тубида маҳлуқлар билан бемалол каймоклашиб юрибди.

Эрназар полвон уйкудан уйғонгандай бир сапчиб тушди. Туман қайта қоплай бошлаган кўзларига кафтини босиб, Ўсарнинг ўша мурғак қиёфасини тасаввурда қайта жонлантирмоқ истади. Аммо кўз олдида тагин ўғлининг разабнок турқи пайдо бўлди. Утишларини фирчиллатиб, қўрқинчли суръатда ўқрайиб турарди. Гўдаклигига бўйнидан кучган, мўйловидан торткилаб ўйнаган бармоклари мушт бўлиб тугилган, отани урмокдан ўзини зўр-базўр тийиб турарди.

Ота ёвузлашган бу башарани кувмок бўлиб, бошини илкис чайқади. Теваракка аста кўз солди. Кишлори-ю, одамларни кўрди. Қуёш ўша-ўша мўл-кўл нур сочар, оппоқ бир булут кунботишдаги қоя бағрига соя ташлаб, охиста сузиб борар, неваралари аллақачон эшаккўпкарини тугаллаб, ҳовли сахнида чопкилашиб юришар, аёллар негадир ўрмак тепасида руж бўлиб туришар, кампири эса, бир қўлида урчук, иккинчи қўли билан белини тутганича улар бошида тик қотган, чамаси келинларига ниманидир уқтирмоқда эди. Ана, Ўсарнинг қайлиги ўрнидан дик сакраб, наридан калава олиб келди-да, яна хотинлар тўпига коришиб кетди. Эрназар полвон аёллар орасидан уни қидириб ўтиради. Шунингдек, унинг олдида ўзини гуноҳкор ҳам хис этмади. Худди синовдан ўтаолмаган итларини совукконлик билан отиб ташлагандек, юрагида ачиниш туймагандай, ўғлининг фожиасига нисбатан қалбида туйкусдан муздек совуклик уйғонганини сезди. Бу совуклик аста-секин бутун вужуди бўйлаб тараларкан, охироқибат, муштдеккина кампиригагина ичи ачиётганини англаб етди. Шўрлик аёли бу мусибатни кўтара олармиカン?

У отини етаклаб, ўта қайгули ҳолатда кишлокка эна бошлади.

## **МУНДАРИЖА**

### *Ҳикоялар*

Қўшиқ . . . . .	15
Ҳамият . . . . .	19
Тепалик . . . . .	23
Шим ёхуд хотинлар жанжали . . . . .	29
Қувончли кун . . . . .	31
Тугатилмаган сурат . . . . .	31
Қиз ўғирлаш . . . . .	32
Олим ўғил . . . . .	35
Орият . . . . .	35

### *Қиссалар*

Бекатдаги оқ уйча . . . . .	131
Чангалзор ити . . . . .	234
Коялар хам йиглайди . . . . .	237